

NICOLAS DE BAYE

Journal

Texte établi par A. Tuetey

(Paris, Renouard, 1885)

Date de composition : 1400-1417 ; **Date du manuscrit** : 1400-1417 ;
Dialecte de l'auteur : non défini ; **Domaine** : juridique ; **Genre** :
journal

Transcription électronique
Base de français médiéval, <http://txm.bfm-corpus.org>
Identifiant du texte : baye1
Équipe diachronie et bases textuelles d'ancien et moyen français - ENS de
Lyon / UMR 5191 ICAR
Céline Guillot (Direction du projet)



Cette transcription est mise à disposition selon les termes de la [Licence Creative Commons Attribution - Pas d'Utilisation Commerciale - Partage dans les Mêmes Conditions 3.0 France](#).

Comment citer ce texte : Nicolas de Baye, *Journal*, édité par A. Tuetey, Paris, Renouard, 1885.

Publié en ligne par la Base de français médiéval, <http://catalog.bfm-corpus.org/baye1>. Dernière révision le 2005-03-30.

1400.

Vendredi, **XIXe** jour de novembre.

Ce jour, a esté faicte eleccion de graphier, et est venu le sort sur moy N. de Baye, indigne.

Mercredi, premier jour de decembre.

Aujourdui, maistre Jehan Chanteprime, conseiller du Roy, a cogneu et confessé devant maistre Jehan Garitel, commissaire donné avec maistre Pierre Drouart, conseiller du Roy, entre maistre Loiz Blanchet, secretaire du Roy, d'une part, et Jehanne la Gencianne, d'autre part, que de la somme de **III^m** frans, de quoy avoit esté parlé, que ledit maistre Loiz estoit obligiez en la dicte somme de **III^m** escus envers ledit Chanteprime, ycely maistre Loiz ne lui doit aucune chose, ne n'est aucunement obligiez ledit Loiz envers lui d'ycelle somme dessus dicte.

Samedi, **III^e** jour de decembre.

Ce jour, maistre Jehan Chanteprime dit et confessa

que des trois mil escus, de quoy est cy dessus mercredy derrain passé touché, se maistre Loyz y estoit ou eust esté obligiez envers ycely maistre Jehan, ledit maistre Jehan me dit que onques n'en avoit baillié denier ne onques n'avoit veu l'obligation, s'aucunne avoit fait ou fait faire ledit maistre Loiz, et ce à la requeste de maistre Oudart Gencian ay enregistré, outre ce que je enregistray ledit mercredy passé.

1401.

Lundi, **XXVe** jour d'avril.

Precedentia a mense novembris ultimo preterito registrata fuerunt per me N. de Baye, grapharium, in papiro, propter novitatem stili mei in officio, grossata per J. Hutini, clericum meum, sequentia vero manu propria propter adequalem assiduitatem exercicii./

Mercredi, **IIIJe** jour de may, au Conseil.

Aujourd'hui, maistre Symon de Nanterre, conseiller du Roy nostre sire, a dit à la Court que monsr le Chancelier l'avoit envoié à la Court dire que les maistres des Requestes de l'Ostel du Roy nostre sire dessusdit se deportoient et delaissoient du procès pendent en la Court devant dicte entre eulz, d'une

part, et maistre Gile le Juesne, d'autre part, et ce m'a esté enjoint que je enregistrasse.

Vendredi, **XXIII**Je jour de juin, feste saint Jehan Baptiste.

Ce jour, j'eü les bourses et gages de l'audience par la mort maistre J. Bertaut, lesquelles furent et sont annexées à l'office de graphier et de nouvel.

Mardi, **XI**Je jour de juillet.

Aujourdui, la Court m'a enjoint que je enregistrasse la cedule que me bailleroit maistre Jehan de Cessieres, dont la teneur s'ensuit:

Jehan de Cessieres, notaire du Roy nostre sire et graphier criminel de Parlement, dit que ou moiz de may, l'an mil **CCC**

IIIxx et **X**, certain arrest fut prononcé en Parlement par la

bouche de feu maistre Symon Fryson, lors president en Parlement,

pour le procureur de monsr le Dauphin de Viennoiz et le

marchiz de Saluce à l'encontre du conte de Savoye, et lors maistre Jehan Jouvence estoit graphier dudit Parlement, lequel avoit le registre et procès dudit arrest. Et avint que ou moiz de juillet ensuivant ou environ, ledit Jouvence ala de vie à trespasement.

Dit outre que quant le Parlement ensuivant fu encommencé, le procureur et les gens dudit marchiz firent grant poursuite en Parlement, afin qu'il eussent ledit arrest, et pour ce que les rapporteurs ne voudrent pas prendre la peine de faire ledit arrest, qui est grant et laborieux, la Court ordonna que ledit arrest seroit fait par ledit de Cessieres, auquel furent baillées les besoignes pour ce necessaires, lequel de Cessieres fit la minute dudit arrest et la bailla à veoir à aucuns seigneurs dudit Parlement. Et ce fait, à un matin, ledit maistre Symon prist avecques lui plusieurs de messieurs dudit Parlement, lesquelz furent assemblez en la Tournelle Criminelle, et illecques fut leu et corrigié ledit arrest par grant deliberacion, et y entendirent nosdiz seigneurs jucques à tant qu'il fut heure d'eulz partir; et faisoient les gens dudit marchiz grant et aspre diligence en la poursuite dudit arrest, lequel arrest fu grossé deux foiz et baillié aux gens dudit marquiz, signé du seing dudit de Cessieres. Lesquelz dirent audit de

Cessieres,
environ II jours après, que l'un de leurs diz arrests estoit
seillé
en las de soie et cire vert, et faisoient faire au devant du
Chastellet
de Paris une longue layecte, à la mesure dudit arrest,
fermant à clef pour le garder plus seurement et nettement,
et
prierent ledit de Cessieres à grant instance qu'il feist
l'executoire
dudit arrest, lequel leur respondit que l'exécution se
devoit faire hors du royaume, et qu'il eussent adviz à leur
conseil
comment exécutoire se feroit et à qui s'adresseroit, et sur
ce on parleroit à la Court, qui en ordonneroit, et ledit de
Cessieres
feroit volentiers ce qui en seroit ordonné.
Item, dit que le lendemain ou environ, un homme vestu à
guise d'esquier parla audit de Cessieres au devant de la
maison
d'un potier d'estain emprès la porte du Palaiz, et lui
demanda
se l'arrest de Savoye et de Saluces estoit fait, auquel ledit
de
Cessieres respondi que oïl, et qu'il estoit baillié auz gens
du

marquiz, lesquelz l'avoient fait seeller, si comme l'en disoit. Et pour ce que ledit homme se disoit estre au conte de Savoie, ledit de Cessieres ly demanda se il en vouloit avoir le double, lequel ne respondi rien et se frappa de sa paume ou front, et à tant se parti hastivement. Et assez tost après vint un sergent d'armes qui défendi de par le Roy audit de Cessieres qu'il ne baillast pas ledit executoire, et pareillement l'un des serviteurs de monsr le Chancellier vint faire défense audit de Cessieres de par ledit monsr le Chancellier. Et, le lendemain, ledit de Cessieres ala à la Chancellerie pour savoir la verité de ladicte defense, et oy par la bouche dudit monsr le Chancellier que ladicte defense avoit esté commandée à faire par le Roy nostre sire. Et pour ce ledit de Cessieres dist aux gens dudit marquiz, qui le poursuyoient moult fort et asprement, que ilz le laissassent en paix, et qu'il ne leur pavoit faire ladicte executoire pour les defenses dessusdictes, et atant se departirent. Dit outre que depuiz ce il a veu plusieurs foiz un nommé George qui poursuioit la besoigne pour ledit marquiz, lequel se plaignoit moult fort de ce qu'il ne pavoit avoir ladicte executoire,

obstant les defenses dessusdictes, et plus ne scet.
Item, le **XIIIe** jour de juing derrienement passé,
comparurent
en la Court messire Jaques de Saint Germain, procureur
fiscal
du Dauphiné, et George Ravyol, escuier, procureur de
monsr le
marquiz de Saluces, qui presenterent leur requeste, lequel
procureur
fiscal du Dauphiné, après ce qu'il eut recité l'arrest
pieça donné pour le procureur du Dauphiné et le marquiz
de
Saluces contre le conte de Savoie, par lequel fu déclaré
l'omage
du marquiz et marquisé appartenir au Dauphin, et le lui
adjuga
le Roy et sa Court, et que neantmoins n'en avoient peu
obtenir
executoire, et si detenoit encores le conte plusieurs villes,
chasteaulz et terres du marquisé et fié du Dauphin,
auquelles
rendre et restituer il avoit esté condempnez par ledit
arrest et
es fruiz, a exposé à la dicte Court ou nom que dessus
comment
il avoit entendu que par importunité ou autrement le Roy
avoit
donné ou vouloit bailler et transporter l'ommage dudit
marquisé
au conte, si se opposoit et opposa à ce que la chose ne
sortist aucun effect, et que ledit don et transport ne se
feist, et
se aucune chose en estoit, que riens ne feust verifié ne
passé,

disant que ce seroit le dommage et desheritement du Dauphin et le préjudice de son vassal, et que faire ne se devoit pour plusieurs causes que monstreroit en temps et en lieu, suppliant que la Court en vousist advertir le Roy et son Conseil, et en outre, pour ce que on n'avoit eu executoire de l'arrest, mais l'avoit tousjours le Roy prorogué jucques à ores et donné ses lettres, que ce feust sanz prejudice de l'arrest et demourast tousjours executoire comme dedans l'an; et estoit le temps de la prorogacion sur le point de faillir, requeroit lettres semblables de prorogacion jucques à un an, ou que le Roy en eust autrement ordonné.

Ausquelles requestes la Court respondi que elle en avoit bien memoire et feroit tousjours ce que elle devoit par raison, et enjoigny au procureur et aussy à un nommé George, procureur du marquiz, si comme il disoit, lequel fit semblables opposition et requestes ou nom du marquiz, qu'ilz apportassent par devers la Court les lettres des dictes prorogacions dont il se disoient avoir aucunes par deça, et la Court leur pourverroit si avant que elle pourroit et qu'il appartendroit,

et ce ay je enregistré icy, pour ce qu'il est pertinent à ce qui est devant enregistré.

Mercredi, **XIIJe** jour de juillet.

Ce jour furent assemblez, après ce que dit est,

messieurs des II Chambres ...
lesquelz mesdiz seigneurs assemblez à conseiller se
l'en bailleroit executoire preciz ou *cum opinione* à
monsr le dauphin de Vienne et au marquiz de Saluces
de leur arrest obtenu à l'encontre du conte de Savoie
de l'an mil CCC IIIxx et X, ou moyz de may, lequel
executoire avoit esté souspendu pour aucunes causes

touchées en certaines lettres, qui furent veues et visitées par la Court, delibererent, veues lesdictes lettres et mandemens du Roy nostre sire, et oye la relation de maistre Jehan de Cessieres, graphier criminel de la Court, enregistrée du jour de hier, que l'executoire seroit baillié et preciz, outre adviserent et ordonnerent, que avant ce que *incommutabiliter aut irrevocabiliter* fu bailliez, que l'en eust avant l'advis et deliberation de messieurs du Grant Conseil.

Juesdi, **XIIII**e jour de juillet, l'en ne plaidoya pas, mais fut conseillié, et furent assemblez au Conseil en la Court:

Messire Arnault de Corbie, chancelier; messire Pierre de Giac, jadis chancelier; messire Pierre Boschet; maistre Henry de Marle; messire Ymbert de Boisy, presidens; l'evesque de Noyon; l'evesque de Paris; l'evesque de Saint-Flour; l'evesque du Puy; l'evesque de Maguelonne; monsr le mareschal de France, dit Bouciquaut; messire R. de Trie, amiral de la mer; mons. de Torcy; messire R. du Boissay; m. G. d'Estouteville; m. N. d'Orgemont; m. Ph. de Boisgilloud; m. P. de Reilhac; m. R. d'Acquigny; m. G. de Saulz; m. J. Garitel; m. Th. d'Aunoy; m. J. de Vitry; m. J. d'Arceiz; m. J. de Longueil; m. P. Le Fevre; m. R. du Mont S. Eloy; m. H. L'Escrivvain; m. R. Mauger; m. J. Accart; m. J. Boyer; m. P. Le Cerf, procureur du Roy; m. J. Jouvenel, m. J. Perier, advocas du Roy. Par lesquelz fu deliberé et conclu que, veu ce que dit est et tout considéré, l'en bailleroit ausdiz dauphin et marquiz l'executoire

dudit arrest obtenu à leur prouffit à l'encontre
dudit conte, preciz.

Item, après ce, fu respondu à ce que requeroient
Raoul d'Auquetonville et Guillaume Barbery, c'est
assavoir, l'enterinement de certaines lettres de
rehabilitation

à l'encontre d'un certain arrest donné à l'encontre
d'eulz pour le Roy et pour la Roynes, prononcé
le **VI**e de juin, ce présent an, pour lesquelz le Roy en
avoit escript en la Court lettres moult especiaulz,
signées de sa main, et esquelles avoit escript une ligne
de sa propre main, c'est assavoir, que l'en enterinast
lesdictes lettres sanz plus renvoyer devers la Court,
que lesdiz d'Auquetonville et Barbery avoient:

*LECTA IN CURIA, PRESENTE PROCURATORE REGIO ET NON
CONTRADICENTE,*

tali die, etc., et non plus.

Lundi, **XVIII**e jour de juillet.

Aujourd'hui, Otelin de Haulterive, sergent d'armes
du Roy, en ordonnance est venus en la Court et a dit
de par le Roy que la Court, en ce qui touche monsieur le
dauphin de Vienne et le marquis, d'une part, à l'encontre
du conte de Savoie, ne face aucune chose par

especial contre ce qu'avoit esté ordonné derrienement au regart de l'executoire donné pour lesdiz dauphin et marquiz contre ledit duc, pour quelques lettres ou mandemens de bouche, se il n'est avant passé par le Roy en son Grant Conseil.

Samedi, XXXe jour de juillet.

Sur une requeste baillée en la Court par le prieur et couvent de Nostre Dame du Carme sur ce que demandoient

le residu des biens de l'execution de damoiselle Perrenelle de Crepon, par vertu de certain laiz à eulz par elle fait, la Court, oye la relacion des commissaires et du consentement de maistre Pierre Michiel, hoir à cause de sa femme de damoiselle Perrenelle de Crepon, jadis mere d'icelle sa femme, de J. Goulain, Carme, executeur du testament d'icelle Perrenelle, Pierre de Serry, curateur donné aux biens de l'execution de ladicte Perrenelle, et aussy present messire Pierre Boschet, president en Parlement, et conseiller de ladicte execution et non contredisant, a ordonné et ordonne que le residu de l'argent et debtes de ladicte execution sera delivré et baillié par la main de la Court aux freres du Carme à l'usage ordonné par ladicte Perrenelle et par la forme et maniere qui s'ensuit, c'est assavoir, que l'argent dudit residu sera miz et deposé es mains d'un changeur de Paris qui deliverra et baillera aux ouvriers qui feront l'ouvrage à quoy a lessié ledit argent ladicte Perrenelle, icellui argent necessaire à ycellui ouvrage.

Et pour perpetuel memoire des choses ordonnées par ladicte Perrenelle, et à ce qu'il appere publiquement

et à chascun comment et à quoy les freres du Carme dessusdiz sont obligiez pour le laiz à eulz fait par ladicte Perrenelle, sera fait un tableau de cuivre où sera emprainte l'ordonnance de ladicte Perrenelle et l'office que doivent et devront faire perpetuellement lesdictz

freres pour l'ame de ladicte Perrenelle, lequel tableau sera miz et affichiez en la chappelle où ledit office sera fait où a accoustumé d'estre fait.

Mardi, **IXe** jour d'aoust.

Aujourd'hui, la Court, après ce qu'elle a deféré le serment jusques à **IJm** frans et au dessoubz à J. Le Monnoier, au regard d'une adjudication de marque à l'encontre du duc Aubert, et que ledit Monnoier a juré en ladicte Court de la somme de **XVIIJc** frans, adjuge audit J. Le Monnoier et J. Grevin, marchans, et Colart Dance, marinier, marque à l'encontre du duc Aubert et ses subgiez de Hollande et de Zelande de ladicte somme de **XVIIJc** frans et de leurs dommages, interests et despens, dès qu'ilz bailleront la declaration devers la Court lesdicts marchans et Colart Dance.

Aujourd'hui, la Court a ordonné que les bulles que l'evesque du Puy a par devers la Court seront baillées à l'evesque de Ceinctes, par tel que Jehan de Chevenon, frere dudit de Ceintes, s'obligera de restituer lesdictes bulles ou la somme de **IJm** livres ou à l'ordonnance de la Court.

Vendredi, **XXVJe** jour d'aoust.

Furent au Conseil messieurs du Grant Conseil, messieurs

les presidens, les evesques de Paris, Noyon, Bayeus, Meaulz, Mascon, du Puy et d'Apt, et messieurs des **IJ** Chambres, le procureur du Roy et les advocas du Roy ou Chastellet sur le fait du couvent des Cordeliers de Paris, ouquel pour une sedicion entreulz, à cause d'une demolition d'unes estables qu'avoit fait faire le provincial de France *intra septa conventus*, que estoit contre les ordonnances de leur ordre, comme disoient celz d'estrange langue d'icellui couvent, et pour ce de fait, le mercredi **XXIIIJe** de ce moiz, après minuit, la demolirent ycelz estrangiers; et aussy pour une commotion que firent contre les freres de la province de France, contre lesquelz crierent: *Moriantur Gallici omnes*/ et pour une rebellion contre les gens du Roy, tant qu'il falu rompre leurs portes, et y eut conflict, et tant que plusieurs furent navrez tant des gens du Roy que des diz freres, et en eut **IJ** en peril de mort, comme l'en disoit, et un armerurier navré d'un piet, et que aucuns des estrangiers saillirent par dessus les murs de la cité de Paris derrier leur maison es fossez, et furent repriz par les gens du Roy environ **XIIII** freres estrangiers, comme dist en la Court le commissaire de Chastellet à ce ordonné, et pour ce furent emprisonnez desdiz estrangiers environ **XL**, sur lequel fait a esté assemblé le

Conseil, comme dit est, et au surplus au graphier criminel.

Mardi, **XIIJe** jour de septembre.

Aujourd'hui, j'ay esté sur monsr le Chancelier pour enregistrer le residu du scrutine qui hier avoit esté imparfait en la Tornelle criminelle, commencé par ledit monsr le Chancelier et messire J. de Poupaincourt, premier president, sur l'election ou lieu de l'un de messrs appelé M. Guillaume Liroiz, trespasé, et jà soit ce que plusieurs suffisans hommes se presentassent,

neantmoins, le Roy, à la requeste d'aucuns grans seigneurs, s'arresta à **IJ**, c'est assavoir, maistre Gefroy de Perusse, de la nation d'Acquitaine, maistre des Requestes de l'ostel de monseigneur de Berry, et maistre Guillaume de Launoy, de la nation de Normandie, nepveu de monseigneur l'evesque de Meaulz, et archediacre de Brie en l'esglise de Meaulz, touz **IJ** licenciez en droit, Perusse *in utroque*,

Launoy *in jure*

vili, et pour eulz donna le Roy nostre sire ses lettres

contenens que la Court *in effectu*

esleust le plus ydoinne

des **IJ** dessusdiz, sanz eslire autre.

Juesdi, **XXIJe** jour de septembre.

Sur une requeste faicte par l'Université de Paris à l'encontre de l'abbé de Trouart qu'il pleust que **IIII** des

moinnes de Trouart, soy disans escoliers à Paris,
emprisonnez par vertu d'un arrest donné au prouffit
dudit abbé à l'encontre de **XXIJ** de ses religieux, estre
eslargiz partout et leur procès estre fait à Paris,

juxta

privilegium predictae Universitatis.

Il a semblé aux dessusdiz presidens et conseillers
que ledit abbé puet *impune* consentir et souffrir que
les **IIIJ** dessusdiz religieux, soy disans escoliers, soient
eslargiz à Paris et en Normendie, au lieu où le procès
sera fait selon la teneur dudit arrest prononcé le **IIJe** de
ce present moiz, et ouquel lieu les dessusdiz religieux
stabunt juri, et sanz prejudice de l'abbé.

Lundi, **IIJe** jour d'octobre.

Aujourd'hui, monsieur le premier president m'a defendu,
comme autrefois a fait, que je signe aucune commission
qui contiegne que l'enqueste se face, *etiam sedente*
Parlamento, se je n'en ay congié, *ne Curia dominis*
orbetur, vel propter ipsorum absenciam patiatur.

Samedi, **XXIXe** jour d'octobre.

Ce jour, fut advoquée la cause d'entre Me Raoul

Witart, cleric de la Chambre des Comptes, marié lay, d'une part, et le procureur du Roy en la Chambre des Comptes, pour certains deliz criminelz desquelz ladicté Chambre vouloit cognoistre, et pourtant l'avoit fait emprisonner en la Conciergerie du Palayz, et illec le fit prene la Court et le mettre de par elle en prison, et ce touche Cessieres, graphier criminel.

Item, ce jour, furent leues en la Chambre certaines lettres envoyées de par monseigneur le duc de Bourgogne,

contenant la teneur qui s'ensuit... .

Lundi, **XIIIJe** jour de novembre.

Ce jour, fu confirmé ce qu'avoit esté deliberé le **XXIXe** d'octobre sur l'advocation de la cause maistre Raoul Witart, cleric de la Chambre des Comptes, à l'encontre du procureur du Roy esdiz Comptes pour certains deliz criminelz, et pour ce que ce que lors avoit esté deliberé n'avoit pas esté executé, a esté dit que pour seller la lettre de ladicté advocation de la cause en la Court, parlera monsr le premier president

à monsr le Chancelier, lequel s'il en est refusant, la Court parlera à lui mercredi prouchain en la chambre où il doit venir, en lui disant ce qu'a esté deliberé et confirmé, deliberé par les presidens et autres de mess. le dessusdit **XXIXe** jour et confirmé aujourdui.

Item, cedit jour, pour ce que plusieurs abus se faisoient et font ou Chastellet de Paris tant par les notaires qui prennent d'une procuration tant que traire et exiger puent, combien que n'en ist pour le salaire du notaire que **IJ** solz parisis et **VJ** deniers parisis pour le scel de toute ancienneté, et les commissaires examineurs et graphier dudit Chastellet abusoient et abusent en leurs offices, fut enjoint au prevost de Paris, appelé messire Guillaume de Tignonville, chevalier, de nouvel prevost, qu'il y meist remede, ou la Court y pourverroit, et ce fait, furent les procès par escript du bailliage de Vermendoiz receuz.

Vendredi, **XXVe** jour de novembre.

Sur ce que le procureur du Roy proposa, dès le **XXIXe** de septembre derrenierement passé en la Chambre de Parlement, où estoient presens mess. les presidens et pluseurs autres tant du Grant Conseil que des Chambres dudit Parlement, et du Conseil du Roy ou

Chastellet de Paris, que maistre Raoul Witart, bigame, cleric de la Chambre des Comptes, estoit accusez en ladicte Chambre de certains crimes et deliz, tant de larrecin que de faulz, commiz et perpetrez ou fait des Comptes et papiers d'icelle Chambre, et pour ce de par les maistres desdis Comptes avoit esté et estoit detenus prisonnier. Et avoit ycellui Witart obtenu certaines

lettres de remission du Roy nostre sire, desquelles avoit requiz en ycelle Chambre l'enterinement, et combien que son procès ne fust fait ne parfait, neantmoins, pluseurs s'estoient fait donner ses biens et son office en grant lesion de justice et peril pour le temps avenir. Et pourtant les dessusdiz presidens et autres messieurs dessusdiz, considerans que auxdiz des Comptes n'appartenoit pas la cognoissance de la dicte cause ne de semblables, advoquerent la dicte cause dès le dessusdit jour, et arresterent et firent arrester et detenir en la Conciergerie de par eulz ledit Witart en prison, en ordonnant que tout ce qui touchoit ceste cause tant en procès, actes et autrement fust apporté aux jours de Vermendoiz lors avenir et

maintenant presens, et que aucun ne fust receu à son office, ne les biens dudit Witart à aucun delivrez, jusques à ce que ordonné en fust par justice de ladicte Court de Parlement, comme il appartendroit. Et tout ce ait esté confirmé par la Court le lundi **XIIIJe** jour de ce moiz, à laquelle advocation se soient lesdiz des Comptes efforcez de soy opposer et de vouloir cognoistre de ladicte cause, disans qu'ilz estoient commiz de par le Roy, se besoin estoit, d'en cognoistre par vertu de certaines lettres que se disoient avoir. En la fin monsr le Chancellier, meü pour certaines causes, a au jour d'ui retenu et reservé à lui la cognoissance de ladicte cause, par ce qu'il appellera de messrs de la Court dessusdicte, quant, où, telz et en tel nombre que bon lui semblera, et sanz le prejudice desdictes parties. Samedi, **XXVIJe** jour de novembre.

Au jour d'ui, a esté assemblé le Conseil sur ce que un commissaire de par le prevost de Paris avoit fait certaine relation que un banni, qui avoit esté priz par lui, à l'ayde de certains sergens d'Orleans à ce requiz de par le Roy et par vertu de certaine commission, avoit esté comme par force mené à Orleans par lesdiz sergens et retenu, nonobstant les commandemens et inhibitions faictes de par le Roy par ledit sergent, pour occasion que ledit banni avoit esté priz ou duchié d'Orleans par ledit commiz royal qui estoit à ce envoyez. Ce touche Cessieres, graphier criminel, et *imorecurratur ad ipsum*.

Vendredi, **IJe** jour de décembre.

Au jour d'ui, m'a commandé monsr le premier president que, quant aucun de messrs sera envoyez de par la Court en commission, je ne lui signe sa commission jucques à ce qu'il ait rapporté devers moy tous les procès qu'il a prinz à visiter.

Mercredi, **VIJe** jour de decembre.

Ce jour, m'a enjoint la Court par maniere d'advertissement

que je ne baille à aucuns de messieurs aucun procès à visiter que touche aucun de messeigneurs les ducs de Berry, de Bourgoigne, oncles du Roy, et d'Orleans,

frere du Roy nostredit Seigneur, ou Bourbon, oncle dudit Seigneur, sanz en parler à la Court avant et pour cause.

Samedi, **XVIJe** jour de decembre.

Au jour d'ui, m'a esté enjoint par monsr M. H. de Marle que je enregistrasse que le temps de bailler contrediz par Pons de Cardilhac, vicomte de Murat, à l'encontre des lettres produites par Renault de Murat, a esté prorogué audit Pons jusques à lundi prouchain.

Vendredi, [XXXe](#) jour de decembre.

Ce jour, je alay en la Chambre des Enquestes pour savoir se la conclusion de l'arrest de Thiebaut de Mazeray, d'une part, et les executeurs de Luce et maistre Guillaume de la Fons, leur plaisoit, veu qu'il n'avoient pas esté à conclurre, combien qu'il eussent esté au conseiller, et me dirent que la conclusion leur plaisoit bien, laquelle est ou vendredi [XVJe](#) jour de ce present moiz.

1402.

Mercredi, [XVIIIe](#) jour de janvier.

Furent au Conseil messrs J. de Poupaincourt, M. P. Boschet, M. H. de Marle, et M. Y. de Boisy, presidents... . Et avec ce y furent plusieurs de messieurs des Enquestes, et fu parlé de plusieurs choses, tant de l'assignation des gages de messieurs dessusdiz et autres menues besoignes.

Vendredi, [XXVIIJe](#) jour de janvier.

Au jour d'ui, maistre Jehan d'Aigny, chanoine de la Sainte Chappelle du Palaiz, et contreroleur de la Chambre aux Deniers du Roy nostre Sire, vint à la Court et exposa ce que autrefois avoit fait, c'est assavoir que, comme le Roy nostre Sire dessusdit lui eust donné l'office de clerc en la Chambre des Comptes, que par avant tenoit maistre Raoul Witart, et eust présenté ses lettres pour les enteriner aux gens de la Chambre

des Comptes, à quoy se avoit opposé maistre Aymery Tesson, et procès eu entre lesdictes parties, lesdiz des Comptes eussent jugié contre ledit d'Aigny au prouffit dudit Tesson, de laquelle sentence ou jugement eust dès le **XJe** jour de ce moiz appellé en la court de Parlement.

Et le **XIJe** jour ensuivant, se fust trait par devers messire Arnaut de Corbie, Chancelier, et ly eust requiz qu'il seellast son adjournement en cas d'apel, lequel eust delayé et respondu qu'il venist le landemain, auquel jour pareillement le delaya et de jour en jour. Et au jour d'ui eust requiz que, veu ce que dit est, la Court lui octroyast et donnast adjournement en cas d'apel, ycelle, tous messieurs des **IJ** Chambres assemblez avec le procureur et advocas du Roy, a ordonné que le procureur du Roy iroit avec ledit d'Aigny demain au matin audit monsr le Chancelier, et lui requeroit que, veu que ledit d'Aigny ne requeroit que justice, que lui seellast sondit adjournement en cas d'apel, et ou cas que ne le feroit, il se pourveroit comme il appartendroit.

Samedi, **XXVIIJe** jour de janvier.

Au jour d'ui, le procureur du Roy et maistre J. d'Aigny, chanoine de la Sainte Chappelle, et contrerolleur de la Chambre aux Deniers du Roy nostre Sire, sont venus denuncer à la Court qu'il avoient esté à monsr le Chancelier, auquel ont requiz qu'il leur seellast l'adjournement en cas d'appel fait des gens de la Chambre des Comptes, lequel avoit pluseurs foiz delayé, combien qu'il est cler que ce n'est que justice que requeroient, et toutevoie ne l'avoit volu faire ancores,

lequel monsr le Chancellier respondi qu'il ne seelleroit point et que messeigneurs les ducs d'Orleans, frere du Roy nostre dit Seigneur, et de Berry et de Bourgoigne, oncles dudit Seigneur, avoient ordonné à oïr les parties. Et de rechief ledit procureur du Roy, present les maistres des Requestes dudit Seigneur, ledit d'Aigny et un chevalier envoié de par ledit duc d'Orleans pour seeller ledit adjournement et dire audit Chancellier que l'oppinion dudit d'Orleans estoit que le Chancellier le pouvoit bien seeller, lui requist qu'il seellast ledit adjournement

ou, si ne le faisoit, attendu que lui refusoit lettre de justice, il se pourverroit pour le Roy, selon ce qu'il appartendroit, maiz ce nonobstant n'en volt rien faire, pour quoy *in subsidium* de justice requist

et aussy fit ledit d'Aigny la Court, laquelle leur a ottroyé ledit adjournement, et a requiz le procureur du Roy que ce fust enregistré.

Lundi, XXXe jour de janvier, jour de Plaidoyeries.

Et, cedit jour, vindrent en la Court au matin avant les Plaidoeries le procureur du Roy et maistre J. d'Aigny, et sur la matiere de quoy est parlé samedi derrenier passé baillerent et presenterent un adjournement en cas d'apel fait par ledit d'Aigny des gens de la Chambre des Comptes, avec une requeste attachée à ycellui adjournement, en disant de bouche que hier ledit d'Aigny derechief estoit alez à monsr le Chancellier, auquel aussy messeigneurs les ducs de Berry et de Bourgoigne avoient envoié II de leurs gens, c'est assavoir, le duc de Bourgoigne le maistre de sa chapele, son secretaire, et Berry un autre, lesquelz dirent audit

Chancellor qu'il seellast ledit adjournement, comme autrefois avoit esté requiz, veu mesmement que ledit Chancellor avoit dit que c'estoit raison, et ce aussy requist ledit d'Aigny en disant que ledit Chancellor avoit dit que c'estoit raison, et que samedi derrenier ce avoit requiz, et si avoit envoieé pour ce devers ledit Chancellor monseigneur le duc d'Orleans ledit samedi, lequel Chancellor en disant que s'il avoit dit que c'estoit raison, c'estoit son oppinion, refusa *iterum* à seeller ledit adjournement. Pour

quoy requeroient

lesdiz procureur et d'Aigny ledit adjournement de la dicte Court, attendu le refuz dudit Chancellor. Pour quoy la Court, attendue sa deliberation faicte de samedi derrenier, leur accorda et respondit à la requeste:

Executetur per prepositum Parisiensem et per primum hostiarium. Actum in Parlamento, XXXa januarii CCCCe

primo.(Signé:) N. DE BAYE.

Et après environ **IX** heures, ce dit jour, entendiz que l'en plaidoit, allerent lesdiz prevost et huissier en la Chambre des Comptes, et vindrent devant ycelz gens des Comptes que trouverent **IIIJ** en nombre, et tantost se partirent, avant ce que il vouldissent oïr lesdiz prevost et huissier, et alerent en bas; nonobstant lesdiz prevost et huissier executerent ledit adjournement audit lieu à la personne de leur clerc des Comptes ou graphier, comme je oy dire du prevost après ce fait. Mercredi, premier jour de fevrier.

Ce jour, fut conseillé un arrest sur un cas de faulseté, dont le registre fut fait par maistre J. de Cessieres,

graphier criminel, et fu parlé d'aucunes choses touchant l'onneur de la Court.

Juesdi, *XVJe* jour de fevrier.

Ce jour, fut plaidoiée une cause d'appel d'entre maistre Jehan d'Aigny, contreroleur de la Chambre aux Deniers, appelant des gens de la Chambre des Comptes, d'une part, et maistre Aymery Tesson, partie intimée, d'autre part, pour cause de ce que ledit d'Aigny se disoit avoir lettres, par lesquelles le Roy lui donnoit les gages de clerc de la Chambre des Comptes que tenoit maistre Raoul Witart, et lieu à seoir en haut avec les maistres d'icelle Chambre, et pour ce que à la presentation d'icelles lettres et à requerir l'enterinement en ycelle Chambre ledit Tesson s'opposa, et que, les parties oyes, *tandem* fut dit par lesdictes

gens que les lettres d'Aigny ne seroient pas enterinées, mais adjugerent audit Tesson, qui estoit clerc de ladicte Chambre paravant extraordinaire, lesdiz gages, il en apela à la Court, et ladicte cause plaidoiée bien longuement,

comme puet apparoir ou registre des Plaidoiries, ce present jour fut appointié au Conseil. Et s'efforcèrent lesdictes gens par moult de manieres, nonobstant qu'elle soit capital et souverainne de tout le royaume et unique, d'empescher qu'elle n'eust la cognoissance tant par une maniere qui est touchée le

lundi **XXXe** de janvier cy-dessus, comme d'aler à nos seigneurs les ducs Berry, Bourgoigne, oncles, et Orleans, frere du Roy nostre Sire, qui pour ce temps estoit tenu de grieve maladie, dont Diex par sa grace le vueille delivrer, et soy efforcer devers eulz de empescher

ladicte cognoissance, comme mesme, par ce que hier au soir lesdictes gens des Comptes firent commandement,

à **C** ou **L** mars d'argent, audit d'Aigny que à ce matin fust en ladicte Chambre des Comptes, pour rendre compte avec le maistre de la Chambre aux Deniers, et semble qu'il eust esté avisé de fait, afin ou qu'il encheust en ycelle peine, s'il venoit à faire plaider sa cause et avoir audience, ou, s'il voloit aler à ladicte Chambre pour eviter ycelle peine, qu'il perdist son audience, et que entre deuz fust apportée une lettre de la Chancellerie pour delaier la cause à **XVe**, qui après fu apportée, et par ainsy ledit d'Aigny *incideret in Scillam, cupiens vitare Caripdim*. Lequel Aigny vint en la Chambre de Parlement au matin, entre **VJ** et **VIJ** heures, en requérant remede ou provision, attendu le commendement à lui fait dessusdit, pour quoy la Court, qui est benigne et charitable et juste, volans le rendre obeissant aux dictes gens des Comptes, attendu son office, volens aussy à luy garder son interest, comme elle fait à toute personne qui la requiert, lui octroya tantost audience. Or avint que, sur la fin des repliques de la cause, un secretaire du Roy apporta la lettre de la Chancellerie pour delaier la cause à **XVe**, maiz c'estoit trop tart, ainsy furent frustez lesdiz des Comptes, et aussy la cause plaidée longuement et finée; ledit Aigny ala tout à point en ladicte Chambre des Comptes, et porta ses comptes, et ne tint pas à lui

qu'il ne rendist compte, et si fut oy ceans à son audience et sa partie adverse, et faillirent lesdictes gens des Comptes de leur entencion, et par ce *defecerunt scrutantes*

scrutinio, et aussy *veritas rerum erroribus storum non viciatur*. La cause pourquoy lesdiz des

Comptes ne weillent pas que la Court cognoisce de telz appeaulz ne d'autres aussy d'eulz, car il se voulsissent maintenir exemps, et ont à amiz et favorables à eulz grans seigneurs, *quia amici mammone*.

Vendredi, **XVIIe** jour de fevrier.

Au jour d'ui, a ancores esté miz suz l'arrest d'entre monsr de Berry, d'une part, et le sr de Chauvigny, d'autre part, sur lequel avoient esté parti en la Chambre des Enquestes et puiz *iterum*

en la Grant

Chambre, et *demum* ce present jour, ont esté **XXX** d'une

opinion ou **XXXJ** d'une autre, à compter les oppinions de messieurs qui les autres jours cy devient en dirent, et par ce demeurent ancores parti.

Jeudi, **XXIIJe** jour de fevrier.

Ce present jour, en plaidoiant, survint un secretaire du Roy nostre Sire appelé Despeaux, normant ou mensoiz,

qui apporta une lettre royal qui contenoit *in substancia* que sur le plaidoié d'entre maistre J. d'Aigny, contreroleur de la Chambre aux Deniers, appelant des gens de la Chambre des Comptes, d'une part, et maistre

Aymery Tesson, partie intimée d'autre part, laquelle cause et plaidoié estoit mise au Conseil par appointement de huy à **VIII** jours, ne procedassent outre ne n'en cognissent, et ce avoient empétré aucuns de ladicté Chambre des Comptes, de laquelle l'un des principaulz est l'evesque de Bayeux, *quia* president, auquel octroy furent presens le sire de Heugueville, messire Colart de Calleville et autres, signée Despeaux, et pour ce que ceste lettre estoit et est telle qu'elle se monstre, et que elle est ou tres grant prejudice du Roy, de la chose publique, *in similibus casibus appellationum*, veu que la Court est capital et ordonnée pour faire raison et justice à touz sanz rien excepter, et que c'estoit ou deshonneur de la Court, fu parlé au Roy de par aucuns de messieurs de la Court, qui deffendi hier que la lettre dessus dicte ne fust sellée, et non obstant a esté seellée, se sont levez environ **IX** heures et sont allez devers le Roy mes seigneurs de la Court, et par ainsy l'en a lessié les Plaidoiries, où pluseurs povres et bonnes personnes requeroient et requierent avoir audience et justice, qui par telles besoignes est empeschée à estre faicte, non pas maintenant seulement, maiz desja par pluseurs jours, tant de Conseil où povres gens deussent avoir esté delivrées, comme de Plaidoiries, comme appert par le livre du Conseil et par les registres, et par aventure que lesdiz des Comptes ont grans amiz qui puent practiquer ou practiquent ce qui est dit de Jhesucrist: *Facite vobis amicos de mammona iniquitatum*. Orsoit adverti que justice ne sueffre et à ce

que dit Saint Augustin: *quod sunt regna nisi latrocinia perdita iusticia.*

Vendredi, **XXIII**^e jour de fevrier, *festum beati Mathie apostoli, Curia vacat.*

Cejour, furent assemblez messire Arnault de Corbie, Chancelier, et **XII** ou **XV** de messieurs de Parlement avec le patriarche d'Alexandrie, l'evesques de Noyon, de Bayeuz, de Meaulz, d'Esvreux, d'Arras et de Chartres, et les gens de la Chambre des Comptes, desquelz

sunt lesdiz de Bayeuz et de Chartres, en la Conciergerie du Palaiz, pour ce que le Roy avoit ordonné que ledit Chancelier oist lesdiz gens des Comptes à ce que voloient proposer pourquoy la Court ne procedast à juger l'arrest d'entre maistre J. d'Aigny, appellant des gens des Comptes, et maistre Aymery Tesson, partie intimée, maiz les dessusdiz assiz pour oïr ce que dit est, pour ce que lesdiz des Comptes ne disoient mot, et que monsr le Chancelier dessusdit deist qu'il sembloit que deussent parler, veu que eulz meimmes avoient requiz estre oïz, et que le Roy l'avoit à ce commiz, et que monsr J. de Poupaincourt, premier president de la Court, deist aussy que de toute loy un subgiet du royaume grevé avoit et devoit avoir recours par appel à son souverain, et que pour ce estoit ordonné le Parlement, et ce estoit le grant interest du Roy et de son royaume; nonobstant lesdictes gens des Comptes dirent en delaiant que ilz ne diroient autre chose touchant ladicte cause, sinon en la presence du Roy, pour ce qu'il disoient que ce touchoit le Roy et son demainne, et par ce fu perdue l'eure.

Ce jour, maistre Guillaume de Gy, advocat en Parlement, s'est opposez et s'oppose que aucunes lettres, que l'evesque de Meaulz ou maistre Guillaume de Launoy baille touchant l'office de feu maistre Guillaume Liroiz, seigneur de leans, ne lui soient enterinees, jusques à ce que il sera oiz à ce qu'il voudra proposer.

Samedi, [XXVe](#) jour de fevrier.

Ce jour, maistre Guillaume de Launoy a esté receu conseiller du Roy en la Chambre des Enquestes ou lieu de feu maistre Guillaume Liroiz, par vertu d'un mandement

du Roy, tant par lettres patentes, que aussy sont venus en la Court pluseurs du Grant Conseil, c'est assavoir, l'evesque de Chartres, le premier maistre d'ostel du Roy nostre Sire, le sire de Heugueville, messire N. de Calleville et pluseurs autres chevaliers, qui ont dit que le Roy mandoit qu'il fust receu.

Mercredi, premier jour de mars.

Ce jour, monsr le premier president m'a defendu que de cy en avant je ne signe aucunes lettres de commission,

sinon par le congé de cellui monsr le president qui au matin tendra le siege, pour ce que messieurs de la Court de legier sont meuz à aler dehors en commission, et par ce la Court souvent demeure desgarnie de conseillers.

Au jour d'ui, a esté ordonné maistre Pierre Buffiere

et commiz à visiter les merceries du Palaiz durant la mainmise du Roy faicte par la Court es choses contencieuses entre Thiebaut de Mazeray, concierge du Palaiz, d'une part, et les merciers du Palaiz, d'autre part, sur ycelle visitation et m'a esté enjoint par monsr le premier president que ce soit fait *secrete, ad obviandum fraudibus*.

Vendredi, **IIJe** jour de mars, au Conseil.

Au jour d'ui, a esté ordonné, presens le lieutenant du bailli de Chaumont et le procureur du Roy dudit Beaumont, que les ordonnances faictes aux Grans Jours de Troyes sur l'office du tabellionnage du baillage de Troyes tendroient et seroient pareillement tenues comme faictes au regart de l'office de tabellionnage des bailliages de Chaumont et de Vitry, et a esté dit que ycelles ordonnances seroient publiées esdiz bailliages.

Mercredi, **XVe** jour de mars.

Au jour d'ui, maistre Jehan d'Aigny, contreroleur de la Chambre aux Deniers, a presenté unes lettres royaulz en la Court, contenant en brief que, comme il eust appellé des gens de la Chambre des Comptes d'une sentence par eulz donnée au prouffit de maistre Aymery Tesson, cleric de la Chambre des Comptes,

eust esté plaidoié ceans la cause, et eust esté appoinctée en droit, et les dictes gens des Comptes eussent obtenu lettres par lesquelles estoit mandé à la Court que sur ledit appoinctement ne procedassent point à juger et que le Roy advoquoit la cause devant ly, nonobstant ycelles lettres recitées de mot à mot esdictes lettres presentées, le Roy pour plusieurs besoignes occuppez telement que à ce ne pouvoit vacquer, et qu'il ne welt point retarder ne empescher ledit procès ne autres quelcunques, maiz les welt abbreger, a mandé et enjoint à la Court en ses dictes lettres patentes, face la Court droit sur ladicte cause d'appel et le plaidoié d'icelle, et pronunce son arrest le plus brief qu'elle pourra. Et pour ce la Court a envoyé au jour d'ui dessusdit **IJ** huissiers de ladicte Court, c'est assavoir, Aleaume Chassemarée et Guillaume de l'Espine en ladicte Chambre des Comptes faire commandement ausdictes gens des Comptes qu'il envoiassent les lettres, actes et munimens de ladicte cause, lesquelz y alerent, et feront *una die* leur relation.

Au jour d'ui m'a enjoint monsr le premier president que je ne signe l'executoire de l'arrest de messire Geffroy de Brezé, prononcé samedi derrenier passé, à autre que à maistre Pierre Drouart.

Vendredi, **XVIJe** jour de mars.

Au jour d'ui, sunt venus en la Court un docteur de

Thoulouse et autres licenciés d'ycelle université et estude de Thoulouse de par elle, et ont presenté une espitre à ladicte Court de par ladicte université, avec lettres closes, lesquelles tu trouveras ou la teneur d'elles en la fin du livre du Conseil de ceste année, et outre persuaderent lesdiz messages ou ambassadeurs à la Court qu'elle voulsist conseiller le Roy de rendre l'obeissance à nostre Saint Pere le pape **Benedic XIIIe**, qui lui avoit esté ostée en France par la sustraction à lui faicte, comme appert par la lettre contenue ou livre des Ordonnances, pour ce que ledit Benedic n'avoit voulu faire cession du papat pour appaisier le cisme qui avoit duré ja par plus de **XXIJ** ans, et des le temps du roy Charle, pere du Roy nostre Sire, qui à present est, pour lequel cisme avoient regné *successive* Urbain, et après lui Boniface à Romme, et par deça à Avignon Clemens et Benedic dessusdit, attendu que ja soit ce que ledit Benedic, combien que au temps de la substraction ne fust pas conseillez de ceder, toutevoie de present estoit prest, comme ilz disoient.

Samedi, **XVIIIe** jour de mars, au Conseil.

Ce jour, maistre Guillaume des Piez m'a dit et confessé que hier, qui fu le **XVIIe** de ce present moy, il avoit veu les lettres que maistre J. d'Aigny avoit mises devers la Court en la cause d'appel d'entre ledit d'Aigny, appelant des gens de la Chambre des Comptes d'une part, et lesdites gens appellans, et maistre Aymery Tesson, partie intimée, et lesquelles avoit ordonné la Court estre monstrées audit Tesson et audit des Piez, son procureur.

Mercredi, **IIIe** jour d'avril.

Curia vacat propter festum Annunciacionis dominice, quod, quia suo die sabbati vigilia Pasche ultime preteriti solemnizari non potuerat, hodie ex ecclesie ordinacione Parisiensis solemnizatum est in diocesi Parisiensi.

Lundi, **XVIe** jour d'avril.

Ce jour, entre les plaidoiries, survint maistre J. de Sains, secretaire et notaire du Roy nostre Sire en la Court, et presenta certaines lettres scellées du grant seel en las de soye et cire vert, contenans en substance que le Roy revoquoit tous dons de terres ou revenues, tant

à perpetuel que à vie faiz par ledit Seigneur à quelque personne, fors à la Royne, ses enfans, frere, oncles, et à messire Pierre de Navarre, son cousin germain, en laquelle ordonnance aussy ne sont pas compriz rentes à vie ou à volenté que prennent par nostre octroy aucuns noz officiers par les mains du changeur de nostre tresor ou de nos vicontes et receveurs, et ceste ordonnance ont juré le Roy nostre Sire, messeigneurs

ses frere, oncles, gens du Grant Conseil et de la Court de ceans, c'est assavoir les presens.

Juesdi, **XXe** jour d'avril.

Au jour d'ui, a esté leue et publiée en la Court une lettre royal par laquelle le Roy a ordonné que monsr le duc d'Orleans, son frere, s'entremette du fait de ses finances des subsides ordonnés pour les guerres, et qu'il soit par dessus les generaulz conseillers sur le fait des dictes finances, et sanz lequel il ne puist par eulz aucune chose estre fait, comme plus à plain appert par la teneur d'icelle lettre, qui est enregistrée ou livre des Ordonnances.

Samedi, **XXIXe** jour d'avril.

Ce jour, la Court a ordonné, comme autrefois, que aus jours de Troies ne seront point admiz ne receuz à seoir avec messeigneurs du Conseil du Roy aucuns religieux, abbez ou autres, ja soit ce que aucunes foiz

à autres jours les abbez de Moustier Erraine et autres y aient siz.

Ce jour, maistre André Cotin m'a requiz que je le vousisse excuser devers la Court, pour ce que faut que voist à Meaulz avec les commissaires de la Court, et eust demandé congié devers la Court, mais messrs les presidens estoient ja partiz de ceans.

Samedi, **XXe** jour de may.

Samedi derrain passé, environ **IX** heures à matin, vindrent en la Chambre du Conseil le conseil de monseigneur le duc de Bourgoigne ou Parlement et un sien secretaire, et pour ce que l'en avoit mise suz une grant taille, montant, comme j'ay oy dire, **XIJ** ou **XIIJc** mil frans ou royaume, nonobstans les autres grans et divers subsidies qui couroient par le royaume, et que pour le present n'y avoit nulles guerres apparens, et si montoit bien ladicte taille à plus le tiers que une qui derrainement fu faicte pour le mariage de l'ainnée fille du Roy nostre Sire au Roy d'Angleterre, et si estoit diminué le royaume, puiz **IJ** ou **IIJ** ans, pour les grans mortalitez qui ont esté, ont requiz que la cedula, dont la teneur est cy après enregistrée, fut leue en la Court et publiée tous oyans et voyans. Sur quoy fut avisié par les **IJ** Chambres que, veu que la Court n'avoit volu souffrir que les lettres de la taille

fussent publiées en la Court, et plusieurs autres causes qui à ce la mouvoient, et pour paeur que le pueple ne feust plus meuz de telles lettres estre leues en la Court souveraine, que se elles fussent leues et publiées ailleurs, attendue l'auctorité d'icelle Court, l'en respondi aux dessusdiz que la chose estoit grosse et avoit l'en besoin d'en parler à monseigneur le Chancelier

et à monseigneur le premier president qui estoit absens pour le jour, et au lundi prouchain la Court en respondroit plus à plain. Et en la Court fu avisié que l'un de messeigneurs les presidens iroit à Senliz, où estoit ledit monseigneur de Bourgoigne, pour excuser la Court. Et ce pendent, environ X heures, allerent les dessusdiz ou Chastellet et requirent la pareille cedula estre publiée, qui fu publiée, et aussy furent envoyées semblables cedules en la Chambre des Comptes, au Prevost des Marchans et es bonnes villes du royaume, comme l'en disoit. La teneur de la cedula s'ensuit:

Philippe, filz de Roy de France, duc de Bourgoigne, comte

de Flandre, d'Artoiz et de Bourgoigne palatin, seigneur de Salins et de Malines, aux presidens et autres gens tenens le

Parlement de monseigneur le Roy à Paris, salut et dilection.

Nous avons entendu depuiz nostre partement de nostre ville

d'Arras que on met suz une taille en ce royaume, et que on a

publié à Paris en plusieurs lieux et ailleurs, que c'est de nostre

consentement, parmi IJc mil frans que avoir en devions,

laquelle chose, en tant comme touche ce que dit est, nous
en
avoir esté consentans est bourde, et ceulz qui ainsy l'ont
semé,
ont dit et semé pures bourdes et mensonges, car
veritablement
nous n'en avons esté conseillans ne consentans. Et
attendu les
grans mortalitez qui des [IIII](#) ou cinq ans en ça ont esté et
sont
ancores en pluseurs lieux de ce royaume, et aussy les
grans
charges que le pueple a eu et ancores a continuelment à
soustenir,

nous, saulve noz conscience et honneur, ladicte taille ne pourrions et aussy ne voudrions en aucune maniere conseiller ne consentir, combien que des un an a et mesmement puiz nagueres on nous a offert C mil frans pour ycelle consentir estre mise sus, lesquelz C mil frans nous refusames, des lors les avons ancor refusez, et pour quelcunque prouffit que avoir en deussions, entendu ce que dit est, et mesmement que tailles ne doivent estre levees sur le peuple pour en faire dons, ne voudrions ycelle taille consentir, maiz se aucuns voloient supplier à mondit seigneur de grace avoir, afin que icelle taille ne fust ou soit levee, nous pour consideration des choses dessusdictes en voudrions avec eulz supplier à mondit seigneur, combien que en touz cas touchans le bien et honneur de mondit seigneur, le commun prouffit et utilité de ce royaume et de son pueple sommes, avons esté et tousjours serons prests d'y employer corps et chevance, et tenons certains que aussy soyez vous. Et pour ce que nous voulons et desirons chacun savoir nostre entention et la verité de ceste chose, nous vous prions et tres acertes requerons que vous lisiez ou faictes lire et publier une ou pluseurs foiz ces presentes en la Chambre dudit Parlement,

presens tous ceulz qui les voudront oïr. Donné soubz
nostre seel de secret en l'absence du grant à Clermont en
Beauvoisiz,

le **XVIIJe** jour de may, l'an de grace mil **CCCC** et deux.

Ainsy signée: Par monseigneur le duc: HABART, et
seellée du

seel secret et patente.

Vendredi, **XVJe** jour de juin.

Ce jour, monsr maistre Henry de Marle m'a dit que
surrogoit en son lieu monsr le doien de Senliz, son
frere, pour aler à la Rochelle avec maistre Phelippe de
Boisgillon en commission, auquelz a donné congié.

Samedi, premier jour de juillet.

Ce jour, le conte de Jogny et **IIJ** ou **IIII** autres chevaliers sont venus en la Court, en requerant que la Court feist publier certaines lettres royaulz, par lesquelles le Roy faisoit et ordonnoit monseigneur le duc de Bourgoigne, general conseiller sur le fait de ses finances, et que sanz lui ne fut rien ordonné ne fait es dictes finances, et que ce qui feroit, apellez celz que voudroit des generaulz en tel nombre que voudroit, fu fait, nonobstant les lettres données par avant à monseigneur le duc d'Orleans, frere du Roy, comme plus à plain puet apparoir par le registre des lettres qui sunt ou livre des Ordonnances de ceans. A laquelle requeste la Court, appellez messeigneurs des **IJ** Chambres, fu respondu que l'en les publieroit *publice* en jour de Plaidoirie à lundi prouchain, comme l'en a accoustumé en telz lettres, et par ainsy seroit miz par le graphier: *Publicata et lecta tali die*, etc., sur ycelle lettre, et si seroit enregistrée ou livre des Ordonnances, si ne voloient attendre, elles seroient leues à la fenestre par le premier huissier, maiz l'en ne les enregistreroit pas, ne ne seroit miz *Publicata*, selon le stile de la Court. Lesquelz chevaliers respondirent que reporteroient au duc de Bourgoigne.

Lundi, **IIJe** jour de juillet.

Ce jour, a esté publiée une lettre royal, de quoy est faicte mention ou livre du Conseil du samedi derrain passé.

Samedi, **VIIJe** jour de juillet, au Conseil.

Ce jour, maistre Jehan de Cahors fu par moy interrogés se J. de Corbeant, pour qui occupoit, estoit clerc non marié, pour ce que ou plaidoié du jour de juin n'estoit contenu, que seulement ledit Corbeant avoit confessé ou proposé qu'il estoit clerc, combien que de la partie de l'evesque d'Arras feust dit qu'il avoit proposé qu'il estoit clerc non marié, qui faisoit à sa cause, lequel Cahors a confessé et dit que ledit Corbeant est clerc non marié, et ce a Pidalet, procureur dudit evesque, requiz estre enregistré, et qu'il en eust lettre.

Lundi, **Xe** jour de juillet.

Fu plaidoié par environ une heure, et après furent pronuncez

arrests par environ heure et demie, et puiz ala la Court à Saint Marcel aux exeques de maistre Pierre Reilhac, feu conseiller du Roy nostre Sire ceans.

Mardi, **XVIIIJe** jour de juillet.

Ce jour, s'en ala messire J. de Poupaincourt, premier president, et autres en Boulenoiz sur la mer pour traicter avec les Angloiz.

Samedi, **XXIXe** jour de juillet, au Conseil.

Ce jour, messire Pierre Boschet me dit, comme autrefois lui et messire Ymbert de Boisy m'avoient dit que je signasse la commission de Coustances à maistre Robert Mauger, attendu que maistre J. Garitel, auquel et à maistre Pierre Le Ferré messire J. de Poupaincourt l'avoit assignée, ou cas que les parties procederoient en ce present Parlement, estoit absent et s'en estoit alez dehors, et que les parties se fussent hier consenti audit maistre Robert Mauger.

Mercredi, **IJe** jour d'aoust.

Au jour d'ui, la Court a ordonné sur un debat qui estoit entre Thomas Raart, huissier de ceans, lequel avoit empétré lettres du Roy de appeller au roole aux Grans Jours de Troyes, à l'execution desquelles Raoul Le Noir, huissier de ceans, lequel avoit et a la commission de ordonner et nestoier la chambre de ceans et les sieges, et par ce estoit plus convenable qu'il alast audit Troyes pour appeller audit role et pour ordonner la chambre par delà, comme il disoit, et entre le debat desquelz se boutoit Robert Chaurre, premier huissier de ceans, en requerant que par delà à Troyes apelast au role, comme icy faisoit, ladicte

Court a ordonné que ledit Raoul Le Noir ira par delà à Troyes et appellera au roole et ordonnera les sieges, et ou cas que ledit Raoul averoit empeschement de maladie ou autre par lequel n'y peust aler, ledit Raart ira sanz prejudice dudit Raoul, et senz ce que le exercice que fera ledit Raart tourne audit Raoul en prejudice en quelque maniere une autre foiz, attendu que ledit exercice ou commission de la Court n'est pas proprement office au moins que l'en doie impetrer. Ce jour, a la Court ordonné que maistre J. Foulon, secretaire de monsr de Berry, et Nycholas Bonnaut, bachelier en loiz, curé de l'eglise du Puy Nostre-Dame, seront surrogez par la Court à maistre J. Moreau, donné par la Court curateur aux biens de feu monsr Seguin d'Anton, arcevesque de Tours, et ordonne la Court que les dessusdiz puissent requerir, exiger et lever les debtes deues à la dicte execution et bailler quittance ensemble et conjointement, et si leur seront baillez de present cent escus par ledit Moreau, curateur, sur le residu desdiz biens pour faire translater le corps dudit de Tours en l'eglise de Xainctes, desquelz cent escus et de tout ce que les diz dessus recevront, ilz seront tenus de rendre compte en la Court qui leur taxera leurs gages raisonnables, et qui ordonnera comment et par quel maniere sera distribué et ordonné ce qui sera receu par eulz surrogez.

Et sera ledit Moreau deschargez, et le descharge la Court de la dicte somme de C escus, en prenant quittance d'icelz surroguez, et les causes touchans ladicte execution meues et à mouvoir ledit Moreau, curateur, poursuivra en ycelle Court et par devant les commissaires auxquelz elles seront commises.

Mercredi, IXe jour d'aoust.

Ce jour, maistre H. de Marle, president, commissaire envoié à Amiens, et maistre N. de Biencourt avec lui, recita pluseurs choses du gouvernement de ladicte ville d'Amiens, par quoy fu deliberé que la Court leur bailleroit plus grant puissance que par avant n'avoient, et furent exprimez les especialitez que l'en metroit en la lettre, outre celle qui par avant leur avoit esté baillée, et m'en fu commendée lettre.

Vendredi, XJe jour d'aoust.

Au jour d'ui, ay leu en la Court la lettre d'une commission faicte air la Court à Me H. de Marle, J. André et N. de Biencourt, de laquelle est parlé ou jour de mercredi derrain passé, et au lever du siege m'a dit messire P. Boschet, present maistre J. Chanteprime, que je feisse lettre à la ville d'Amiens d'expedier

Vc frans aux commissaires, et ce aussy m'avoit l'en dit, avant ce que l'en alast ou siege à plaider. Samedi, **XIJe** jour d'aoust.

Ce jour, environ **IX** heures, vint en la Chambre monseigneur le Chancelier, et en sa presence fu plaidoyée la cause qui s'ensuit:

Entre l'evesque de Paris, d'une part, et le procureur du Roy, d'autre part, l'evesque requiert que, comme ledit procureur ait fait mettre son temporel en la main du Roy, ou le prevost de Paris et sans cause, lui soit delivrez... .

Lundi **XIIIJe** jour d'aoust, vegile de l'Assumption Nostre Dame, après les Plaidoiries, environ **IX** heures, furent prononciez **V** arrests par messire P. Boschet, president, et puiz les ordonnances leues, fu mis fin ou Parlement quant aux Plaidoiries, et ordonné que jucques à la saint Barthelemi l'en conseileroit, et a esté cest année ordonné que l'en iroit à Troyes tenir les Grans Jours.

Mercredi, **XVJe** jour d'aoust, au Conseil.

Ce jour, ay baillié à l'abbé de Moustier Erraine sa

lettre d'estre au Conseil aux jours de Troyes par le commandement de la Court à moy fait puiz **XV** jours.

Ce jour, Robert Chaurre m'a apporté la cedula de par le procureur du Roy qui s'ensuit:

Robert Chaurre, rapportez à monsr le graphier que du consentement

du procureur general du Roy et de J. Hemart, procureur du concierge du Palaiz, Guillemin le Mareschal, alias elargy par

la Court juques à huy, est elargy comme devient par main souverainne

juques aux jours de Paris prouchainement venans.

Ce jour, ont esté conseilliez et reconseilliez **IIJ** arrests touchans l'archevesque de Senz et sa mere à l'encontre de messire Guillaume de Neelle, et en l'un J. de Longueval

contre messire Guillaume de Neelle, lesquelz combien qu'il eussent esté passez et concluz en la Chambre des Enquestes, toute voie, à la requeste de messrs les ducz de Berry et de Bourgoigne, à la poursuite que faisoit Robert Le Tirant, escuier d'escuierie du Roy, ont esté repriz ceans, c'est assavoir en la Grant Chambre lesdiz procès, et *iterum* en ycelz a

esté par les **IJ** Chambres conclu.

Vendredi, **XVIIJe** jour d'aoust, au Conseil.

Ce jour, la Court a taxé les despens de Paule Triboulet et de Bouquendri, commiz pour le mareschal Bouciquaut et messire Remon de Turenne à aler veoir l'estat du gouvernement de la conté de Montfort, à eulz **IJ III** frans.

Ce jour, la Court a donné delay à l'evesque du Puy de bailler ses memoires à l'encontre du chapitre dudit Puy juques à la vegile de la Nativité Nostre Dame

prouchainement

venant, nonobstant les autres delaiz par luy obtenez autrefois, et a ordonné la Court que se dedens ledit jour ledit evesque n'avera baillé, plus n'en face requeste d'avoir delay, ne jamaiz autre delay n'avera, et m'a esté defendu que outre ledit terme plus ne reçoive aucunes memoires dudit evesque, et entent la Court ledit delay et l'appointement fait tant de memoire comme de lettres et autres choses quelzgunques touchans ycelle cause.

Mardi, **XXIJe** jour d'aoust.

Ce jour, la Court a receu lettres royaulx patentes pour avancer les arrests de l'arcevesque de Senz.

Mercredi, **XXIIJe** jour d'aoust.

Ce jour, a ordonné la Court, oye la relation de maistre J. de St Verain et Th. Tiessart, que les Carmes, attendue leur nécessité d'eulz elargir en leur logiz, averont par la main de la Court de l'argent ou biens à eulz laissez par Perrenelle de Crepon pour acheter certaine place près d'eulz.

Ce jour, arrests pronuncez par Boisy, et à la fin a esté dit que ce qui sera fait de cy à dimenche prouchain an la Chambre de Parlement vaudra, comme se le Parlement qui fine au jour d'ui durast.

Samedi, **XXVI**e jour d'aoust.

Hac die, recessi de Parisius, proficiscens Trecas pro diebus qui teneri debent./

Vendredi, premier jour de septembre.

Circa horam nonam ante meridiem, intravit dominus Johannes de Poupaincuria, miles, primus presidens in Parlamento, et primus in presentibus diebus ordinatus per dominum Regem, Trecas cum domino Petro Boscheti, utriusque juris professore, ac secundo in predicto Parlamento presidente, et in presentibus diebus secundo deputato, quibus obviam ierunt domini, episcopus

Trecensis Stephanus de Givry, consilarii de dicto Parlamento ad dictos dies deputati, baillivus custos nundinarum Campanie, burgenses Trecenses cum plurimorum tam ecclesiasticorum quam laycorum comitiva grandi et speciosa, campanis belfredi altissime pulsatis, ac per horam cum dimidia resonantibus, cum ceteris ad hujusmodi introitum solemnitatibus assuetis observatis. Et hac die, quieverunt predicti domini presidentes et consilarii et absque ulteriori labore supersederunt./

Samedi, **I**e jour. Circa sextam horam, congregatis

predictis dominis presidentibus et consiliariis in cappella palatii Trecensis, celebrata fuit missa de Sancto Spiritu cum nota, cantu et discantu armonicis; postea, vero` eisdem dominis in camera dierum, hostio clauso, segregatis, nonnulle eisdem supplicationes porrecte expedite fuerunt, ac procuratores bailliviarum comitatus Campanie ad tradendas informationes et processus procuratori et advocatis regiis, si quos haberent, admoniti, et ordinatum quod hac et crastina diebus reciperentur presentationes partium causas ad dictos dies habentium. Insuper admissi episcopus et abbas sancti Lupi Trecenses, necnon abbas Monasterii Arremarensis et Sancti Nychasii Remensis, ad sedendum cum dictis dominis in camera dierum, virtute certarum regiarum litterarum per ipsos exhibitarum, juramento tamen prius ab ipsis exacto atque habito... ./

Mercredi, [XJe](#) jour d'octobre.

Ce jour, la Court a ordonné que maistres G. de Villiers, P. de Oger, P. Le Fevre et R. Mauger, conseillers du Roy nostre Sire, aviseront et esliront un gouverneur ou administrateur pour mesdames les religieuses de Nostre Dame de Troyes, à gouverner leur temporel par la main du Roy, ou lieu de messire Pierre Clouet, qui par avant a gouverné ledit temporel, et par l'auctorité de la Court sera institué ledit gouverneur ou administrateur, et sera faicte inhibicion de par la Court audit Clouet par lesdiz conseillers que ne aliene

aucuns de ses immuebles, jucques à ce qu'il aura verifié ses comptes et jucques au plaisir de la Court. Et outre a ordonné la Court que le bailly de Troyes d'ores en avant orra de par le Roy les comptes de ladicte eglise de Nostre Dame, appelez avec lui ceulz que bon lui semblera.

Samedi, **XIIIJe** jour d'octobre.

Ce jour, furent baillées et delivrées par maistre J. du Boiz à maistres François le Pevrier, Pierre Hannequin et J. Houselot, bourgeois de Troyes, pour et ou nom de la ville de Troyes, quatre chartres qui avoient esté mises par devers ladicte Court par les talemeliers à l'encontre des doyen et chapitre de S. Estienne de Troyes, et par l'ordonnance de la Court.

Mercredi, **XVIIJe** jour d'octobre.

Ce jour, après disner, furent assemblez en la Tournelle maistres Guillaume de Villiers, P. de Oger, R.

Mauger, commissaires donnez de par la Court avec me P. Lefevre pour pourveoir au gouvernement temporel de mesdames les religieuses de Nostre Dame de Troyes et aviser les comptes de messire Pierre Clouet, qui par avant par longues années avoit gouverné ledit temporel, et pour ce que ilz avoient trouvé defauz notables en ses comptes, au jour d'ui par l'ordonnance de la Court midrent tous les heritages, rentes et revenues et biens immuebles quelzcunques et debtes, à cause de ladicte administracion d'icellui Clouet, en la main du Roy nostre Sire, en lui defendant l'alienacion,

juques à ce qu'il eust verifié ses comptes et juques au plaisir de la Court.

Mardi, derrain jour d'octobre, au Conseil.

Ce jour, n'a peu prononcer les arrests messire J. de Poupaincourt, premier president, pour ce que ceste nuit lui est survenue maladie telle que n'est peu venir à la Court.

Juesdi, **IJe** jour de novembre.

Cedit jour, furent prononcez arrests par messire P.

Boschet, pour ce que messire J. de Poupaincourt ne les peut mardi derrain passé ne au jour d'ui prononcer, obstant certeinne maladie qui lui estoit survenue.

Ce jour, environ **VIII** heures, furent prononcez les arrests par messire P. Boschet, et après furent leues les ordonnances, et en la fin, pour ce que le jour saint Crespin les cordouanniers de Troyes avoient esté divent l'uiz de monseigneur le premier president *in turba et tumultu*, pour ce que son queuz avoient deu dire lors qui dansoient par la ville, que c'estoit la feste aux savetiers, et l'un desdiz cordouanniers lui dist qu'il estoit un camus punaiz, et pour ce espia à une autre foiz icellui cordouannier près de l'ostel dudit president divent l'eglise Nostre Dame, entendent que dansoient, et bailla d'une espée et fit plaie audit cordouannier,

de quoy la feste fu tourblé, et s'en vindrent après icellui queuz juques à l'uiz dudit president, comme si voulsissent le assallir oudit hostel, ledit president estant en son hostel, et pour quoy tant ledit

queuz que pluseurs furent emprisonnez, et après **III** ou **IIII** jours delivrez, hors le plus coulpable desdiz cordouanniers

et ledit queuz, fu dit ce dit jour que pour ce que à peine que à l'occasion de telz festes n'avoit eu grans inconveniens commiz audit Troyes, la Court suspendi ycelz cordouanniers de tel feste de menestriers et de diners, non pas de la feste dudit saint Crespin à l'eglise, juques au plaisir d'icelle Court.

Lundi, **XIIJe** jour de novembre.

Nota quod domini tenentes dies Trecenses, presidentibus dominis J. de Poupaincuria et P. Boscheti, redierunt in hoc festo Martini, nichilque ex omnibus causis Trecis appunctandum, nec aliquid ex dictis causis agitatis arrestum ferendum seu pronuciandum reliquerunt, nisi modicum appunctamentum magistri J. du Veu, quod est infra **XIIIIa** die instanti. Utinam in futuro tam diligenter agatur./

Lundi, **XIIJe** jour de novembre.

Ce jour, après ce que dit est, depuiz que celz qui n'estoient de la Court issirent hors de la Chambre du Parlement, furent leues aucunes lettres au Conseil, impetrées par aucuns sur l'office de conseiller vacant en ladicte Chambre par le trespas de feu maistre

Renault d'Amiens, et pour ce que l'heure estoit breve et il y avoit **VIII** ou **IX** impetrans, ceste besoigne fu remise à un autre jour.

Ce mesme jour, maistre Guillaume de Gy s'est opposé à ce que la Court ne ordonne aucunement de l'office de conseiller vacant en la Court de Parlement par le decès de maistre Renault d'Amiens, sanz le oïr, et ce a requiz estre enregistré.

Vendredi, **XXIII**je jour de novembre.

Ce jour, est venus monseigneur le Chancelier en la Court pour ordonner sur un lieu vacant aux Enquestes par le decès de maistre Renaut d'Amiens, et furent oyes les oppinions et *vota* d'aucuns à part en la Tournelle criminelle, et ce fait, fu temps d'aler disner, et la chose delayée à autre jour.

Samedi, **XXVe** jour de novembre.

Ce jour, arrests Poupaincourt. Et après ce vint monseigneur

le Chancellier ceans, et les arrests pronuncez, fu procedé sur la vacation de l'office de maistre Renaut d'Amiens en la Chambre des Enquestes.

Mercredi, **XXIXe** jour de novembre.

Ce jour, fut confirmé l'arrest autrefois conseillé le mercredi **XXXJe** et derrien jour de may derrien d'entre maistre Giles de Grigny, d'une part, et maistre Pierre

de l'Esclat, d'autre part, qui avoit esté differé à prononcer, pour ce que la Court y voloit ancor pancer, attendu que touchoit le stile de Parlement en un point aucunement difficile.

Vendredi, premier jour de decembre.

Ce jour, est venus monseigneur le Chancelier en la Court pour ordonner de l'office vacant en la Chambre des Enquestes ou lieu de maistre Regnaut d'Amiens, et, attendu le nombre des voix que a eu maistre Guillaume

de Gy au regart de ses competeurs, il a esté institué oudit lieu et a fait le serment acoustumé, et ou lieu dudit Regnaut en la Grant Chambre a esté et est maistre Renaut de Bussy, et ou lieu de Bussy aux Enquestes est Gy.

Vendredi, [XVe](#) jour de decembre, au Conseil.

Ce jour, maistre N. de Biencourt, conseiller du Roy nostre Sire, s'est opposé et oppose à ce que les joyauz,

que la Royne demandoit pour certain prest de par elle fait à maistre Loys Blanchet ou de par elle, estre vendus, ne soient vendus.

1403.

Mercredi, **Xe** jour de janvier.

Après fu conseillé sur un cas avenu que sur une lettre requisitoire de la Court envoyée par **IJ** sergens royaulz executer selon leur forme à Cambray envers aucuns qui detenoient une bourgoise dudit Cambray, apelée Marie du Cavech, en cas d'eresie, comme l'evesque dudit Cambray maintenoit; et à cause de quoy ledit evesque avoit formé une complaincte ceans contre l'arcevesque de Reins, sur lequel appoinctement de laquelle cause avoit esté dit que ladicte Marie venroit à certain jour ceans, ycelz **IJ** sergens avoient esté detenus prisonniers ou chastel de Ceze lez ledit Cambray ou oudit Cambray, lequel chastel appartient à l'evesque dessus dit, et en les prenant et traictant assez durement, avoient esté rompues lesdictes lettres requisitoires en la queue. Et pour ce que le cleric de l'eschevinage de Cambray estoit venus excuser les eschevins dudit Cambray sur ledit fait, et aussy avoit

requiz le conseil de maistre Pierre d'Ailly, evesque dessusdit, qui estoit nez de Compiegne, et avoit esté estudiant et après maistre du college de Champagne dit de Navarre, et qui avoit eu ses estas par le Roy de France et par son moien, car il avoit esté son aumosnier et thresorier de la Sainte Chappelle, que fust oiz avant ce que la Court appoinctast sur la besoigne, fu ordonné qu'il seroit oiz, et seroit dit audit clerck de l'eschevinage de Cambray que ne se partist juques à ce que la Court averoit parlé à lui; et si demourerent certaines

lettres faictes et signées par Cessieres, graphier criminel, sur ledit fait, qui des hier estoient envoiées pour estre executées, comme l'en disoit.

Samedi, [XIIIe](#) jour de janvier.

Item, ce jour fu miz en deliberation au Conseil sur ce que le procureur du Roy de son Hostel, qui avoit esté batu moult enormement en son hostel, entendent

qu'il seoit à table, de plain jour, depuiz **VIII** ou **XV** jours par **X** ou **XII** compaignons au commendement, comme l'en disoit, de messire Charles de Savoisy, chevalier, chambellain du Roy, à l'occasion de ce que l'en disoit que ycellui procureur avoit esté avec l'un des maistres de l'Ostel du Roy en la chambre dudit chambellain, en l'ostel du Roy à Saint Pol, à pranre un apelé J. de Beauvaiz, serviteur dudit chambellain, lequel serviteur estoit larron et murtrier, et banni de ce royaume, et pour ce que Montagu, vidame de Laon, et grant maistre de l'Ostel du Roy, ou les maistres d'icellui Hostel, d'une part, se disoient avoir la cognoissance du delict et crime dessus dit, et les maistres des Requestes de l'Ostel du Roy dessus dit aussy se disoient avoir la cognoissance, si faisoit le prevost de Paris, attendu que la bateure avoit esté faicte hors de l'ostel du Roy audit S. Pol et en la maison dudit procureur, afin que la punition dudit cas ne prist delay et defaut de justice pour ladicte altercation, et mesmement attendue la grief maladie du Roy, que Diex par sa grace vueille guerir, et que la chose estoit de trop perilleuz exemple, veu aussy que n'a pas **VIII** ou **X** ans que messire Pierre de Craon avoit batu et villené messire Olivier de Cliçon, connestable de France, l'en se fust enhardi par aventure plus legierement de cy en avant ce temps durant contre les serviteurs royaulz, fu miz au Conseil, comme dessus, comment l'en y procederoit. Sur quoy ne fu pas conclu, car il y eust arrests.

Mercredi, **XXIII**Je jour de janvier. Au Conseil.
Au jour d'ui, ont baillé une cedula maistre N. de
Biencourt, Oudart Gencien et Loyz Blanchet pour estre
enregistrée, dont la teneur s'ensuist:
Le samedi, **XXe** jour de janvier **IIIIc** et **II**, par devant
monseigneur
maistre Henry de Marle, en la presence de François
Chanteprime, comparurent en la Tournelle maistre Loiz
Blanchet,
d'une part, et maistre Oudart Gencien, procureur de
Jehanne la Gencienne, sa mere, d'autre part, et aussy sire
Hemon Raguier et maistre Nycole de Biencourt, pour tant
comme à chascun touche. Et requeroit ledit sire Hemon
que
certains joyeux, c'est assavoir une ceinture, un
chappeau d'or
et une coiffe, qui avoient esté miz en gage par maistre
Jehan
Salant audit sire Hemon, pour la somme de **CCCC** escus
fussent
vendus, et l'argent delivré à lui pour la Royne, nonobstant
l'empeschement miz à ce par les dessusdiz maistre Oudart
et
Nycholas, pour certaines causes que ilz allegoient.
Finablement,
du consentement et accort desdictes parties, et sauf le
droit d'une chacune d'icelles, et sanz prejudice de leur
droit, il
a esté ordonné que la somme de **CCCC** escus dessusdicte
se pranra
sur la part appartenent audit maistre Loiz de ce en quoy
maistre Jehan Jouvenel a esté condempné envers lesdiz
maistres
Loiz et la Gencienne, et lesdiz joyeux seront miz par

devers

ledit monseigneur maistre Henry ou lieu desdiz **CCCC**
escus,

sanz prejudice et sauves les raisons et le droit d'une
chascune

desdictes parties. **MARLE, BLANCHET, BIENCOURT.**

Et ceste presente cedula fu passée, moy present,
le devant dit jour, maiz ceste presente cedula me
devoit après estre baillée, laquelle ne me fut baillée
jusques à ce jour present.

Lundi, **XXIXe** jour de janvier.

Ce jour, les procès par escript de la prevosté de
Paris ont esté receuz.

Ce jour dessusdit, après ce que les dessusdiz procès furent receuz, fu debatue la grace ou remission présentée par messire Charles de Savoisy des jueves derrain passé, à laquelle presentation furent presens messeigneurs le duc d'Orleans, le conte de Tancarville, le sire de Lebret, le premier maistre d'Ostel du Roy nostre Sire, et plusieurs autres seigneurs et gentilz hommes; et pour ce que de stile, puiz que aucun presente une remission en cas criminel, la Court se doit saisir et garnir de son corps, et a l'en accoustumé d'envoyer ycellui crimineulz ou Chastellet, fu promiz par ledit monseigneur le duc d'Orleans à le rendre et ramener en la Court à au jour d'ui, lui fu baillé à celle caution; si sont au jour d'ui retournez les dessusdiz à requerir l'enterinement dudit pardon et remission, et après ce que la lettre de ladicte remission a esté leue en Court, a esté debatue par le procureur du Roy par plusieurs raisons enregistrées par maistre J. de Cessieres, graphier criminel.

Vendredi, **XVJe** jour de fevrier.

Ce jour et environ **X** heures, s'est levé le Conseil, et sont alez aucuns des messeigneurs, presidens et autres,

en la Chambre vert de ce palaiz, pour oïr aucunes propositions sur ce qu'avoient proposé aucuns legas du royaume de Castelle sur la restitution de l'obeysance soustraicte à Benedic, derrainement esleu en pape, pour laquelle restitution concludoient et avoient conclu, comme l'en disoit, ycelz legas de Castelle.

Samedi, **XVIJe** jour de fevrier.

Ce jour, Marie du Cavech a promiz en ma main de non partir d'entre les bastides de Paris jusques à l'ordonnance

de la Court, à peine de mil livres parisis, et sur ce l'ont cautionnée et de ce Pierart du Cavech, bourgeois de Cambray, que l'en dit avoir plus de cent livres de rente ou royaume, et Huart du Cavech, oncle d'icelz Marie et Pierart, son frere.

Juesdi, **XXIJe** jour de fevrier.

Ce jour, a esté publiée en la Court une lettre de par le Roy, par laquelle monseigneur le duc de Berry, oncle dudit nostre Seigneur le Roy, estoit ordonné par le Roy à ordonner et cognoistre sur le fait des finances de ce royaume, instituer et destituer officiers appartenans auxdictes finances, et autres choses contenues en ycelles lettres, avec messeigneurs les ducs de Bourgoigne, oncle, et de Orleans, frere dudit seigneur le Roy.

Ce jour, monseigneur le patriarche et autres executeurs du testament de monseigneur de Giac ont requiz que, pour le prouffit et avancement d'icelle execution, soient maistre Philippe de Boisgillou et R. Mauger,

conseillers du Roy nostre Sire adjoins avec eulz, ce que la Court leur a octroyé.

Vendredi, **XXXe** jour de mars.

Ce jour, m'a enjoint la Court que les lettres que Pons de Cardilhac a mises devers la Court ou procès qu'il avoit contre Renault de Murath, dont mention est faicte ou samedi derrain passé, demeurent devers la Court, ne audit Pons ne soient point rendues et pour cause.

Samedi, **VIIe** jour d'avril.

Ce jour ou environ, me fu baillez en garde par maistre Bertran Thioche, pour monseigneur de Tours, un gobelet d'or, duquel le poiz est contenu en une cedula qui est oudit gobelet, et est ledit gobelet couvert et de estrange façon, à **IIJ** pelles sur le couvercle.

Mardi, **Xe** jour d'avril.

La Court a au jour d'ui donné congié à frere Nycolle de Peronne d'aler à son couvent de S. Quentin jusques à ce que, environ la Panthecoste, l'en appoinctera plus pleinement en sa cause qu'il a contre les arcevesque de Reins, le procureur du Roy et Marie du Cavech, et lui a dit la Court que *interim* ne se tiegne

point à Cambray

pour pueur d'esclande, et lui a delivrée et levée

la main ycelle Court mise telement quelement à certain vin qu'il avoit audit S. Quentin.

Vendredi, **XXe** jour d'avril.

La Court au jour d'ui a donné congié au bailli

d'Amiens de soy en aler, jusques à ce que ycelle Court l'avera mandé sur ce que ledit bailli estoit venuz pour soy excuser ou respondre, se l'en lui voloit aucune chose demander, pour ce que l'en lui avoit donné entendre que le procureur du Roy à Amiens se plaignoit de lui devers ycelle Court.

Samedy, **Ve** jour de may.

Ce jour dessusdit, messire J. de Poupaincourt, premier president, qui devoit prononcer les arrest, a mandé à la Court que ne povoit venir, obstant certaine maladie qui ceste nuit l'avoit arresté.

Vendredi, **Xe** jour de may.

Cedit jour, vindrent messrs Charles de Lebret, chevalier, cousin germain du Roy nostre Sire, connestable, Arnault de Corbye, Chancellier de France, en la Court de par ledit Seigneur et de son commendement, et de par eulz appellez et assemblez en la Chambre du Parlement conseillers, graphiers, advocas et huissiers dont les noms s'ensuivent:

... .

Firent ycelz connestable et Chancellier lire et publier les lettres dont la teneur s'ensuit de mot à mot:

... .

Et ycelles leues, touz les dessus nommez vindrent au giron de mondit seigneur le Chancellier l'un après

l'autre, et touchiez les Sains Euvangiles et la croix un chascun des dessus nommez jura et promit garder et accomplir l'ordonnance royal cy dessus escripte, sanz venir contre. Et puiz fut enjoint et commendé au graphier que ce enregistrast, et feust enregistrée ycelle lettre dessusdicte, et que de ce qui avoit esté fait feist ledit graphier lettre qui seroit mise ou Tresor des Chartres; laquelle ledit graphier a fait, qui est enregistrée avec la lettre cy dessus escripte ou livre des Ordonnances de ceans. Après ce que dit est fait, s'en alerent les dessusdiz connestable et Chancelier en la Chambre des Comptes pour pareillement faire, comme ceans avoient fait.

Mardy, **XVe** jour de may.

Environ **X** heures après les Plaidoiries, fu ordonné par Conseil que le receveur de l'Ordinaire de Paris, pour ce que, sommez de paier les huissiers de ceans, ne les voloit paier pour les grans charges extraordinaires que se disoit avoir, et mandez que venist parler à la Court, avoit desobey, et pour ce la Court au jour d'ui envoie **IJ** sergens du Chastellet pour mangeurs en son hostel, jusques à ce que fust venu en ycelle Court,

ycellui receveur avoit fait aler hors lesdiz sergens de son hostel en usant de menasses, comme relatoient lesdiz sergens. Sur quoy ledit receveur au jour d'ui oy, veu et attendu que parloit moins honorablement que ne devoit, et que lui retraict à part, *dum domini appunctarent*, avoit dit auxdiz huissiers que tant feroit il piz, sur ce la Court accertenée et ce que dit est, a envoyé ledit receveur ou Chastellet, et les **IJ** sergens dessusdiz disner en son hostel.

Juesdi, **XVIJe** jour de may.

Cedit jour, fu question en la Court à savoir se en taxation de despens faicte par commissaires en la Court doie venir la despense faicte en espices données aux visiteurs des procès de ceans, quant ladicte Court donne congé de donner et pranre lesdictes espices.

Sur quoy a esté respondu par la Court que ladicte despense d'espices ne doit point venir en taxation.

Vendredi, **XVIIJe** jour de may.

Ce jour, le receveur de Paris, dont est parlé cy dessus mardi prouchain, est venus en la Court, humblement

à genoulz, et a supplié à la Court qu'il lui

soit pardonné, se par avant n'a eu si grant reverence

à ladicte Court, comme appartient, car ce li venoit *ex ignorantia*, et paiera les huissiers

le miex et le

plus tost qui pourra, si lui a doné congé la Court.

Samedi, **XIXe** jour de may.

Ce dessusdit jour, a esté dit de par la Court, après

les arrests pronunciez par messire Pierre Boschet, president, que, pour ce que la Court a entendu par plusieurs foiz que moult des procureurs de ceans exigent de leurs maistres, soubz umbre de la Court et pour avancer les procès de leursdiz maistres, grans finances et argent, en disant à leurs maistres que faut argent pour espices pour l'avancement de leurs procès, combien que ycelz procureurs retiennent souvant l'argent devers eulz sans le restituer, contre l'onneur de la Court et le serement qu'il ont fait et font ceans, a esté defendu ausdiz procureurs que de cy en avant, à peine de privation de leurs offices et d'estre reputez pour parjures, ne exigent quelque chose, sinon par la permission et licence d'icelle Court, que aucune foiz, quant les procès sont gros et que touchent grans parties, donne bien congié de pranre et donner **IJ** ou **IIJ** laiettes d'espices.

Lundi, **XXJe** jour de may.

Cedit jour, environ **IX** heures, fu denoncé à la Court que messire J. de Poupaincourt, qui des Pasques continuellement avoit esté en lit de maladie moult grieve, d'excoriation de la vessie principalement, comme disoient les phisiciens, estoit trespasé, qui par environ **IIJ** ans avoit tenu le lieu de premier president ou lieu de messire Guillaume de Senz, et par avant avoit esté ycellui Poupaincourt advocat du Roy, et lequel a finé ses derrains jours *sancte atque catholice*,

comme par relation des assistens à sa fin a esté
relaté:*Anima ejus in pace requiescat.*

Mardi, **XXII**e jour de may.

Cedit jour, dist ou Conseil monseigneur le Chancelier
que le Roy nostre Sire avoit donné à maistre

Henry de Marle, president *in tertio loco*,

le lieu premier

de president que avoit feu messire J. de Poupaincourt,
maiz afin que les ordonnances de ceans, par lesquelles
l'en doit venir par election audit lieux, ne

fussent blessées, avoit dit au Roy en le remerciant
qu'il voloit bien estre oudit lieu,*cum benignitate et*

beneplacito Curie, et lors ce que dit est, recita ledit

de Marle en touchant la maniere comment le Roy lui
avoit octroyé, car ce avoit esté à la poursuite de ses

amiz et à l'instigacion. Ce fait, pour ce que messire
Pierre Boschet, secont president, dist que ladite

impetration et octroy avoit esté fait en son prejudice,

et que du stile de ceans et par raison il devoit estre
oudit premier lieu et que il s'opposoit, se trairent les

dessus diz Boschet et Marle arrieres et hors de la

Chambre, et pour ce que aucuns de mes dessus diz

seigneurs ne vodrent point dire leur oppinion dudit

debat en hault, vint un chascun au giron dudit
monseigneur

le Chancelier et par maniere d'election dire

votum et oppinionem suam, telement que ledit Marle

oudit lieu eut plus de voix. Et pour ce ycelz Marle et

Boschet rappelez, fu dit par ledit monseigneur le Chancelier que, attendu que ledit Boschet estoit bien aagez et foible et maladz, et ledit Marle fort et laborieuz, si estoit esleu par la plus grant partie de trop, nonobstant que toute la Court eust moult pour recommandée

la personne dudit Boschet, attendue ses suffisances de science, de vertus et autres graces dudit Boschet, pour quoy seroit recommande au Roy à ce que en autre maniere l'eust pour recommandé. Et puiz fu ledit Marle installé oudit premier lieu par ledit monseigneur le Chancelier et fit le serement accoustumé.

Cedit jour, après ce que dit est fait, commist ledit monseigneur le Chancelier ledit maistre Henry et maistre Philippe de Boisgillou à oir *vota dominorum* en l'election d'aucun ou lieu dudit Marle, pour ce que s'en voloit aler au Conseil à S. Pol, en laquelle election eurent voix messeigneurs, maistre Jaques Bouju, J. de Longueil, P. Le Fevre, Robert Mauger, Jaques de Ruilly, president des Requestes du Palaiz, Pierre Buffiere et Symon de Nanterre, et non obstant que l'un d'eulz, c'est assavoir, maistre Robert Mauger eust eu plus de voix, toutevoie il a pleu au Roy d'avoir donné ledit lieu à maistre Jaques de Ruilly, dessus nommé. Mercredi, **XXIIIe** jour de may.

Hier, après disner, alerent messeigneurs de la

Court, premier president, et grant foison de mesdiz seigneurs convoier à cheval le corps de messire J. de Poupaincourt, jadis premier president, que l'en portoit ou menoit àRaye, et le convoierent jusques hors de la porte Saint Deniz.

Cedit jour, maistre Mahiu de Mondieres a fait es mains de certains commissaires donnez par requeste le serment de procureur.

Vendredi, **XXVe** jour de may.

Ce jour, la Court a donné congïé à Hebert Camus d'aler aux nopces jusques à lundi prouchain inclusivement.

Ce jour, monsr le duc de Berry, par la voix de maistre Michiel Le Buef, son secretaire, qui pour ce est venus ceans, madame Alienor de Pierregort, mere de Loyse de Clermont, messire J. de Torsay, d'Aufemont, chevaliers, Jaques de Rouvray et J. de Bourc, escuiers, en leurs personnes, et messire Pierre de Menou et messire Charles de Chambly, chevaliers, par cedules signées de leurs seaulz, se sont consentiz au mariage de François de Montberon, d'une part, et de ladicte Loyse de Clermont, d'autre part, et partant a la Court revoqué et revoque la defense qu'avoit autrefois faite, et consent ledit mariage, *presente et non contradicente Regis procuratore*.

Samedi, **XXVJe** jour de may.

Cedit jour, vindrent monseigneur le Chancelier, le

grant maistre d'ostel nommé messire J. de Montagu,
vidame de Launoiz, chevalier, messire Jaques de
Bourbon, messire Renaut de Trie, admiral de la mer,
le sire de Heugueville et plusieurs autres chevaliers
et escuiers en la Court, où ledit monseigneur le
Chancellor
dist comment, selon les ordonnances royaulz
commendées à estre gardées par plusieurs foiz et
confirmées
par le Roy nostre Sire, avoit esté faite election
de l'un de messeigneurs de la Court de ceans, ou
lieu de monseigneur maistre H. de Marle, nagueres
tiers president, et de present premier president, maiz
ce non obstant, le Roy avoit volu que monseigneur
maistre Jaques de Ruilly, nagueres president es
Requestes du Palaiz, fust oudit lieu de Marle, et combien
que ledit monseigneur le Chancellor eust moult
fort defendu la cause de la Court et dudit esleu, toutevoie
le Roy lui avoit commendé qu'il sellast la lettre
du don par lui fait, et combien que il eust fait tout
son effort et pour justice de ce que dit est, et moult
recommandé la personne dudit esleu, neantmoins par
le commendement du Roy exprès avoit seellé la lettre
dudit don. Pour quoy fu appellé ledit de Ruilly, qui
fit le serment accoustumé, et après fu installé oudit lieu.
Cedit jour, après ce que dit est, fu faite election,
par l'ordonnance du Roy et de monseigneur le
Chancellor,
ou lieu de maistre J. Luillier, conseiller du Roy
nostre Sire en la Chambre des Enquestes, qui avoit
le lieu de maistre Jehan Du Drac, qui estoit miz ou

lieu de president des Requestes qu'avoit maistre Jaques de Ruilly, et pour ce que entre ceulz qui eurent voix, **IJ** qui eurent pluseurs voix que les autres, furent *in equali numero vocum*, ne fu pas conclu, maiz seulement avisié que l'en rapporteroit à monseigneur le Chancelier ce qu'estoit fait, si conclurroit ou adviseroit par autre maniere.

Lundi, **XXVIIJe** jour de may.

Devant les Plaidoiries furent messeigneurs des **IJ** Chambres assemblez, et après ce que fu relaté par monseigneur le premier president que monseigneur le Chancelier lui avoit dit que, sur ce que, en l'election d'un ou lieu de maistre J. Luillier, avoient eu maistre Estienne Joffron et messire Guillaume Benoit plus de voix, à chascun d'eulz deuz **XXIJ**, ledit monseigneur le Chancelier avoit donné sa voix à Joffron, attendu qu'il avoit don du Roy, et non l'autre, et que mesdiz seigneurs ou la plus grant partie furent d'assentiment que ledit Joffron fust receu, ledit Joffron a fait le serment acoustumé, et par ainsy a esté receu oudit lieu.

Juesdi, derrain jour de may.

Ce jour, la Court a donné congé à maistre Giles Labbat d'aler en pelerinage jusques au vendredi après la Panthecoste, pourveu que laissera un procureur substitut à ses causes, se mestier est.

Mardi, **XVIIe** jour de juin.

Cedit jour, maistre Jaques du Rully, president en Parlement, a defendu au graphier que de cy en avant il ne signe despens à taxer par messieurs de ceans aux jours que l'en plaidera après disner, pour ce que il y a defaut de mesdis seigneurs auxdictes Plaidoiries d'après disner.

Lundi, **XXXe** jour de juillet.

Ce jour, la Court a veue certaine lettre patente seellée en la Chancellerie, par lesquelles le Roy mandoit à la Court qu'elle jugast un certain procès qui pendoit ceans entre messire Loiz de Chalon, chevalier, d'une part, et le procureur du Roy, d'autre, pour la conté d'Aucerre et de Tonnerre, d'autre part, et pour ce que la judication avoit esté longuement differée, la dicte Cour, eu sur ce conseil où messeigneurs dessus nommez estoient, et aussy messire l'evesque de Bayeuz, sire Mahiu de Lignieres, J. Chantepime, maistre Ysembart Martel, Miles d'Angeul, maistres en la Chambre des Comptes, maistre Robert Broisset, N. de Biencourt, Jaques Du Gard, a ordonné, tout consideré, que l'en jugera, et sera bailliez ledit procès à visiter.

Vendredi, **IIJe** jour d'aoust.

Cedit jour, vindrent en la Court certains chevaliers espaignoz qui apporterent certainnes lettres faisans mention de treves prises, et convenues, et jurées entre le roy de Castelle, d'une part, et le roy de Portugal, d'autre part, jusques à **X** ans, lesquelles lettres furent leues et publiées, les huiz ouvers publiquement, et requirent lesdiz Espaignos avoir lettre de ladicte publication.

Samedi, **IIIJe** jour d'aoust.

Ce jour, J. Le Bossu me dist que messire Pierre Boschet lui avoit dit qu'il me deist que je rendisse certains volumes, **XIIin numero**, de droit canon qui estoient devers la Court pour cause de certain debat d'entre les executeurs du patriarche jadis d'Antioche, d'une part, et l'arcevesque de Tours, d'autre part, et que je les baillasse à un religieux appellé frere Helie, attendu certain accort passé entre le curateur de l'execution dudit feu patriarche, d'une part, et ledit religieux, d'autre part, et pour ce que je en faisoie difficulté, attendu que ledit arcevesque ne se consentoit point que lesdiz livres fussent hors des mains de la Court, jusques à ce qu'il fust décidé dudit debat qui estoit

d'entre certains commissaires de la Court sur la somme de **Ijc** frans ou escus que ledit arcevesque demandoit sur ycelz livres, ledit monsr Pierre envoya et au Palaiz et en mon hostel un sien parent et un prestre qui me dirent que ledit monsr Pierre estoit esmeu contre moy de ce que je ne bailloye lesdiz livres et qu'il s'en plaindroit à la Court lundi prouchain, si alay audit monsr Pierre et lui diz la difficulté que je faisoie, et ce nonobstant, pour ce que voloit qui fussent renduz, attendue l'auctorité dudit monsr Pierre, ottroye à rendre lesdiz livres.

Dimenche, **Ve** jour d'aoust.

Cedit jour, ay rendu les livres dont mention est faicte ou jour precedent audit religieux et par inventoire, lequel m'avoient baillié les gens de l'arcevesque de Tours.

Mardy, **VIIIe** jour d'aoust.

Ce jour, ay baillié à monsr le doyen de Tours **VIII** frans en son hostel, que tenoit pieca pour receuz, et que avoit bailliez devers la Court Robin Chapeau dès devant Pasques.

Samedi, **XJe** jour d'aoust.

Ce jour, la Court a ordonné que par maniere de provision l'abbé de Clugny prestera et baillera à cellui qui de par la Court sera commiz dès maintenant **C** frans, et le premier jour d'octobre prouchainement venant autres **C** frans, pour estre convertiz es edifices du college

de Clugny fondé à Paris, à les recouvrer où il
appartendra, et aux jours d'Amiens prouchainement
venans la Court jugera sur la provision, veues les
informations faictes et à faire par maniere d'enqueste.
Juesdi, **XXIII**e jour d'aoust.

Ce jour, la Court a donné congié à me Nycholas
Maignien d'aler es parties de Breteigne jusques à la
S. Martin, par ce que il lessera substitut ydoyne et
suffisant
à ses causes.

Samedi, premier jour de septembre.

Au jour d'ui, a ordonné la Court que pour le roolle
porter à Avignon chascun de messeigneurs clers payeront
III escus, et les laiz **IJ** escus, et sont esleuz à porter
ledit rolle messrs me G. de Gaudiac, doyen de S. Germain
l'Aucerroiz, et H. Grimault, doyen de Noyon.

Vendredi, **VI**e jour de septembre.

Ce jour, m'a dit messire Ymbert que je signasse
l'audition du compte du cardinal d'Amiens à maistre
Henry de Savoisy.

Lundi, **Xe** jour de septembre.

En la Chambre, estans aucuns de messeigneurs presidens et conseillers, fu ordonné, oye la relation de me J. Garitel et G. de Villiers, en la cause d'entre messire J. Morice, prestre, l'Université de Paris et le procureur du Roy, d'une part, et l'evesque de Paris, son official et les religieux de Saint-Eloy de Noyon, d'autre part, que l'argent, livres et tous autres biens prins chiez J. Micheau en la rue S. Jaques, estans es mains de l'evesque ou de ses commiz, seront miz realement

et de fait en la main de la Court, restablisement fait *realiter et de facto* desdiz biens en ladite maison,

et aussy fait restablisement des biens priz en la maison dudit evesque, et seront gouvernez et conservez par la main du Roy, et sur yceulz sera faicte provision audit Morice de la somme de **IJc** frans, et oultre sera dit que le procès estant d'entre ledit evesque de Paris, entre lesdiz religieux de S. Eloy et Morice surserra jusques à ce que le procès estant en la Court sera fini ou que autrement en sera ordonné par ladicte Court.

Mardi, **XJe** jour de septembre.

Fu ordonné par mess. les presidens que l'en ne fera aucune provision en la cause du duc de Bourgoigne et des habitans de Douay à l'encontre des chapitre de S. Amé et de Saint Pere dudit Douay, maiz en ordonneront

les commissaires quant il seront par delà à faire l'enqueste, comme bon leur semblera.

Mercredi, **XIIJe** jour de septembre.

Me fu dit par monsr me Jaques de Ruilly que je enregistrasse comment maistre Pierre Buffiere estoit

surrogé ou lieu de me André Marchant à conserver les biens du feu evesque de Poitiers et à faire l'inventoire d'iceulz, lequel André y avoit autre foiz esté commiz.

Mardi, **XVIIIe** jour de septembre.

Cedit jour, Raoulin de la Chaucée est venus renuncer par devant le graphier de la Court à office de procureur, lequel souloit ceans exercer, et a requiz estre par ledit graphier enregistré, et a dit que dudit office de procureur n'avoit mie entention de s'en plus entremettre.

Mercredi, **XIXe** jour de septembre.

Cedit jour, a esté donné delay au receveur de Gisors de payer les gaiges de messeigneurs de ceans des moiz de juillet et d'aoust jusques à **VIII** jours avant la S. Martin prouchainement venant, et à paier le moiz de septembre jusques à la S. André ensuiant.

Mardi, **Ie** jour d'octobre.

Le graphier de la Court a rendu un livre de Croniques qui se commence ou second feuillet escript *[in] Vidia* et ou penultieme

de equis, à messire Guerin,

abbé de Pruilly, lequel livre monsr l'abbé de Monstier Erraine avoit miz par devers la Court pour estre rendu audit abbé de Pruilly, selon certain appointement fait aux Grans Jours derrainement tenus à Troyes.

Lundi, **XIJe** jour de novembre.

Cedit jour, furent à huiz cloz leues certaines lettres empétrées sur le lieu de maistre Thomas d'Aunoy ou de maistre J. Mangin aux Enquestes qui monta en la Grant Chambre ou lieu dudit me Thomas, qui avoit lieu en la Chambre des Comptes de nouvel, et pour ce que quatre personnes avoient empétré lesdictes lettres sur ledit lieu, fu fait scrutine et election, et fu

tandem

esleu par la plus grant partie de ceulz... estans pour lors au Conseil..., maistre Julien Hue, tout veu et considéré.

Mardi, **XIIJe** jour de novembre.

Cedit jour, maistre Julien Hue a esté receu conseiller en la Chambre des Enquestes ou lieu me J. Mangin, qui a esté receu en la Grant Chambre ou lieu de maistre Thomas d'Aunoy.

Juesdi, **XVe** jour de novembre.

Hier, le graphier de la Court delivra à Guillaume de Baignac, escuier de monsr l'arcevesque de Tours, un gobelet d'or dont mension est faicte au **VJe** jour d'avril derrain passé, selon le registre du matin, qui avoit esté miz en depest devers la Court, et lequel a esté prisié environ **VIJxx** escus, et parmi ce ledit graphier a receu ou lieu dudit gobelet en depest **VIJxx** escus, et ce a fait par vertu de certaines lettres closes à lui envoiées par ledit arcevesque.

Vendredi, **XVJe** jour de novembre.

Ce jour, se sont venus complaindre en la Court l'arcevesque

de Reins, le procureur du Roy, Marie du Cavech et **IJ** autres bourgoiz de Cambray, sur ce que ou contemps, comme ilz disoient, du Roy et des arrests de la Court qui sont contenus ou registre du Parlement derrain passé, avoient esté banniz de Cambray.

Mercredi, **XXJe** jour de novembre.

Hier, furent leues certaines lettres que monseigneur le duc d'Orleans avoit ordonné à envoyer à Henry de Lanclaste, soy disant roy d'Angleterre, lesquelles ont esté registrées ou livre des Ordonnances à la requeste dudit duc d'Orleans.

Mardi, **XXVIJe** jour de novembre.

Furent au Conseil, environ **X** heures, après les Plaidoiries, messeigneurs des **IJ** Chambres, et audit Conseil maistre Pierre de L'Esclat, maistre des Requestes de l'Ostel du Roy, denunça à la Court que, nonobstant que Bureau de Dompmartin, son cousin, et changeur, eust proposé erreurs d'une sentence donnée par certains reformateurs generaulz donnez par le Roy à cognoistre par especial de mauvaiz contraux, illicites ou usuraires, faiz par ce royaume par laquelle ledit Bureau

eust esté condempnez en **IJ** mil frans ou escus, et eust empétré adjournement, et fussent receuz lesdictes erreurs par les maistres des Requestes de l'Ostel du Roy, lesdiz reformateurs ou le procureur du Roy aux diz reformateurs c'estoit opposé à l'audience que ledit adjournement ne fust point baillez audit Bureau; et outre disoit que aucuns desdiz reformateurs, comme messire Hector de Chartres, chevalier, avoit dit qu'il n'entreroit jà en la Court de Parlement sur lesdictes erreurs, et de ce sembloit aussy qu'il chargast maistre Guillaume Chanteprime, soy disant de ladicte reformation;

sur quoy la Court vouldist remedier, attendu que ce touchoit ladicte Court de Parlement et son honneur,

veu que onques maiz n'avoit esté veu, que quant l'en proposoit erreurs de quelzcnques reformateurs,

que l'en n'en cogneust en ladicte Court, puiz qu'elles fussent receues par lesdiz maistres des Requestes. Sur quoy, tout considéré, fu ordonné que **IIII** de messeigneurs iroient à monseigneur le Chancelier en lui requerant qu'il delivrast ledit adjournement, et fust envoyé en la Court avec autres lettres touchans ceste besoigne, pour veoir se ledit adjournement estoit convenable et en forme deue, et ce fait, l'en verroit que l'en feroit dudit chevalier.

Juesdi, **VJe** jour de decembre.

Au jour d'ui, Bureau de Dompmartin, changeur et

bourgoiz de Paris, a deposé et miz par devers la Court
la somme de deux mil frans en quoy avoit esté
condempnez

envers le Roy par messieurs les reformateurs
sur le fait de la police; pour quoy ledit Bureau avoit
supplié estre receu à proposer erreurs, et à ce a esté
receu par le Roy nostre Sire.

Mardi, **XJe** jour de decembre.

Ce jour, Bureau de Domp martin, bourgoiz de Paris,
s'est opposé et s'oppose à ce que certaine finance, qui
est devers la Court mise et consignée par l'ordonnance
du Grant Conseil pour occasion de certaine
condempnation

faicte contre lui par les reformateurs de la police
de Paris en la somme de **IIm** frans, ne soit baillée ne
delivrée à aucun, ne mise hors de la Court sanz le oïr.
Cedit jour, a esté baillée au graphier une cedula
signée de la main de J. Tarenne, changeur et bourgoiz
de Paris, dont la teneur s'ensuit:

Je Jehan Tarenne, changeur et bourgoiz de Paris, promez
paier au Roy nostre Sire pour Bureau de Domp martin,
bourgoiz

de Paris, la somme de **VIxx** livres parisis, pour cause de
double amende, s'elle chiet en certaines erreurs proposez
par
ledit Bureau sur certain jugement ou arrest des conseillers
du

Roy nostre dit Seigneur sur le fait de la police de la ville
de Paris,

et m'en oblige à paier ladicte somme, quant mestier sera,
par

ceste presente cedula signée de mon seing manuel, le **XIe**
jour

de decembre, l'an mil **CCCC III**. J. TARENNE.

Lundi, **XIIIJe** jour de decembre.

Ce jour, le graphier, par appoinctement fait par
messieurs les laiz ou Chastellet de Paris, comme lui a

esté relaté par monseigneur le premier president, a delivré à Bureau de Dampmartin, changeur, la somme de **IIm** frans en escus, du consentement de Guillaume Barbery, chambellant et conseiller du Roy nostre Sire, et en la presence de J. des Poulettes, tresorier de monseigneur de Bourgoigne, de J. Tarenne et de Michiel de Laillier, et plusieurs autres, laquelle somme de **IIm** frans avoit esté consignée devers la Court pour certaine cause, comme appert par le registre du **VJe** jour de ce present moiz. Et a esté faite ladicte delivrance par tel que les dessusdiz Tarenne et Laillier ont promiz en la main dudit graphier de rendre et restituer à la dicte Court les dessusdiz **IIm** frans, toutes et quantes foiz que requiz en seront, et ledit Bureau a aussy promiz de les en desdommagier et d'eulz rendre ladicte somme, se pour lui la baillent.

1404.

Mercredi, **IJe** jour de janvier.

Cedit jour, la Court, oye la relation du commissaire envoyé à Suessons entre l'abbé de St Mard, d'une part, et le couvent dudit St Mard de Suessons, d'autre part, a ordonné que le temporel dudit abbé sera miz reaument et de fait en la main du Roy, et sera gouverné par bonnes et suffisantes personnes à employer et convertir

à l'entretenelement et acomplissement de certain arrest ou accort par arrest du **XIJe** de decembre **CCCC I**, en quoy ledit abbé avoit esté condempnez, jusques à ce que par la Court en soit autrement ordonné,

appellationibus

frivolis non obstantibus quibuscunque, et

aussy *oppinionibus frivolis non obstantibus*.

Mercredi, **IXe** jour de janvier.

A conseiller l'arrest d'un prouffit d'un deffaut d'entre Hubert Gontier, espicier, demourant à Lion, d'une part, et Estienne de Lachaux dit Bouchart, d'autre part.

Item, d'entre ledit Hubert Gontier, d'une part, et Pierre Girardet et sa femme, d'autre part... .

Ces **IJ** arrests cy devant enregistrés furent conseilliez dès vendredi derrain passé, maiz pour ce que le rapporteur

dut faire la conclusion pour plus seurement estre enregistrée, attendu le cas qui souvant n'avient pas, pour quoy furent lors messrs assemblez en competant nombre, si m'a au jour d'ui ledit rapporteur baillié la conclusion que j'ay enregistrée du jour d'ui.

Juesdi, **Xe** jour de janvier.

Ceditjour, ont esté publiées certaines lettres qui sont enregistrées ou livre des Ordonnances, contenans en effect que nul prelat ou autre beneficié ne paie à Court de Romme quelque chose à cause de vaccans deuz pour arrerages ou autrement, tant du temps de la sustration faicte au Pape, pendant laquelle les ordinaires ont donnez les benefices, que par avant **XL** ans.

Cedit jour, ont esté publiées certaines lettres sur la reformation des procureurs generaulz du Parlement, lesquelles sont enregistrées en la Court.

Samedi, **XIXe** jour de janvier.

Cedit jour, a esté ordonné que, combien que les eschevins de Cambray ayent esté sommez de rappeler certain ban qu'ilz ont fait ou contempt des arrests de ceans contre Marie du Cavech et autres, vendront ceans dedans **XV** jours, se bon leur semble, dire leurs excusations, et se elles valent bien, senon seront sommez, comme il appartendra.

Lundi, **XXJe** jour de janvier.

Maistre Pierre Buffiere, conseiller du Roy nostre Sire, s'est opposé et s'oppose que aucun ne soit receu au lieu de maistre J. de Saulz en la Grant Chambre avant lui.

Mercredi, **XXIVe** jour de janvier.

Me fu dit par monsr messire Ymbert de Boisy, president, que je enregistrasse certain appointement fait par la Court, comme me dist, combien que je estoie absent à faire l'appointement, c'est assavoir d'entre maistre Pierre Bonpain, complaignant en cas de nouvelleté, d'une part, et les escoliers du college de Montagu, d'autre part.

Il sera dit que le college jouira de son temporel par maniere de recreance.

Samedi, **XXVJe** jour de janvier.

Ce jour, J. de Flemechon, huissier d'armes du Roy

nostre Sire, a au jour d'uy dit après disner, environ **IIII** heures, au graphier qu'il ne baillast point à executer l'amende en laquelle Engrenain avoit au jour d'ui esté pronunciez comme condempnez, et ledit graphier lui respondi que ordonnance estoit ceans faicte de par le Roy, que l'en n'obeist point à mandemens de bouche, et que ce diroit volentiers à la Court lundi prouchain.

Vendredi, **XVe** jour de fevrier.

A conseiller l'arrest d'entre le procureur du Roy, d'une part, et J. du Boiz et Nycolas Jaloux, d'autre part, sur le plaidoyé du mardi **XXVJe** de juin **CCCC III**, et tout veu:

Il sera dit que les trois cent escus seront miz en la main de la Court, devers laquelle demourront comme acquiz et confisquees au Roy, pour employer ou bien publique d'icelle Court de Parlement, et sanz autre amende et sanz despens.

Vendredi, **XVe** jour de fevrier.

Cedit jour, à la requeste des amiz et nommez executeurs ou testament de messire J. Tabari, evesque

de Therouenne, la Court a mandé et commiz à maistre Julien Le Fevre, nommé entre les autres executeurs dudit evesque, que se transporte à Therouenne et en la ville d'Ayre, et es autres lieux où ledit evesque a aucuns biens, et touz et chascuns yceulz il mette à la conservation et à la garde d'iceulz et de l'execution dudit evesque à la main du Roy et de la dicte Court, à laquelle ledit testament est soumiz, et y commette de par le Roy gardes neccessaires, et face au surplus ce qu'il appartient à faire oudit cas, en parfaissant ce qui a esté commencié par Aleaume Cachemarée, huissier de Parlement.

Mardi, [XIXe](#) jour de fevrier.

Cedit jour, m'a esté commandé par monseigneur le premier president que je face lettres de par la Court au Pape pour maistre Phelippe de Boisgillou à l'eveschié de Terouenne, et aussy pareillement aux cardinaux.

Mercredi, [XXe](#) jour de fevrier.

Cedit jour, j'ay leu à monseigneur le premier president certaines lettres pour envoyer au Pape pour maistre Phelippe de Boisgillou, conseiller du Roy nostre

Sire, à sa promotion de l'eveschié de Terouenne, lesquelles ledit monseigneur le president m'avoit commendées.

Mercredi, **XXVIIe** jour de fevrier.

Cedit jour, Nycholas Romain, huissier de Parlement, a miz devers la Court trois cens escus d'or, en quoy avoit esté J. du Boiz, jadis procureur du Roy à Meauz, condempnez à mettre ycelz devers la Court comme confisqués, et de quoy avoit esté executez, et de ce que dit est appert par l'arrest prononcé samedi derrain passé; des quelz **CCC** escus ont esté baillez **V** escus audit Romain pour son salaire d'avoir vaqué à ladicte execution par **IIJ** jours entiers à Meaulz, où pour ce avoit esté et avoit priz des biens dudit du Boiz pour les vendre et soubhaster, obstant ce que ledit du Boiz ne delivroit pas legierement, ne ne bailloit lesdiz **CCC** escus, comme la Court avoit ordonné.

Juesdi, **XXVIIIe** jour de fevrier.

Ce jour, messire Guillaume de Dormans, arcevesque de Senz, a fait dire au graphier par maistre Renault Rabay, conseiller du Roy, comme il dit, que ledit graphier enregistra que ledit arcevesque, puiz **VIII** ou **X** jours, avoit perdu son signet.

Samedi, premier jour de mars.

Cedit jour, a esté defendu au graphier que il ne reçoive nul accort à passer sanz le congié et consentement de la Court.

Juesdi, **XXVIJe** jour de mars.

Cedit jour, messire Ymbert de Boisy, president, a donné congié à maistre J. de Combes d'estre hors les juevesdi, venredi et samedi après Pasques.

Vendredi, **XXVIIJe** jour de mars.

Ce jour, la femme de Robin Chapeau a miz devers la Court **VIII** frans que son mari devoit à maistre N. d'Orgemont, conseiller du Roy nostre Sire, pour les lui bailler.

Vendredi, **IIIJe** jour d'avril.

Cedit jour, a esté faicte election ou lieu de feu maistre Robert d'Acquigny, jadis conseiller du Roy nostre Sire en la Grant Chambre de Parlement, et estoient nommez en ladicte election par vertu de leurs lettres obtenues dudit Seigneur maistre Guillaume Guerin, maistres Hector de Brouffignac, J. Romain, J.

Vivien, André Marguerie, Guillaume de Longueil, messire Guillaume Benoist, *doctor*, Jaques de l'Espoise.

Et à ladicte election ont esté messire Arnault de Corbye, chancelier, le patriarche d'Alexandrie, les archevesques de Senz et d'Aux, les evesques de Paris, de Bayeux, de Tournay et de Lodeve, et messeigneurs des **IJ** Chambres, en laquelle election n'a pas esté conclu.

Juesdi, **Xe** jour d'avril.

Cedit jour, sur ce que le graphier se plaignoit à la Court que les charpentiers, qui avoient fait le plancher et ceulx qui devoient faire les aumaires de la Tournelle où sont gardez les registres d'icelle Court, et desjà en avoient fait la plus grant partie, n'avoient ancor receu que **IIIJxx** livres et ne povoient estre paieez du residu par le receveur des amandes, et par ce demouroit la besoigne imparfaicte ou prejudice du Roy et de la Court, a esté donné congié et licence et dit au graphier dessusdit que pour parfaire icelle besoigne, il praigne cent escus sur la somme de **IIJc** escus qui sont ou estoient devers la Court, à cause de certaine confiscation par arrest, en laquelle avoit esté condempnez J. du Boiz, jadis procureur general du Roy à Meaux, et la Court se, et quant bon lui semblera, recouvrera dudit receveur ou d'autre ladicte somme de cent escus.

Vendredi, **XJe** jour d'avril.

Au jour dieu, a esté receu maistre Hector de Brouffignac en conseiller du Roy nostre Sire, ou lieu de maistre Charles de Vaudetar, en la Chambre des Enquestes, qui a esté receu en la Grant Chambre ou lieu de feu maistre Robert d'Acquigny, et combien que ledit Hector à faire l'election du **IIIJe** jour de ce moiz n'eust eu pas plus de voix, toutevoie, pour ce que messire Guillaume Benoit n'estoit pas present, maiz estoit à Court de Romme en son temps, par especial avant la subtraction faicte au pape Benedic **XIIIe**,

et estoit doubte que ne retournast pas, et que maistre Guillaume Guerin, qui après ledit Benoit avoit eu plus de voix, estoit puiz **IIJ** moiz ou **IJ** compaignon du chancellier

de monseigneur le duc de Berry et maistre des Requestes dudit duc, si esperoit l'en que ne se tendroit pas à la besoigne ceans, et ledit Hector avoit plus de voix après eulx que les autres compriz en l'election, l'a receu la Court, et ce a esté enjoint au graphier estre enregistré, pour ce que aucuns auroient ymagination que l'en l'eust receu en faveur du conte d'Armignac, qui avec autres seigneurs avoient esté en la Court à recommander ledit Hector.

Sur ce que information avoit esté contre les eschevins de Cambray faicte, sur ce qu'ilz avoient banni Marie du Cavech et **IJ** autres bourgoiz de Cambray, ou prejudice et ou contemps de certains arrests donnez en la Court de ceans en juin derrain passé, comme l'en disoit, et la forme de la loy de Cambray non gardée, et que yceulx eschevins eussent envoyez certains messages fondez de procuration pour eulx excuser en la Court de ceans, et au Grant Conseil, se mestier estoit, et eussent obtenu certaines lettres par lesquelles le Roy eust volu et vouldist que, en jurant et affermant par leur procureur ou procureurs ayans à ce pouvoir et mandement especial par devant monseigneur le Chancellier, que lesdiz bannissemens et punitions par eulx et autres justiciers de ladicte ville faiz à l'encontre desdiz banniz et autres, n'ont esté faiz ou contemps du Roy ne de sa Court, ilz fussent tenez pour excusez et demourassent paisibles, et ledit serment le procureur desdiz eschevins de Cambray eussent fait devant ledit Chancellier, comme portoit ladicte

lettre royal, laquelle lettre eussent requise yceulx eschevins de Cambray ou leurs procureurs estre ceans verifiée, et le procureur general du Roy eust eu delay de dire contre ycelle lettre ce que voudroit, ycelle veue, et puiz ycellui procureur du Roy eust fait demander par la Court au conseil et procureurs d'iceulx eschevins, se, après ce proposé qu'il avoit entention de proposer et dire contre ladicte lettre, ilz voloient prandre droit en la Court sur le proposé des parties sur la verification de ladicte lettre, à ce que l'en ne perdist temps, et ilz eussent respondu que les procureurs d'iceulx eschevins n'avoient puissance que de jurer ce que dit est et excuser lesdiz eschevins, et non pas à pranre droit ne autrement ceans: a esté dit par la Court que donques l'en leur rendist leur lettre, et leur a esté rendue par le graphier.

Samedi, [XIJe](#) jour d'avril.

Cedit jour, après la relation du graphier oyée qui avoit esté envoiez par devers monseigneur le Chancelier pour savoir se son entention estoit que l'en alast aux Jours à Troies ceste année, et ycellui Chancelier eust respondu que, considéré que c'estoit le prouffit de tout le paiz de Champagne d'y aler, et qu'il lui plaisoit bien, se messeigneurs y vouloient aler, que l'en y alast, se guerres n'empeschoient, a esté ordonné que iroit tenir lesdiz Grans Jours.

Mercredi, [XVJe](#) jour d'avril.

Cedit jour, le graphier a delivré et baillié cinquante

frans sur le salaire de la façon des aumoires que l'en fait en la Tournelle à Guillaume Cirasse, charpentier ou hucher, sur les **C** escus qu'il avoit congié de pranre es **IIIc** escus, comme appert par le registre du **Xe** de ce present moiz.

Samedi, **XIXe** jour d'avril.

Ce jour, furent leuz et nommez pluseurs procureurs esleuz par la Court devant touz autres pour practiquer ceans pluseurs ostez du roole pour pluseurs plaintes qui en estoient venues tant à la Chancellerie que en la Court de ceans, et leur fut commendé que se gardassent de cy en avant de deshonneur et desloyauté, et aussy que plus ne se feissent ou souffrissent appeller maistres, s'ilz n'estoient graduez en science ou ancienz d'aage et en office, et aussy en suffisance de l'office, et leur fu defendu qu'ilz ne se feissent appeller seigneurs de Parlement.

Mardi, **XXIJe** jour d'avril.

Cedit jour, avant les Plaidoiries, m'a esté commendé que je signasse la commission de l'enqueste d'entre messire P. Boschet, president, d'une part, et les religieus de Saint-Jehan de Jherusalem, d'autre part, à cause de la commenderie de Champguillon, à maistre J. de Vitry et André Marchant et J. Selvestre, nonobstant que du costé desdiz religieus autres aient fait l'enqueste.

Jeudi, **XXIII**Je jour d'avril.

Cedit jour, a esté plaidée la cause des habitans de Bryve la Gaillarde contre messire Remon de Turenne. A Cessieres.

Après se sont levez messeigneurs à **IX** heures et sont alez aux exeques de maistre R. d'Acquigny, trespasé, conseiller du Roy nostre Sire ceans.

Mardi, **XXIX**Je jour d'avril.

Cedit jour, a esté trespasé maistre Pierre Le Cerf, jadis procureur du Roy nostre Sire general.

Samedi, **XXV**Je jour d'avril.

Cedit jour, estoient presques touz messeigneurs de Parlement malades de reume et fievre tout ensemble, par une pestilence d'air qui a couru et cuert puiz l'entrée de ce present moiz, telle que à peine puet l'en trouver povre ne riche, et par especial à Paris, qui ne se sente de ceste maladie, les uns plus, les autres

moins; et par especial en la chambre de Parlement, aux jours des Plaidoiries, a telle tousserie de touz costez que à peine le graphier, qui a esté surpriz de la dicte maladie à **VIII** heures, puet enregistrer au vray. Diex par sa grace y vueille pourveoir.

Vendredi, **XVJe** jour de may.

Cedit jour, maistre Deniz de Maurroy, advocat ceans, a esté receu en office de procureur du Roy general, ou lieu de feu maistre Pierre Le Cerf, et a esté esleu ledit Deniz par la plus grant partie de messeigneurs du Conseil.

Mercredi, **IIIJe** jour de juin.

Cedit jour, pour ce que esclande estoit sur ce que pour boire à matin en la Chambre des Enquestes, plusieurs vallez et gens estranges se boutoient es chambres du Conseil de ceans, et poyoient percevoir les secrez de la Court *in periculum et scandalum Curie*, et faisoit

l'en trop grandes buveries, et y occupoit l'en le temps que l'en devoit emploier à conseiller, et si faisoit l'en trop excessive despence, et pour autres causes qui ont meü la Court, ycelle, les **IJ** Chambres assemblées, a ordonné que d'ores en avant pour boire à matin en la Chambre des Enquestes dessusdicte ne sera despendu plus haut de **VIII** solz parisis, et quicunques fera le contraire encourra l'indignation d'icelle Court, et sera griefment puni.

Cedit jour, a esté receu maistre Guillaume de Beze en la Chambre des Enquestes ou lieu de maistre Bertran Quentin, lequel a esté receu en la Grant Chambre ou lieu de maistre J. de Saulx, lequel a resigné sondit lieu au prouffit dudit de Beze.

Samedi, **VIIIe** jour de juin.

Cedit jour, messire Rolant Belier, prestre, a miz et baillié devers la Court, comme executeur de feu maistre Robert d'Acquigny, jadis conseiller du Roy nostre Sire, un volume non relié contenant **XXIII** coiez, ou quaternes, ouquel volume estoient contenus les tractiez qui s'ensuivent, c'est assavoir: *Bernardus de colloquio Symonis ad Jhesum; Augustinus de agone christiano; De tranquillitate Ecclesie Marcilii de Padua; Disputatio inter clericum et militem; Quedam conclusiones magistri Johannis Wicliff, s. anglici; seu tractatus qui dicitur de ordine christiano et speculum Ecclesie militantis; et tractatus Guillelmi Parisiensis de collatione beneficiorum.* Lequel volume l'en disoit feu maistre Guillaume Liroiz, duquel ledit Acquigny avoit esté executeur, avoir ordonné estre baillié et miz devers la dicte Court.

Lundi, **XVJe** jour de juin.

Au jour d'ui, messire H. de Marle, premier, et maistre Jaques de Ruilly, presidens ceans, l'evesque de Limoges, maistre Laurens de La Mongerie, chanoinne de Paris, nommez executeurs ou testament de feu messire J. Tabary, evesque de Terouanne, ont renucié au fait et charge de ladicte execution, maiz ilz se sont offers et offrent à conseiller le fait de ladicte execution de leur povoir, et de ladicte execution se sont chargiez m. P. Manhac, P. Buffiere, Laurens de Lambel, J. de Rameiz, Junien Le Fevre, et P. de Quenauvillier,

et pourront les **VJ** ou **V** ou **IIII** ou **IIJ** accomplir ladicte execution par la vertu du testament.

Juesdi, **XIXe** jour de juin.

Au jour d'ui, maistre Guillaume de Celsoy, conseiller du Roy nostre Sire en la Chambre des Enquestes, a protesté que la reception de maistre Pierre Buffiere en la Grant Chambre par vertu de certain mandement royal ne lui prejudicie point, attendu que par l'ordre il precedoit et devoit avant venir en la dicte Grant Chambre que ledit Buffiere.

Vendredi, **XJe** jour de juillet.

Ce jour, la Court a ordonné que sur l'argent qui est devers le graphier venant de l'amende de J. du Boiz, jadis procureur du Roy à Meaulx, ledit graphier delivre sur l'ouvrage des aysemens de Parlement au maistre

charpentier du Roy, nommé Foucher, ou à son ordonnance,

XX livres, par maniere de prest, à recouvrer sur les amendes de Parlement.

Samedi, **XIJe** jour de juillet.

Cedit jour, le graphier a delivré **XX** livres parisis à Michiel Salmon, marchant de merrien, pour les aysemens

de Parlement refaire, et par l'ordonnance de la Court, selon le registre de venredi derrain passé.

Cedit jour, sont commencées les chaleurs de ceste année, ou **IJ** ou **IIJ** jours par avant, devant lesquels de

ceste année n'avoit fait chaut, maiz *continue*

froit par

vens et pluies qui ont esté continues depuiz fevrier, quasi telement que les rivieres en ce moiz de juillet et ou moiz precedent ont esté plus hautes que n'avoient esté toute l'année, maiz avoient esté en l'iver moult basses, et se Dieu de sa grace n'eust regardé son povre pueple, les biens de terre estoient en grant peril et par consequant le pueple, nonobstans les travaulx que sueffre en moult de manieres, *sed peccata nostra meruerunt*.

Samedi, **XIXe** jour de juillet.

Au jour d'ui, avant ce que l'en pronuçast les arrests, sur ce que le **XIIIJe** jour de ce moiz l'Université de Paris, en alant à Sainte Katerine du Val des Escoliers en procession et pelerinage, par maniere d'aniversaire pour la paix de l'Eglise, du royaume et de la santé du Roy, avoit esté moult enormement injuriée en pluseurs de ses supposts en ladicte eglise, *dum missa celebrabatur*, et dehors en la rue S. Antoine et

derriere l'eglise dudit S. Anthoinne, en la rue où estoit la maison de messire Charles de Savoisy, chevalier, et en sa dicte maison par aucuns ses vallés et autres qui avoient batu d'espées et trait de ars et saiettes plusieurs escoliers de la dicte Université impourvement et dont ne se donnoient garde; et avoit esté cest outrage à l'occasion d'aucuns pages qui, près de la dicte eglise de Sainte Katerine en genétant leur chevaulx, *sua consueta insolentia*, empeschoient lesdiz escoliers

à entrer en ladicte eglise, pourquoy les enfans escoliers leur giterent pierrettes pour les faire arrester et soy tenir en paix, dont lesdiz pages s'en fuirent, comme l'en dit, audit hostel ou environ, et esmurent lesdiz maufaicteurs qui vindrent en grant fureur, et firent lesdiz excès. Ycelle Université, au jour d'ui dessusdit,

a requiz en ladicte Court, pour ce que au Grant Conseil estoit appoinctié que ladicte Court leur feroit justice desdiz excès, y luy pleust d'arrester prisonnier ledit chevalier. Si a ordonné ladicte Court que ledit chevalier sera arrêté, et lui sera faicte defence à peine de bannissement, de confiscation de touz ses biens, et d'estre attains de touz les malefices ledit jour perpetrez, que de la ville de Paris ne se parte, jusques à ce que icelle Court en avera autrement ordonné.

Samedi, **XXVI**e jour de juillet.

Cedit jour, a esté apportée par le prevost de Paris en la Court la cedula dont la teneur s'ensuist:

Pour ce qu'il est venu à la cognoissance du Roy et de nos seigneurs que, depuiz ce que appointié avoit esté que la Court de Parlement cognoistroit de certain descort meü ou esperé à mouvoir entre l'Université de Paris et aucuns autres, et voloit le Roy que toutes voies de fait cessassent d'un costé et d'autre, et aussy ceulx de la dicte Université eussent miz certaines cedules en plusieurs lieux en defendant aux suppoz d'icelle toute voie de fait, et depuiz ce aucunes personnes incogneues et meues de mauvaise volenté ont miz et ataché aux portes de l'eglise de Nostre-Dame de Paris et de plusieurs autres eglises certaines cedules diffamatoires en langage françoiz, le Roy defent à toutes manieres de gens, de quelque estat qu'ilz soient, que d'ores en avant aucun ne soit si hardi, ne si osé d'atacher aucunes teles cedules aux portes desdictes eglises ne autre part, sur quanque ilz doubtent encourir son indignation à tousjours, et sur quanque ilz se puent mesfaire envers lui; et s'aucun est trouvé faisant le contraire, on en prendra tele punition que ce sera exemple à tous autres.

Ceste cedula dessusdicte a esté cedit jour publiée en
la grant sale à la fenestre par Robert Chaurre, huissier.
Vendredi, premier jour d'aoust.

Au jour d'ui, a esté apporté et miz par devers la
Court par J. Vrien, examinateur ou Chastellet de Paris,
ce qui s'ensuit:

[...] .

Primo, en un sac, **IIJ** fons d'escuelles d'argent avec
pluseurs bordeures et rongneures d'icelles escuelles,

en aucunes desquelles rongneures sont empreintes
les armes de messire Pierre de Navarre, pesant tout

ce quatre marcs une once douze estellins et obole.
Item, une ceincture d'argent esmaillée sur un tissu

de soye à **XJ** cloz, boucle et mordant d'argent. Item, une dague, atout la gainne garnie d'argent. Item, deux bourses à boutons d'argent, en l'une desquelles a trois gros blans. Item, six plates d'argent à faire six hanaps, six souages pour asseoir soubz lesdiz hanaps et quatre filez à mettre soubz quatre d'iceuls souages, et une plate d'argent en masse, tout ce pesant sept mars quatre onces, ou environ, pesez par Robin Beson et J. Hebert, orfevres jurez; lesquelles choses ont esté trouvées en un coffre appartenant à Guillaume Hefroy dit l'Ainsné, trouvé ycellui coffre en l'ostel de Alain de Compans, orfevre, demourant à Paris, devant le Palaiz, comme disoit ledit Vrien.

Mercredi, **VJe** jour d'aoust.

Cedit jour, monseigneur l'evesque de Paris a confessé avoir eu et receu par la main de certains commissaires de ceans certains biens dont l'inventoire est enregistré dessus le premier jour de ce present moiz, lesquelz biens estoient devers la Court, pour l'occasion du larron appelé Guillemin Aufroy qui par avant avoit lesdiz biens, et lequel larron, pour ce qu'il a esté trouvé cleric, a esté rendu audit monseigneur l'evesque.

Mardi, **XIXe** jour d'aoust.

Ce jour, l'Université de Paris a proposé ceans par la bouche d'un frere mineur à l'encontre de messire Charles de Savoisy, chevalier, par theme: *Deprecabantur eum, ut imponeret ei manum*, Marc, en ce demenant par ce que, comme par un sirurgien est guerrie la plaie, aussy sera ceste doloureuse plaie, qui est divulguée par tout le monde, que a fait ledit chevalier, en prenant la similitude d'un chien qui met sa pate et langue à sa plaie. Et puiz vient au cas: que, le lundi que fu **XIIIJe** de juillet, l'Université ala, assemblée de toutes ses facultez et nations, en pelerinage solonelment pour la paix de l'Eglise, santé du Roy et biens de terre à Sainte Katerine, où furent premierement petis enfans estudians assailiz *in primo ordine* et puiz autres indifferaument par les gens de messire Charles de Savoisy, en l'ostel duquel se retournerent et d'où estoient issus, et là furent par lui receptez, aidez, confortez, montez et armez pour faire lesdiz cruelx crimez, quel merveille, à tel pot, tel cuiller, à tel chien, tel os. Ledit chevalier a esté son temps et est garniz de mauvaises gens et serviteurs bateurs et crimineulx: *Rex iniquus iniquos ministros habet*, et dit que yceulx maufauteurs batirent, fraperent et navrerent pluseurs

escoliers qui très doucement et devotement et simplement aloient en procession, non armez ne que aigneaux, et, qui pis est, les poursuivrent et chacerent à espées, dagues, couteaux, ars et saiectes en traiant sur eulx et jusques en l'eglise de S. Caterine, à l'eure mesme que *corpus Domini* estoit entre les mains du prelat qui disoit la messe, à ce que l'en veist avenir ce qui est dit des paiens: *Deus, venerunt gentes in hereditatem tuam, polluerunt templum sanctum tuum, posuerunt Jerusalem in pomorum custodiam*, qui est moult grief et de moult grant punition que violer le temple de Jhesu Crist, où toutz doivent estre asseurs. Recite à ce propos les histoires de Troies, d'Achilles qui fut tué ou temple d'un des Diex, de Helene qui fut ravie ou temple Venus, quelle vengeance et comme cruelle et longue fu faicte et prise de ce, par plus fort raison ou present cas, de crestiens ou qui se dient crestiens à telx crestiens que sunt les enfans et innocens estudians, et ou saint Temple de Dieu assemblez pour les **III** causes dessusdictes, *quia in presens, si inimicus maledixisset mihi, sustinuissem utique, et si is qui oderat me, super me magna locutus fuisset, abscondissem me forsitan ab eo. Tu vero homo unanimes, dux meus, et notus meus, qui mecum dulces capiebas cibos, etc.. Sequitur Veniat mors super illos et descendent in infernum [viventis]. Veniat, id est, veniet, scilicet in glosam, quoniam nequitie in medio eorum. Declarat quia posuerunt Jherusalem in pomorum custodiam, id est Universitatem in*

desertionem, pour ce que l'en ne lit, ne presche, ne despute l'en a par especial en ceste noble theologie ou college de Serbonne en ce temps present qui est ordonné auxdictes desputoisons, maiz sont espars les escoliers et seront plus, se remede n'y est miz, pour ce que *posuerunt morticina servorum suorum*, et pour ce que les escoliers et serviteurs de Dieu qui faisoient le divin service à S. Catherine et l'oyoient, et où estoit faite predication pour les IIIJ poins dessusdiz, furent en ce service delessiez et dechacez, quant les ennemiz de Dieu et persecuteurs survindrent, en tant que sembloit que la persecution de Saint Thomas de Cantorbie fust retournée, car les saiectes voloient près du prelat qui celebroit et estoit près de la perception, et falu qu'il attendist la fureur un peu passée, aussy falu que le prescheur cessast, et tout par le fait de Savoisy et de ses menistres qui a acoustumé de faire telz choses. Il bati le procureur du Roy, il a batu la fille du Roy, c'est assavoir, l'Université de Paris qui ly puet dire: *Multa opera bona ostendi vobis, propter que vultis me lapidare*. Se il la welt lapider, pour ce qu'elle prioit pour la paix de l'Eglise, il n'est pas bon crestien, se pour prier pour la santé du Roy, ce que faisoient, il n'est pas loyal au Roy, se pour les biens de terre dont le pueple vit, il n'est pas digne d'estre entre gens, comme tourbleur de police. Qui est plus cruel que eulx qui batoient petis innocens de non pas de pommes,

maiz de cousteaux, et sanz nulle resistance, car combien
 que les juesnes hommes, artistes fors et apers,
 qui n'avoient de quoy eulx defendre eussent prinz,
 l'un le baston à estaindre les chandoilles de l'eglise,
 les autres ce que povoient trouver par l'eglise, toutevoie
 au seul signe du recteur se souffroient, n'onques
 l'en ne les vit plus obeissans ne plus devotement
 assemblez que ledit jour. Helas, ceste plaie a jà
 longuement
 duré sanz remede, et si n'y a ancor aucun
 qui l'ait confortée:*Vulnus et livor et plaga tumens,*
 se dit le prophète,*et non est circumligata, neque curata*
medicamine, neque fota oleo. Il y a un moiz qu'elle ne
 cesse de crier, de latrer comme le chien, à qui souvant
 sont comparez les clers selon les docteurs de
 l'Eglise, pour ceste plaie curer et la leche souvant, et
 si ne ly ayde l'en pas, elle fait son pover et de sa
 langue, à ce que la pate et main y soit mise et sinon a
 point d'effect:*Sagite parvulorum facte sunt plage*
eorum, et infirmate sunt contra eos lingue. Aucuns
 d'eulx furent navrez ou cuer de saiectes qui sont en
 peril, les autres ou chief, autres es bras, autres es
 gembes, autres es mains, pour quoy,*conturbati fuerunt*
qui videbant eos et timuit omnis homo, tellement
 que pluseurs de plus de III jours ne povoient revenir
 à eulx, dont un religieuz est devenu *alienatus a mente,*
 maiz *letabitur justus, cum viderit vindictam manus*
suas, etc., combien que le sanc ne demande point.

Maiz retournent à la Court à ce que souverainement y pourvoie, et telement que soit acomplie de Gedeon *Judicum: Duc populum ad aquas, etc., Populus* Université est, Madian est Savoisy et ses menistres qui ce ont fait, aussy fit batre son pere pluseurs escoliers en la Cousture S. Caterine. *Duc*, donques, *populum ad aquas, scilicet sapientie hujus Curie*, qui weille metre la pate à ceste plaie agravée. Allegue outre à un autre point la **IIIe** declamation de Seneque, *in declamationibus*, applique le seigneur ou pere à Dieu, qui dissimule la prostitution de son espouse, l'Eglise, et le filz puet estre dit Savoisy, que ne venga pas celle prostitution, ce que pavoit, car lui voiant batre en sa maison le bedel de theologie, duquel ne fit pas comme le recteur, qui ce jour garda un que l'en disoit des gens Savoisy d'estre batu, maiz en envoya les maufaiteurs garniz de chevaux, si ne doit point estre dit filz, maiz le prevost de Paris qui a dissimulé, si doit

estre abdiqué, pour quoy la Court sera la fille bonne et juste qui y metra remede. Et dit que combien que le fait soit notoire, *tamen facte sunt plures informationes*, si requierent que soit verifié en la Court ce que est *Danielis quinto*, de Baltazar qui vit *in pariete manum scribentem: Mane, Techel, Phares*, par **III** doiz, *pollicem, indicem et medium*, qui signifient **III** estaz en la Court, presidens, conseillers, advocas et notaires, et escripurent *in candelabro aule - luminari fidei, / MANE, numerus numerando inconvenientia longi temporis; / TECHEL, appensio ponderis, pensando circunstancias facti, et PHARES, divisio, - Curia dividat lucem a tenebris et palliationes a veritate*. Et soit adverti par la Court, comme ilz supplient, un privilege qu'ilz eurent du temps de Philippe le Conquerant contre un prevost de Paris appellé Thomas, sur l'occision de **V** escoliers tuez en plainne rue, ce qu'il en fut ordonné. Messire Charles de Savoisy ou maistre Guillaume Cousinot, son advocat, propose les excusations dudit chevalier, en soy excusant envers l'Université, et propose que *peccata suos debent tenere auctores et non ultra progredi*, allegue la loy, et ce dit à la justification dudit chevalier, et dit que le fait de Sainte Katerine ne se puet justifier, ne ne le voudroit, ne ne welt justifier ne excuser, et ce proteste. Maiz, quant audit chevalier ne son pere, onques ne firent ne procurerent mal contre l'Université, maiz estoit son pere un grant piller pour l'Université envers le Roy Charles. Quant à lui aussy ne voudroit mesprandre vers elle, ne ne volt onques, aussy eut de ses freres escoliers en l'Université,

et de present aussy y a de ses parens, si n'est
point presumption qu'il voulsist rien faire contre elle,

maiz voudroit tousjours ycelle reverer. Quant au cas, il y a **IJ** faiz, un sien et un autre touchans autres qui n'est point son fait. Et quant à son fait, dit qu'il est noble de generation et chambellain du Roy, lequel a servi noblement et comme il appartient, et à bien faire a employé sa juenesce. Dit que en juillet derrain arma en Normandie une galiote de compaignons d'armes, dont il estoit venus à Paris en chevauchant hastivement, et estoit mahaitiez, si manda le **XIIIJe** de juillet derrain le medecin qui ala à lui et lui dist que se reposast, et estoit environ **VIIIJ** heures, et fu en son lit jusques à **IX** heures, que en son hostel avoit grant murmure, et lui dist l'un de ses serviteurs que l'en tuoit ses gens: si vint à une fenestre atout un jupon et mist la teste dehors, et peut estre que vit l'un de ses gens qui wolt fraper un long vestus, ne scet s'il est bedel, et lui cria que ne le ferist,*alias*

le feroit

pendre, et ne fu pas feru par la parolle dudit Savoisy. Après defendi à ses gens que ne feissent mal, maiz cloissent les huiz, et ce a eu son conseil de sa bouche. Et tost après assés **IJ** de l'Université vindrent à lui de par le recteur, si les salua tout esmeu de l'esclande que l'en faisoit à sa maison, et lui dirent que aucuns de l'Université avoient mespriz en son hostel, et leur en desplaisoit, et les puniroient, et aussy avoit de ses gens qui avoient mespriz envers l'Université et que les punist, et il respondi qu'il en pourchaceroit justice estre faicte, et ne faloit point qu'il eussent seurté de lui, et s'attendoit quant à leurs escoliers et supposts à eulx, et les mercia, et se departirent honestement et paisiblement; si appert par ce de son innocence, et voudroit que les nocens fussent icy presens pour grant

partie de sa chevance. Dit oultre que ledit **XIIIJe** jour, un vallet aloit ou venoit de la riviere atout un grant cheval, et en passant devient les enfans qui pipoient, comme aucune foiz font, le cheval s'esmut et esclissa aucuns, dont il cheterent et pierres et boes, tant que falu que descendist; après vindrent **IJ** vallès de son hostel à **IJ** chevaulx en la place non pavée pour trocer leur chevaulx qui s'esmurent pour les enfans qui cifloient, et crioient les escoliers *ad lapides*, et les suirent et poursuivrent jusques à la maison de Savoisy, et *ad motum***IIII** vel **VJ** s'esmurent **IIJe**, et tant que par force entrèrent en la court de Savoisy, alors se revengerent ses vallès qui furent aucuns navrez de pierres, et fu lors que desmut ses gens. Et pour ce que rumeur fut que l'en tuoit les gens de Savoisy en son hostel, aucunes gens d'entour le bordeau de Tyron trairent et issirent de la taverne, et prirent ars et cousteaus, et tandis que les escoliers estoient en sa rue, les poursuivrent et chacerent, non pas que les veist ne ne cognoisce, et ceulx sont dignes de punition, et non pas *innocentes*, car de raison ancor vaudroit miex *delictum remanere impunitum quam innocentem punire*.
 Allegue
 audit fait conjectures, car audit jour et heure avoit moult peu de gens, et n'y avoit un seul gentilhomme, ne en son hostel n'y avoit armeures, ne ars, ne saiettes, et pour ce que partie a requiz les delinquans soient puni, le welt, maiz parce qu'est innocent, lui ne doit point estre puni, attendues les conjectures, et lui plaist que la Court extende à ce cas sa main, à quoy s'atent

et y a fiance. Et à ce que partie a dit de l'Université
qui est bel joyeau, vray est, car par elle la foy et
crestienté
est essaucée; quant à lui onques ne fit excès,

fors un du procureur du Roy en son hostel, dont en a esté delivré par le Roy et sa justice de ceans, où sa grace et remission fu enterinée, maiz onques autre villain cas ne fist; quant au cas present, il y a respondu, car de la venue de ceulx qui vindrent à son hostel, il n'en scet rien, ne n'en fit rien, ne ne doit point estre dit receptateur, attendu la nature de receptation, où science est requise et communication, et s'il eust sceu que maufauteurs y eussent esté, ne les eust pas laissié issir, maiz doit estre dit, cel fait plus

fato estre

avenu que de propos et volenté. Et à ce que l'en lui pourroit dire que le povoit empescher et ne l'a pas fait, dit que ce est à dire et entendre, quant aucun scet aucun voloir faire delict ou crime, et à lui appartient de l'empescher et ne l'empesche, il en est tenu, *non sic in proposito suo*, car il ne scavoit rien du fait, maiz

furent aggresseurs les escoliers, et si a fait bonne diligence

d'envoyer ses gens en Chastellet ou en la Conciergerie.

Quant à ceulx qui s'en sont fuiz, ne sont pas

à lui, et si les savoit à LX lieux, les poursuivroit par justice, si requiert estre excusé, et soient veues les information faictes à sa justification, si ne conclud autrement, veu que partie aussy n'a point conclu, et si faloit conclurre, sa conclusion s'ensuit *ex suo facto*.

Ce fait, le president a recommandé la Court en

prenant ces mos: *Opera que ego facio testimonium perhibent de me, et a fructibus eorum cognoscetis eos*; la Court fera si bien justice et raison telement

que parties s'en tendront pour contens. Et a dit la

Court que se les parties wellent soy arrester aux information et à ce que tout soit fait souverement et de plain, et en ce cas la Court parleroit de bouche audit chevalier, et en oultre fera ce qu'il appartendra. Et sur ce le procureur de Savoisy, interrogué s'il advouoit son advocat, a dit que oy.

L'Université par son proposant a dit au contraire de ce que partie avoit dit que **IJ** des maistres ou supposts avoient envoieé audit Savoisy, qu'il n'en est rien, et après ont mercié la Court et priz jour à respondre sur ce que la Court a interrogué les parties, si se wellent rapporter aux informations, l'Université a priz à revenir sur ce dire leur response à demain à **IX** heures, et partie adverse a dit que n'est pas raison qu'ilz dient leur responce, jusques à ce que l'Université ait dit la sienne, attendu qu'il est defendeur, et pour ce parlera le conseil dudit chevalier à lui, et aussy en revendra à demain à **IX** heures.

Mercredi, **XXe** jour d'aoust, au Conseil.

Cedit jour, environ **X** heures, par maistre André Cotin, advocat ceans, a fait proposer non pas par lui comme advocat, maiz comme suppost d'icelle Université, en respondant à certain interrogatoire hier fait par la Court, en remerciant la Court de la bonne affection et diligence qu'elle a eu et a adès à ladicte Université en ce fait selon justice et raison, en suppliant en oultre qu'elle weille perseverer en leur justice, et proteste qu'il ne tend que à fin civil. Et dit que après le propos hier fait par elle et la response de messire Charles de Savoisy, chevalier, et que la Court exposa partie de la besoigne, et pour ycelle abbreger demanda

se les parties voudroient descendre à pranre droit par les informations, et que sur ce eust delay; si a delibéré sur ce ycelle Université et dit qu'elle a requiz la Court representans le Roy, à qui a acoustumé de recourir, et ce que proposa hier et ancor propose, ce ne fait pas ne ne fit comme partie formelle qui se face contre Savoisy, maiz comme denunciant les excès qui lui ont esté faiz par ledit Savoisy, pour en avoir justice et y estre procedé souverenement et de plain, et pour ce a amenistré tesmoins, à ce que par la prise dudit Savoisy l'en l'y face justice. Et ancor supplient et requierent que la Court, *ex suo nobili officio*, procede à lui faire raison et justice, et si n'y a assez preparatoires, est preste de les administrer, et que le procureur du Roy face ce que lui appartendra. Si dit que par ceste maniere la Court y doit proceder, et ce requierent.

La Court ou le president pour elle recite que en la Court est acoustumé par le stile de proceder aucune foiz par voie ordinaire, aucune foiz par voie extraordinaire, *ut in criminibus*, es quelx aussy selon l'exigence

du cas l'en procede par voie ordinaire, maiz par informations n'est pas accoustumé de condempner, maiz seulement de mettre parties en procès. Et pour ce que l'Université, que la Court voudroit adès conforter et ayder par justice, ne se welt point rapporter aux informations, selon ce que avoit hier esté interrogué, ne savoroit ne ne pourroit condempner ou absoudre.

Savoisy propose et dit que, attendu l'appoinctement hier fait par la Court, se l'Université eust respondu *formaliter*, eust aussy respondu trancheement, et pour

ce que la maniere et propos de l'Université n'est pas accoustumée, c'est assavoir que la Court à la seule denunciation d'une partie face droit, maiz se doit ycelle Université constituer partie, autrement pourroit gagner contre raison, et *claudicaret iudicium, quod equa lance procedere debet*. Dit qu'elle doit respondre

premierement, et, ce fait, est prest de respondre, *aliàs*

n'est recevable ne raisonnable la requeste de l'Université, maiz appartient au procureur du Roy ce que elle requiert et offre de respondre par peremptoires, si doit estre oy, non pas estre priz, ne contre lui estre procedé par voie extraordinaire.

La Court après ce et les parties oyes offre à faire justice et dit qu'elle verra les informations, et, ce fait, fera ce qu'il appartendra.

L'Université propose et dit qu'elle n'a pas parlé à Savoisy ne à Cousinot son advocat, et pour ce ne welt point repliquer au propos de Savoisy, maiz requierent justice à la Court, laquelle a dit qu'elle a ouvert les manieres de proceder ceans, et pour ce se arreste à son autre responce cy devient faicte, si procedera *ex nobili officio*, et autrement, comme il appartendra. Samedi, **XXIIJe** jour d'aoust.

Cedit jour, a receu le graphier la cedula de certaine ordonnance ou condempnation faicte par le Roy en son Grant Conseil, pour et au prouffit de l'Université de Paris à l'encontre de messire Charles de Savoisy,

chevalier et chambellain du Roy, et aucuns ses vallés et familiers, et autres crimineulx, sur le propos d'icelle Université, d'une part, et dudit Savoisy, d'autre part, le **XIXe** de ce moiz, ou livre des Plaidoiries de l'an **CCCC III**, et du **XIXe** de juillet, ou livre du Conseil oudit an. Et combien que la Court de ceans, pour ce que au temps du crime par les dessusdiz Savoisy et vallés crimineulx perpetré, le Roy estoit mauhaitié, si n'y pouvoit pourveoir en sa personne, eust esté ordonné et chargée ou grant Conseil de pourveoir à ladicte Université, que par ja près de **V** sepmaines avoit cessé de sermons et faiz scolastiques, toutevoie, pour ce que le propos et entention de l'Université tendoit à fin et maniere non accoustumée ceans, pour ce qu'elle protestoit qu'elle ne se faisoit, ne ne voloit faire partie, maiz requeroit *ex nobili officio Curie* estre satisfaite et reparée desdiz crimes et malefices, et que l'en n'a ceans accoustumé en fait de justice, fors proceder es causes où il a demandeur et defendeur, le Roy retourné en santé, en son Grant Conseil, consideré lesdiz malefices, propos dessusdiz et ce qui faisoit à considerer, a ordonné estre fait et dit ce qui s'ensuit, par une cedula baillée audit graphier pour estre enregistrée. Il sera dit que le Roy ordonne que la maison messire Charles de Savoisy sera demolie et abatue aux coulx et despens de la matière d'icelle maison, et le residu d'icelle matiere sera baillée à l'eglise de Sainte Katerine du Val des Escoliers, en laquelle eglise partie des offenses et malefices proposez par l'Université

furent faiz, et se commencera la demolition mardi prouchain, qui sera faicte par les officiers du Roy et par justice. Avecques ce, le Roy condempne ledit messire Charle de Savoisy en cent libvres parisis de rente admortie, qui sera assise à l'ordonnance de la Court de Parlement, pour fondation de chappelles, et aussy le condempne en mil libvres tournoiz pour satisfaire aux blessiez de ladicte Université par l'ordonnance d'icelle Université, et en autres mil libvres tournoiz au prouffit de l'Université. Et delivre le Roy ledit messire Charle de l'arrest ou mainmise en la personne dudit messire Charles, et de touz procès contre ladicte Université. Et n'est mie l'entention du Roy que les serviteurs, familiers, ne autres quelcunques coupables des crimes et malefices commiz contre ladicte Université soient en rien comprins en ceste ordonnance ou condempnation, maiz welt le Roy qu'ilx soient tres bien puniz selon leurs demerites, et enjoint à ses gens de Parlement, au prevost de Paris et tous autres ses justiciers que ilz les preignent et facent pranre où ilz pourront estre trouvez, et en facent telle justice qu'il en soit memoire et exemple partout.

Ce que dessus est dit a esté pronucié en la presence du Roy en la grant sale de son hostel lez Saint Pol, à Paris, par le premier president de Parlement, le vendredi [XXIJe](#) de ce present moiz, presens le Roy de Navarre, les ducs de Berry et de Bourbon, oncles du

Roy, l'Université de Paris, pluseurs contes, barons, chevaliers et escuiers, pluseurs du Grant Conseil et de la Court de Parlement et pluseurs autres. *Et qui vidit et audivit, testimonium perhibet de his,* present

aux piez du Roy, ledit graphier. (Signé:) BAYE.

Vendredi, **XXIXe** jour d'aoust.

Alexandre des Marez, changeur de Paris, a dit en la Court qu'il avoit **IJ** mil frans touz prest de par messire Charles de Savoisy, et d'autre cousté mil et **Vc** frans, d'autre cousté pour certainne rente de **C** livres parisis pour l'Université de Paris, envers laquelle avoit esté ledit Savoisy, huy a **VIII** jours, condempnez, et ce a esté requiz estre enregistré.

Vendredi, **Ve** jour de septembre.

L'evesque de Paris a requiz que l'en lui lesse mettre une eschelle à la Croix du Tiroir pour escheller **IJ** maufaiteurs faulseres.

Mercredi, **Xe** jour de septembre.

Cedit jour, a esté ordonné que ..., prestre,
que l'en a trouvé nayé en Seine, seroit enterré en
terre sainte, nonobstant le procès pendant entre le
Roy, d'une part, et l'evesque de Paris, d'autre, et
sanz le prejudice du droit des parties.

Vendredi, **XIJe** jour de septembre.

Cedit jour, ont esté presentées certaines lettres
patentes sur la retardation d'un procès jugié dont l'arrest
estoit à pronuncier, d'entre les religieus de Saint
Germain d'Aucerre, d'une part, adjoint le procureur
du Roy, et messire Gacelin du Boiz, chevalier, bailly
de Senz et dudit Aucerre, Pierre Cousinot, procureur
du Roy audit Aucerre, maistre J. Mauduit, lieutenant

dudit bailli, et autres, d'autre part, et lequel procès
avoit esté jugié *supra*, le **IIIe** de
ce moiz de septembre,
sur l'enterinement desquelles lettres, tout veu et
consideré,
a esté deliberé par tous messeigneurs dessusdiz,
hors l'oppinion d'un ou de **IJ**, que la Court
n'obtemperera point auxdictes lettres.
Mercredi, **XIJe** jour de novembre.
Cedit jour, fu ordonné, que non obstant que aucuns
advocas et procureurs de ceans et autres eussent empétré
devers le Roy nostre Sire l'office, bourses et gages
de graphier criminel vacants ceans par la mort de feu
maistre Jehan de Cessieres, jadis et en son vivant
graphier criminel, que election seroit faicte du plus
ydoine et convenable homme à tel office, qui n'estoit
pas impetrable, maiz electif.

Juesdi, **XIIIe** jour de novembre.

Ce jour, furent assemblez messeigneurs des **IJ** Chambres et plusieurs des maistres des Requestes de l'Ostel du Roy, le procureur du Roy et les **IJ** advocas du Roy, et fu esleu par la plus grant partie de mesdiz seigneurs maistre J. du Boiz, paravant notaire du Roy, en graphier criminel, et lui fu dit qu'il averoit les bourses et gages que avoit maistre J. de Cessieres, par avant graphier criminel, comme annexées audit office par l'ordonnance du Roy faicte au temps que le graphier civil qui est à present fu esleu.

Samedi, **XVe** jour de novembre.

Après ce, furent assemblées les **IIJ** Chambres, c'est assavoir de Parlement, des Enquestes et des Requestes du Palaiz, et fu faicte election du lieu vacant par le trespas de maistre Ja. Bouju, et combien que les voix de messeigneurs churent sur plusieurs et divers, toutevoie maistre J. Romain eut plusieurs voix.

Cedit jour, Jehan Perrigny, dit Corbelet, s'est consenti et consent que J. Brifaudin, prisonnier en la Conciergerie, soit eslargi jusques à la Chandeleur prouchainement

venant, à peine de **C** livres parisis à appliquer au Roy, de rendre ses comptes de l'execution et recepte que ledit Brifaudin avoit faicte ou paiz de Champaigne pour la rançon du conte Duglas qui doit rendre à messire Phelippe des Essars, et maistre Jaques de Ruilly, president, qui de present sont absens, ou à leurs commiz, dedans ledit temps, si ne tient

auxdiz commiz, et ce a promiz ledit Brifaudin qui a renucié à un appel qu'il avoit fait dudit J. Perrigny, le **XIIIe** de ce moiz, et par ce doit **LX** solz.

Mercredi, **XIXe** jour de novembre.

Ce jour, a esté receu maistre J. Romain, licencié en loiz, en Parlement, en la Chambre des Enquestes, ou lieu de maistre Guillaume de Celsoy qui a monté de ladicte Chambre des Enquestes en la Grant Chambre, ou lieu de feu maistre Jaques Bouju, et a fait ledit Romain le serment, après ce qu'a esté publié le scrutine par maistre Eustace de Laitre, maistre Robert Mager et P. Buffiere, commiz à ce de par la Court, pour ce que messire P. Boschet, president, commiz à ce de par monseigneur le Chancelier empeschié, n'estoit peu venir ceans aggravez de maladie.

Mardi, **XVIIe** jour de novembre.

Ce jour, ont esté delivrez **C** frans de l'argent déposé aux Maturins appartenens au prieur de Cerfroy, à cause de l'exécution de messire Raoul de Chenevieres, audit prieur pour faire une cloche en l'eglise où ledit Chanevieres

a ordené certainne messe, et ceste delivrance a esté faicte par l'ordonnance de maistre Th. Tiessart, conseiller du Roy nostre Sire ceans, et à compter l'argent a esté present J. Hutin, cleric du graphier, pour ce que ledit graphier n'y pavoit estre, et ce ly a relaté.

Vendredi, **XXVIIIe** jour de novembre.

Ce jour, a esté maistre Henry de Cessieres, filz de

feu maistre J. de Cessieres, jadiz graphier criminel, receu en office de notaire ou lieu de maistre J. du Boiz, jadiz notaire du Roy ceans, et à present graphier de Parlement criminel, et a donné congé la Court audit Henry d'aler à Orleans pour soy faire licencier en droit civil de cy à la Chandeleur prouchainement venant.

Item, cedit jour, a requiz à la Court maistre N. de Lepoisse, graphier des presentations, que comme il eust un filz licencié en droiz civil et canon, et il eust volenté de le instruire en office de notaire, et de lui pourveoir ou faire pourveoir par le Roy nostre Sire des bourses et gages, ou de l'un des deux, en esperance qu'il puist venir *tandem*, selon ce qu'il verra que sondit filz se portera à l'office qu'il a, il pleust à la Court d'avoir ce agreable, nonobstans certainnes ordonnances que l'en dit estre faictes de l'union de bourses et gages avecques les offices de graphiers. A quoy a respondu la Court que à elle n'est pas d'ordonner desdictes bourses et gages, toutevoie ce qu'il plaira au Roy ordonner ou cas dessusdit, attendu que ledit N. a longuement, louablement, notablement et sagement et aussy loyaument exercé sondit office, averont bien agreable, ce qu'a requiz ledit N. estre enregistré. Lundi, premier jour de decembre. Ce fait, s'est levée la Court pour aler aux exeques de feu maistre Jaques Bouju, jadiz conseiller du Roy en la Court de ceans. Samedi, **XIIJe** jour de decembre. Ce jour, l'abbé de Saint Nycolas ou Boz, maistre

J. de Monnentueil, chanoine de Paris, Girart d'Athies et Gilot de Pont de Pierre, executeurs de feu monseigneur l'arcevesque de Besançon, ont requiz à la Court que, comme monseigneur l'evesque d'Arras, l'evesque de S. Flour et sire Mahiu de Lignieres, maistre de la Chambre des Comptes du Roy nostre Sire, nommez executeurs dudit de Bezançon en son testament, se soient excusez du fait de ladicte execution quant à receptes, mises et comptes, et aussy eulx premierement nommez, empeschez pour pluseurs besoignes autres, ne puissent pas continuellement entendre au fait de ladicte execution, y pleust à la Court de leur bailler pour coadjuteur maistre J. Fleury, notaire du Roy, et jadiz serviteur dudit de Bezançon, et ouquel se fioit en sa vie, pour miex faire et parfaire le fait de ladicte execution, ce que la Court leur a octroyé, et ce ont requiz estre enregistré et en avoir lettres.

Dimenche, **XIII^e** jour de decembre. *Curia vacat*. Ce jour, l'evesque d'Arras a dit et protesté

au graphier de Parlement que son entention n'est pas de soy meller aucunement de l'execution de feu l'arcevesque de Besançon, quant à ce qui regarde fait de recepte ou de mises, ou de compte rendre faire ou soy entremettre aucunement, nonobstant qu'il soit executeur nommé, maiz seulement comme conseiller et ami soy entremeller d'icelle execution, et y bien faire de son povoir à la conseiller seulement, et ce a requiz estre enregistré.

Mardi, **XXXe** jour de decembre.

Cedit jour, maistre Pierre de Gynes, cleric et notaire du Roy, et secretaire de monseigneur de Berry, a miz et consigné devers la Court cent solz parisis que se dit devoir pour le terme de Noe derrain passé, pour la moitié de la rente de l'ostel où il demeure, assiz devient l'ostel du conte de Harcourt, emprès l'ostel maistre Jaques de Ruilly, president ceans, laquelle rente apartient au religieux de Molesme; ce depost fait, pour ce qu'il n'a trouvé aucun qui ait volu pranre ne recevoir lesdiz **C** solz, et afin que l'en ne luy puisse demander peignes, et consent que ladicte somme de **C** solz soit baillée aux procureurs desdiz religieux, abbé et couvent, ou à leur procureur deument fondé.

1405.

Samedi, **IIJe** jour de janvier.

Sur ce que entre messire Guillaume Daguin, prestre et chanoine de Saint Aignen d'Orleans, et le chapitre de Saint Aignen d'Orleans, les procureur du Roy et

du duc d'Orleans, d'une part, et l'Université d'Orleans et aucuns supposts d'icelle Université, c'est assavoir J. de Corbye, Jehan de Rambures, Guillaume de Craon et pluseurs autres, d'autre part, estoit meü un procès ceans pour occasion d'un excès et bateure faicte en la persone dudit Daguin, dont l'en disoit lesdiz singuliers estre couplables, et à occasion dudit procès, ladicte Université eust privé ledit Daguin et ledit chapitre ou capitulans dudit St Aignan de ladicte Université, nonobstant inhibitions et defenses de la Court, maiz ou contempt de ce eussent lesdiz de l'Université fait pluseurs rebellions, excès et outrages contre l'onneur de ladicte Court et en la persone d'aucuns huissiers ou sergens royaulx, envoiez de par icelle Court, lesquels avoient boutez hors de leur assemblée, quant il faisoit ou faisoient ou vouloient faire lesdictes inhibitions et defenses; sur lequel procès et inobeissance eussent les couplables esté adjornez en personne ceans, et au jour fussent venus messire Baude de Mascon, docteur en ladicte Université, et maistre J. Thomas, procureur general de la dicte Université, ceans, et par vertu de certaines lettres patentes d'icelle Université eussent dit à la Court qu'ilx avoient en mandement que, se ladicte Court ne voloit renvoyer ladicte cause à Orleans, intimassent cessations. Et pourtant, considerée la simplece desraisonnable et arrogance d'icelle Université, et que renommée estoit que tant en general, es faiz d'estude comme autrement, et es particuliers et singuliers supposts ladicte Université se gouvernoit mal, eust ordonné que par lettres closes d'icelle Court seroient aucuns mandez, comme fu fait selon la teneur des lettres qui s'ensuit:

Venerabiles atque carissimi. Zeli fervor et ea, quam circa rei publice stabilitatem et permanentiam gerere debemus, cura, sollicitudo etiam, propriique officii necessitas, preterea decor regni, honor cleri, nec minus caritas et affectio quam erga vos habemus, nos excitant, inducunt, immo impellunt ut scandalis que statum vestrum dehonstant et prosternunt obviamus, et ejusdem honestatem prosequamur atque augere enitamur. Itaque, cum insolentie atque malorum morum procacis temeritatis cetum vestrum hactenus tam fructiferum perturbantis, inertie insuper atque desidiæ nonnullorum vestrum rumores dudum, sepe et multum nostras permoverint aures, mandamus vobis, atque, si opus est, precipimus quatinus rectorem scolasticum, vestros magistros J. de Matiscone, Geraldum Bagouli, procuratores nationum Francie, Aquitanie, Picardie, Burgundie et Campanie, nec non magistrum J. Thome, J. de Corbye, J. de Rambures, Guillelmum de Credonio, priorem de Fougieres, Bertrandum Itier, fratrem prioris de Cemoy, Nycolaum Gehe, Hutinum de Dicy, Henricum Quellet et Theobaldum Carpentarii, bedellum vestrum, nonnulla honorem vestrum attinentia audituros

et coram nobis secunda instantis januarii personaliter
staturos
transmittere nullatenus vos omittatis, quos feliciter
conservet

Altissimus. Scriptum Parisius, sub signeto Camere, XVI
decembris. BAYE./

Et au jour dudit mandement, qui fu hier, n'eust envoié
aucuns icelle Université, mais seulement fussent venus
J. de Corbye, nepveu de monseigneur le Chancelier
dessus nommé, Guillaume de Craon et Hutin Dicy
dessusdiz, et aussi eust icelle Université envoié lettres
excusatoires, contenens en effect que pour
l'empeschement
de l'estude et pour defaut d'argent n'avoit
icelle Université peu obeir au mandement de la Court.
A delayé la Court à ordonner sur ce et respondre sur
lesdictes lettres excusatoires jusques à un autre jour,
et quant aus trois dessusdiz qui estoient venus en
obtemperant et obeyssant à la Court, elle leur a donné

congié d'eulx en retourner, jusques à ce que autrement en ait ordonné.

Mercredi, **VIJe** jour de janvier.

Ce jour, la Court, pour ce que l'Université d'Orleans avoit desobey à envoyer aucuns que la Court avoit mandé d'icelle Université, comme apert par le registre du **IIJe** jour cy dessus, a ordonné que le graphier face ung mandement au premier huissier ou sergent, par lequel sera commendé à ladicte Université, sur quanque ilz se puent mesfaire envers le Roy et sa Court, qu'ilz envoient celx qui estoient mandez par icelle Court, et aussi auxdiz singuliers, que à peine de prise et expletation

de leur temporel ilz veignent et comparient ceans personnelment le **IIJe** jour de fevrier prouchain venant.

Cedit jour, la Court a donné congié à maistre Phelippe Villate d'aler hors en Picardie, pourveu que laisse ydoine substitut.

Juesdi, **VIIJe** jour de janvier.

Cedit jour, messire Henry de Marle, president premier ceans, sire Mahiu de Lignieres, maistre en la Chambre des Comptes, Robert Le Tirant, J. L'Escuier, messire J. Guellan, prestre, et Mahiu de Brichancourt, executeurs du testament de feu monsr le viconte d'Acy,

ont soubmiz l'execution à la Court, de laquelle se sont excusez et deschargez messire H. de Marle et sire Mahiu de Linieres dessusdiz, quant à mise, recepte et rendre compte, maiz quant à conseiller ladicte execution se sont offers et presentez. Et se sont chargez de faire le fait et charge, mise et recepte de ladicte execution messire J. Guellan, prestre, et Mahiu de Brichancourt, escuier, dessus, à la requeste et conseil de leurs co-executeurs.

Item, cedit jour, maistre Phelippe de Boisgillou et maistre Pierre Le Fevre ont esté ordonnez à oir le compte de ladicte execution.

Vendredi, **IXe** jour de janvier.

Cedit jour, la Court a ordonné au graphier par une requeste baillée par les gens de messire Charles de Savoisy qu'il face delivrer audit messire Charles mil et **Vc** frans qui sont au change Alexandre des Marès, qui les avoit en depost pour acheter rente qu'il a trouvée pour l'assiete faire à l'Université de Paris, selon certaine condempnation faicte par le Roy nostre Sire en son hostel de St Pol, en aoust derrain passé.

Vendredi, **XVJe** jour de janvier.

Ce jour, Aleaume Cachemarée a relaté au graiphe que, pour ce que hier ly apparu certainement que messire Charles de Savoisy, chevalier, ou ses gens et officiers pour lui avoient acheté **C** livres parisis de rente rendues à Paris de messire Renier Pot, a fait,

par l'ordonnance de la Court, delivrer audit de Savoisy ou à ses diz gens la somme de mil et **Vc** frans, déposée au change Alexandre des Marez pour employer en fondation de certaines chappellenies au prouffit de l'Université de Paris.

Item, a relaté ledit Aleaume qu'il a defendu à J. Hure et Miles Du Brueil, notaires ou Chastellet de Paris, et en la presence desquelx ledit achat avoit esté fait, qu'il ne rende les lettres dudit contract, ne ne baille audit Savoisy ne à ses gens sanz le congïé et consentement de la Court.

Lundi, **XIXe** jour de janvier.

L'Université de Paris par un maistre en theologie a proposé et dit que me Pierre de la Casteigne, maistre en medicine, a demouré **XXX** ans en l'estude de Paris, et fu licencié en ars, en la premiere audition et en medicine le second, et si a esté deputé legat ou fait de l'union de l'Eglise, si supplie que la Court l'ait pour recommandé en sa bonne justice, et par especial en une cause que ledit Casteigne a ceans, qui touche l'onneur du Roy, de l'Eglise et de l'Université et de l'eglise de France, si vendront à demain les parties à plaider.

Mercredi, **XXJe** jour de janvier.

Au jour d'ui, Raoulet Grison, clerc du Roy nostre Sire, comme l'en dit, et du mareschal de Rieux, lequel

avoit refusé à porter tesmoignage ceans un jour de la sepmainne passée après disner devant aucuns de messeigneurs

de la Court, commissaires, et à qui à leur commendement avoit desobey, et s'estoit defendu de fait et rebellé à l'encontre des huissiers de ceans qui par le commendement desdiz commissaires le vouloient mener en la Conciergerie pour tenir prison, et les avoit injuriez de paroles et par especial l'un d'eulx, après ce que il eust esté prisonnier et eslargi et qu'il se fust repenti pluseurs foiz en pleurant et disant qu'il estoit abuvez de vin à l'eure, est venus en jugement, et à **IJ** genoulx et en pleurant a crié mercy à la Court à mains jointes, en suppliant qu'elle lui voulsist pardonner son meffait, et aussy en suppliant audit huissier pardon, pour quoy la Court a remiz au Conseil la taxation de l'amende.

Vendredi, **XXIIIJe** jour de janvier.

Cedit jour, monsr l'evesque de Paris, d'une part, et l'evesque de Lodeve, d'autre part, sur certain descort qu'il ont ensemble à l'occasion des biens d'un prisonnier larron qui est es prisons dudit de Paris, se sont rapportez au jugement de la Court.

Lundi, **XXVIJe** jour de janvier.

Cedit jour, a esté ordonné que un appellé Brifaudin, sergent royal, qui estoit adjornez et estoit prisonnier pour cause de certain argent que devoit avoir receu pour la redemption d'aucuns prisonniers en Angleterre, c'est assavoir messire Pierre des Essars et autres, s'en ira jusques au landemain de mi caresme que comperra

en personne pour rendre compte, et est mise au neant l'obligation qu'avoit fait ledit Brifaudin à un huissier d'armes qui l'avoit emprisonné, et tout du consentement de messire Phelippe des Essars, à la relation de maistre Ja. de Ruilly, president.

Cedit jour, a esté ordonné par requeste que mil escus qu'avoit ordonné messire J. de Poupaincourt, jadis president premier ceans, pour la fondation de certaines messes, seront mises devers la Court pour convertir en la rente admortie desdictes messes que la Court arbitre à L livres parisis, et seront tenus le chapitre de Roye, en l'eglise duquel lesdictes messes avoient esté ordonnées, et les executeurs dudit Poupaincourt

de querir ladicte rente, pour laquelle, se lesdiz mil escus ne souffisent, y sera fourni selon la teneur du testament dudit defunct.

Mercredi, **XXVIIIe** jour de janvier.

Cedit jour, la Court, à la requeste faicte par l'abbé de S. Mard de Suessons, a octroyé que ledit abbé joisse de son temporel pleinement soubz la main d'icelle Court.

Messire Guillaume de Vierville, chevalier, a asseuré Guillaume Taupin et Thomas de Condey, auxquels la Court a defendu qu'il ne parlent outrageusement ne ne meffacent audit chevalier, à peine de grosses et arbitraires peïnes.

Maistre J. de Combes, procureur en Parlement, a au jour d'ui eu congé d'aler à Pontoise pour faire certaine information en l'ostel Dieu d'icellui lieu.

Mercredi, **IIIJe** jour de fevrier, au Conseil.

Ce jour, a rendu le graphier **IJ** clefs du cofre de fer appartenent à l'exécution de l'arcevesque de Besançon, qui estoit à S. Cloud, ouquel n'avoit rien, comme disoient les gens dudit Besançon, à Thiebaut Amaurri, familier de Casin, à qui les executeurs l'avoient lessié.

Vendredi, **VJe** jour de fevrier.

Cedit jour, comparurent messire Raoul du Refuge, escolatre d'Orleans, messire Gerault Bagouli, docteurs en ladicte Université regens, maistre J. Thomas, licencié *in utroque* et procureur general de

ladicte Université,

non pas comme tel, et les procureurs des nations de France, de Picardie, Bourgoigne, Acquitaine et Champagne, non pas comme procureurs, Guillaume de Craon, J. de Rambures, Hutin de Dicy, Henry Quellet, et pluseurs autres estudians d'Orleans, auxquels

la Court sur le gouvernement petite de ladicte Université,

tant en meurs que en faiz de l'estude, a parlé en

les reprenant, et par especial sur les cas plaidioiez le

Ve dudit moiz, et finalement a ordonné la Court que

les defaus de ladicte Université et aussy remedes seront

miz en certaines cedules par chacun desdiz docteurs

et Thomas *ad partem* et en secret, et

renvoieront devers

la Court leur adviz et lesdictes cedules, sanz ce que

l'un sache de l'autre, et puiz la Court advisera la

provision,

et puiz en a renvoié lesdiz de l'Université.

Vendredi, **VJe** jour de fevrier, au Conseil.

Cedit jour, Pierre Le Nourrissier et Colin Tuebeuf, poissonniers et bourgoiz de Paris, et fermiers du fossé devers S. Victor lez Paris, ont consigné et deposé devers la Court la somme de **X** livres paris que devoient au receveur de Paris pour le Roy nostre Sire, pour le terme de la Chandeleur derrain passé, pour ce qu'ilz ont esté contrains à paier ladicte somme par Jaques de Buymont, huissier, par vertu de certain arrest et executoire d'icellui donné au prouffit de Pierre Marquier contre les prevost et procureur de la Marchandise de Paris.

Au jour d'ui a esté dit au graphier que face lettre à maistre P. Le Fevre, conseiller du Roy, par laquelle puisse faire inventoire des biens estans à Mayencourt, appartenans à l'execution de l'arcevesque de Besançon. Samedi, **XXJe** jour de fevrier.

Ce jour, la Court a defendu à peine de **Vc** livres à Jehan Marcheou, chastellain de Touars, qu'il ne mefface ne mesdie à Colart par soy.

Lundi, **XXIIJe** jour de fevrier.

Cedit jour, a dit monsr le president premier au registre qui par la Court estoit ordonné que la main du Roy mise aux biens de Bertran Bruneau avoit esté levée par ladicte Court au prouffit dudit Bruneau.

Juesdi, **XXVJe** jour de fevrier.

Ce jour, a esté levée la main des biens et corps de Bertran Bruneau qui y estoit mise pour cause de **IIIc** livres en quoy avoit esté condempnez envers le Roy, et si a la Court miz certain appel entrejeté par le procureur du Roy d'une sentence donnée au prouffit dudit Bruneau par les gens des Requestes de l'Ostel du Roy au neant.

Samedi, derrain jour de fevrier.

Aleume Cachemarée a requiz qu'il soit enregistré que, du congié et auctorité de la Court, il va ou paiz de Pons de Cardilhac pour executer l'arrest de la Court, ce qui lui a esté octroyé.

Juesdi, **Ve** jour de mars.

Cedit jour, a esté publiée une lettre royal sur l'impost d'une taille imposée sur les subgès de ce royaume.

Lundi, **XIIIJe** jour d'avril.

Ce jour l'arcevesque de Toulette, nepveu du Pape,

est venu en la Court au jour d'ui et a exposé l'affection que le Pape a à la Court, à laquelle a recommandé les causes touchans les eglises et personnes d'eglise, et oultre s'est offert à parler à nostre Saint Pere sur ce que la Court voudra; laquelle Court a remercié en la personne dudit arcevesque ledit S. Pere et de sa bonne affection qu'il a devers la Court, ce qui est apparu en especial es prerogatives qu'il a données à ladicte Court en son roole, et après ce s'est offerte audit Saint Pere.

Mardi, **XIII^e** jour d'avril.

Cedit jour, fu plaidoiée la cause d'entre Renault d'Azincourt et autres, d'une part, et le procureur du Roy, Pierre Aymery et autres, d'autre part, sur un excès fait en l'ostel des filles dudit Aymeri soubz ombre de mariage.

Mercredi, **XV^e** jour d'avril.

Ce jour, avant les arrests, sur ce que l'en disoit que les prevost et eschevins et loy de la ville de Cambray avoient banni aucuns dont mention sera faicte cy après, et dont procès avoit esté et estoit ceans, est appointé

que l'evesque et les prevost et eschevins et loy de la ville de Cambray, ou nom d'eulx et eulx faisans fors du Roy des Romains, leur souverain signeur, et moiennant certaines lettres par eulx sur ce obtenues dudit Roy des Romains, rendront et recevront l'abitation et demourance de ladicte ville damoiselle Marie du Cavech, Nycaise de Vault, Jaquemart de Dompierre, Jehan de Billy, Hannequin L'Orfevre, Nycaise Daneau, Jaquemart Huvot et Philibert Linart, boucher, que lesdiz de Cambray avoient banniz et condempnez clers laiz, et leur rendront tous leurs biens, se aucuns en ont esté prinz, et se ilz sont en nature, ou sinon la juste valeur et estimation d'iceulx, et promettront bonne paix et bon accord avec lesdiz banniz et condempnez, et leurs parens et amiz, et si les remetront et recevront aux droiz, honneurs, franchises, libertez et prerogatives des citoyens et habitans de ladicte ville, tout ainsi que se onques n'eussent esté banniz ou condempnez; et usera damoiselle Marie du Cavech et Girardin du Cavech, son frere, de change et marchandise en la maniere que les autres changeurs de ladicte ville en usent. Et seront tous les procès de court de Romme et des cours de Reins et de Cambray et de Parlement, pour occasion de ce et autrement faiz et encommenciez, miz du tout au neant. Et promettront lesdiz de Cambray que, pour occasion desdiz procès et des choses par lesquelles lesdiz banniz et condempnez avoient esté banniz et condempnez, ne pour les circonstances et dependances ilx ne leur porteront, ne feront ou feront faire par eulx ne par autre injure ne villenie, ne à leurs amiz, et ne les tendront, ne ne metront en aucuns procès, et de ce bailleront si bonnes lettres, comme

l'en pourra faire en tel cas. Et quant aux injures, despens, dommages et interests lesdiz banniz et condempnez, qui ont frayé toute leur chevance en ceste poursuite pour la bonne esperance qu'il ont tousjours eue de la bonne justice de la Court de Parlement, ilz s'en sont rapporté du tout en la bonne ordonnance de ladicte Court, laquelle a ordonné que l'argent, qui par l'ordonnance et appointement de ladicte Court a esté queully et levé pour l'issue du royaume pour la cause dessusdicte par commissaires ordonnez à ce par le bailli de Vermendoiz, sera baillé et delivré à ladicte damoiselle et auxdiz Nycaise de Vault et Jaquemart de Dompierre, qui ont fait et paié les despens de la poursuite faite contre lesdiz de Cambray. Fait du consentement de maistre Jaques Gregoire, vicair dudit evesque, Baudart de la Conquerie, receveur, Guerart de Bousort, conseiller, et J. Aubri, cleric des **IIII** hommes et gouverneurs de la ville et cité devent dicte, pour ce presens à ce en leurs personnes ou nom et soy faisans fors comme dessus, d'une part, et maistre Jaques Le Fer, procureur de Marie du Cavech, de Nycaise de Vault, Jaquemart de Dompierre, J. de Billy, Hannequin L'Orfevre, Nycaise Daneau, Jaquemart Huvot et Philibert Linart, boucher, d'autre part.

Vendredi, **XXIII**e jour d'avril.

Cedit jour, l'Université de Paris est venue en la Court, et, par la bouche d'un frere augustin, maistre en theologie, a proposé et prinz *pro themate: Docete omnes*, en le deduisant et concluant à ce que la Court, quant elle sera appellée au Conseil sur le fait de

l'union de l'Eglise, mesme attendu que l'antipape de Romme a envoié en l'Université par bulles et lettres bonnes nouvelles, elle s'en weille acquiter, telement que l'en puisse avoir brief union, et aussi que la Court ne weille pas souffrir que des benefices qui ont esté donnez ou temps de la subtraction qui fu faite à Nostre Saint Pere par le Conseil de l'Eglise et Court de France, les procès touchans icelle subtraction ne soient demenez à Court de Romme.

Lundi, **XJe** jour de may.

Ce jour, la Court a commendé à maistre Jaques Le Fer que soit avec maistre Michiel Mignon à l'encontre de l'Université de Paris.

Mardi, **XIJe** jour de may.

Au jour d'ui, la Court a ordonné que maistre Guillaume Barrau, secretaire du Roy et de monseigneur de Berry, et Segurier Lauze auront delay de cy à lundi pour bailler leurs lettres et procès mieux et plus arreement à l'encontre des evesques de St Pons, du Puy et pluseurs abbez et autres; et, quant au temporel desdiz evesques, abbez et autres, qui estoit en la main du Roy, la Court leur recroit soubz ladicte main jusques à ce que autrement en soit ordonné, et, pendent ce procès, s'il avient que aucuns desdiz evesques, abbés et autres, dont le temporel estoit empeschié, soit translaté ou alé de vie à trespas, la Court pourverra

auzdiz Barrau et Seguiet, au regart du salaire
que demandoient auxdiz evesques, abbez et autres.

Mardi, derrain jour de juin.

Ce jour, la Court, oye la relation de maistre Guillaume
de Villiers, conseiller du Roy et commissaire
en ceste partie, a delivré aux Carmes de Paris par
requeste la somme de CCCC livres tournois, restant de
plus grant somme venant des deniers et biens de
dame Perrenelle de Crepon, et laquelle somme estoit
en depost de par la Court au change demy sur le Pont.
Venredi, XVIIJe jour de juillet.

Cedit jour, après disner, en la presence de messire
H. de Marle, Y. de Boisy, presidents, et pluseurs
autres conseillers du Roy nostre Sire ceans, maistre
J. Hoynart, procureur de l'Université de Paris, et
pluseurs maistres d'icelle Université ont permiz que,
sanz prejudice de leurs droiz et privileges, frere J.
Bruillot, prisonnier en la Conciergerie, lequel avoit
demandé l'arcevesque de Rouen, lui soit bailliez et
rendus, attendu qu'ilz ont esté et sont anformez autrement
qu'ilz n'estoient au jour qu'ilz avoient fait ceans
leur requeste sur la reddition dudit prisonnier, et ce
ont requiz les parties estre enregistré.

Lundi, IIJe jour d'aoust.

Au jour d'ui, a relaté messire H. de Marle, premier
president en Parlement, au graphier que à l'entrée de
juillet, à un jour, à l'issue du siege, messire Anthoinne

de Craon, chevalier, qui voloit aler espouzer femme à Arras, doubtans que il ne fust pas à Paris au premier jour d'aoust, renouvela dès lors pour ledit premier jour d'aoust la caution de mil livres que autrefois avoit baillée pour ramener J. de S. Pere à tel jour que plaira le eslargir de nouvel.

Mardi, **XJe** jour d'aoust.

Au jour d'ui, avant les Plaidoiries, la Court a ordonné que jusques à la Septembresche, J. de Saint Pere sera elargi et *interim* fera tout son effort de

contenter ses crediteurs, et aussy messire Anthoinne de Craon et la femme dudit de S. Pere le pleront, *ut alias*.

Mercredi, **XIXe** jour d'aoust.

Cedit jour, le Roy estant malade en son hostel de Saint Pol à Paris de la maladie de l'alienation de son entendement, laquelle a duré dès l'an mil **CCC IIIxx** et **XIII**, hors aucuns intervalles de resipiscence telle quelle, et la Royne et le duc d'Orleans Loiz, frere du Roy, estans à Meleun, où l'en menoit le Dauphin, duc de Guienne, aagié de **IX** ans environ, et sa femme, aagée de **X** ans ou environ, au mandement de la Royne, mere dudit Dauphin, Jehan, duc de Bourgoigne et contes de Flandres, cousin germain du Roy et pere de la femme dudit Dauphin, qui venoit au Roy, comme l'en dit, pour faire hommage après le decès de Phelippe, son pere, oncle du Roy jadis, de

ses terres, et pour le visiter et aviser, comme l'en disoit, du petit gouvernement de ce royaume, souspeçonnans, comme l'en dit, que la Royne n'eust mandé ledit Dauphin pour sa venue, chevaucha hastivement et soudainement à tout sa gent armée de Louvres en Paris où il avoit geu, en passant par Paris environ **VIJ** heures au matin, et aconsuit ledit Dauphin, son gendre, qui avoit geu à Villejuyve, à Gevisy. Et ledit Dauphin, interrogué après salus où il aloit, et si vouldroit pas bien retourner en sa bonne ville de Paris, a respondu que oy, comme l'en dit, le ramena environ **XIJ** heures contre le gré du marquiz du Pont, cousin germain du Roy et dudit duc, et contre le gré du frere de la Royne et d'autres qui le menoiert. Auquel Dauphin alerent au devant le Roy de Navarre, cousin germain, le duc de Berry et le duc de Bourbon, oncles du Roy, et pluseurs autres seigneurs qui estoient à Paris, et le menerent ou chasteau du Louvre pour estre plus seurement, dont se tindrent mal contens lesdiz duc d'Orleans et la Royne, telement que *hinc inde* s'assemblerent à Paris, du cousté dudit duc de Bourgoigne, le duc de Lambourc, son frere, à grant nombre de gens d'armes et ou plat païz pluseurs de pluseurs païz, et à Meleun et ou païz environ du cousté dudit d'Orleans, pluseurs, comme l'en dit. Que l'en avendra, Dieu y pourvoie, car en lui doit estre esperance et fience, et non *in principibus, nec in filiis hominum, in quibus non est salus*.

Juesdi, **XXe** jour d'aoust.

Furent apportées lettres closes de par le duc d'Orleans devers la Court, quant l'en plaidoit, contenans *in somma* que l'en avoit priz le Dauphin contre la

volenté du Roy, de la Royne et du duc d'Orleans, son oncle, et qui est le plus prouchain après pere et mere, l'avoit l'en miz au Louvre, en commettant crisme de lese magesté, comme à l'ayde de Dieu et de Nostre Dame pençoit à maintenir, si requeroit la Court qu'elle ne souffrist ledit Dauphin estre transporté, ne entré plus gens d'armes par les portes de Paris pour paeur de commotion.*De data XIX hujus [mensis]*.

Mercredi, **XXVJe** jour d'aoust.

Cedit jour, fu apportée une cedula à la Court, dont la teneur est enregistrée en la fin de ce livre du Conseil de ceste année, de par le duc de Bourgoigne par maistre Baude des Bordes, son secretaire, de laquelle cedula a autant baillié à l'Université de Paris, et en pluseurs autres lieuz et citez de ce royaume, comme l'en dit.

Vendredi, **XXVIIIe** jour d'aoust.

Cedit jour, à matin et après disner, a esté plaidoiée une cause de gage de bataille sur la mort de feu messire Bernard de Castelbayart, chevalier, entre messire Bertran de Terride, d'une part, et le sr de Castelbayart, nepveu du feu de Castelbayart. *Criminale*.

Samedi, **Ve** jour de septembre.

Cedit jour, après disner, les **IJ** Chambres assemblées, furent apportées lettres de creance, de par le duc d'Orleans, par aucuns de ses officiers, avec lettres patentes seellées du grant seel dudit duc, responsoires à la cedula envoyée à la Court du **XXVJe** d'aoust derrain passé, dont la teneur est ou livre des Ordonnances.

Samedi, **XIJe** jour de septembre.

Cedit jour, ont presenté lettres seellées des seaux des ducs de Bourgoigne, de Lambourc et le conte de Nevers, freres, par **IIJ** ou **IIII** chevaliers ceans de par le duc de Bourgoigne, lesquelles lettres estoient comme replicatives aux lettres envoyées par le duc d'Orleans,

de toutes lesquelles la teneur est contenue ou livre des Ordonnances.

Cedit jour, fina le Parlement, et fu dit, comme puiz **XVe** avoit esté ordonné par lettres patentes royaulx, que par les vacations s'aucuns des seigneurs, *in debito et competenti numero*, vouloient venir ès

Chambres et juger des procès, gaigneroient et averoient leurs gages.

Juesdi, **IIIJe** jour d'octobre.

Cedit jour, a esté commandé, et autre foiz au graphier, qu'il signast la commission d'entre Guillaume de Buschaille, d'une part, et la dame de Giac, d'autre part, à maistre Phelippe de Boisgillou, J. Charreton et G. Petit Sayne, et *cuilibet cum adjuncto*, non obstant qu'elle fust distribuée à maistre O. Gencien et Ja. du Gard, car les dessusdiz sont du païz, et a esté Gencien recompensé par Charreton, ou cas qu'il feroit l'enquete, et aussi sera recompensez du Gard par celui qui fera ladicte enquete.

Mercredi, derrain passé, qui fu **XVIIJe** jour de ce moiz (de novembre), les maistres, procureur et escoliers et chappellains du college de Dormans fondez à Paris ou

Cloz Brunel, des bourses desquelx la collation est nouvellement devolue et venue à la Court de ceans par le trespas de messire Guillaume de Dormans, jadis arcevesque de Senz, nepveu de messire J. de Dormans, en son temps, chancelier de France et cardinal au temps du regne du roy Charle quint, pere du Roy present, lequel cardinal fonda ledit college, et aussi par le moien d'un certain accort ou arrest fait et passé ceans entre l'abbé et couvent de S. Jehan ès Vignes lez Suessons, d'une part, et lesdiz escoliers et ledit Guillaume, d'autre part, dont la teneur appert ou livre des Ordonnances de ceans, sont venus ceans et ont fait reverence et obeyssance à ycelle Court en suppliant qu'elle les ait pour recommandez, et ce ont requiz estre enregistré. *Commissarii deputati pro collatoribus* Marle et Mauger.

Samedi, **XXJe** jour de novembre.

Cedit jour, messire Henry de Marle, chevalier et premier president ceans, en pronunçant l'arrest d'entre maistre Matelin Waroust, clerc et notaire du Roy, et clerc au Tresor, d'une part, et maistre Mahiu de St Omer, et Raymon Lorier, notaire du Roy, d'autre

part, pour ce que ledit Matelin s'appelloit en ses lettres graphier du Tresor, dist que la Court de ceans estoit souverainne Court du royaume et si notable que chascun veoit et savoit, et pour ce appartenoit bien que les offices de la Court eussent preeminence et auctorité

singuliere, tant en nom que autrement, devient tous autres, et pour ce qu'[en] nul lieu hors ceans n'avoit, ne ne devoit estre aucun qui se doie appeller graphier, et que nul ne doit estre appellé graphier, sinon le graphier de ceans, si defendi à tous clerks que nul ne se appellast d'ores en avant graphier,

alias

la Court le punira, et pareillement que autres sergens d'autres chambres ou cours de justice ne se appellassent huissiers, hors les huissiers de ceans.

Lundi, **XXIIJe** jour de novembre.

Cedit jour, furent leuz en la Court certains articles par maniere de memoire, qui par la Court avoient esté faiz et baillés au Grant Conseil du Roy sur les defaus qui sont en la justice de ce royaume pour icelle reformer, et par l'ordonnance de nos seigneurs les ducs de Berry, d'Orleans, de Bourgoigne, de Bourbon, les roiz de Jherusalem et de Navarre, à l'occasion du debat qui avoit esté entre les ducz d'Orleans et de Bourgoigne, dont registre a ou moiz d'aoust derrain

passé et ou livre du Conseil, et plus à plain ou livre des Ordonnances, et pour ce que le Grant Conseil approuva assez lesdiz articles, ordonna oultre que, sur lesdiz articles, la Court advisast les remedes et les responses auxdiz articles et defaus, et fussent articulées;

pour quoy ycelles remedes et adviz furent leuz en la Court, afin que, s'il y avoit aucune chose à corriger, fust corrigée par icelle Court pour plus seurement estre leuz et baillez audit Grant Conseil, et par ce soit miz remede auxdiz defauz faiz en la justice, comme dit est. *Dicte ordinationes prius rupte quam lecte fuerunt.*

Mardi, **XXIII**e jour de novembre.

Cedit jour, a vaqué la Court audit Conseil à visiter, lire et conseiller les remedes articulez sur les defaus de la justice de ce royaume, articulez et bailliez au Grant Conseil pour y pourveoir, selon ce que enjoint avoit esté à la Court, comme dit est dessus, le **XXIII**e de ce moiz.

Juesdi, **XVII**e jour de decembre.

La Court a ordonné que, pour les abuz et entreprises qui, à Paris et en la viconté de Paris, sont fait par pluseurs de la court ecclesiastique de l'evesque de Paris, ou prejudice du Roy et de ses subgiez, information

sera faicte par maistre P. Drouart et O. Baillet, conseillers du Roy nostre Sire.

Samedi, **XIXe** jour de decembre.

Au jour d'ui, la Court a envoyé le graphier de ceans au Chancellier lui dire, de par la Court, qu'il seellast certain adjournement en cas d'appel et d'atemptas pour les habitans de Bar sur Aube, appellans à l'encontre d'un des serviteurs de la duchesse d'Orleans et un sergent appelé Jaquet de Chaalons, à l'occasion de la capitenie dudit Bar qui estoit donnée audit serviteur appelé Pirmen, lequel adjournement estoit signé par la Court, ou default dudit Chancellier qui l'avoit refusé auxdiz habitans,*alias*, la Court y pourverroit, auquel graphier a respondu ledit Chancellier que le seelleroit.

1406.

Samedi, **IJe** jour de janvier.

Cedit jour, a ordonné la Court que maistre Loiz Blanchet, prisonnier, duquel la prison avoit esté extendue par le Palaiz jusques à au jour d'ui, demourra en cest estat jusques à lundi prouchain, et ce pendent sa partie adverse verra les lettres par lui impetrées.

Juesdi, **VIJe** jour de janvier.

Avant les Plaidoiries, fu dit au graphier que certain accort, que messire Pierre de Craon, Anthoinne, son filz, et le sire de Honcourt requeroient estre receu et passé ceans, n'y seroit point passé ne receu, maiz alassent les parties ou Chastellet le passer, se bon leur sembloit.

Juesdi, **XIIIJe** jour de janvier.

Cedit jour, Colart de Laon, peintre, a promiz de parfaire le tableau et ouvrage qui est ou parquet de Parlement dedans le mi-caresme, par ce que J. de la Cloche, bourgoiz de Paris, qui avoit donné ledit tableau, outre ce que ledit Colart avoit eu de lui, lui a delivré et baillié **XIJ** frans, l'entention toutevoie dudit Colart est que, se il aura plus desservi qu'il n'a eu, que les commissaires à oïr les parties lui facent raison.

Mercredi, **XXe** jour de janvier.

Au jour d'ui, pour ce que certain arrest ou jugié avoit esté fait en la Chambre des Enquestes d'entre messire Gaucher de Chastillon, curateur de messire J. de Chastillon, son frere insensé, d'une part, et la contesse de Harcourt, d'autre part, et icellui arrest, avant ce que l'en l'eust prononcé, eust esté revelé, comme l'en croit *verisimiliter*, parce que le Roy et aucuns de nosseigneurs avoient mandé les presidens de ceans, et avoient volu et voloient que ledit procès fust veu par les trois Chambres, et, au contraire, ledit Gaucher avançoit ledit arrest, et sur ce eust présenté lettres patentes à la Court, a esté dit et ordonné que

ledit arrest sera prononcé des premiers qui se prononceront.

Au jour d'ui, maistre Pierre Le Pingre, cleric et negociateur de messire J. Le Meingre, chevalier, mareschal de France, a dit en la Court que, pour ce que les habitans de Brive la Gaillarde requeroient leur estre pourveu de gens d'armes ou de finance pour gens d'armes, à resister à l'entreprise de fait et guerre que à eulx et aux paiz d'environ leur faisoit messire Raymon de Turenne, chevalier, entre lequel, d'une part, et ledit mareschal estoit ceans procès de la conté de Beaufort en cas de nouvelleté, pour quoy estoit certaine finence en la main de la Court, comme en la main du Roy, laquelle lesdiz habitans demandoient leur estre baillée et prestée, que ledit mareschal avoit dit que de ce et de ses autres choses de ce royaume lui plaisoit que le duc de Berry en feist à sa volenté, à laquelle se rapportoit; pour quoy maistre Renier de Bouligny, cleric et secretaire dudit de Berry, a dit de par le duc que lui plaisoit que l'en preist de ladicté finance pour pourveoir auxdiz habitans jusques à la somme de **Ijm** escus, pourveu que se obligeront de les restituer *tempore et loco*.

Samedi, **XXIIIe** jour de janvier.

Ce jour, messire Jaques de Bourbon, chevalier et parent du Roy, est venus à la Court atout lettres de

creance, et a requiz, de par le Roy, que l'arrest, en quelque estat que fust de prononcer, se en ce estat estoit, d'entre la contesse de Harcourt, tante du Roy, d'une part, et messire Gaucher de Chastillon, chevalier, *nomine quo procedit*, d'autre part, fust differé de

cy à mardi prouchain, sur quoy lui a esté respondu que l'en en feroit du miex que faire se pourroit. Et, pour ce que ceste responce, comme trop general, ne lui souffisoit pas, a esté sur ce conseillée la Court, present ledit de Bourbon, qui est du Conseil du Roy, et considerées les ordonnances de ceans et de pluseurs roiz, et aussy que le Roy paravant envoya lettres patentes de haster la besoigne ceans, a esté dit que l'en ne differeroit point.

Samedi, [XXXe](#) jour de janvier.

Cedit jour, en la Tournelle criminelle où estoient pluseurs des seigneurs laiz de ceste Court, a la Court obtemperé à certaines lettres obtenues par les fermiers de Tholouse et a miz l'appellation au neant, et,

en obtemperant à certaines autres lettres obtenues par maistre J. de Ruilly, la Court a renvoié et renvoye les parties par devant les generaulx sur le fait de la justice ou paiz de Languedoc au **XXe** de mars prouchain venant, touz despens reservez en diffinitive.

Ce jour, a la Court commiz messeigneurs H. de Marle, president, et R. Mauger à conferer les bourses du college de Dormans, *et cetera facere que, juxta accordum in Curia dudum passatum, facere debet Curia.* Venredi, **Ve** jour de fevrier.

Au jour d'ui, la Court a defendu à maistre Pierre de Perach, cleric et licencié, sur peine d'encourre l'indignation du Roy et de la Court, c'est de corps et de biens, que en nulle maniere il ne conseille, ne ayde, ne conforte messire Raymon de Turenne, chevalier, ou prejudice du Roy, de son honneur, ne de sa Court, maiz le induise et enhorte de son pouvoir à obeir au Roy et à sa Court, et à leurs commendemens, comme bon vassal et loyal doit faire à son seigneur.

Samedi, **VJe** jour de fevrier.

Messire Estienne Haton, prestre et chanoine d'Arras, requiert à l'encontre de l'evesque et chapitre d'Arras provision de juge en un cas dont est accusez à tort, provision de vivre et eslargissement.

L'evesque d'Arras dit au contraire que partie, c'est assavoir Haton, est accusez et souspeçonnez *crimine pessimo* dont s'est rendu coupable, parce que s'en fui, dont deust avoir la cognoissance, maiz se la Court

welt ordonner juges, de par Dieu soit, maiz Haton ne sera point eslargi.

Chapitre d'Arras consent que la Court baille juges audit cas, maiz de l'eslargir non. Si a appointié la Court que maistres J. Charreton, G. Ponce et Ja. Gelu, conseillers du Roy, seront juges en la cause et appelleront avec eulx maistres G. de Gaudiac et autres de la Court, ou cas que les parties ne s'accorderont de juges, et fait la Court provision audit Haton de XL livres.

Au jour d'ui, a dit la Court au graphier que le sire de Terride et celx qui avoient plegié et cautionné Diago d'Avesche, escuier, ont rappellé ladicte caution et plegerie.

Mercredi, XVIIJe jour de fevrier.

Cedit jour, à l'occasion de certaines lettres baillées par le Chancellier au graphier et envoyées ceans pour presenter, lire et publier ès Chambres de ceans, contens en substance que, pour plusieurs très grans defaux et negligences que ou fait de la justice estoient ès IIIJ Chambres de Parlement, parce que plusieurs de conseillers dudit Parlement avoient obtenu lettres de gages à vie, pour quoy le Roy rappelloit tous gages à vie desdiz conseillers, fors de ceulx qui avoient servi

XX ans et au dessus, et oultre ordonnoit que les presidens de Parlement contraignissent et peussent contraindre lesdiz conseillers par suspension de leurs offices et par autres voies à faire leur devoir, en leur donnant de ce plain pouvoir et auctorité; maistre Robert Mauger, de par la Court, presens icelles IJ Chambres dessusdictes, prist la parole de l'apostre: *Solliciti servare unitatem in vinculo pacis*, et alibi, *non sint in vobis scismata*, et alibi, *non sitis inanis glorie cupidi, neque inter vos contententes, nec vobis invicem invidentes*, en debatant lesdictes lettres de falseté, surreption et iniquité, contre l'onneur mesme des presidens, quant au premier point, et aussi comme de nulle valeur, et non soustenables quant au point de la contrainte, car les presidens n'estoient que membre de la Court, comme les conseillers, ja soit ce qu'il eussent prerogation d'avancer les besoignes et arrests, et, comme ilz ne peussent suspendre ne priver le moindre procureur de ceans, maiz la Court, par plus fort raison, ne pavoient ne ne devoient suspendre lesdiz conseillers de leurs offices, attendue aussi l'auctorité, noblesse et preeminence desdiz conseillers, toute notoire, et l'auctorité souverainne de ceste Court qui estoit communement nommée fonteinne de justice,

par quoy l'en devoit avoir et tenir lesdiz conseillers en grant reverence et honneur, et non pas les manier ou demener, comme enfans d'escole, sers ou serviteurs; car mesme le Roy en ses ordonnances, en ses lettres et mandemens les honeure grandement, les appellans maistres de son Parlement et tous autres seigneurs; si n'est pas raison que soient en telle subjection,

car aussi sont il en grant nombre, à ce que s'aucun ou aucuns presidens ou aucuns d'eulx

invicem

avoient ou sur eulx ou contre eulx indignation, que un, ne **IJ**, ne **IIIJ**, ne **VJ** ne les puissent pas punir, maiz toute la Court. Oultre disoit qu'il ne faloit ja causer ladicte lettre pour venir à la provision faicte par icelle lettre, qui estoit moult petite et de très petit proufit au Roy, car toute la provision ou ordonnance, hors miz les exceptez, ne comprenoit que **V** ou **VJ**, desquelx les uns avoient servi le Roy **XIX**, les autres **XVIIIJ**, les aucuns **XVIJ** ans, et l'exception estoit de celx qui avoient servi le Roy vint ans, que le Roy voloit joir de gages à vie, *tandem*, à fin, après pluseurs paroles, que la lettre fust revoquée, dessirée et corrigée ou amandée. Sur quoy s'excuserent les presidens par la bouche de messire H. de Marle, premier president, en disant qu'il ne tendoient tousjours que à paix, et ceste est la fin de la Court et d'eulx, *quia opus justitie pax*, ne ne se voloient point donner l'auctorité contenue en ladicte lettre, *quia scriptum est, constitui te unum ex illis non extollaris*, en soy excusant et en disant que par eulx, ne à leur instance, ne en leur presence, ne par leur conseil ladicte lettre n'avoit

esté empetrée, ne faicte. Et fu *tandem* conclu que la Court requeroit que ladicte lettre fust dessirée, revoquée et refaicte, et après ce fu ordonné par le Chancelier, qui, pour autre chose cy après contenue, survint à la Court, et avec lui les evesques de Noyon, de Paris, de Chalon et de Saint Flour, que ladicte lettre seroit corrigée et refaite.

Item, après ce à conclurre ou procès d'entre messire Olivier de Mauni, d'une part, et le Borgne de la Heuze, chevaliers, d'autre part, sur le plaidoié du **XIJe** de janvier derrain passé, et tout veu, a esté conclu que l'en attendroit la santé du Roy, lequel, si voloit ou welt croire le conseil de la Court, ne mettra à Saint Maalo en Breteigne pour capitain ne ledit Olivier, ne ledit Borgne.

Mardi, **XXIIJe** jour de fevrier.

!Messire Pierre Symeon, prestre, executeur du testament de feu madame Ysabel de Germaincourt, dame de Baucey, a au jour d'ui baillié à la Court la somme de soixante escus d'or, laquelle somme ladicte Ysabel avoit laissié en sondit testament à ladicte Court pour employer en livres ou en autres usages, au plaisir

d'icelle Court, et a requiz ledit Pierre ce estre enregistré, et a eu autant du registre signé par le graphier.

Vendredi, **XXVJe** jour de fevrier.

Cedit jour, la Court a defendu à maistre Dominique qu'il ne mesdie, en quelque maniere que ce soit, à maistre N. d'Orgemont.

Mercredi, **VIJe** jour d'avril.

Ce jour, la Court a octroyé à Josserant Frepier, à l'encontre du roy de Castelle, sommation *pro prima vice* en cas de marque, tout considéré.

Samedi, **XXIIIJe** jour d'avril.

Ce jour, ont esté revisitées les ordonnances sur le fait de la justice, qui, autre foiz, avoient esté avisées pour bailler devers le Grant Conseil par l'ordonnance de nos seigneurs de France, et autre chose n'a esté fait.

Mardi, **XXVIJe** jour d'avril.

Ce jour, a esté la Court empeschée, pour ce que plusieurs des presidens et autres des seigneurs sont alez devers nosseigneurs pour certaines rebellions faictes ou paiz de Guienne et de Languedoc contre l'execution d'un arrest obtenu par Regnault de Murath contre Pons de Cardilhac, et pour ce n'a pas esté plaidoié.

Cedit jour, après ce que par la Court, ou m. N. d'Orgemont et J. Accart, commiz à ce, le graphier

present, fust avisié que les sieges et bancs et porches de la Chambre du Parlement estoient vielx, derompus, et moult malhonestes, et aussy malaisez et trop bas d'environ pleine paume ou demi piet, pour quoy l'en ne pavoit entendre les advocas si bien qu'il appartenoit,

et pour ce eust esté fait marchié à Guillaume Cyrace, par la maniere qu'est contenu en la fin du Conseil de ceste année, bourgoiz et hucher à Paris, pour le priz de **IJc** escus qu'il en doit avoir, parmi ce qu'il rendra tout prest et assiz à ses despens hors ferreures dedans la Toussaint prouchain venant, et ce a promiz en la main du graphier, ycelle Court a ledit marchié approuvé, et ordonné que ... de certain argent estant devers ledit graphier, venant d'une amende en laquelle avoit esté condempné J. Corieu, procureur ou Chastellet, envers le procureur du Roy.

Mercredi, **XXVIIIe** jour d'avril.

Cedit jour, outre les seigneurs cy-dessus nommez, furent au Conseil pour le fait des marques, et par especial pour conseiller sur certain accort avisié entre aucuns officiers et gens du Roy, d'une part, et les gens et officiers du roy d'Arragon, d'autre part, au regart des marques ou temps passé *hinc inde* adjudgées,

et dont l'execution pendoit:

Messire Arnault de Corbye, chancelier, le patriarche d'Alexandrie, l'arcevesque d'Aux, l'evesque de Paris,

l'evesque de Tournay, l'evesque de Limoges, l'evesque de S. Flour, m. Jaques de Ruilly, president, m. Tristan du Boz, m. E. de Laitre, m. P. de l'Esclat, m. A. Marchant, m. B. Quantin, m. J. Boyer, m. P. Buffiere. Il a esté ordonné que Loiz Jehan qui se opposoit audit accort sera oy à demain.

Sur ce que le bailly de Tournay et de Tournesis avoit requiz à la Court que aucun ne fust receu en son office de bailli, ne d'icellui ne fust aucunement despointié

sanz le oïr avant, attendu qu'il offroit à respondre par peremptoire à ce que l'en lui voudroit demander à l'occasion d'aucunes informations que l'en disoit estre faictes contre lui, a esté respondu en la requeste baillée par escript par ledit bailly: *Audietur, antequam aliquid minutetur. Actum XXVIJ aprilis CCCC VI*, et ce a requiz estre enregistré en la Court ledit bailly.

Mercredi, *Ve* jour de may.

Ce jour, la Court a appoinctié que toutes informations cesseront contre le bailli de Tournay et de Tournesis, et s'en pourra aler jusques à ce que, veuz le procureur du Roy les cas qui lui seront baillez, en sera autrement ordonné, attendu que ledit bailli a offert à respondre personnelment et peremptoirement ceans à ce que l'en lui voudra demander.

Lundi, *XVIJe* jour de may.

Cedit jour, la Court a eslargi J. du Ru, prisonnier en la Conciergerie et nagueres geolier d'icelle, pour

occasion de certains prisonniers qui s'en estoient eschapez de ladicte Conciergerie, par Paris, *sub penis et summissionibus* et moiennant caution de **LX** livres que ledit du Ru sera tenus de bailler.

Mardi, **XVIIIe** jour de may.

Messire Foulques d'Acre, chevalier, est au jour d'ui venu au registre, à heure de vespres, et a dit que non obstant qu'il fust adjornez au **XXe** de ce moiz ceans pour asseurer maistre Oudart Correl, procureur ceans, estoit prest de l'asseurer, et voloit que l'asseurement vaulsist autant comme s'il l'eust assureé ledit jour, si plaist à la Cour, car il falloit ledit chevalier partir sur heure et chevaucher nuit et jour pour estre à la besoigne et bataille de Brantosne.

Juesdi, **XXVIIe** jour de may.

Ce dessusdit jour, a presenté l'Université, par maistre Pierre Cauchon, maistre J. Broillot et autres, **IJ** lettres royaulx par lesquelles principal et executoire est mandé à la Court qu'elle face justice au procureur du Roy et à ladicte Université sur certaine espitre injurieuse faicte et envoyée par l'Université de Tholouse dès le temps de la subtraction faicte au Pape et contre icelle, en la deshonneur du Roy, de son Conseil, de son royaume et de ladicte Université, et ont requiz lesdiz Cauchon et Broillot ce estre enregistré.

Et cedit jour ladicte Université, en grant compaignie

et assemblée, tant d'icelle Université que des seigneurs des deuz Chambres, de prelas et des maistres des Requestes de l'Ostel du Roy, proposa par la bouche de maistre Pierre Plaoul, maistre en ars et en theologie et chanoinne de Paris, en disant pour theme:*Querite pacem civitatis et orate pro ea. Jeremie, XXIX, hystoria prophetalis...*

Après ce se leva maistre J. Petit, maistre en theologie, qui dist que l'entente de l'Université estoit de monstrier en especial la faute et injure de ladicte espitre et declarer certains poins des griefs intollerables faiz par le Pape et ses officiers à l'Eglise, pour quoy requiert de par l'Université jour à proposer lesdiz poins,*singillatim* et en especial. Si leur a octroïé la Court tel jour que voudront eslire, si se sont arresteiz pour jour à d'ui à **VIII** jours, après leur a esté dit par la Court, que pour ce que la matiere est grande, grosse et notable, et est expediens que chacun l'oie et entende, que le jour que parleront proposient en françoiz, pour ce que touz ceulx qui viennent ceans oïr les Plaidoiries n'entendent pas latin. Et ancor après ce, a requiz l'Université que, pour ce que ladicte espitre est notoirement diffamatoire, et se dampne de soy, et fust cheue du ciel, requierent que s'il y a aucuns à qui il touche et qui weillent aucune chose dire que comparient audit jour, si leur a dit la Court qu'il baillient les noms et surnoms d'iceulx, et il leur

sera signifié que, se aucune chose wellent dire,
comparient

ledit jour.

Vendredi, **XXVIIIe** jour de may.

La Court ce jour a ordonné que maistre N. d'Orgemont,
G. Petit Sayne, P. Lefevre et R. Mauger
interrogueront ceulx que l'Université de Paris leur baillera
sur le fait d'une espitre injurieuse pieça envoyée
au Roy, à la Court et à ladicte Université par l'Université
de Tholouse sur le fait de l'universale subtraction
jadis faite au Pape.

Lundi, **VIIe** jour de juin.

*Nota, septem folia sequentia, multum excellentia et
notabilia in propositionibus sequentibus factis per
excellentes clericos et doctores Sacre Scripture in
presenti
Curia./*

Mercredi, **XVJe** jour de juin, au Conseil.

Et cedit jour, entre **VJ** et **VIJ** heures à matin et assez
tost après **VJ** heures, quant l'en visitoit les requestes
en la Chambre, apparu eclipse de soleil tel que le
soleil, qui une heure paravant luisoit moult bel, net et
cler, souffri tel defaut de clarté ou bas monde que l'en
ne voioit ne que à l'eure de **X** heures de nuit ou environ
IJ heures après minuit, et dura ce l'espace de la

XIJe partie d'une heure ou environ, par especial en nostre climat.

Vendredi, **XVIIJe** jour de juin.

Cedit jour, les notaires du Roy, sur certaines lettres qu'il avoient obtenues du Roy sur le paiement de leurs gages, c'est assavoir de **Vm** sur l'emolument du seel, à quoy s'estoit opposé le Chancelier, et mil sur les amendes, ont baillié certaine requeste sur l'enterinement desdictes lettres, et en cas d'opposition venir ceans dire la cause d'opposition et d'oster l'empeschement miz aux bourses par ledit Chancelier et audiencier, sur quoy n'a pas esté ordonné, en attendant que les parties s'accordassent sanz procès.

Mardi, **XXIJe** jour de juin.

Fu si grant tempeste au lieu du Landict et à S. Deniz que, comme relatoient aucuns des seigneurs de la Court et de l'evesque de Paris, y chut greelle aussi grosse qu'est le poin à un homme et plus ancores.

Mercredi, **XXIIJe** jour de juin.

Cedit jour, la Court a defendu à me Henry Mauloué, audiencier de la Chancellerie, qu'il ne delivre l'argent de la Chancellerie ou seau d'icelle à aucun jusques à

ce que la Court en ait autrement ordonné, et ce a esté à la requeste des notaires, et a dit la Court audit Mauloué que, si se voloit opposer ne estre oy, qu'il venist venredi prouchain, à quoy dist que la distribution dudit argent ne lui appartenoit pas, et qu'il ne se opposoit pas.

Samedi, **XXVJe** jour de juin.

Ce jour, la Court a ordonné et ordonne que les advocas et procureurs soient prests chascun jour que l'en plaidera après disner à **IIII** heures de leurs causes, *aliàs*

sera executé chascun advocat de **LX** solz et procureur de **XL** solz, qui default fera.

Mercredi, derrien jour de juin.

Cedit jour, le procureur du Roy et l'Université de Paris requierent que l'espitre de l'Université de Tholouse envoiée dès l'an **CCCC I** au Roy, et contre laquelle a ceans esté proposé par l'Université et par les gens du Roy, *sine expectatione seu procrastinatione judicetur*, attendu qu'elle est dampnable de soy, et fussent les compositeurs ou compositeur mors, à quoy la Court leur a dit que, pour ce que l'Université avoit requiz default contre maistre Guigon Flandin, que l'en dit compositeur de ladicte epistle, et adjournement,

attendoit à juger l'un avec l'autre, à quoy ont dit ceulx de l'Université que, attendu que ladicte Université de Paris a grosses besoignes entreprises pour le bien publique, et ne puet pas vacquer à tant de choses ensemble, comme poursuivre ledit Guigon qui se defuit et rend fuitif, et si est fait separé, si welent et requierent, attendu ce que dit est, le jugement sur ladicte espitre, et puiz après à leur bon temps et loisy poursuivront leur defaut et ce que ont à poursuivre à l'encontre dudit Guigon, pour quoy a esté ordonné que venredi prouchain s'assembleront les Chambres et prelas estans du Conseil, et sera rapportée la besoigne en Conseil pour juger.

Vendredi, **IJe** jour de juillet.

Cedit jour, environ **VIII** heures, se sont assemblez au Conseil en la Grant Chambre de Parlement, sur ce qu'avoit esté requiz par l'Université de Paris et le procureur du Roy mercredi derrien passé touchans ladicte Université de Paris et ledit procureur du Roy sur l'adjudgement de certainne epistle envoyée au Roy par l'Université de Thoulouse dès l'an **CCCC I** contre l'ordonnance faite sur la subtraction qui par avant avoit esté faite au pape Benedic **XIIIe**, c'est qui s'ensuivent: messire H. de Marle, Pierre Boschet, Y. de Boisy, presidents.

A conseiller se l'en jugera l'espitre de Tholouse dessus dicte sanz appeller ceulx de l'Université de Tholouse, attendu que en icelle s'offrent à la soustenir envers et contre tous.

Dit a esté et conclu que l'espître dessusdicte, les lettres de la restitution de l'obeysance et tout ce qui appartendra à la matiere sera veu, et puiz les seigneurs diront et delibereront ce que bon leur semblera.

Samedi **IIJe**, mercredi **VIJe**, venredi **IXe** jour de juillet. A conseiller ladicte epistle de Tholouse. *Non est conclusum.*

Mardi, **VJe** jour de juillet.

Le duc de Bourgoigne dit que, comme ait esté ceans proposé contre une epistle Tholousainne par le procureur du Roy, le duc de Berry et l'Université de Paris, et il soit informé qu'elle soit moult diffamatoire contre l'onneur du Roy, de son sanc et de son Conseil, il se adjoinct avec lesdiz procureur du Roy, de Berry et de l'Université, et tient les conclusions faictes par les dessusdiz comme faictes par lui, et aussy pareillement s'adjoinct avec les dessusdiz à l'encontre de messire Guigon Flandin, que l'en dit compositeur de ladicte epistle, en faisant pareilles conclusions comme autrefois ont esté faictes par les dessusdiz tant contre ladicte epistle que contre ledit Guigon, et requiert ce estre registré et en avoir lettre.

Depuiz l'Université, ou le recteur et les deputez d'icelle, sont ceans venus, et ont presenté lettres patentes royaulx, contenens mandement de delivrer le jugement de ladicte epistle tant en jours de Conseil que de Plaidoiries, et sanz intervalle de temps; après la lecture desquelles lettres a proposé et dit me J. Petit, maistre en theologie, de par ladicte Université, que pour ce que pluseurs empeschent ledit jugement de l'epistle, et, par especial, aucuns dimenche derrain

passé, à l'eure de **XJ** heures de nuit que le Roy se voloit coucher et aler dormir, aucuns lui requirent que ledit jugement fust differé, et se n'eussent esté aucuns amiz de l'onneur du Roy et de l'Université, eussent empesché ledit jugement, qui est moult grant peril au Roy et à sa lignée et au royaume, car s'il avenoit que la chose demourast empeschée et le Roy mouroit, veu que ladicte epistle maintient le Roy scismatique, l'en pourroit conquerir le royaume, comme le Roy mesme conquist *in simili casu heresis* la conté de Tholouse,

et en tel cas aussi conquist le bastart d'Espagne le royaume de Castelle, pour quoy à obvier à telx perlix et aventures requierent l'acceleration du jugement de ladicte epistle et dient qu'il ne cesseront de venir de jour en jour jusques à ce que ladicte epistle soit jugée, car en ce le Roy, la Court et ladicte Université demourront

en paix, et si n'y avera ja interest pour les Plaidoiries, car se la Court emploie aucuns jours de Plaidoiries à conseiller et juger ladicte epistle, en pourra rebranre autant des jours ordonnez à conseiller, et dit que ce sera honte à la Court, se la chose n'est jugée et expédiée.

Samedi, **Xe** jour de juillet.

A conseiller le jugement sur l'epistle de Tholouse, veuz les propos de l'Université de Paris, du procureur du Roy, des duc de Berry et de Bourgoigne, du **XXVIIJe** jour de may et de juin ensuivant derrien passé, et tout veu et consideré.

Il sera dit que ladicte epistle apportée par messire Guigon Flandin, soy disant messenger de Tholouse, est injurieuse et diffamatoire du Roy et de sa magesté

royal, de ceulx de son sanc, de son conseil, du clergié de France et de l'Université de Paris, et comme tele sera despecée en pieces en la Court de ceans, et les semblables à Tholouse et sur le pont d'Avignon, et sera fait commandement à son de trompe par tous les bailliages, senechaucées et jugeries royaulx de ce royaume que quicunques avera la copie ou double d'icelle, qu'il apporte ou envoie en la Court dedans **III** moiz après ladicte publication, sur peinne de cent mars d'argent et de quanques il se pourra meffaire envers le Roy et sadicte Court.

Mercredi, **XIIIJe** jour de juillet.

Cedit jour, maistre Pierre de l'Esclat et Hemonnet Raguier, tresoriers des guerres, ont dit de par la Royne que de la volenté du Roy elle ne demande rien à messire Morelet de Betencourt, à occasion de certaine somme d'argent qui lui appartenoit, et laquelle somme l'en disoit que ledit Morelet avoit ottée par force à cellui qui l'apportoit à Paris, soubz umbre de ce qu'il disoit que le Roy lui devoit.

Samedi, **XVIJe** jour de juillet.

Cedit jour, fu prononcié l'arrest, ordonnance ou jugement de l'epistle de Tholouse.

Mercredi, **XXJe** jour de juillet.

Sur la provision requise par le curé de Chalemol, à

cause des funerailles et beneissons de noces et d'espousailles

à l'encontre de ses parroissiens, la Court a ordonné et ordonne que ledit curé aura par maniere de provision, durant le plait pendent entre lesdictes parties, pour la funeraille de chascun chief d'ostel de sa parroice **XV** solz parisis, soit homme ou femme, et de chascune autre personne non faisant chief d'ostel, aagée au dessus de sept ans, **XII** solz parisis, et de chascun

enfant de **VIJ** ans et au dessoubz **XXX** deniers parisis, et pour chascune beneysson d'espousailles, de chascun chief d'ostel faiz en sa parroice **X** solz parisis, et d'autre **VIII** solz parisis; et pour remission ou licence de ceulx de ses parroiciens qui se iront marier hors de sa parroice, aura ledit curé de chascun chief d'ostel **XV** solz parisis, et de chascune pucelle un pichot d'avoinne à la mesure de Bourbon Lanceiz et une geline, et de chascun autre non faisant chief d'ostel **XII** solz parisis.

Juesdi, **XXIXe** jour de juillet.

Cedit jour, messire H. de Marle a relaté que le chancellier de monseigneur d'Orleans lui avoit dit de par ledit d'Orleans que, attendu que le doien de Paris, maistre J. Chanteprime, conseiller ceans, ne pouvoit vacquer, obstant son doienné, à sondit office et que maistre Giles de Clamecy, licencié en loiz, est son nepveu,

bon clerc et suffisant homme, filz de Giles de Clamecy qui avoit bien servi le Roy, et au prouffit duquel maistre Gile ledit doien voloit bien resigner son office dessusdit, lui sembloit que la Court pouvoit bien recevoir ledit maistre Giles, non obstant certaines ordonnances faictes sur l'election des offices de ceans.

Pareillement, maistre Michiel Le Buef, secretaire de monseigneur de Berry, et aussy maistre Geffroy Maupoivre

et autres sont venu au jour d'ui ceans, et de par lesdiz de Berry et de monseigneur de Bourgoigne ont dit que, attendu ce que dit est de par monseigneur d'Orleans, la Court pouvoit bien et devoit recevoir ledit maistre Giles, si comme lui sembloit et plaisoit.

Samedi, derrien jour de juillet.

Ce jour, a esté receu ou lieu de maistre J. Chanteprime, doien de Paris, en la Grant Chambre maistre Renault Rabay, ou lieu duquel a esté receu en la Chambre des Enquestes maistre Giles de Clamecy, nepveu dudit doyen, qui en faveur de lui avoit resigné sondit lieu. Et pour ce que debat estoit entre maistre Germain Paillart, d'une part, et ledit Rabay, d'autre part, sur ce que ledit Paillart disoit qu'il devoit aler devent ledit Rabay, car il avoit esté primo receu ordinairement, combien que ledit Rabay eust eu lieu extraordinaire paravant lui, car il avoit servi ou lieu de maistre J. Gibour qui

mente captus

ne pouvoit servi, maiz il avoit eu manteaulx et gaiges ordinaires après ledit Paillart, les **IJ** Chambres assemblées,

a esté dit que Rabay devoit aler devent en la Grant Chambre. Et aussy, pour la difficulté de certaines ordonnances faictes d'eslire les seigneurs de ceans de cy en avant puiz un an, par le consentement de nosseigneurs

les ducz, et attendue la resignation dudit Chanteprime qui longuement avoit servi ceans, qui aussy resignoit au prouffit dudit Clamecy, *non alias facturus*

a esté receu ledit Clamecy et a fait le serment
acoustumé.

Samedi, **XIIIJe** jour d'aoust.

Sur ce que le Roy avoit fait, ou par importunité de requerans ou moins pourveument, aucunes choses touchans les offices de la Chambre des Comptes, du Tresor, les maistres de son Hostel et autres offices contre les ordonnances faictes n'avoit que un peu par grant et meure deliberation, et avoit envoyé publié les lettres, sur ce que dit est que estoit contre lesdictes ordonnances, a esté dit et deliberé que la Court ne souffriroit point qu'elles fussent ceans publiées, car ce seroit contre l'onneur du Roy.

Samedi, **XXVIIIJe** jour d'aoust.

Cedit jour, le procureur du Roy general s'est opposé en la Court et s'oppose que maistre J. de Longueil, conseiller du Roy ceans, lequel l'en dit avoir obtenu l'office de general sur le fait de la Justice ou lieu de messire J. David, à present bailli de Rouen, ne soit receu à tenir les **IJ** offices, c'est assavoir de general et de conseiller ceans, maiz en acceptant l'un laisse l'autre, et à ce a requiz d'estre oy, se mestier est, et ce estre enregistré.

Mercredi, premier jour de septembre.

Cedit jour, fu ordonné que **XIJ** ou **XIIJ** de messeigneurs

avec les procureur et advocas du Roy iroient à S. Victor, où se doit tenir le Grant Conseil où doivent estre les ducs de Berry, d'Orleans et de Bourgoigne et de Bourbon, sur ce que hier le duc de Berri, duquel aucuns des gens puiz **IJ** ou **IIJ** jour avoient esté miz ou Chastellet, pour ce qu'il estoient alez à minuit en l'ostel de la Banniere, en la rue des Lombars, où estoit logez l'evesque du Puy, et avoient rompu l'uiz et

avoient prinz une bible, breviaire, ceinture et autres chosettes, et une fillette que l'en disoit que ledit evesque avoit, ou ses gens, et à les chacer par le chevalier du Guet et ses gens s'estoient rebellez et efforcez de les battre, et pour ce aussi que la Court avoit parlé à aucuns desdiz prisonniers de près, avoit dit ledit de Berri que s'en penroit aux singuliers seigneurs de la Court et à messire Ymbert de Boisy, president, qui avoit esté oudit Chastellet. Et pour ce que ce estoit contre les droiz et honneur du Roy qui à ce jour estoit encloz et enfermez malade, et que c'estoit empescher justice, mesme en la ville de Paris où moult d'excès se faisoient, et où chascun *impune* portoit espées, dagues et couteaux, et armeures pluseurs de plain jour portoient, les dessudiz iroient pour aviser les seigneurs sur ce et *similibus*, et que il n'empeschassent point justice.

Juesdi, **IJe** jour de septembre, après disner.

Cedit jour, sur ce que un appellé J. Gendreau avoit baillié certaine requeste au duc de Berri contre messire P. Boschet, president ceans, et contre son honneur, en se plaignant de justice, ledit Gendreau s'en est rapporté à la Court, pour quoy, ladicte requeste veue, et tout consideré;

La Court a condempné ledit Gendreau à faire amende honorable audit Boschet, laquelle a faicte en icelle Court à genoux en criant mercy audit Boschet, et

aussy en amende proufitable, la taxation à icelle Court reservée, et lui a esté dit que, se jamaiz il lui avient de ainsy faire, il sera puni du corps, comme il appartendra.

Lundi, **VJe** jour de septembre.

A conseiller la taxation de l'amende proufitable de J. Gendreau à l'encontre de messire P. Boschet, il sera dit que la Court taxe l'amende proufitable à **X** livres, et condempne la Court ledit Gendreau es despens du default obtenu contre ledit Gendreau par ledit Boschet.

Lundi, **VJe** jour de septembre, au Conseil.

Cedit jour, en la presence de messeigneurs P. Boschet, Y. de Boisy, presidens, des archevesques de Tours et de Tholouse, des evesques de Paris, de Beauvaiz, de Xainctes, de Limoges, de Nantes, l'abbé de Saint Deniz, des seigneurs des **IJ** Chambres, de l'Université de Paris, de toute la Court et de plusieurs autres, a ceans proposé maistre J. Petit, docteur en ars et en theologie, pour ladicte Université, en disant, contre le Pape, que l'en baille au plus foible la chandoille tenir, pour ce qu'il estoit chargé de proposer en la Court, dont perdoit senz et memoire quant il consideroit sa foiblece et petitesse de son entendement et suffisance, la compagnie où le falloit parler et la cause pourquoy, toutevoie, quant il avoisit le droit et justice de la cause dessusdicte et de la Court, se confortoit. Disoit que l'Université de Paris se tient en la subtraction autrefois faicte à Benedict, et n'est point son entention de

obeir à lui, car il est scismatique et suspect d'eresie; si exhorte la Court que ainsy le face et face faire, et supposé que subtraction ne ly seroit faicte en tout, toutevoie, attendu son gouvernement, lui doit estre faicte subtraction en partie, c'est assavoir es finances qu'il a levées et lieve en ce royaume, et tiercement que les prelas soient assemblez, comme il a esté ordonné au regart du premier point. Et pour venir à sa matiere, prant pour theme:*Subtrahate vos ab omni fratre ambulante inordinate*, IJe ad Thessalonic. ultimo./

Soubtraiez vous d'un chascun frere, lequel en son gouvernement s'en va desordoneement et continuelment persevere.../

Samedi, XJe jour de septembre.

A conseiller l'arrest d'entre les procureur du Roy, du duc de Berry et l'Université de Paris, d'une part, et les officiers du Pape, de la Chambre apostolique et les Cardinaulx, sur le proposé par les parties du VJe jour de ce moiz, et tout consideré:

Il sera dit en obtemperant aux lettres royaulx obtenues par ladicte Université que Benedict pape dessusdict et ses officiers cesseront ou royaume et Dauphiné de exiger les premieres années des fruiz et emolumens

des prelatures et autres benefices quelxcunques vacans, ou qui ont vaqué ou vaqueront, tant pour les premieres années, que aussy des fruiz et emolumens qui du temps de subtraction autrefois faicte audit Benedict et de la vacation des prelatures, dignitez et autres benefices, sont escheuz ou eschient en aucune maniere. Et aussi cesseront les exactions des procurations qui sont dehues pour les visitations et des arrerages quelxcunques deubz pour raison des choses dessusdictes ou d'autres exactions; et pourront pranre les prelas, arcediacres et autres ordinaires icelles procurations, quant il visiteront. Et cesseront aussi les Cardinaulx et le Chambellant de percevoir et pranre et exiger ce que prenoient et exigoient devent ce present arrest pour cause des premieres années et des arrerages quelxcunques deubs pour l'occasion devent dicte, en quelque maniere que ce soit. Et se aucune chose de ce qu'a esté levé pour occasion des choses dessusdictes est devers les collecteurs, ou soubcollecteurs, ou autres quelxcunques, sera arresté soubz la main du Roy, et leur sera defendu que audit Benedict ne à quelque autre n'en baillent ou delivrent aucune chose. Et aussi sera defendu à celx qui doivent audit Benedict ou à la Chambre apostolique ou aux Cardinaulx dessus diz qu'ilx ne paient ou baillent aucune chose. Et ordonne la Court que ceulx qui pour l'occasion dessusdicte sont excommuniez, seront relachez et jusques à ce que autrement en sera ordonné.

Cedit jour, a esté prononcé par messire P. Boschet, president, l'arrest d'entre les procureur du Roy et du duc de Berry et l'Université de Paris, d'une part, et le Pape ou les gens du Pape, d'autre part, sur certaine provision requise par l'Université et Roy et Berry dessusdiz

des finances que levoit le Pape en ce royaume:

Recurre super hoc ad proposita per Universitatem, registrata supra.

Vendredi, **XVIIe** jour de septembre.

Cedit jour, les presidens et conseillers estans en la Chambre ont arresté prisonnier en la ville de Paris messire Phelippe Maalart, chevalier, et lui ont defendu le partir à peine de mil libvres, jusques à ce qu'il ait contenté et païé Richart de Cologne et J. Vaast, marchans

de chevaulx, de certains chevaulx que ly ont vendu la somme de **Vc** escus, ou baillié caution suffisant de ladicte somme, et ont ordonné que **IJ** chevaulx, dont l'un est arresté en main de justice et l'autre est devers ledit chevalier, presens Raoul de Garges et les parties, soient vendus le plus proufitablement que faire se pourra, et l'argent apporté en depost devers la Court pour en ordonner comme il appartendra. Maistre Ja. du Gard et G. Le Clerc sont commiz à soy informer de l'estat de l'abbaie de St Cir.

Juesdi, **XXIIIe** jour de septembre.

Raoul de Garges, huissier ceans, a déposé la somme de **XXVIII** escus ceans, venans de la vendition d'un cheval

brun bail appartenant à messire Phelippe Maalart, chevalier, à la delivrance se sont opposé Corrat Vernate,

bourgoiz et hostelier de Paris, pour despense
faicte en son hostel, et aussi Hennequin de Rivieres
pour la garde dudit cheval, et avecques ce ledit huissier
pour son salaire de l'execution.

Vendredi, premier jour d'octobre.

Messire Ymbert de Boisy, president, s'est opposé
et oppose pour et ou nom de monsr l'evesque d'Amiens,
son frere, que quittance ne soit baillée aux executeurs
du testament du feu cardinal d'Amiens, jusques à ce
que ledit evesque ait eu copie du compte de ladicte
execution et l'ait veu et visité.

Mercredi, **VJe** jour d'octobre.

Maistre J. Hoiquart, procureur de l'Université de
Paris ceans, a consenti l'enterinement de certaines
lettres royaulx, par lesquelles le Roy donne congïé et
auctorité à messire Charles de Savoisy, chevalier, de
reedifier et restaurer son hostel qui avoit esté, par
l'ordonnance

du Roy et à l'instance de ladicte Université,
abatu et demoli, comme plus especialment et plus à
plain apert par la teneur d'icelles.

Mercredi, **XIIJe** jour d'octobre.

Le clerck maistre J. du Boiz, receveur des amandes
de Parlement pour le Roy, maistre J. de Cahours,
procureur

en ceste partie de monsr le duc d'Orleans et du
marquiz du Pont, maistre J. d'Anisy, procureur de
Arnoul Boucher, et maistre Girart d'Asy, procureur

de Jehanne la Gencienne, present aussy maistre Oudart Gencian, son filz, conseiller du Roy, ont consenti que maistre Loiz Blanchet, prisonnier en la Conciergerie, soit eslargi en estat jusques aux jours de la prevosté de Paris, prouchain à venir, par ce qu'il a juré et promiz, jure et promet, en tant que mestier est, qu'il ne pourchacera ne fera pourchacer par autre devers le Roy ou autrement, d'avoir lettres qui diminuent l'assignation que a faicte le Roy auxdiz monsr d'Orleans et le marquiz, ne à autres, sanz leur consentement, et s'aucunes lettres obtient sur ce pendent ce temps, il welt dès maintenant qu'elles soient nulles, presens Miles Baillet, Thomas Raart, maistre J. Hoiguart, messire Rolant Belier et autres.

Vendredi, **XVe** jour d'octobre.

Pour ce que de nouvel l'assignation du paiement des notaires du Roy a esté faicte sur **IIIJm** frans à pranre sur l'emolument du seel de la Chancellerie, comme l'en dit apparoir par certaines lettres sur ce faictes, et à la contribution de ladicte somme je N. de Baye, graphier de Parlement, n'aye pas esté appelé, ne ne serè pas appelé, comme il est vraisemblable, pour ce que le graphier de Parlement a acoustumé estre païé de ses gages sur les amandes dudit Parlement, ay protesté et proteste de venir et retourner à ladicte contribution de ladicte somme de **IIIJm** frans, *pro rata vadiorum meorum*, toutes et quantes foiz que je ne serois pas souffisaument païés sur lesdictes amendes, et que il se face ou ait fait assigner sur lesdictes amendes ou temps passé ou temps avenir.

Lundi, **XXVe** jour de ce moiz d'octobre.

Pierre Chenart et J. Godart, orfèvres, demourans à Paris, rapporterent et affermerent par serment à moy Baye, graphier de Parlement, et commiz à faire l'inventoire

des biens de l'execution de très reverent pere en Dieu, messire Guillaume de Dormans, nagaires archevesque de Senz, que, à la requeste de maistre Regnaut Rabay, executeur du testament dudit defunct, ilz avoient pesé une croix d'argent et le baston d'icelle que l'en soloit porter devant ledit defunct, une crosse d'argent dorée et esmaillée, appartenent à ladicte execution,

comme disoit ledit maistre Regnaut, au plus justement qu'il avoient peu, et après ce que je leur avoie fait faire serment solennelment que bien loyaument et justement à leur povoir priseroient et peseroient les choses dessusdictes. Et avoient trouvé que ladicte croix et pommeau d'icelle pesoient **VJ** mars, **J** once, **XVIJ** estarlins et obole, et le baton d'icelle pesoit **IX** mars **III** onces et demie, dont estoit à rabatre, si comme il leur sembloit, **IJ** mars **IJ** onces et demie pour le fust qui estoit en icellui baston, ainsi pesé l'argent d'icelle croix **XIIIJ** mars **IJ** onces **XVIJ** estarlins et obole, dont ilz prisoient et estimoient chascun marc **VIJ** livres tournois; et aussi avoient trouvé que les trois bastons de ladicte croce pesoient **IX** mars **VIJ** onces et demie, et la croce pese **IX** mars **IIIJ** onces et demie, de laquelle croce et baton ilz prisoient et estimoient chascun marc valoir **VIIJ** livres tournois.

Vendredi, **XIJe** jour de novembre.

Et fu ordonné que de cy en avant chascun nouvel advocat receu au serment paieroit **IJ** escus ou **IJ** frans, et un chascun procureur samblablement receu de nouvel un escu, pour dire les messes acoustumées en la sale du Palaiz, auxquelles avoit defaut de paiement, et fu ce publié par le Chancelier.

Samedi, **XIIJe** jour de novembre.

Cedit jour, environ entre **IJ** et **IIJ** heures après minuit, survint au graphier un flux de ventre qui par **V** jours ensuivans l'a tenu avec une autre maladie du stomac qui par **XIJ** jours en grant nécessité l'a tenu, telement

qu'il n'a peu venir ceans, n'exercer son registre par ledit temps, si a enregistré son clerc qui garde les procès.

Mercredi, **XVIJe** jour de novembre.

La Court a octroyé à Giraut Motet adjournement en cas d'excès et d'injures contre les reformateurs simplement,

et en personne contre maistre Ligier Saboux, me Regnault d'Ambonnay, procureur du Roy, J. Maillart et Mathiu Diren, sergens, à certain jour ordinaire ou extraordinaire pour respondre au procureur du Roy general et audit Motet et à chascun d'eulx.

Juesdi, **XXVe** jour de novembre.

Hac die rediit grapharius a quadam fluxus valitudine

adversa et stomachi gravedine, que eum per **XII** dies in lecto egritudinis detinuerunt, quo registrum facere et officium suum a prima die presentis incepti Parlamenti prepeditus fuit; qui per sex precedentes annos cum Dei gratia valuerat, et absque impedimento et solius diei infirmitate immunis fuerat et dictum officium exercuerat./

L'occasion ou cause de sa maladie print au disner sur le premier president premier jour de Parlement. La Court a ordonné que le procureur du Roy face diligence en la cause touchant les mortemains et le collecteur d'icelles contre l'evesque de Chaalons à la poursuivre ou delaisser, escrire ou faire ce qui y appartendra

dedans les Brandons, comme autrefois a sur ce esté amonnesté ledit procureur par icelle Court.

Samedi, **IIIIe** jour de decembre.

La Court a octroyé secundes lettres requisitoare de marque à Jossierant Frepier et Ymbert Marin contre le roy d'Espagne.

Vendredi, **Xe** jour de decembre.

Au jour d'ui, la Court a appointé, du consentement de l'evesque de Paris, que il relachera le cès par lui miz en l'eglise Saint Jaques de la Boucherie de Paris pour occasion de la prise du prisonnier faicte en ladicte eglise par le prevost de Paris, ou aucuns sergens de son commandement, jusques au **IIJe** jour de janvier prouchain venant exclus, et ce pendent la Court fera raison et justice sur la requeste ce jour faicte par ledit evesque.

Mercredi, **XVe** jour de decembre.

Cedit jour, la Court a ordonné et ordonne que, ce que J. de la Chappelle a païé des ouvrages faiz par maistre Robert de Hellebuterne, lui sera alloué en ses comptes, et, par provision, ledit Hellebuterne se mellera des ouvrages jusques à ce que du debat meu entre lui, d'une part, et maistre J. du Temple, d'autre part, sera autrement ordonné, et iront maistre R. Mauger et un autre de messeigneurs de ceans en la Chambre des Comptes pour dire l'appointement de la Court. Au jour d'ui, André d'Espéron, changeur à Paris, a confessé et confesse avoir en garde et en depos de par la Court la somme de mil livres tournois, laquelle il avoit receue par les mains de maistres Thomas d'Aunoy et J. de la Croix, conseillers du Roy nostre Sire et maistres en sa Chambre des Comptes, à Paris, dès le **XXVe** jour de septembre derrien passé, pour convertir en l'achat de la terre de Frontignan, en la senechaucie de Beaucaire pour le Roy nostre dit seigneur, laquelle somme de mil livres il a promiz et promet à bailler et delivrer au mandement et ordonnance de la Court, si comme appert par la cedula signée de sa main, laquelle cedula est devers ladicte Court.

Lundi, **XXe** jour de decembre.

Cedit jour, après la cause de Hutin de Clamas dessusdicte plaidoiée, s'est levée la Court et est alée en la sale de Saint Loiz derrieres la Tournelle criminelle, où estoient assamblez monseigneur le Dauphin, lequel

en l'aage de **X** ans ou environ avoit tenu le lieu du Roy au Conseil du Roy, où estoient assemblez les Roy de Sicile, duc de Berry, duc de Bourgoigne, conte de Nevers et les prelas de France, l'Université de Paris et pluseurs autres barons et clers, et gens d'eglise, sur ce que devoit proposer le procureur du Roy par la bouche de l'advocat du Roy sur le fait de l'Eglise et du pape Benedic, et par especial au regard d'aucunes choses qu'avoit proposé maistre Guillaume Fillastre, doien de Reins, pour le Pape en ladicte sale puiz **III** sepmaines ou environ, et pour ce n'a point esté plaidoié oultre ladicte cause.

Juesdi, **XXIII**e jour de décembre.

Au jour d'ui, a esté ordonné, oye la relation des commissaires que maistre Loiz Blanchet ait pour provision de son vivre et de sa femme sur la revenue de la terre de Lanque en Brie, **C** livres tournoiz pour ceste foiz.

Vendredi, **XXIII**e jour de decembre.

Cedit jour, la Court a ordonné que maistre J. Larchier, comme par main souverainne, fera une execution de **II** mil **XXXII** libvres **IX** solz parisis, d'une part, et

de **Iic XXXV** livres tournois, d'autre part, à la requeste des executeurs de feu Le Besgue de Villaines contre messire Pierre de Villaines, son filz, et madame de Malicorne, sa femme, a quoy les sergens à cheval se sont opposez que ledit Archier ne feist ladite execution.

Vendredi, derrien jour de decembre.

Sur certainne requeste que voloit l'Université de Paris et pluseurs prelas que feist le procureur du Roy ceans pour le Roy sur troiz ou **IIIJ** poins conclus par la plus grant partie des prelas assemblez à Paris contre le pape Benedic, pour les libertez de l'eglise de Galle, a conseillé ledit procureur la Court, qui ly a respondu qu'il en face ce que bon ly en semblera, et la Court fera ce que de raison.

1407.

Lundi, **IIJe** jour de janvier.

Environ **IX** heures, cessa la Court des Plaidoiries et se mist en Conseil sur certaines lettres closes envoiées par monseigneur le duc d'Orleans qui estoit en expedition publique en Guienne, et tenoit le siege devant Bourc près de Bordeaux, sur ce qu'il avoit defaut de finance, et toutevoie ne tenoit qu'à finance qu'il n'eust bonnes nouvelles de son emprise; si fu conseillé de parler au chancelier d'Orleans sur ce que le duc dessusdit escripvoit que la Court tenist les

mains à la besoigne devers le Roy, et ly voulsist remonstrer pour l'onneur et prouffit du Roy et du royaume, et tendoit que chascun moiz eust cent mil frans pour les gens d'armes paier.

Samedi, **VIIJe** jour de janvier.

Ce jour, la Court a ordonné que, en prenant obligation de maistre Thibaut Tiessart, maistre J. de la Marche et maistre J. de Bailli et d'un chascun *insolidum*

de la somme de mil frans, et par ce le graphier baillera des cedulaes des deposts de ceans auxdiz Tiessart, Marche et Bailli jusques à ladicte somme, que seront tenus de rendre toutefoiz que requiz en seront, et est ladicte somme ordonnée pour l'execution de l'arrest obtenu ceans par Renaut de Murat contre Pons de Cardilhac,

laquelle execution faisoit messire Jaques de Ruilly, chevalier, president ceans, *socer* dudit de la Marche et oncle desdiz Bailly, advocas ceans, et dudit Tiessart, conseiller du Roy ceans.

Mercredi **XIJe** jour de janvier.

Cedit jour, a esté déclaré en la Chambre des Enquestes, comme a relaté maistre J. Mauloué, que l'execution de l'amende de **LX** livres parisis, en laquelle Jehan Le Clerc a esté condempné ou nom qu'il procede par

arrest prononcé le **XXVIIIe** de novembre **CCCC V** pour cause d'un fol appel, se fera pour moitié sur les biens de sa femme et pour moitié sur les biens de lui, et pareillement l'amende de **C** solz en quoy il a esté condempnez

es noms que dessus par ledit arrest.

Mardi, **XVIIe** jour de janvier.

Cedit jour, est trespasé maistre J. d'Arcies, jadis conseiller de ceans, *natione Campanus*, qui en son office de conseiller avoit exercé par l'espace de **XXXVJ** ans

ou environ, ou lieu duquel puiz **VIII** jours a esté receu maistre Pierre d'Arcies, son filx, par le don du Roy, moiennant la resignation dudit son pere en sa vie et maladie.

Mercredi, **XIXe** jour de janvier.

Ce jour, la Court a ordonné que maistre Guillaume Germe et Pierre de Montyon, notaire du Roy, soient separement miz prisonniers en la Conciergerie, et soit fait commandement à maistre J. de Rouvres que viegne demain parler à la Court à huit heures.

Vendredi, **XXe** jour de janvier.

Cedit jour, la Court a eslargi *sub penis et summisionibus*/maistre Pierre de Montyon et Guillaume Germe, et comparront toutes foiz qu'il seront mandez.

Vendredi, **XXVIIIe** jour de janvier.

Ce jour, monseigneur l'evesque de Paris a requiz en la Court, que comme un appellé Guillemin Gontier, clerc non marié et prisonnier en ses prisons, ait esté condempné envers Geffroy Gastebreze en la somme de **C** ou **IJe** libvres et au Roy en autre grant somme, et à asseoir rente de **XL** libvres audit Gastebreze, et il n'ait pas vaillant **XL** solz, qu'il soit deschargez de la garde dudit prisonnier, et s'en est deschargé et descharge et en la presence du procureur du Roy.

Vendredi, **XJe** jour de fevrier.

Au jour d'ui, a esté advisé et ordonné que à juger le procès d'entre les executeurs de feu maistre Dominique d'Alexandrie, d'une part, et le procureur du Roy, d'autre part, ne seront point appellez celx de la Chambre des Comptes.

Mercredi, **XVJe** jour de fevrier.

Cedit jour, a ordonné la Court maistres R. Rabay et R. Broisset à soy informer sur les excessiz salaires des notaires et du fait des inventoires, et aussi des excessiz salaires de examinateurs.

Item, a ordonné maistres J. André, P. Le Fevre et R. Mauger à veoir l'accort d'entre maistre Pierre de Fresnes, d'une part, et Pierre Le Gayant, d'autre part,

et le rapporter à la Court, et se informeront aussy sur le nouvel auditoire fait oudit Chastellet.

Vendredi, **III**Je jour de mars.

Ce jour, a ordonné et ordonne la Court que par la main du Roy seront gouvernez les poiz et balances contentieux entre le duc d'Orleans, d'une part, et les religieux de St Mard de Suessons, par personnes non suspectes et le plait pendent.

Cedit jour, est venu ceans au Conseil le Roy de Sicile, duc d'Anjou, conte du Mainne, de Prouvence et de Roucy, accompaignié de pluseurs prelas et chevaliers,

lequel après ce qu'il a recommandé la Court grandement et sagement de justice devient toutes cours du monde, car par icelle Court le royaume se soustenoit et soustient, comme disoit, et sans laquelle ne se pourroit soustenir, et pour ce avoit en icelle singuliere fiance et esperance, et telle, que quant avoit aucunes causes ceans, se tenoit pour tout assuré de justice, et pour ce qu'il avoit aucuns procès ceans moult grans et pesans, l'un de la Ferté Bernart contre le duc d'Orleans, l'autre pour la conté de Roucy contre le conte de Brenne, prioit que celui de la Ferté Bernard lui fust delivré et jugié le plus brief que faire se pourroit. Et quant à celui de Roucy, pour ce que c'estoit moult grant et moult pesant chose, il pleust à la Court, quant

vendra au juger appeller toutes les Chambres et par icelles le juger, comme autrefois avoit esté fait sur la recreance. Autre procès avoit ceans contre un Espaignot nommé pour cause de certaine grosse somme que lui demandoit ledit Espaignot et qui s'estoit plaint de lui à icelle Court, en disant que lui ou ses gens l'avoient menacé. Et quant à la dicte somme disoit que l'obligation dont partie se ventoit avoit esté faicte ou temps de son enfance ou juvenesce, et que n'estoit pas si bien ne si deument gouverné, comme mestier lui estoit, car l'en faisoit de ses seaulx et seelloit l'en telx lettres que l'en voloit sanz discuter ou aviser les besoins, si ne savoit rien de l'obligation. Et quant aux menasses, onques n'avoit eu entention ne volonté, ne ses gens aussi de menasser ne faire de fait contre ledit Espaignot ne autre aussy; car aussi n'estoit ce pas l'estat à un prince que voie de fait, ne n'avoit onques en sa vie feru aucun, maiz s'attendoit à la bonne justice de la Court, contre laquelle ne contre le Roy son seigneur, ne contre son honneur ne voudroit jamais forfaire, maiz le vodroit garder et servir à ses despens, si faire le povoit. Si requeroit que la Court l'eust pour excusé et ne creust point telx paroles, en soy offrant à icelle Court et en recommandant soy et ses besoins. Samedi, **Ve** jour de mars.

Le dessusdit jour **Ve** de ce moiz, a esté ordonné qu'il sera mandé au bailli de Tournay et de Tournesiz qu'il contraigne les religieux de S. Martin par prise de

leurs corps, se mestier est, et les amener ou Chastellet de Paris, en cas de rebellion ou refus, le seel du couvent et pour cause, et icellui baillé en garde à **IJ** bonnes personnes non suspectes.

Vendredi, **XJe** jour de mars.

Cedit jour, la Court, present et non contredisant le procureur du Roy, a obtemperé à certaines lettres royaulx, de la date du **Xe** de ce moiz, impetrées à la requeste de messire Hector des Marès, chevalier, et autres enfans de feu messire J. des Marès, docteur en loiz, et, en son temps, advocat du Roy ceans, et lequel avoit esté executé avec pluseurs autres es Hales de Paris, l'an **IIIIxx** et **II**, par lesquelles le Roy octroye audiz requerans qu'il meissent les os dudit des Marès en l'eglise Sainte Katerine du Val des Escoliers en la chappelle qu'avoit fondée et sanz solennité, et à executer ceste lettre a esté ordonné Robert Chaurre, huissier de ceans.

Samedi, **XIJe** jour de mars.

Au jour d'ui, le viconte de Vandosme et messire Guillaume de Lere, chevalier, ont dit de par le Roy et nosseigneurs de Berry et d'Orleans que l'en jugast le procès d'entre messire Olivier de Mauny, d'une part, et le Borgne de la Heuse, d'autre part, pour la capiteinnerie de S. Maalo.

Au jour d'ui, a esté miz et consigné en Court par maistres N. d'Orgemont et P. Le Fevre, conseillers du Roy, certaine finance estant en un sac seellé, appartenant,

comme il disoient, à maistre J. Trucan.

Mercredi, **XVJe** jour de mars.

Au jour d'ui, a esté deliberé que, pour ce que autrefois avoit esté grant altercation d'entre le Borgne de la Heuse, d'une part, et messire Olivier de Mauny, d'autre part, sur la capiteinnerie de S. Maalo, sur quoy, combien que le procès, passé à un an, eust esté miz sus, toutevoie n'avoit point esté conclu de prononcer

l'arrest, a esté dit que, pour plus meurement

faire, ancor seroit reveu le procès et lettres pluseurs,

qui avoient esté impetrées *hinc inde*, par les

IJ Chambres,

et seroit prononcé l'arrest qui en sourdroit.

Vendredi, **XVIIJe** jour de mars.

A conseiller l'arrest d'entre Olivier de Mauny, d'une part, et le Borgne de la Heuze, chevaliers, d'autre part,

qui, le **Xe** de fevrier et le **XVIJe** dudit moiz, l'an **CCCC V**,

avoit esté miz sus, comme apert par les registres dudit

temps, veu le plaidoié du...

La Court a ordonné qu'elle attendra la bonne santé

du Roy nostre Sire, en la presence duquel et en son

Grant Conseil sera exposé ce que a esté fait en ceste

matiere.

Mercredi, **XXIIIJe** jour de mars.

La Court a delivré au jour d'ui certain argent venant

de la vendition des vielx banc, porches et formes de

ceste Chambre à Pierre Noé, huissier de ceans, à qui

le Roy l'avoit donnez, pour ce que le concierge de ceans, qui maintenoit que ce que dit est lui appartenoit à cause de son office de concierge, a consenti ladicte delivrance *sine prejudicio tamen suorum jurium*, comme a esté relaté par certains commissaires, conseillers de ceans, à la Court.

Juesdi, **XXIII**e jour de mars.

Ce jour, ou Chastellet fu ordonné par messire Ja. de Ruilly, president, et les commissaires ordonnez que la lettre octroiées aux Freres Mineurs sur la reformation des dames de S. Marcel, *in juris subsidium*, seroient limitées, que translation, s'aucune en faisoient, fust faite hors la prevosté de Paris et bailliage de Senliz.

Juesdi, **VI**e jour d'avril.

Cedit jour, l'Université de Paris, par la bouche d'un maistre en theologie de l'ordre de la Trinité, a proposé en la Court ce qui s'ensuit, en prenant pour theme: *Hec est victoria que vincit mundum, fides nostra, prima Jo. Vto capitulo...*

A quoy le premier president a respondu que la Court est fondée sur raison et, *partibus auditis*, a acoustumé

faire droit et raison à chascun qui ceans vient, si orra ceulx qui à oïr seront, et, les parties oyes, fera droit afin de condempnation ou d'absolution.

Vendredi, **VIIIe** jour d'avril.

Ce jour dessus escript, qui fu vendredi **VIIIe** de ce moiz, pour ce que l'abbé de Saint Jehan es Vignes de Suessons, et à qui appartient la presentation des bourses du college de Dormans, et la collation à la Court de ceans, n'avoit volu presenter maistre Nycole Gomaud, né du diocese de Reins, prestre, maistre en ars et bachelier en theologie, et bon gramarien, suffisant homme tant en meurs que en discipline de lettres et expert à instruction d'escoliers, comme par information sur ce faicte avoit apparu à monseigneur Henry de Marle, premier president, et maistre Robert Mauger, conseiller du Roy, dont avoient escript audit abbé, attendu que du diocese de Suessons ne trouvoient aucun suffisant pour estre maistre dudit college, ja soit ce que ledit abbé avoit présenté maistre J. Sanute, maistre en ars, et né du païs de Suessons, qui n'estoit pas suffisant pour pluseurs causes, et avoit ledit college longuement esté sanz maistre, ou prejudice des escoliers et dudit college, ladicte Court a fait et ordonné ledit Gomaud, oye la relation desdiz Marle et Mauger, commissaires ordonnez par icelle Court à ladicte collation faire et aux pertinens, maistre dudit college, et a fait ledit Gomaud le serment acoustumé en la Court. Et si a ordonné la Court que Mauger dessusdit instituera et mettra en possession ledit Gomaud de la dicte maistrise, present le graphier, se pui y welt estre, pourveu que ce que dit est ne fera aucun prejudice aux droiz dudit abbé ou temps avenir. Et a ledit jour esté institué maistre dudit college ledit Gomaud par ledit Mauger en la sale dudit college, present

ledit graphier, les procureur, soumaistre, chappellains et escolliers dudit college, et a renouvelé le serment fait en la Court ledit Gomaud en la presence des dessusdiz.

Mercredi, **XIIIe** jour d'avril.

Cedit jour, ont esté interrogez en pleine Court maistre Guillaume Barrau, secretaire du Roy et du duc de Berry, messire Vidal de Chastelmoran, soy disant arcevesque de Tholouse, sur certain recelement de lettres que l'en disoit appartenir à messire Ravat, soy aussy disant arcevesque de Toulouse, et lesquelles avoit envoiées à Paris pour sa cause à l'encontre dudit Vidal.

Mardi, **XIXe** jour d'avril.

Ce jour, les executeurs de feu maistre Pierre du Perier, jadis notaire et secretaire du Roy nostre Sire et du duc de Bourgoigne derrainement trespasé, ont donné et aumosné du residu des biens de l'execution dudit du Perier à la chappelle assise au bout de la grant sale du Palaiz, pour le divin service et salut de l'ame dudit du Perier, une chasuble de baudequin de quatre soies, garnie d'estoles fanon, une aube de toile de lin parée dudit baudequin, **IIII** nappes d'autel de toile de lin, dont l'une est parée dudit baudequin et frangée de fine soye, un estuy à corporaulx avec les corporaulx de fine toile, et sur ladicte chasuble sont

assiz deux escussons de broderie, un eau benoitier et une clochette, avec **IJ** frans pour dire une messe à note en ladicté chappelle.

Mercredi, **XXVIJe** jour d'avril.

Cedit jour, sur ce que certaines lettres adreçans à la Court, par lesquelles le Roy vouloit que la Court ne tint court, ne cognoisce de certains erreurs proposées par Jehan Miroflet et autres, qui avoient esté condempnez à l'encontre de Raoulin de la Chaucée par les generaulx sur la Justice, sur le fait des fermes des servoises et autre menus buvrages, desquelx erreurs adjornement avoit ja esté donné ceans et l'adjornement executé, comparens lesdiz generaulx ceans et requerans l'enterinement desdictes lettres, a esté dit par la Court, les **IJ** Chambres assemblées et aussy presens les maistres des Requestes de l'Ostel du Roy, que la Court cognoistroit desdictes erreurs, maiz se lesdiz generaulx y voloient estre au juger, la Court les y receveroit.

Item, a esté dit à maistre Symon de Nanterre, conseiller du Roy ceans en la Grant Chambre et general sur le fait de la Justice, que, attendu qu'il estoit premierement

de ceans où avoit premierement juré, ne devoit point faire requeste ne soustenir contre icelle Court, et que s'en gardast, à quoy a respondu qu'il se garderoit de mesprandre. Sur quoy la Court l'a requiz qu'il venist et seist entre les seigneurs de ceans, veue la response par lui faicte qui n'estoit pas bien raisonnable, maiz sentoit opposition, auquel commendement ou requeste a obtemperé.

Ce mesme jour, maistre Robert Mauger, conseiller du Roy ceans, pour ce que autrefois avoit eu la plus grant partie des voiz à election de president faicte ou lieu que pour lors tenoit messire Henry de Marle, premier president, comme l'en disoit, et aussi pour ce que aucuns de messeigneurs les presidents estoient pluseurs foiz empeschez, par quoy avoit eu defaut de presidents ceans aucunes foiz, et pour autres causes mouvens le Roy nostredit Seigneur, a au jour d'ui, par vertu de certaines lettres d'icellui Seigneur, esté receu en president, par ce qu'il servira comme president aux gages de conseiller et jusques à ce qu'il vaquera lieu de president, et a fait le serment acoustumé, presens et appelez les seigneurs des **IJ** Chambres et les maistres des Requestes de l'Ostel du Roy, comme dessus.

Vendredi, **XXIXe** jour d'avril.

Un frere mineur, maistre en theologie de l'Université de Tholouse, à l'occasion d'aucuns et pluseurs escoliers et plus de **C** qui pour une rebellion qu'il avoient

fait aux gens du Roy, à l'exécution de certaines lettres impetrees par messire Vidal, soy disant arcevesque esleu par le temps de la subtraction à l'encontre de messire Pierre Ravat, par avant evesque de S. Pons, soy aussy disant arcevesque de Tholouse ordonné par le pape Benedic, et à ce que la Court eust compassion de ladicte Université de Tholouse, proposa en la maniere qui s'ensuist tout haut publiquement en icelle Court en disant: ...

Ce fait, le president premier pour la Court a respondu que grant rumeur et clameur a esté du grant excès qui a esté fait à Tholouse par ceulx de la dicte Université, dont c'estoit grant merveille, attendue que ladicte Université est fondée du Roy qui a envoié par delà aucuns commissaires pour soy informer selon la Decretale:*Descendam et videbo*,etc., et ont esté rapportées les informations par deça, si tendra icelle Court

la main à garder icelle Université, tant en general que en particulier, et fera la Court justice, *cum clementia et pietate et non cum rigore*.

Sur le plaidoié du **XIXe** de ce moiz d'entre le prier de St Martin des Champs, d'une part, et le procureur du Roy, d'autre part, il sera dit que le prier fera examiner autant de tesmoins qu'a fait examiner le procureur

du Roy, oultre le nombre ordonné par la Court.

Samedi, derrain jour d'avril.

Ce jour, maistre Robert Mauger, president en Parlement, s'est opposé et oppose que aucun ne soit receu en l'office de conseiller ceans à **X** s. de gages, qu'il a exercé jusques à cy et ancor exerce, selon ce que contenu est en sa lettre de presidence, jusques à ce qu'il soit oy.

Maistres G. de Villiers et R. Rabay, conseillers du Roy, sont commiz à oïr le compte de l'execution de maistre Jaques Remon, jadis notaire du Roy.

Samedi, **VIIe** jour de may.

La Court a prorogué le delay donné aux marchans drapiers de Brouxelles de la Trinité prouchaine au landemain de la Magdaleine, et *interim* pourront vendre leurs draps au Landit prouchain pareillement, comme firent l'année passée.

Vendredi, **XIIIe** jour de may.

Ce jour, a esté ordonné que Ysabel La Fraimbaude,

qui estoit en garde en la maison de maistre Guillaume Le Clerc, sera mise en l'ostel Robin Griveau, ne ycelle ne sera mariée, si non du consentement de ses parens de l'un et de l'autre costé, et seront gouvernez ses biens par ledit Robin jusques à ce que autrement en soit ordonné, et sera tenu Pierre de Brecourt, son oncle, rendre compte par devant maistres Guillaume de Celsoy et Guillaume Le Clerc des choses par lui administrées, et visiteront lesdiz commissaires les edifices d'icelle Ysabel, et iceulx visitez et le compte rendu et oy, se informeront des excès sommierement et de plain, *vocatis evocandis*, et l'information faicte en ordonneront et rapporteront à la Court, et cesseront aussi les procès pour occasion des choses dessus dictes commenciez es Requestes.

Mercredi, *XXVe* jour de may.

Depuiz sont assemblez messeigneurs de la Chambre des Enquestes en la Grant Chambre pour juger le procès ou y conclurre, qui autrefois avoit esté visité et jugié en la Chambre des Enquestes d'entre le sire de Florensac et ses consors, d'une part, et le procureur du Roy, d'autre part, veues les enquestes et tout considéré.

Il sera dit que le procès ne se puet juger en l'estat qu'il est, maiz reprins les procès dessusdiz sera fait recolement des tesmoins produiz par lesdictes parties, auxquels seront faiz certains interrogatoires, et sera faicte collation de tous les procès, actes, lettres et instrumens produiz par lesdictes parties, desquelx collation n'a esté faicte aux notes ou lettres originaulx

en presence desdictes parties, selon l'appointement de ladict Court. Et ordonne la Court que lesdictes parties pourront de nouvel produire tant de tesmoins qu'ilx voudront, tant sur le principal comme sur l'usage et coustume acoustumé d'ancienneté es lieux voisins des hauls justiciers de ladict viguerie de Besiers, et, ce fait et tout joint au procès principal, la Court fera droit auxdictes parties, et baille la Court prefix aux jours ordinaires dou Parlement prouchain à faire ce que dit est, et seront produiz lesdiz tesmoins du temps que les procès commencerent entre lesdictes parties ou leurs predecesseurs sur la cognoissance desdiz officiers.

Samedi, **XXVIIJe** jour de may.

Ce jour, a esté enjoint à maistre Deniz de Paillart, filx de feu messire Philibert Paillart, president en Parlement en son temps, qu'il alast veoir madame Jehanne de Dormans, sa mere, aggravée de maladie et près de sa fin, comme elle disoit; et pour ce que

ledit Deniz s'estoit longuement tenu et n'avoit voulu aler devers sadicte mere, pretendens qu'elle le voloit faire renuncer à son heritage, la Court l'a assure de ce que, se par induction ou autrement contre sa volenté il consentoit aucune chose en son prejudice, la Court l'avera et tendra pour non fait. Si a accordé et consenti ledit Deniz d'aler à sadicte mere, et ce m'a esté enjoint à enregistrer.

Mercredi, [XXIIJe](#) jour de juin.

Sur certaines lettres royaulx presentées à la Court de par les generaulx conseillers du Roy sur le fait de la Justice, a esté dit qu'elles seront monstrées au procureur

du Roy, et sur ce les parties oyes, la Court leur fera droit et raison.

Mercredi, [XXVIJe](#) jour de juillet.

Ce jour, maistre J. du Boiz, receveur des amendes de ceans, s'est opposé et oppose à l'adjudication du decret des heritages de Robert de Jouval, requerans qu'il viegne à contribution pour cause de certaine amende en quoy a esté ledit Robert condempné envers le Roy nostre Sire.

Mardi, [XVJe](#) jour d'aoust.

Cedit jour et aussy samedi derrien passé, la Court a entredit à maistre Deniz de Paillart, de present et *quousque*, l'alienation de ses biens immuebles, et a ordonné et ordonne que les amis charnelx dudit Deniz s'assembleront et esliront un curateur qui comparra

en la Court pour faire le serment acoustumé et pour estre auctorisé.

Juesdi, **XVIIIe** jour d'aoust.

L'Université de Paris et maistre Arnoul de Lafons ramenent à fait leur requeste à l'encontre de plusieurs Cordeliers de Mascon et de Lyon qui defendent, et dient par especial ceulx de Mascon, supposé l'arrest obtenu par Lafons qui n'est que *ad tempus*, pour lequel executer Laurens Le Viguereux, qui n'est point sergens, leur a fait moult de griefs, car il les bouta hors de leur maison et eglise, et prist leur robes, livres et joyaux, et les banni hors de Mascon et du royaume, et defendi que l'en ne leur donnast rien, combien qu'il deissent qu'il estoient prests d'obeir, maiz que Arnoul qui estoit excommunié se feist absodre, et sur ce ont baillé requeste, et ancor requierent, attendu le temps d'aoust et vendenges, que puissent revenir en leur couvent servir Dieu.

Repliquent l'Université et Arnoul et dient qu'il dirent au rebelle que les sentences du Pape ne lioient point, comme portoient par instrument et par ordonnance de l'eglise de France, maiz il ne tindrent compte,

maiz prirent les meubles de leans et porterent aux Jacobins, et en lieu des pannunceaus du Roy midrent des testes et machoires de buef et pour le batail des cloches y mirent une queue de renart. Appoinctié que l'un des seigneurs de ceans s'informerá de dela et appaisera, si puet, la besoigne,*alias* rapportera, et au

Conseil sur plus grant provision.

Samedi, **XXe** jour d'aoust.

Cedit jour, maistre J. du Drac, president des Requestes du Palaiz, a receu **XIJ** libvres parisis baillées en depost ceans par maistre Giles de Grigny, advocat, qui de ladicte somme de **XIJ** libvres a receu quittance corrigée par la Court.

Mardi, **XXXe** jour d'aoust.

Ce jour, maistre Jehan Rabateau, procureur de monsr le duc de Berry, tant en son nom que comme lieutenant du Roy es païs de Languedoc et duchié de Guienne, s'oppose à ce que la main du Roy nostredit Seigneur mise sur le temporel de l'evesque du Puy ne soit levée et requiert estre oy.

Vendredi, **IXe** jour de septembre.

La Court commet maistres Nicole de Biencourt et Bertran Quentin à veoir l'estat du prevost des marchans, afin que l'en puisse pourveoir à la requeste faicte par ledit prevost sur la reparation des chaussées de la ville de Paris.

Cedit jour, est venus ceans le duc de Bourgoigne, conte de Flandres, accompagné de plusieurs barons et seigneurs, pour recevoir la curation du conte de Pantevre et pour faire le serment acoustumé, comme apert par le registre des Plaidoiries.

Samedi, **XIJe** jour de novembre.

Messire Arnault de Corbie, chevalier et chancelier de France, tint le Parlement après la messe du Saint Esperit chantée solennelment par les freres Augustins en la grant sale du Palaiz...

Et est asavoir que, combien que les presidens fussent plusieurs en nombre, car, oultre le nombre de quatre acoustumé, avoit esté fait president maistre Robert Mauger puiz un an pour ayder et suppleer les defaus qui povoient avenir, et par ainsy fussent cinq presidens, neantmoins n'en a eu aucun à ce commencement en la grant deshonneur et esclande du Roy, de sa justice souverainne et de sa Court, dont a eu grant murmure, attendu mesme que de tous les cinq n'y avoit cellui qui fust empeschié pour le Roy

immediate,

sinon messire Henry de Marle, premier president, qui tenoit l'Eschequier à Rouen, car le secont, c'est assavoir messire Pierre Boschet, estoit en son paiz de Poitou, messire Ymbert de Boisy tenoit les jours du duc de Bourgoigne, cousin du Roy, à Beaune, messire Jaques de Ruilly estoit en commission pour gentils hommes en Anjou, et ledit maistre Robert Mauger en commission pour autres parties en Poitou ou en Anjou.

Dimenche, **XIIIe** jour de novembre.

Curia vacat.

Ce jour, envoya au soir querre le Chancellier le graphier au soir et lui commenda qu'il feist lettre adressans à maistre J. du Drac, president aux Requestes du Palaiz, pour tenir et exercer le lieu de president ceans durant l'absence des presidents.

Lundi, **XIIIe** jour de novembre.

Au Conseil furent envoiées lettres patentes de par le Chancellier adressans à maistre J. du Drac, president aux Requestes du Palaiz, pour tenir le lieu de president, lesquelles lettres ledit du Drac apporta en la Chambre au matin, et estoient lesdictes lettres signées du graphier, du commendement à lui fait le jour precedent bien tart par ledit Chancellier, et desquelles lettres la teneur s'ensuit:

Karolus, etc., Dilecto ac fideli nostro consiliario, magistro Johanni du Drac, presidenti in camera Requestarum Palacii

nostri Parisius, salutem et dilectionem. Cum nobis fuerit relatum

presidentes nostri Parlamenti Parisius abesse, et ipsorum absentia, in nostri et rei publice regni nostri, presertim expeditionis

causarum dicti nostri Parlamenti detrimentum et jacturam vergere dignoscatur, majusque detrimentum succedere perpendatur,

nisi a nobis de remedio provideatur oportuno, vobis precipimus et mandamus, committendo, si sit opus, quatinus

ad Magnam nostri Parlamenti Camera accedentes ibidem locum

et officium presidentis teneatis, et quousque iidem presidentes seu eorum alter remeaverint, fideliter ac diligenter, et prout est fieri solitum, exerceatis, ab omnibus autem justiciariis, officariis et subditis nostris vobis in hac parte pareri volumus et jubemus. Datum Parisius, **XIIJ** die novembris, anno Domini **Me CCCCe VIIe** et regni nostri **XXVIIIe**./
 Ainsi signées:*Per Regem, ad relationem Consilii,*
 BAYE.

Ce jour, a esté ordonné que les seigneurs qui averont servi es Chambres de Parlement et des Enquestes le moiz de septembre pourront faire leurs cedules de **XVIJ** jours.

Mardi, **XVe** jour de novembre, au matin.

Fu parlé en Conseil par les maistres des Requestes de l'Ostel du Roy contre ce que le Chancellier avoit envoié lettres à maistre J. du Drac, president aux Requestes du Palaiz, pour tenir le lieu de president, pour ce qu'il disoient que en absence des presidens à eulx appartenoit de tenir le siege, nonobstant que messeigneurs

de la Chambre deissent le contraire, car souvant a esté veu que, quant il faloit aler au Conseil, le president tenent le siege ou soy lever du siege pour aucune necessité, le plus ancien des laiz de la Chambre tenoit le lieu du president, presens mesmes lesdiz maistres des Requestes, et pour ce disoient les anciens laiz de ceans que plus estoit en leur prejudice que desdiz maistres, que ledit Chancellier faisoit tenir le president des Requestes le lieu de president en ceste Grant Chambre, car il y avoit ceans suffisans laiz et anciens assez pour tenir ledit lieu. *Tandem* a pleu et

plait auxdictes parties que sanz prejudice ledit du Drac, president des Requestes du Palaiz, exerce ledit office de president ceans, selon ce que mandé lui a esté, en l'absence des presidents.

Vendredi, **XVIIJe** jour de novembre, au Conseil.

Ce jour, a esté plaidoié et repliqué en une cause pour l'evesque et Université de Paris contre messire Guillaume de Tignonville, chevalier, prevost de Paris, pour **IJ** clers, l'un maistre en ars, l'autre bachelier en ars en ladicte Université, qu'il avoit pendu ou fait pendre au gibet de Paris, presens monseigneur le duc de Guienne, ainsné filz du Roy, les roiz de Sicile et ducs de Berry et de Bourgoigne en la sale du Louvre, et l'a enregistré le graphier, comme appert ou registre de ceans.

Samedi, **XIXe** jour, au Conseil.

Et cedit jour a esté repliqué au Louvre en ladicte cause cy dessus.

Mercredi, **XXIIIe** jour de novembre.

Ce jour, au soir, environ huit heures, messire Loiz, filz du Roy Charles **Ve** et frere germain du Roy Charles regnant de present, duc d'Orleans, conte de Valoiz, de Bloiz, de Beaumont, de Suessons, d'Angolesme, de Dreuz, de Porcien, de Pierregort, de Luxembourg et de Vertus, sire de Coucy, de Montargi, de Chasteltierri, d'Espernay et de Sedanne en Champaigne et de plusieurs autres terres, marié à madame [**Valentine**] fille de feu messire Galiache, duc de Milant, dont avoit **III** filx et une fille, en revenant de l'ostel de la Roine, qui est près de la porte Barbette, vers l'eglise des Blans Manteaus, accompagné moult petitement selon son estat, c'est assavoir de **IIJ** hommes à cheval et de **IJ** à piet à une ou **IJ** torches, devient l'ostel du mareschal de Reux, en son aage de **XXXVJ** ans ou environ, fu par **VIIJ** ou **X** hommes armez qui estoient mussez en une maison appellée l'ymage Nostre Dame, estant devant l'ostel dudit mareschal, et où lesdiz hommes avoient habité et conversé repostement par **VIIJ** ou **XV** jours, tué et murtri, et ly fendirent la teste de jusarmes, puiz que fu abatu de son cheval, et ly firent espendre la cervelle de la teste sur le pavement, et ly coperent tout jus une main, et avec lui tuerent un sien vallet qui se metoit sur lui pour le defendre, et si navrerent un qui tenoit la torche; le Roy estant en son hostel de S. Pol, monseigneur de Guienne, dauphin de Vienne et ainsné filz du Roy au Louvre, de l'aage d'environ **XJ** ans, les ducs de Berri et de Bourbon, ses oncles,

et les roy de Sicile et duc de Bourgoigne et conte de Nevers, et les contes d'Alençon et de Clermont, et messire

Charles de Lebret, connestable de France, ses cousins germains, et messire Pierre de Navarre, conte de Mortain, aussi son cousin germain, et pluseurs autres seigneurs, tant du sanc royal que autres estans à Paris, admiral de France que maistre des arbalestriers, et les seigneurs et menistres de justice, tant de Parlement que du Chastellet estans à Paris. Et lui qui si grant seigneur estoit et si puissant, et à qui naturellement, ou cas qu'il eust falu gouverneur à ce royaume, apartenoit le gouvernement, en si petit moment a finé ses jours moult horriblement et honteusement. Et qui ce a fait *scietur autem postea.*

Juesdi, **XXIII**Je jour de novembre.

Cedit jour, est alée la Court à l'enterrement de feu messire Loiz de France, germain du Roy, lequel hier au soir estoit environ **VIII** heures duc d'Orleans et de moult d'autres terres, et maintenant cendre et pourreture, et lequel est enterré aux Celestins delez S. Pol.

Samedi, **XXVI**Je jour de novembre.

Ce jour, a esté dit et puplié de pluseurs que le duc de Bourgoigne, conte de Flandres et de Bourgoigne et d'Artois, disoit et maintenoit qu'il avoit fait occire le duc d'Orleans, son cousin germain, par Rolet d'Auquetonville et autres, et sur ce s'est au jour d'ui parti de Paris.

Vendredi, **IJe** jour de decembre.

Giles de Molin, procureur de maistre Phelippe des Essarts, conseiller du Roy nostre Sire et maistre des Requestes de son Hostel, s'est opposé et oppose à toutes fins que maistre Philippe de Corbie ne soit institué en l'office de maistre desdictes Requestes de l'Ostel, que tenoit à son vivant feu maistre Tristan du Bos.

Vendredi, **XVJe** jour de decembre.

Cedit jour, messire Guillaume d'Avaugour, chevalier, a esté fait et ordonné curateur au conte de Peintevre à la requeste de lui et de plusieurs chevaliers et seigneurs ses amiz, pour ce comparens en la Court, pour auctoriser certain tractié fait pour ledit conte avec le duc de Breteigne touchant la terre de Moncontour,

et ont l'evesque d'Angiers, le Borgne de la Heuse et plusieurs autres chevaliers juré que c'est le prouffit dudit mineur, si a fait le serment acoustumé ledit d'Avaugour, et s'en est constitué plege selon la coustume de Bretagne messire Alain de la Mote, chevalier.

Messire Pierre de Villeinnes, chevalier, soy disans gouverneur de la Rochelle, s'est opposé et oppose que nul ne soit receu à gouverneur de ladicte Rochelle sans le oïr.

Ce jour, maistre J. d'Aigny, contreroleur de la Chambre aux Deniers, a renucié et renuce à certaines erreurs par lui proposées ou qu'avoit entention de proposer à l'encontre de certain arrest ou jugement de ceans donné contre lui et au proufit de l'abbé de S. Germain des Prez lez Paris, en obtemperant à icellui, nonobstant appellations et oppositions par lui faictes au contraire, et pareillement renuce à certaines requestes par lui baillées à la dicte Court sur ce que maintenoit aucuns tesmoins avoir deposé faulx en l'enqueste du procès, dont despend ledit arrest, et parmi ce les despens en quoy avoit esté condempné ledit d'Aigny envers ledit abbé, taxez à la somme de **IIIc** livres ou environ, sont ramenez à la somme de **LX** escus, desquelx **LX** escus et au dessoubz maistres J. Garitel et R. Broisset, conseillers du Roy nostre Sire, pourront ordonner à leur volenté. Fait du consentement dudit d'Aigny et dudit Broisset, soit faisant fort dudit abbé, et ce qui sera fait par lesdiz commissaires vaudra arrest du consentement de Hogouart, procureur de l'abbé et dudit d'Aigny.

Mardi, **XXe** jour de decembre.

La Court a octroyé à Jehanne Mahiu qu'elle puisse ceans plaider sans grace par procureur, attendue sa povreté, et a requiz que ce soit enregistré.

1408.

Mercredi, **XJe** jour de janvier.

Au jour d'ui, a esté ordonné, veu le plaidoié du **Ve** de ce moiz et tout veu, que la dame de la Fauche sera

mise à sa pleinne liberté et venra ceans, se elle welt,
et ly interdit la Court l'alienation de ses bie
immuebles *quousque*, et sera mandé aux bailliz de
Vitri et de Chaumont et à chascun d'eulx, que l'amenent
ou facent amener à ses despens, et avera messire Ferry
de Chardoigne l'administration des biens de ladicte
dame, dont rendra compte, et ce *quousque*.

Mardi, **XVIJe** jour de janvier.

Imperfectum registrum propter vigentissimum frigus,
congelans calamum et incaustum de duobus vocabulis
ad duo vocabula./

Cent ans a qu'il ne fit plus froit, ce dit la gent.

Juesdi, **XIXe** jour de janvier.

Au jour d'ui, a la Court commiz Pierre Belle, huissier
de ceans, au gouvernement et administration des

IJ Chambres de ceans sur la provision aviser et faire ou faire faire de buches, chandoilles, torches, nestoier les tapis et chambres et autres choses appartenens ou lieu que avoit Pierre Noe, jadis huissier.

Juesdi, **XXVJe** jour de janvier.

Intensissimum frigus viget, adeo quod nec incaustum fieri neque conservari potest, neque scribi, etiam ad ignem./

Vendredi, **XXVIJe** jour de janvier.

Cedit jour, à la conjunction de ceste prouchaine lune, c'est amoderé le temps qui par les **IJ** lunes cy devant par especial combien que dès la Saint Martin derrien a adès gelé, ont esté si fors et si merueilleuses gelées que les rivieres ont esté congelés, et par especial par la riviere de Seinne en pluseurs lieux à Paris le pueple aloit et venoit comme par la charriere, et ont esté neges en si grant habundance que l'en eust onques maiz veu de memoire d'omme, et a esté si grant froit que non obstant que le graphier eust feu en vaissel delez son siege pour garder l'ancre de son cornet de geler, neantmoins l'ancre se geloit en sa plume de **IJ** ou de **IIJ** mos en **IIJ** mos, et telement que enregistrer ne pavoit, ne nul autre à peine besoigner.

Or povez sentir en quel estat estoient povres gens qui n'avoient ne pain, ne vin, n'argent, ne busche, et qui avoient povre mestier et foison d'enfans.

Lundi, **XXXe** jour de janvier.

Cedit jour, au soir, se commencerent les glasses à departir et avaler aval à grant impetuosité.

Mardi, derrien jour de janvier et **Ve** jour de la conjunction de la lune, *Curia vacat*, pour ce qui n'est venu ne advocat, ne procureur, ne presidens, ne conseiller du Roy au Palaiz, hors messire Henry de Marle, premier president, maistre Guillaume de Gaudiac, doien de S. Germain l'Aucerroiz et conseiller du Roy ceans, et **IJ** ou **IIJ** autres pour la cause qui s'ensuist: Au jour d'uy et dès hier environ **IX** ou **X** heures de nuit, sont descendues les glaces et glaçons aval en si grant habundance par si grant impetuosité et à si grant effort, en especial par celle partie de Seine qui flut à Paris par dessoubz les petis pons, que par les heurs continuels des glaces contre les pez de boiz qui soustenoient le Petiz Pont, qui estoit en alant de la rue S. Jaques à Nostre Dame, et aussi contre les pillers de pierre qui soustenoient les arches et le pont de pierre qui estoient en alant de la rue de la Harpe au Palaiz royal, icelles glaces et riviere de Seine ont abatu ledit pont de boiz qui estoit en alant à Nostre Dame et partie des maisons adjacens, et aussi ont abatu, froissié, demoli et rué jus le pont de pierre dessusdit

et bien de **XX** à **XXX** maisons qui estoient dessus, et lesquelx pont et maisons avoient esté edifiées et construiz puiz **XXVIJ** ou **XXVIII** ans. Voians tous celx qui veoir le voloient en grant merveille, peril et dommage de la bonne ville de Paris, et par ce peu ou nulx des conseillers du Roy ceans n'ont peu bonnement estre venus ceans, par especial de ceulx qui delà lesdiz petiz ponz demouroient, pour le peril de venir et de retourner qui estoit grant, comme vit le graphier qui, combien que entre **VJ** ou **VIJ** heures au matin fust passé par ledit Petit Pont de pierre en alant au Palaiz, lequel pont estoit entier, toutevoie puiz que **IJ** des maisons dessus ledit pont avec l'une des arches pour moitié fust fondue en l'eaue, et ce lui eust esté dit en la Tournelle de la Chambre de Parlement, se parti pour revenir à son hostel de la rue Pavée, près des Augustins, et lui estant près du pont vit sur icellui une autre des maisons cheoir et fondre avec partie du pont de la main senestre, et puiz passa à dextre. De ceste pestilence fu le pueple moult esbahy par Paris et ailleurs où pareille pestilence fu. Pareillement aussi cedit jour, chut partie des changes de dessus le Grant Pont et peu dudit pont, nonobstant qu'il ne fust que de boiz hors le pavement, pour ce qu'il n'y eut pas si grans heurs de glaces que esdiz petis pons, tant pour ce que la force des glaces la plus grant passa par lesdiz petis pons, pour ce qu'il trouverent le chemin empeschié en la riviere qui estoit encor gelée vers S. Pol, et par ce falloit que les glaces se tournassent d'autre costé, que aussi pour ce que quant les glaces peurent tourner soubz ledit Grant Pont, encontrerent les molins de l'evesque et autres près du Grant pont

que froisserent et par ce rompirent, et empescherent leur violence et force, telement que le heurt ne pot estre si grant qu'il estoit aux dessusdiz petis pons, par lesquels aussy dès dimenche derrien passé passoit la riviere de Bievre qui avoit esté moult impetueuse et qui moult de dammage avoit fait à Saint Marcel hors Paris. Ne vindrent point les seigneurs de ceans au Palaiz, ne advocas, ne procureurs, ne parties, hors en très petit nombre, pour le grant peril que chascun veoit, pour cause des grans et horribles glaces qui dès hier au soir commencerent à descendre et couler par les pons de Paris et par especial par les petis pons, et non pas sans cause, car puiz la saison et le temps ont esté si froiz et adès eu gelées puiz la S. Martin derrain passé, et par especial a esté tel froidure et si aspre et si vigent par les **IJ** lunoisons derrainement passées que nul ne pavoit besoigner. Le graphier mesme, combien qu'il eust prins feu delez lui en une paelette pour garder l'ancre de son cornet de geler, toutevoie l'ancre se geloit en sa plume de **IJ** ou **IIJ** mos en **IIJ** mos, et tant que enregistrer ne pavoit; et que par icelles grans gelées eussent esté gelées les rivieres, et en especial Seine, telement que l'en cheminait et venoit et aloit l'en, et menoit voitures par dessus la glace, et que eussent esté si grant habundances de neges que l'en eust veu de memoire d'omme, et tant que à Paris avoit grant necessité tant de boiz que de pain pour les molins gelez, se n'eussent esté les farines que l'en y amenoit des paiz voisins, et que lesdictes gelées, neges, glaces et froidures se fussent amoderées dès vendredi derrain passé pour la nouvelle conjunction lunaire, et

que les glaces se fussent dissolues par parties et glaçons, iceulx glaçons par leur impetuosité et heurs ont au jour d'ui rompu et abatu les **IJ** petis pons, l'un qui estoit de boiz joignant du Petit Chastellet, l'autre de pierre, appellé le Nuef Pont, qui avoit esté fait puiz **XXVIJ** ou **XXVIII** ans, et aussi toutes les maisons qui estoient dessus, qui estoient pluseurs et belles, et lesquelles habitoient moult de mainnagiers de pluseurs estas, marchandies et mestiers, comme tainturiers, escripvains, barbiers, couturiers, esperonniers, fourbisseurs, couturiers, frepiers, chasubliers, tapissiers, faiseurs de harpes, libraires, chaussetiers et autres. Et nonobstant ladicte ruine, pestilence et peril merueilleus n'y a eu aucune personne perillée, Dieu mercy, car ledit cas est venu et a esté puiz **VIIIJ** ou **VIJ** heures à matin jusques à une ou **IJ** heures après midi; combien

que ce n'eussent esté les pillers pieça faiz et commencez entre ledit Petit Chastellet et l'Ostel-Dieu de Nostre-Dame qui ont receuz les premiers heurs desdictes glaces et glaçons, qui par ce ont esté debrisez et leur impetuosité amandrie, vraysemblable estoit et est que ladicte aventure, cas et pestilence desdiz pons fust avenue en ceste nuit derrienne, en la destruction des corps humains qui ne se peussent avoir garde ne fuir pour le cas soudain. Oultre ce que dit est, ont esté rompus et destruis les molins de l'evesque de Paris qui sont dessus le Grant Pont et pluseurs autres, et aussi churent en la riviere grans parties des changes dessus ledit Grant Pont, qui vraisemblablement et selon l'opinion de ceulx qui s'i cognoissent, eust esté abbatu par les glaces, se ne fust les heurs qui rompoient les molins dessusdiz qui sont près et au-dessus, et aussi que les glaçons sont descenduz par ledit pont plus tart plus de **XIJ** heures que par lesdiz petis pons, pour ce que les glaces qui descendoient de haut ne pavoit avoir leur cours devers Saint Pol et devers Greve, pour ce que celle partie estoit ancor gelée, si resistoit audiz glaçons que ne passassent de cel cousté, si falloit que alassent par la partie qui est devers lesdiz petis pons qui estoit plus desgelée et plus expediee d'empeschemens. Et ce cas avec l'occision de feu messire Loiz, duc d'Orleans, frere germain du Roy, *de quo supra mense novembri*, a esté à grant merveille en ce royaume. Mercredi, premier jour de fevrier. *Curia vacat*, pour ce que nul n'a osé passer la

riviere pour aler au Palaiz, pour la grant impetuosité et force d'elle, car aussy croit elle tousjours.

Curia vacat, pour ce que nul ne se ose abandonner à passer Seine, par especial outre les feu petis pons, pour ce que la riviere croit outre mesure et hors ses termes et si impetueusement que c'est horreur.

Juesdi, **IJe** jour. *Festum purificationis beate Marie, Curia vacat.*

Vendredi, **IIJe** jour, au Conseil où n'eut que **IX** ou **X** de seigneurs de ceans et de ceulx qui demeurent entre les pons, c'est assavoir en la Cité avec peu de ceulx d'outre le Grant Pont.

Samedi, **IIIJe** jour de fevrier.

Au Conseil. Et fu ordonné que, pour ce que les maistres ou seigneurs de ceans ne povoient bonnement venir d'outre les petis pons qui estoient rompus et que Seine passoit et issoit ses termes, ilz s'assembleroient

en aucun lieu et feroient Conseil et arrests, et ceulx de la Cité et d'outre le Grant Pont venroient au Palaiz en la Chambre et conseileroient et feroient arrests.

Item, cedit jour, fu ordonné que l'en ne plaideroit ne lundi ne mardi prouchain.

Item, fu ordonné que les maistres des oeuvres du Roy et II des seigneurs de ceans et le graphier avec eulx visiteroient le Palaiz et haut et bas, pour ce que l'en trouvoit que les sales et la Chambre de Parlement estoient estayés par dessoubz les vostes, et si empiraient les murs, et plouvoit presque par tout, et estoient les maisons du Palaiz en voie de ruine qui n'y remedieroit, si comme toutes les maisons et chasteaulx du Roy par le royaume aloient à ruyne, non obstant que de par le Roy l'en levast continuelment moult grans subsidies. Et icelle visitation faicte seroit rapportée à la Chambre des Comptes pour y pourveoir.

Pour ce que les maistres ou seigneurs conseillers ceans et demourans de là les petis pons, qui estoient en nombre environ XXX ou plus, ne povoient venir au Palaiz ne en la Chambre de Parlement seurement pour le grant excès de la riviere qui s'extendoit en plusieurs rues moult impetueusement, a esté au jour d'uy ordonné que lesdiz maistres se assembleront en leur marche et jugeront procès jusques à ce que seurement l'en puisse ceans venir en batel, attendu que les pons sont rompus et demoliz. Et pour ce que le graphier demeure outre lesdiz petis pons en la marche desdiz maistres ou seigneurs, ledit graphier enregistrera au Conseil des dessus diz maistres, et son clerc principal, qui est notaire du Roy à bourses, venra ceans et enregistrera pour lui.

Lundi **VJe** jour de fevrier, au Conseil.

Cedict jour, se sont assemblez à Sainte Genevieve ou Mont les maistres ou seigneurs et **IJ** des presidens de ceans qui demouroient oultre les petis pons, et les autres, qui demouroient par deça, en la Chambre de Parlement ou Palaiz, selon ce que avoit esté ordonné samedi derrien passé, pour conseiller, et a esté le graphier au Conseil tenu à Sainte Genevieve, et son principal clerc, qui est notaire et secretaire du Roy, en la Chambre du Parlement au Conseil.

Vendredi, **Xe** jour de fevrier.

Item, ce jour a esté pourparlé sur la provision des petis pons et passages pour le marrain, et a esté mandé le prevost des marchans qui a recité de plusieurs manieres de faire et refaire les pons de Paris touchées au Grant Conseil, l'une et la plus giere qui pleust au Roy de donner et octroyer la tierce partie des aydes de la ville et viconté de Paris pour un an, qui monteroit à **IIJxx** mil livres, car toutes les subsidies que le Roy prant à Paris et en la viconté hors son ordinaire monte à **XIJxx** mil livres. Nota, con grans subsidies prant le Roy par tout le royaume.

Et si a esté touchié de requerir provision pour la ville de Paris où plusieurs gens d'armes doivent arriver en brief en la compaignie des ducs de Berry, de Bourgoigne, de Breteigne et du roy de Sicile, sur le fait de la mort du duc d'Orleans, *de quo supra*, sur quoy n'a pas esté conclu, *quia ad Curiam non pertinet*,

multis obstantibus et nunc currentibus, au moins n'y pourroit elle remedier.

Le prevost de Paris a exposé à la Court que on lui a rapporté que aucuns ont despoillié certaines fourches ou gibés patibulaires environ Paris des charoignes de ceulx qui y avoient esté executez, et si avoient tant fait que par certains moiens de femmes ou autres ilz avoient eu certains enfans mors nez, et estoit grant et vraissamblable

presumption qu'ilz ne fussent gens crimineux et sorciers, dont ledit prevost n'osoit mais doubtoit s'entremettre d'en faire ou entreprendre cognoissance, pour les debaz en quoy ceulx de l'Université de Paris et autres le tiennent soubz umbre de ce que aucuns veulent dire que la cognoissance de tels cas appartient à la justice ecclesiastique. Pourquoi, oy ledit prevost et le procureur du Roy, present à ce l'evesque de Paris en sa personne, la Court a ordonné et commandé audit prevost que sur ledit cas venu à sa cognoissance et les dependances sans aucune difficulté il face ou face faire information, et ceulx qu'il en trouvera coupables ou souspeconnez preigne et face emprisonner, et les punisse, comme il appartendra selon raison et justice.

Mercredi, **XVe** jour de fevrier.

Ce jour, a esté ordonné que certaines maisons, qui appartenoient à Nycolas Grimaut et qui estoient demourées

sur le Pont Nuef en ruine et en peril de cheoir, parce que ledit pont estoit cheu, seroient abatues au despens de la chose, et à ce a esté commiz Pierre Belle, huissier de ceans.

Mercredi, **VIJe** jour de mars, au Conseil.

Les procureur et autres officiers du Roy à Rouen, les prelas et autres gens d'eglise, les barons et seigneurs qui sont de la garde et ressort et souverainneté du bailliage de Rouen, et les bourgeois et habitans dudit Rouen **[ont protesté]** que separation ne soit faicte du bailliage de Rouen et d'Esvreux.

Juesdi, **VIIJe** jour de mars.

N'a pas esté plaidoié pour ce que la Court a esté present en la sale de l'ostel du Roy à Saint Pol, où maistre Jehan Petit, maistre en theologie, de la nation de Normandie,

a proposé pluseurs causes et raisons pour le duc de Bourgoigne, par lesquelles disoit de par ledit duc, qui l'a advoué, que à bonne et juste cause avoit fait mourir le duc d'Orleans, et en devoit estre prisez et remuneré d'amour, d'onneur et de richesses. Lesdiz raisons et propos ont esté diz et proposez en la presence des roiz de Cecile, cousin germain du Roy qui estoit enfermé comme malade, du duc de Berry,

du duc de Bourgoigne, du duc de Breteigne, du conte de Mortain, du conte de Nevers, et icelles raisons trouveras ailleurs en cest livre enregistrées et rapportées par le graphier en tables et tout droit pour la presse et foule de gens d'armes et autres qui estoient en ladicte sale.

Lundi, **XIJe** jour de mars.

Le seigneur de Dampierre, acompaignié de pluseurs chevaliers et escuiers, est venu avant les Plaidoiries du jour d'ui à matin de par le duc de Bourgoigne qui faisoit savoir à la Court que le Roy, en son intervalle qu'il a eu de santé depuiz venredi au soir jusques à samedi derrien passé au disner, avoit dit sur ce que pluseurs lui demandoient le lieu vacant ceans pour la mort de feu maistre Renaut de Bussy, que il voloit et estoit son entention que election se feist du plus souffisant,

selon les ordonnances royaulx autrefois faictes.

Mercredi, **XIIIJe** jour de mars.

Ce jour, vindrent ceans l'arcevesque de Sens, l'evesque de Poitiers, chancellier de Berri, messire J.

de Saulx, chancelier de Bourgoigne, le conte de Vandosme et autres pluseurs de par nosseigneurs, tant dessusdiz que de la Royne et le roy de Sicile, requerir que la Court receust ou lieu de feu maistre Regnaut de Bussy, ou au moins ou lieu des Enquestes de cellui qui monteroit en la Grant Chambre en son lieu, maistre J. Taranne, qui avoit lettres de don du Roy, et combien que **VIII** ou **IX** autres eussent don et lettres signées non seellées, et que par l'ordonnance royaulx deust estre faicte election des seigneurs de ceans, et que la Court s'efforsast de soy à ce arrester, toutevoie *tandem*, pour la requeste et importune volenté desdiz dame et seigneurs et pour eschiver esclande, a esté receu ledit Taranne, moienant ce que sa lettre qui estoit defectueuse seroit refaicte, et que maistre Pierre de l'Esclat, maistre des Requestes de l'Ostel du Roy et conseiller de la Royne, feroit avoir lettres à la Court que ce ne tournast point à prejudice d'icelle Court ne des ordonnances dessusdictes, et outre lui et lesdiz chancelliers et le tresorier de Berry et le conte de Vandosme de faire consentir nosdiz seigneurs.

Vendredi, **XXIII**e jour de mars.

Au jour d'ui, a esté advisé ceans par la Court, la

Chambre des Comptes et tresoriers de France que, pour faire et refaire le Petit Pont commencié au Petit Chastellet et le Pont Saint Michiel, les tresoriers bailleront

mil livres, le Prevost des Marchans autre mil livres parisis, la Court de ceans sur les exploiz **Vc** livres parisis, le Prevost de Paris aussi sur les exploiz dudit Chastellet, par une maniere qui sera advisée, une autre somme, et l'evesque de Paris et autres qui prennent peage ou autre redevance sur lesdiz pons, chascun en son endroit selon leur portion, une autre somme. Et sur ce sera commencié à ouvrir le plus tost que faire se pourra, et premierement au pont dudit Petit Chastellet, et *interim* les Prevosts de Paris

et des Marchans dessusdiz iront devers les seigneurs, c'est assavoir la Royne, roy de Sicile, duc de Berry et autres, et leur supplieront que weillent contribuer et ayder audit ouvrage et reparation, et aussy laboreront devers le Roy et les generaulx d'avoir certaine quote sur les subsides prins à Paris pour ledit ouvrage. Lundi, secont jour d'avril.

Cedit jour, a esté receu ceans maistre N. Potin en conseiller du Roy par la resignation de maistre Germain Paillart, fait evesque de Luçon par le Pape, ou

lieu duquel a esté maistre Pierre d'Aunoy en la Grant Chambre, et ou lieu dudit d'Aunoy en la Chambre des Enquestes a esté receu ledit Potin à la requeste du duc de Berry et par vertu de certaines lettres de don fait par le Roy.

Vendredi, **VJe** jour d'avril.

Ce jour, a esté appointié sur certain incident en visitant le procès (d'entre le conte de Brenne, et l'evesque de Laon, d'une part, et le roy Loiz de Sicile, d'autre part), que les tesmoins viex, valitudinaires et affuturs, examinez d'un costé et d'autre sur le petitoire, seront joints à l'enqueste du principal sur le petitoire, supposé qu'il n'appere point de certification de la mort desdiz tesmoins, et en tant que regarde les tesmoins examinez sur le possessoire d'un costé et d'autre, les tesmoins qui apperrent et apperrent estre mors au temps de la reception de l'enqueste du petitoire seront joins à icelle enqueste du petitoire, et ceulx, dont il n'apert point par certification ou autrement de la mort, examinez en icelle

enquête du possessoire, ne seront point joins à icelle enquête sur le petitoire.

Vendredi, **XXe** jour d'avril, au Conseil.

Cedit jour, maistre Guillaume Le Clerc, conseiller du Roy ceans, ou nom de lui et de maistre Gautier Ponce, aussy conseiller du Roy ceans, en la presence de Pierre Simon, procureur de messire Loiz de Poitiers et de dame Katherine de Giac, sa femme, et de Vital Torencha, procureur du seigneur de Tournon, a exposé que comme aient vacqué par pluseurs jours à l'execution de pluseurs arrests de ceans par lesdiz Loiz et sa femme contre ledit de Tournon, dont leur est deue la somme de **CCCC** et **VIII** frans, dont s'est obligié ledit Tournon envers eulx à paier dedans la St-Jehan prouchain venant, et aient promiz de determiner par la deliberation d'aucuns des seigneurs de ceans au landemain

de Quasimodo prouchain, ou d'en faire ordonner par la Court, et il n'aient pas eu temps d'en ordonner ou faire ordonner par icelle Court, et pour avoir adviz avec lesdiz seigneurs ait assembler durans les festes de Pasques derrienes et depuiz pluseurs desdiz seigneurs comme commissaires, lesquelx y ont vaqué sans avoir satisfaction, et ancor ait pluseurs choses à parfaire, pourquoy ont requiz lesdiz procureurs

qu'il paiassent et contentassent lesdiz seigneurs de ce qu'il y ont vaqué, et aussi leur respondissent de ce qu'il y vaqueroient, disans que à eulx ne tenoit pas qu'il n'eussent leur droit audit jour, pourquoy protestent que se par lesdiz procureurs ou leurs maistres tenoit que il ne peussent ordonner desdiz debas, que ce ne leur soit imputé qu'il ne se puissent faire paier dudit de Tournon audit terme, car il estoient prests de faire ce qu'il appartendroit avec lesdiz seigneurs et faire ce qu'avoient promiz, maiz qu'il feissent que lesdiz seigneurs y voulsissent entendre, en les contentant, comme dit est.

Vendredi, **IIIJe** jour de may.

Ce jour, Loiz Pot et Jaques de Lalande ont esté curateurs ordonnez aux enfans de feu messire Guillaume de Neillac, à la relation et election de Pierre de la Trimouille, J. de Chevenon, Dauphin de Seriz et Baptetaust,

messire Guillaume Foucalt, Loiz Pot, Jaquet de Lalande, messire Gaucher de Passac, messire Paous de Prie, J. Garnier, Perceval de la Marche, messire Philibert de Digoinne, Oudart de Lespinace, qui ont fait le serment acoustumé.

La Court a ordonné que la somme de **Vc XIIIJ** escus que coustera à faire ou edifier certain molin, ou edifice de certain molin, dont contens estoit entre l'evesque de Therouenne, d'une part, et les executeurs du feu derrain evesque, sera baillée et delivrée à **IJ** bonnes personnes de Therouenne, gens d'eglise ou autres, pour convertir et distribuer à l'edifice dudit molin, pourveu que lesdiz molin et edifice demourront perpetuellement à heritage à l'eveschié, et le residu de la somme de **VIJc** escus miz

en depost devers la Court demourra devers ycelle,
jusques

à ce que ledit edifice sera parfait.

Sur le debat du partage d'entre J. de Poiz, d'une
part, et sa mere, d'autre part, oye la relation des
commissaires

à ce ordonnez, il sera dit que les partages
faiz par maistre Oudart Baillet demourront en l'estat
qui sont, comme bons et valables, et sortiront leur
plain effect et sera tenu ledit J. de Poiz de choisir
l'un d'iceulx partages dedans le **XVJe** jour de juin
prouchain

venant pour tous delaiz et prefixions, et l'autre
rendre à sa dicte mere pour joir d'icellui par forme
de doaire, et ou cas que dedans ledit **XVJe** jour de juin
ledit de Poiz n'aura choisy, la Court dès maintenant
en baille le choiz à sa dicte mere, et le relieve de
despens et pour cause, et outre a ordonné la Court
que, quelque partage ait J. de Poiz, il avera **J** rousset
dont il se plaignoit.

Samedi, **Ve** jour de may.

Cedit jour, a esté receu en prevost de Paris messire
Pierre des Essars, chevalier, ou lieu de messire Guillaume
de Tignonville, chevalier, qui pour contemplation
de l'Université de Paris et occasion de **II** soy
disans clers et escoliers, executez au gibet de Paris
par le jugement dudit prevost dès la S. Deniz derrain
passé, et pourquoy ladicte Université a cessé de sermons

et leçons jusques à ores, a esté despointié dudit office de prevosté.

Mardi, **XVe** jour de ce present moiz.

Furent ceans publiées et leues trois lettres royaulx, par lesquelles le Roy welt tenir et maintenir les eglises et prelatures de son royaume en leurs franchises et libertez, comme apert plus clerement, qui sont enregistrées

ou livre des Ordonnances.

Et à occasion desdictes lettres a esté présentée au Roy dès lundi derrain passé, comme l'en dit, une bulle par laquelle le pape Benedict, qui est l'un des contendens du papat, excommunie le Roy et messeigneurs

ses parens et adherens, et qu'il en avendra,

Diex y pourvoie.

Mercredi, **XVJe** jour de may, au Conseil.

Cedit jour, ont esté despenduz **II** executez au gibet, qui se disoient clers et escoliers de l'Université de Paris, et au despendre a eu, comme l'en dit, plus de **XLm** personnes

au gibet, et ont esté ramenez en **II** sarqueux, à grant compaignie et grans processions des eglises et de l'Université, sonnans toutes les cloches des eglises jusques au parviz de Nostre Dame, entre **X** et **XJ** heures, couvers de toile noire et rendus à l'evesque de Paris par certaine forme et maniere, et depuiz portez ou menez à Saint Matelin où ont esté inhumez, comme l'en dit, et ce fait par ordonnance royal.

Et cedit jour, a esté levée la Court à **IX** heures pour aler au Conseil en la Chambre Vert sur une burle que le pape Benedict avoit envoiée au Roy, esquelles le excommunioit, et les seigneurs de son sanc et adherens, ou contempt d'unes lettres qui hier avoient ceans esté publiées, par lesquelles le Roy voloit que les eglises de son royaume usassent et joissent de leurs droiz, franchises et libertez, acoustumées d'ancienneté et qui sont de droit.

Lundi, **XXJe** jour de may.

Ont esté assemblez entre la sale du Palaiz et la Chambre de Parlement et les grans galleries par bas ou grant preau par terre le Roy nostre Sire, les roy de Sicile, duc de Berry, duc de Bourgoigne et pluseurs autres seigneurs, ducs, contes, barons, chevaliers,

escuiers, bourgeois, archevesques, evesques, abbez, prelas, religieux, clergié, et par especial l'Université de Paris; et proposa maistre J. Courtecuisse, maistre en theologie, publiquement, en prenant pour theme contre le pape Benedic qui avoit envoié une bien mauvese bulle, par laquelle excommunioit le Roy et les seigneurs de son sang et tous adherens, pour occasion de ce que le Roy, son clergié et son Conseil avoient pené et penoient et poursuoient l'union de l'Eglise, tant par subtraction d'obeysance que de pecunes, et de non obeir n'à l'un n'à l'autre des contendens:*Convertetur dolor ejus in caput ejus, et in verticem ipsius iniquitas ejus descendet.*

Et après ce que ledit maistre eust proposé **XII** raisons de la negligence dudit Benedic à l'union poursuivre et avoir, et du mal et vice desdictes bulles excommunicatoires, en metant *consequenter* **VJ** conclusions, a esté requiz par l'Université que lesdictes bulles fussent dessirées. Si ont esté dessirées publiquement, et à ladicte requeste a esté prins et emprisonné messire Guillaume de Gaudiac, docteur, conseiller du Roy ceans et doien de S. Germain l'Aucerroiz.

Vendredi, premier jour de juing.

Pour ce que maistre Guillaume Cousinot, advocat ceans, n'est pas venu à heure ordenée de plaidier après disner, la Court a commandé à Jehan Maisnier, huissier de ceans, qu'il execute ledit Cousinot de XL solz parisisis, *aliàs*, ilz seront pris sur ledit huissier, s'il n'en fait diligence, et ainsi sera fait d'ores en avant contre les autres, car par la negligence des advocaz et procureurs pluseurs personnes demourent souvent à expedier à jours de Plaidoieries.

Mardi, Xe jour de juillet.

Les procureurs de pluseurs prisonniers estans ou Louvre, c'est assavoir, l'evesque de Gap, l'abbé de S. Deniz, maistre Nycolas Fraillon, conseiller du Roy ceans, maistre Thiebaut Hoce, secretaire et notaire du Roy, maistre Henry Chicot, maistre en theologie, et autres requierent distribution de Conseil contre l'Université de Paris.

L'Université dit au contraire que lesdiz prisonniers sont jà requiz par leur ordinaire, car ilz sont gens d'eglise et si sont prisonniers pour crime de lese majesté et pour scisme de l'Eglise, à quoy ne voudroit toucher la Court. Si dit qu'elle a eu conseil sur ce, et leur adviz a esté qu'elle ne puet en ce pranre distribution, et n'en pranra point, et defent à son procureur qu'il n'en praigne point.

Lesdiz prisonniers dient en replicant au contraire que c'est raison qu'il aient distribution, il viennent ceans comme en Court capital pour remede avoir et justice, car jà longuement ont esté prisonniers, et n'est homme, tant fust Sarrasin, que si venoit ceans et demandast distribution, que l'en ly deniast, et ne wellent point decliner ou apartendra de soy soumettre à tel juge que deveront avoir, si concluent que doivent avoir distribution. Appoinctié au Conseil.

Mercredi, **XJe** jour de juillet.

Au jour d'ui, a esté faicte election du lieu vacant en la Chambre des Enquestes par le trespas de maistre J. d'Ailly, et a esté esleu maistre Renault de Sens, bailli de Bloiz, qui autrefois avoit esté de ladicte Chambre dont avoit esté miz hors sans procès, comme l'en dit, dès le temps d'un triboul qui fu à Paris **XXIIJ** ou **XXIIII** ans a, et pour ce que le Chancelier ne povoit estre à l'election faire, a mandé au matin que, non obstans lettres par pluseurs obtenues, la Court esleust aucun suffisant audit lieu.

Juesdi, **XIJe** jour de juillet.

Les prisonniers estans au Louvre, pour l'occasion

des bulles d'excommeniement envoié contre le Roy et son sang par Pierre de Lune derriement esleu en Pape, requiert distribution de Conseil contre l'Université de Paris.

Hoiguart, procureur de ladicte Université, dit qu'elle lui a defendu que de ceste chose ne se melle, et pour ce lesdiz prisonniers prennent pour advocas maistre Pierre de Marigny et pluseurs autres, à qui la Court a commendé qu'il soient au Conseil desdiz prisonniers et qu'il facent leur devoir, et iceulx prisonniers bailleront par cedula ceulx que wellent avoir pour Conseil.

Samedi, **Xe** jour d'aoust.

Cedit jour, Mahiu Carette, commiz de par le Roy à Tournay à recevoir les cautions et bailler les lettres et certifications sur le fait des denrées conduites et amenées audit Tournay et de celles qui vont hors de ladicte ville, a appellé et appelle de certaine sentence, jugement,

ordonnance ou appointement et certains griefs contre lui faiz et donnez par les seigneurs des Comptes, comme de nouvel venus à sa cognoissance.

Lundi, **XXe** jour d'aoust.

Au jour d'ui, entre **X** et **XJ** heures, les prelas et clergié de France assemblé au Palaiz sur le fait de l'Eglise, ont esté amenez maistre Sance Loup, nez du paiz d'Arragon, et un chevaucheur du pape Benedict qui fu derriere, nez de Castelle, en **IJ** tumbereaux, chascun d'eulx vestuz d'une tunique de toille peincte où estoit en brief effigiée la maniere de la presentation des mauveses bulles, dont est mention le **XXJe** de may

cy dessus, et les armes dudit Benedict renversées et autres choses, et mictrez de papier leurs testes, où avoit escriptures du fait, depuiz le Louvre où estoient prisonniers avec pluseurs autres de ce royaume prelas et autres gens d'eglise qui avoient favorisé aux dictes bulles, comme l'en dit, jusques en la court du Palaiz, en moult grant compaignie de gens à trompes, et là ont esté eschafaudez publiquement et puiz remenez audit Louvre par la maniere dessusdicte.

Juesdi **XXIIJe** jour d'aoust.

Cedit jour, fina Parlement tant en Plaidoiries que en Conseil plus tost que autrefois, pour ce que les jours de Troies se doivent tenir.

Samedi, **XXVe** jour d'aoust.

Festum beati Ludovici, Curia vacat. Et cedit jour ont esté arrestez les seigneurs qui devoient aler à Troyes, de par la Royne, tant pour gens d'armes qui passent par Champaigne pour aler au Liege avec le duc de Bourgoigne que pour autres causes touchans le dit duc et la duchesse d'Orleans, vefve du duc, et du duc son filz.

Fu defendu de par le Chancellier aux charretiers de Troyes, qui avoient chargié sur leur char **II** queues pleines des procès de Champagne estans ceans pour mener à Troies, et pluseurs autres queues et poinsons pleins des habillemens et besoignes tant des seigneurs de ceans que d'advocas et procureurs de Parlement, que ne partissent jusques à ce que averoient autres nouvelles, car l'en disoit que pour ce que la Royne et le Dauphin, qui estoient et avoient esté à Meleun longuement, devoient venir à Paris, si faisoit la duchesse d'Orleans aussi, qui par avant estoit à Bloiz, pour requerir justice contre le duc de Bourgoigne qui avoit fait occirre le feu duc d'Orleans son mari, pere du duc d'Orleans à present, et son filz, et qui estoit frere du Roy, et pour ce faloit que les seigneurs demourassent à Paris avec tous les presidens, et si disoit l'en que les paiz, par especial de Champagne, estoient garni de gens d'armes.

Dimenche, **XXVI**e jour d'aoust.

Enterent à Paris et vindrent de Meleun la Royne et le Dauphin accompaigniez, environ **III** heures après disner, des ducs de Berri, de Breteigne, de Bourbon et pluseurs autres contes et seigneurs et grant multitude de gens d'armes, et alerent parmy la ville loger au Louvre.

Lundi, **XXVIJe** jour d'aoust.

Ce jour, a esté enjoint au procureur de l'Université de Paris qu'il soit prest mercredi prouchain pour dire ce que voudra contre l'enterinement de certaines lettres obtenues par maistre N. Fraillon, conseiller ceans, et prisonnier dès la Panthecouste derrainement passée pour occasion de bulles d'excommeniement envoiées ou moiz de may derrain contre le Roy et son royaume par lors nommé Benedic pape.

Mardi **XXVIIJe** jour d'aoust.

Cedit jour, entra à Paris la duchesse d'Orleans, mere du duc d'Orleans qui à present est, et la Royne d'Angleterre, femme dudit duc et fille du Roy, oncle dudit duc, en une litiere couverte de noir, à **IIII** chevaulx couvers de draps noirs, à heure de vespres, accompagnée de pluseurs charios noirs pleins de

dames et femmes, et de pluseurs ducs et contes et gens d'armes.

Cedit jour, a esté le graphier envoyé au Louvre pour savoir au Conseil se l'arrest fait aux seigneurs et aux charios chargez des procès de la Court et autres choses appartenens aux seigneurs qui y devoient aler et aux advocas et procureurs tendroit, et lui a esté dit de par la Royne par messire J. de Montagu, chevalier et grant maistre d'ostel du Roy, que nul de la Court se partist, car l'en avoit à faire consaulx, où il faloit tous les presidens et autres seigneurs de la Court estre, et si estoient gens d'armes sur les païz de Champaigne, qui pourroient faire empeschement aux bonnes gens. Samedi, premier jour de septembre.

Cedit jour, maistre Pierre de l'Esclat est venu devers la Court de par la Royne et le duc de Berry dire que la Court feist surseoir l'execution commencée à la requeste de messire Bernart du Peyron contre

messire Pierre Le Barbu, pour l'eveschié de Nantes, par maistre Robert Broisset et Robert Chaurre, sur quoy la Court a respondu qu'elle fera le miex qu'elle pourra en justice, et a esté reputé Peyron pour diligent, et l'execution de son arrest pour commancée dedans l'an, et a esté ordonné en oultre que d'ores en avant lettres executaires lui seroient baillées precises. Mardi, III^e jour de septembre.

Ce jour, maistre Jehan Houguart, procureur de l'Université de Paris, appelé en la chambre de Parlement, et interroguez s'il vouloit aucune chose baillier pour ladicte Université contre maistre Nicole Fraillon, a respondu qu'il avoit parlé au recteur et aux deputez, et qu'ilz ne saroient que baillier.

Mercredi, V^e jour de septembre.

Furent tous les seigneurs de ceans au Louvre en la grant sale où estoient en personnes la Royne, le duc de Guienne, son filz ainsné, le duc de Berry, le duc de Bretagne, les contes de Saint-Pol, de Mortaing, d'Alençon, le duc de Bourbon, les contes de Clermont et de Dompmartin, la duchesse de Guienne, la dame de Charrolois, le conte de Tancarville, le connestable, le Chancelier, les presidens de Parlement, le grant

maistre d'ostel, les arcevesques de Bourges, de Tholouse et de Sens, les evesques de Senliz, de Beauvais, d'Amiens, d'Evreux, de Lodeve, d'Alby, de Therouanne, de Sees, de Maillezés et pluseurs autres evesques et abbez, le prevost de Paris et le Prevost des Marchans, acompaignié de cent bourgeois de Paris ou environ. En la presence desquelx et de pluseurs autres notables personnes et gens du Conseil du Roy, fu publiée, par la bouche de maistre Jehan Jouvenel, advocat du Roy, la puissance octroiée et commise par le Roy à la Royne et audit monseigneur de Guienne sur le gouvernement du royaume, le Roy empeschié ou absent.

Jeudi, **VJe** jour de septembre.

Ce jour n'a esté rien jugé, pour ce que les lays sont alez au Louvre.

Mardi, **XJe** jour de septembre.

De la partie de la duchesse d'Orleans et du duc d'Orleans fu proposé au Louvre par la bouche de l'abbé de Chesy par escript à l'encontre des justifications proposées de la partie du duc de Bourgoigne sur

la mort du feu duc d'Orleans, et estoient ledit mardi presens les ducs de Guienne, de Berry, de Bretagne, de Bourbon, les contes de Mortaing, d'Alençon, de Tancarville, de Clermont, le connestable, le Chancellier, les presidens et autres gens de Parlement et de la Chambre des Comptes, pluseurs barons, prelaz, chevaliers, les prevosts de Paris et des Marchans, le recteur et pluseurs maistres de l'Université de Paris et pluseurs des bourgeois de ladicte ville.

Mardi, [XVIIIe](#) jour de septembre.

Ce jour, sur certain debat ou question meue entre aucuns subgez du roy de Portugal, d'une part, et le gouverneur et autres de la ville de la Rochelle, d'autre part, devant maistres Gieffroy de Peyruce et Symon de Nanterre, commissaires deputez à la dicte cause, de la sentence interlocutoire desquelx commissaires

de la partie desdiz de la Rochelle a esté appellé ceans, les presidens et autres conseillers du Roy estans cedit jour en la Chambre de Parlement ont offert à Thuribié de Saint Faconde, escuier et message du roy de Castelle en ceste partie, fere et administré auxdictes

parties bonne et brieve justice, et icelles parties oïr
sommierement et de plain sur le principal, l'appellation
mise au neant sans amende, et à cest appointement
ont bien voulu obtemperer lesdiz de la Rochelle.
Ce fait, la Court ou messeigneurs estans en icelle ont
appointié que adjournement en cas d'appel soit
bailliez auxdiz de la Rochelle à l'encontre desdiz de
Portugal, ou cas qu'ilz ne voudront obtemperer à
l'offre audit Thuribié.

Mercredi, [XIXe](#) jour de septembre.

Ce jour, sur un debat d'entre le conte daulphin
d'Auvergne, d'une part, et le sire de Montberon et sa
femme, d'autre part, affin d'assoper un arrest prononcé
entre lesdictes parties, sur quoy on avoit presentées
certaines lettres royaulx impetrées de la partie du duc
de Berry, la Court ou messeigneurs estans en icelle
ont delivré auxdiz de Montberon et sa femme ledit
arrest avec l'executoire d'icellui.

Samedi, **XIIJe** jour d'octobre l'an **M CCCC VIII**.

L'evesque de Chartres requiert que comme Charles et un autre du Cigne aient esté pris en son eveschié, et soient renduz à l'evesque de Paris, que iceulx prisonniers

lui soient renduz par la Court.

L'evesque de Paris dit que les diz prisonniers ont esté pris et amenez à Chasteaufort en son eveschié, puis en Chastellet, et les a requis devant ce que l'evesque de Chartres les ait requis, et dit outre que il est clerc notoirement, et n'est tenuz en ce cas de respondre ceans, et si ne scet rien qu'ilz aient esté pris en l'eveschié de Chartres, et si l'en a debouté le prevost qui les a bailliez audit de Paris, par quoy, supposé qu'il deust respondre, si ne fait à recevoir de les lui demander, ne aussi à la Court qui ne les a pas, et à lundi prouchain revendront et sera adjournez le prevost audit jour, dont lettre a Milet.

Mardi, **XXXe** jour dudit moiz d'octobre.

Maistre N. d'Orgemont et G. Ponce, conseillers du Roy, ont esté commiz par les presidens et aucuns seigneurs de ceans à gouverner la chose contencieuse entre l'evesque du Puy, d'une part, et le chapitre dudit lieu, d'autre part, sur le fait de la collation des prebendes du Puy, dont lettre.

Lundi, **XIJe** jour de novembre mil **CCCC VIII**.
Tint le Parlement messire Arnaut de Corbie, chevalier
et chancelier de France, presens messire Henry
de Marle, president premier, maistre R. Mauger,
president,
les patriarche d'Alexandrie, arcevesque de Tours,
evesques de Lisieux, de Paris, de Senliz, du Puy,
Tornay, Usès, Limoges, Lodeve, Mirepoiz, Terbe,
Esvreux, Lusson et Coustances, et l'abbé de Saint Deniz
en France, pluseurs des maistres des Requestes de
l'Ostel du Roy nostre Sire, les seigneurs des Grant
Chambre, des Enquestes et Requestes du Palaiz. Et
furent leues les ordonnances et fais les sermens
acoustumez.

Cedit jour, ledit messire Arnaut de Corbie, Chancelier,
a dit au Conseil à la Court que lui estoit mandé
de par le Roy nostre Sire qui estoit, comme l'en
disoit, à Gien sur Loire, qu'il alast à lui; qui lui estoit
bien grief, attendu son ancien aage et le temps, et pour
ce que le temps qui est à present estoit bien dangereux,
car l'en disoit que monseigneur le duc de Bourgoigne
estoit entour le païz de Flandres, garni es
païz de Picardie et de Champaigne de moult grant
nombre de gens d'armes, et ne savoit l'en son entention.
Et le Roy nostredit Seigneur, la Royne, monseigneur
le Dauphin et les autres seigneurs du sang royal
estoyent ou chemin de la riviere de Loire, et s'estoyent
puiz **XV** jours partiz de Paris assez hativement, et le
Roy estant malade de sa maladie acoustumée. Qui
amonesta la Court de diligemment faire justice, car

ceste Court estoit le seul refuge de justice qu'on peust de present avoir en ce royaume. Car partout avoit grant tribulation, et souffroit et avoit moult à souffrir le peuple et par especial en la Languedoy, par la grant multitude de gens d'armes qui, hors feu bouter, gastoient et destruioient les plas païz en pillant, en rançonnant les villes et les singulieres personnes, et par especial les eglises et gens et subgiez d'eglise, et les subgiez et hommes et villes du Roy partout, et singulierement puiz IIII ou V ans, le païz de Champagne et de Brie, et aucune foiz tuoient et souvant batoient pluseurs bonnes gens du plat païz. Et cedit jour, le dessusdit messire Arnault de Corbie, chevalier de France, dist à messeigneurs dessusdis en Conseil que le falloit aler au Roy nostre Sire qui estoit, comme l'en disoit, à Gien sur Loire et qui l'avoit mandé, et pour ce que les choses de ce royaume estoient en petit point, et que le refuge de ce royaume en justice estoit en et de ceste Court, si amonnesta la Court de bien et diligemment entendre à faire justice, de venir matin et de s'en aler à heure raisonnable et competent, non pas trop tost. Cy après s'ensuist la table des cent seigneurs qui à ce present jour estoient du Conseil du Roy nostredit

Seigneur en son Parlement et qui faisoient ledit Parlement,

desquelx a **XIJ** pers de France, **VIII** maistres des Requestes de l'Ostel du Roy nostredit Seigneur, et **IIIIxx** es **IIJ** Chambres de ceans, c'est assavoir en la Grant Chambre, en la Chambre des Enquestes et en la Chambre des Requestes du Palaiz.

Mercredi, **XIIIJe** jour de novembre.

Ce jour, J. Mautaillié, seigneur de Courtaignon, a consenti l'adjudication du decret de la terre de Courlandon

mise en criées à la requeste de messire Lancelot de Semur, chevalier, et de sa femme, et oultre a consenti qu'il soit condempné es despens fais pour occasion desdictes criées et es despens de ceste instance.

Juesdi, **XVe** jour de novembre.

L'abbé d'Aniane propose et dit que Estienne de Montigny a miz son temporel en la main du Roy, sur quoy a obtenu certaines lettres royaulx adreçans aux presidens *tempore vacationum*, par vertu desquelles lui fu faicte recreance jusques à ce que autrement en seroit ordonné, et pour ce qu'il est grant cleric, docteur, ancien et ordonné pour aler avec autres à conseil qui se tendra par les **IJ** colleges à Pise, requiert qu'il ait congié et son temporel delivré, et il est prest de respondre par peremptoires *cuicunque et de quibuscunque*.

Appoinctié qu'il mettra sa requeste devers la Court qui verra ses lettres et provision *alias* obtenue, considerera ce qu'il appartendra et en ordonnera demain ou samedi prouchain.

Ce jour, la Court a licencié sans jour et sans terme l'abbé d'Anianne et ly a recréu son temporel

quousque,

attendu qu'il a offert respondre par preemptoires

cuicunque

et de quibuscunque, comme appert ou registre des Plaidoiries du jour d'ui.

Mardi, **XXe** jour de novembre.

Assez tost après **IX** heures au matin, firent les seigneurs de la Court partir les advocas, procureurs et autres estans aux Plaidoiries, et tindrent conseil sur certaines lettres envoiées par le duc de Berry à monseigneur Henry de Marle, premier president, sur ce que la Court avoit eu plainte d'une juesne fille, d'environ **VIII** ans, née de Bourges, de bourgeoisie, que voloit marier icellui duc à un peintre alemant qui besoignoit pour lui en son hostel de Vincestre lez Paris; contredisant la mere et autres amis, comme l'en disoit. Et de fait avoit fait detenir icelle fille le duc en son chastel d'Estampes, où estoit alé un huissier de Parlement, par justice, querir ladicte fille, que l'en lui avoit refusée, pour quoy avoit adjorné les desobeysans ceans. Sur quoy avoit en present envoyé lesdictes lettres audit president, contenens en effect

que se pranroit à sa personne et à ses biens, se la chose prenoit autre conclusion qu'il n'eust ordonnée. Sur quoy fu deliberé que aucun, ou aucuns des seigneurs de ceans alassent audit duc le desmouvoir, combien que ledit president se presentast d'y aler en sa personne.

Lundi, **XXVI**Je jour de novembre.

Après ce que messeigneurs, pour ce que certaines lettres estoient venues à la Court, se leverent des Plaidoiries

et se mitrent au Conseil, ceulx des **IJ** Chambres, pluseurs du Grant Conseil et de la Chambre des Comptes, furent leues icelles lettres envoïées par le Roy nostre Sire estant à Tours en la presence d'iceulx seigneurs, et icelles leues, fu incontinent commendé à l'un des huissiers de ceans que les portast à monseigneur le Chancelier qui s'estoit hier parti pour aler audit Tours au Roy, et fu ordonné que le graphier escripvist de par le Conseil estant en la Chambre de Parlement, que, veues icelles lettres, lui pleust à retourner à Paris. La teneur desdictes lettres s'ensuist:

De par le Roy. Nos amez et feaulx, nous avons receu vos lettres et veu le contenu d'icelles faisans mention que nostre amé et feal Chancelier, en obtemperant à nos commendemens, s'estoit du tout disposé et apresté de venir par devers nous, ainsy que mandé lui avions. Vous veans que, pour les grans affaires qui chascun jour viennent en nostre bonne ville de Paris, et mesmement pour nostre absence et aussy de ceulx de nostre

sang, il est expedient d'avoir en nostre dicte ville une notable
personne, comme est nostredit Chancellier, à qui l'en
puist

avoir recours, vous estes assemblez, et tous d'un commun accord avez advisié qu' (*sic* :qu) [il] est neccessité et expedient que pour les causes dessusdictes nostredit Chancellier demeure pardelà.

Si nous semble que vous avez très bien advisié, et pour les causes en vos lettres contenues sommes contens et nous plaist que nostredit Chancellier demeure en nostredicte ville, sans ce qu'il en parte point jusques il ait autres nouvelles de nous.

Et pour ce vous mandons que nostredit Chancellier et vous pourveez à toutes les besoignes et affaires qui vous seurvendront par delà, auxquelles vous pourrés bonnement pourveoir en nostre absence; et par especial pourveez bien et diligemment au fait de nostredicte ville, en faisant qu'elle soit et demeure tousjours en nostre bonne et vraye obeyssance, en telle maniere que autre n'y ait auctorité, fors nous à qui seul elle apartient, et que autre dommage ou desplaisir ne puisse venir à nous ne à nostredicte ville, ainsy comme de ces choses nous en avons en vous la confiance. Donné à Tours, le [XVIIIe](#) jour de novembre.

Signé: CHARLES.

A nos amez et feaulx conseillers, les gens de nostre Grant

Conseil, de nostre Parlement et de nostre Chambre des
Comptes
estans à Paris.

Mercredi, [XXVIIIe](#) jour de novembre.

Cedit jour, ont esté en la Chambre du Parlement
maistre Ysembert Martel, sire Mahiu de Linieres,
Jaques d'Ussy, maistres en la Chambre des Comptes
du Roy nostre Sire, le Prevost des Marchans, J. de la
Chappelle, bourgoiz de Paris, et le prevost de Paris, et
ont requiz comme autrefois, que comme les pons de
Paris, rompus et demoliz par les grans eaues et glaces
de l'année passée [CCCC VII](#), eussent esté commencez
à estre refaiz et reparez, et fust l'ouvrage entrelassé et
entrerompu par defaut d'argent, qu'il pleust à la Court
aviser de remede sur ce. Après plusieurs paroles et

opinions diverses, la Court a offert au bien de l'ouvrage et conseillié que l'en praigne mil frans sur les amendes de ceans pour le Roy, qui aussy estoit et est tenuz à faire et refaire lesdiz pons. En après monseigneur Pierre d'Orgemont, evesque de Paris, a offert à donner du sien audit ouvrage **XXX** frans. Puiz ont esté appellez aucuns des advocas de ceans, demourans delay le Petit Pont, qui ont esté admonestez par la Court de y ayder et de exhorter les autres advocas et compaignons de ceans de y aider, qui ont respondu que volentiers le feroient, et tant que l'en s'en deveroit tenir pour contens.

Oultre a esté ordonné que Gautier de Blandecque, huissier ceans et commiz à recevoir **XL** mil frans octroiez au Roy par les marchans frequentans la marchandie de sel es parties de Languedoil sur icelle marchandie, bailleroit audit ouvrage **VJxx** frans, que se dit avoir de reste de ladicte recepte, reaument et de fait. Et quant au surplus demourra la Chambre des Comptes, à qui appartient de veoir et pourveoir au domaine du Roy nostre Sire, auquel appartient la charge de la construction et reparation desdiz pons, comme dit est, chargée de aviser et pourveoir à l'acomplissement de l'ouvrage desdiz pons.

Juesdi, **XXIXe** jour de novembre.

L'evesque de Paris, l'inquisiteur de la foy et le procureur de l'Université requierent maistre Pierre le Gayant, prisonnier ou Chastellet, que dient suspect

d'eresie, et pour ce que se dit avoir appellé ceans,
requierent que die ce que voudra dire.

Hebert Camus, procureur commiz par la Court à
ladicte cause d'appel, dit qu'il n'a peu parler audit
Gayant, ou Chastellet, car il est enfermé et enserré, la
Court a ordonné que le conseil dudit Gayant parlera
à lui.

Samedi, premier jour de décembre.

Pour ce que debas estoit souvant survenu en la Court
sur la maniere de clorre les procès par escript ou
bailliage de Tournay et par especial par devant prevosts
et jurez dudit Tournay et des evangiles;

La Court a au jour d'ui ordonné que aux parties,
lesquelles ou aucune d'icelles ne comparront pas au
jour qui à elles sera assigné à oïr droit, sera prorogué
jour pour tous delaiz au **VIIJe** jour dudit jour autrefois
assigné à oïr droit, auquel **VIIJe** jour, comparens les
parties ou non, sera cloz, seellé et evangélisé le procès,
et pour l'evangile d'un chascun procès pourra pranre le
clerc du registre **IIII** solz parisis tant seulement.

Juesdi, **XIIJe** jour de decembre.

Phelippes de Brebant, bourgeois de Paris, a receu ce
jour la somme de **VJxx** frans ou la cedula de Michaut
de Lalier de ladicte somme, venant des mains Gautier
de Blandecque, huissier de ceans, et laquelle somme
a esté ordonnée à mettre es reparations des pons de

Paris, et pour ceste cause a esté baillée audit Phelippe de Brebant.

Vendredi, **XIIIJe** jour de decembre.

Sur la requeste faicte par l'evesque du Puy le **XXVJe** de novembre derrain passé à l'encontre du Roy nostre Sire et du duc de Berry:

Il sera dit que la Court delivre audit evesque ses biens meubles et lieve la main de son temporel.

1409.

Lundi, **VIIJe** jour de janvier.

Cedit jour, à heure de **X** heures, s'est retraicte la Court au Conseil pour certaines lettres que le grant maistre d'ostel a monstrees à la Court, par lesquelles le Roy lui mandoit qu'il feist commandement à la Court qu'elle ly delivrast Gillette la Merciere, fille de **IX** ans environ, qui estoit en la main de la Court, et en cas de refus que la preist et baillast au duc de Berri, qui s'en disoit avoir la garde en son chastel d'Estampes paravant, et laquelle il voloit marier à un peintre qui ly faisoit besoigne, comme l'en dit, contredisant la mere et justice requerant.

Vendredi, **XVIIJe** jour de janvier.

Cedit jour, messire J. de Fosseux le jeune, chevalier, Phelippe de Fosseux, Phelippe de Fosseux, dit le Borgne, et J. de Fosseux, escuiers, freres, enfans de messire J. de Fosseux, chevalier, et de madame Katerine d'Arly, comparens en personne, ont promiz et chascun d'eulx juré aux Saintes Evangiles touchées et en la main de maistre R. Mauger, president ceans, à ce deputedé de par la Court, que eulx et chascun d'eulx traicter ladicte dame, leur mere, comme dame d'onneur et ne ly meffera, ne ne fera meffaire en quelque maniere que ce soit, à peine de perdre tous ses biens et son corps à la volenté du Roy et de sa Court, et surtout quanqu'il pourroit meffaire envers le Roy et sa Court dessusdiz. Et ce fait, icelle Court leur a baillié icelle dame, leur mere, en garde, et a esté ordonné que commission soit faicte aux bailliz d'Amiens et de Tournay et de chascun d'eulx que facent ledit messire J. de Fosseux, mari, Jaques de Fosseux, son filx, messire Colard de Fosseux et autres que leur facent faire le serment qui mandé leur sera.

Samedi, **XIXe** jour de janvier.

Cedit jour, la Court a receu le procès d'entre les religieux de Saint Cornille de Compiègne, d'une part, et les attornez et gouverneurs d'icelle ville, d'autre part, pour icellui juger, selon la forme des lettres royaulx, veu le plaidoié ou requeste du **XVIIe** de janvier **CCCC VIII** et oye la relation du rapporteur.

Juesdi, derrien jour de janvier.

Colart Grimaut, ramené, a fait certaine requeste par escript contre le procureur du Roy pour cause du pont Saint Michiel, en concluant selon icelle, et dit que par certaines chartres qu'il a devoit le Roy soustenir les fondemens et les faire visiter: sur quoy somma par avant la demolition dudit pont les gens du Roy, mesme que *notorium erat* que ledit pont et edifice de dessus s'avaloit, et si n'y ont point remedié les gens du Roy, dont est desert, pour quoy le Roy en recompensation

welt qu'il puist edifier sur le pont qui y sera fait ou lieu de l'autre, et sur le petit pont de pierre, et ce nonobstant a l'en crié l'edifice du pont, et a esté miz à priz à **IJ** vies, à **XXXIJ** livres de rente sur l'edifice de l'un seul, en prestant argent pour ledit pont refaire, si offre à parfaire ledit pont Saint Michiel de boiz dedans mi-caresme, et cely de pierre dedans **J** mois après Pasques, pour quoy s'oppose que la chose ne soit baillée à autre, et aussi pour **LX** livres que percevoit sur certaines maisons que l'en dit estre abatues par l'auctorité de la Court.

Le procureur du Roy propose et dit au contraire que Michau Laillier et J. Tarenne, qui sont marchans

notables, ont prins ledit pont de St Michiel pour edifier chascun un costé à **XXXIIJ** libvres à **IJ** vies seulement, et si baillent mil libvres à parfaire le pont, et ne reste que à bailler le decret, à quoy partie s'oppose en offrant **VIIJ** libvres de rente seulement que baille. Et à ce que partie dit que le Roy lui a octroyé, etc., n'en est rien, et si ne monstre point de lettre, et *posito* que si elle n'est point verifiée, et si seroit surreptice en pluseurs poins, et s'il a perdu oudit pont, aussi à la Sainte Chappelle plus que Grimaut. Dit oultre que pour la faute de Grimaut qui avoit fait caves ès arches et puiz fort edifice et haut dessus icellui, a corrué le pont par les grans glaces et eaues qui estoient *majoris vis*, à quoy ne pavoit estre remedié; et *posito* que au priz de **VIIIIJ** libvres lui eust esté baillié ledit pont, ne seroit neant au regart de ce que sont les **IJ** marchans, mais seroit *alienare domanium*, et ce fait pourroit estre revoqué, par plus fort raison avant que fait soit, le puet empescher, et se partie a interest, comme dit, *agat cum geminiano*, si conclud que l'opposition de partie n'est recevable au moins valable. Appoinctié que le marchié fait par le Roy et le Grant Conseil auxdiz marchans tendra, et ne fait à recevoir Grimaut, maiz s'il a interest contre le Roy, la Court lui reserve son action, et au Roy ses defenses au contraire.

Mercredi, **VJe** jour de fevrier.

Cedit jour, a esté baillée à J. Le Maçon, commiz de par le Roy à gouverner la terre de P. et de Fucigny, appartenant à dame Marguerite du Commin, une quittance

de **LX** livres parisis par lui paiées à moy N. de Baye, graphier de ceans, à qui ladicte somme estoit assignée pour mes gages, et en laquelle somme ladicte Marguerite a esté condempnée par arrest pour un fol appel, parmi ce que ledit J. Le Maçon a promis de renvoyer une quittance qu'il a de **XXX** livres du receveur des amendes de ladicte Court.

Lundi, **XJe** jour de fevrier.

Gillette, fille de feu Giles Le Mercier, qui à la requeste de Marie du Brueil, nagueres femme dudit feu Gillet, et mere de ladicte Gilette, avoit esté mise en la main du Roy et depuiz en garde de par la Court à maistre Guillaume Le Clerc, conseiller du Roy nostre Sire, du consentement de ladicte Marie a esté baillée et delivrée au Grant maistre d'ostel du Roy, comme en la main de monseigneur le duc de Berry, par ce que ledit Grant maistre a promiz à ladicte Marie, si comme il dit, en bonne foy et par sa loyauté et conscience, que il fera tout son pouvoir et diligence à ce que ladicte fille ne soit mise.

Mercredi, **XIIJe** jour de fevrier.

Sur certain debat qui estoit sur la reception d'une enquête entre maistre Gile de Molins, comme procureur

de pluseurs marchans d'Alemaigne, d'une part, et maistre J. Fourcaut, procureur de messire Clignet de Brebant, nagueres admiral de France, d'autre part, a esté ordonné que ledit Molins requerra demain tel prouffit que voudra au regart de certains defaus ou defaut par lui obtenu ceans contre ledit Clignet, qui dira au contraire ce que voudra et en audience.

Mardi, **XIXe** jour de fevrier.

Ce jour, *adies prophani carniprivii*, et pour ce s'est levée la Court entre **IX** et **X** heures.

Juedi, **XXJe** jour de fevrier.

La Court a ordonné et ordonne que maistre J. du Boiz, receveur des amendes de Parlement, paye des deniers desdictes amendes le parchemin qui sera necessaire pour les registres et autres escriptures d'icelle Court, et le delivre ou face delivrer aux greffiers de ceans de cy au Lendict prouchain, ou jusques à ce autrement soit ordonné sur ce, ou jusques à ce que ceulx qui ont accoustumé de livrer ledit parchemin en livrent, et sans le prejudice dudit receveur et autres qu'il apartendra au temps à avenir.

Mardi, **XXVJe** jour de fevrier.

Cedit jour, a esté ordonné que frere Perceval de Lanay, religieux, soit rendu à son ordinaire, c'est assavoir, à l'abbé de Marremonstier.

Mercredi, **XXVIJe** jour de fevrier.

Ce jour, a esté commendé à Jaques de Buymont, huissier, que les lettres estans en l'ostel me Loiz Blanchet, en la rue St Antoine, arrestées à la requeste de me Oudart Gencian pour J. La Gencienne, sa mere, soient transportées et mises hors dudit hostel en tel et si seur lieu que ledit huissier en sache respondre auxdiz Gencians, Loiz et à la Court.

Juesdi, **XXVIIIJe** jour de fevrier.

Ce jour, a esté plaidoiée une cause criminelle d'entre le procureur du Roy et le Chancelier de France, d'une part, et pluseurs gentilx hommes et vallès que l'en metoit sus qu'il avoient esté et pillié en aucuns de ses hostelx, par le temps que depuiz **IIIJ** ou **V** mois ont couru les gens d'armes en moult grant nombre par le royaume.

Samedi, **IJe** jour de mars.

Cedit jour, le Roy comme autrefois a mandé à la Court que **IJ** des presidens et **VJ** des seigneurs clers et **VJ** des seigneurs laiz de ceans, et aussi le procureur du Roy general et les **IJ** advocas du Roy alassent à Chartres où le Roy estoit, et où les seigneurs du sanc royal et aussy le duc de Bourgoigne et le duc d'Orleans devoient estre à lundi prouchain sur certain accort passer et enteriner, comme l'en dit, sur la mort du feu duc d'Orleans, pere du duc d'Orleans à present.

Samedi, **IXe** jour de mars.

La Court a ordonné que des biens de maistre Loiz Blanchet seront faictes **III** parties, l'une sera pour le vivre de lui, de sa femme et de ses enfans, l'autre pour paier ses creanciers, et la tierce pour soustenir et laborer les heritages, et seront commissaires à ce faire ordonnez, qui de ce qu'averont administré rendront compte à ceulx que la Court ordonnera.

Cedit jour, a esté faicte la paix entre le duc de Bourgoigne, d'une part, et le duc d'Orleans, d'autre part, sur la mort du duc d'Orleans Loiz, pere du duc qui est à present et frere du Roy germain, que ledit duc de Bourgoigne avoit fait tuer en la ville de Paris, comme est contenu ou registre de novembre **CCCC VII**; à laquelle paix faire en la presence du Roy en l'eglise de Chartres, presens, comme l'en dit, la Royne, monseigneur

le Dauphin, les roiz de Navarre, de Jherusalem, les ducs de Berry, de Bourbon, de Hollande et plusieurs autres seigneurs, barons, **IJ** des presidens et **XIJ** des seigneurs de ceans, le procureur du Roy general et les **IJ** advocas du Roy et plusieurs autres.

Dimenche, **XVIJe** jour de mars. *Curia vacat.*

Ce jour, le Roy nostre Sire, qui par environ **V** mois et demi avoit esté absens et hors de Paris, est retourné et entré à Paris, environ **V** heures après midi, à moult grande compaignie, c'est assavoir des roiz de Sicile et

de Navarre, ses cousins germains, les cardinaux de Bar, son cousin germain, le cardinal de Bordeaulx et d'Espagne, les ducs de Berry, de Bourgoigne, de Hollande et plusieurs autres grans seigneurs, contes, barons, chevaliers et autres gentilx hommes, et lui sont alé au devant les bourgoiz de Paris, les presidens et les seigneurs de ceans, *in majori numero*, et a l'en crié Noë par toutes les rues où a passé. Et aussy au soyr l'en a fait par les rues publiquement feus en signe de joye et de leesse pour la revenue dudit seigneur.

Maistre Guillaume Guerin, maistre des Requestes de l'Ostel de monseigneur de Berri, s'est opposé et oppose à ce que aucun ne soit receu ou lieu de maistre Geffroy de Pompadour, nagueres conseiller du Roy ceans sans le oïr.

Samedi, **XXIIJe** jour de mars.

Sur certaine cause meue et ouverte le **Ve** jour de fevrier derrien passé entre Giles d'Auffay, appellant du prevost et eschevins de l'Isle, d'une part, et les duc de Bourgoigne, prevost et eschevins dessusdiz, appelez, intimé, d'autre part, accordé a esté entre lesdictes parties, moiennant lettre de congié du Roy nostre Sire, selon ce que est contenu en la cedula qui est devers la Court, et pour ce que ledit appellant à sa cause d'appel proposer requeroit provision que

pendent l'appel joist de l'abitation d'icelle ville de l'Isle, attendu que, veu que de ce que lesdiz prevost et eschevins l'avoient banni à III ans de ladicte ville, dont avoit appellé, par quoy pendent l'appel devoit joir d'icelle habitation, de quoy par ledit accort ne lui estoit point pourveu, car combien que par icellui accort l'appellation fust mise au neant, toutevoie n'estoit pas ce dont avoit esté appellé mis au neant, pourquoy maistre Henry de Toisy, advocat desdiz appelez, interrogué sur ce, a juré en sa conscience que lesdiz appellans font autant pour ledit appellant, comme se ce dont a esté appellé fust mis au neant.

Juesdi, XXVII^e jour de mars.

Cedit jour, messire J. de Craon, seigneur de Dompmars, Mahiu de Roye, sr de Muret, J. de Roboiz, sr de Roboiz, Sarrazin d'Arly, sr du Quesnoy, Guillaume de Trye, sr de Plainville, Rolant de Wiquarque, sr de Harque, Gasselin du Boiz, sr de Rainseval, et le seigneur de la Hamade, tous chevaliers, et aussy Rasse de Montcaverel, escuier, sr de Bonnecourt, tous amis charnelx et parens de damoiselle Jehanne et Jaqueline, mineurs d'ans, filles de feu noble messire Robert de Bethune, jadiz chevalier et viconte de Meaulx, et de madame Ysabel de Guistelle, sa femme, ont esleu et nommé à estre tuteurs desdiz enfans mineurs lesdiz

messire J. de Craon, cousin germain desdictes damoiselles,
et Mahiu de Roye, cousin remué de germain d'icelles damoiselles, lequelx ainsy nommez *primo juramento* ont fait le serment acoustumé. Lettre à Disy. Samedi, penultieme jour de mars.

Sur certaine requeste faicte par Turribieu Ferrandes, portugaloiz, d'une part, et pluseurs habitans de la Rochelle, d'autre part, sur ce que ledit Turribieu demandoit pour faire l'enqueste commissaire d'Espagne ou de Portugal, appointié est que lesdictes parties auront en commissaire un François, et se ledit Turribieu pour les Portugaloiz wellent avoir adjoint aucun autre que du païz de France, avoir le pourront. Mardi, **IJe** jour d'avril.

Cedit jour, messire Baugoiz d'Arly et messire Sarrazin d'Arly, chevaliers, freres, ont au jour d'ui fait serment **[sur]** les Sains évangiles touchez en la Court que bien et loyaument ayderont, garderont et conforteront madame de Fosseux, leur niepce. Au jour d'ui, le conte de Saint Pol est venu ceans

et a juré qu'il ne scet point de plus convenable à avoir la curation de Robert de Bar, pour passer certain accort et tracter de l'accort d'entre lui et monseigneur le marquiz, que sont messeigneurs les conte de Clermont, ou de la Marche, ou de Vendosme, ou l'evesque de Laon, ce a dit pour ce qu'il se welt partir, et ne pourra par aventure venir avec les autres seigneurs qui devront venir ceans pour ordonner curateur à ce que dit est.

Juedi, [XJe](#) jour d'avril.

Cedit jour, messire le cardinal de Bar, Loiz, duc en Baviere, frere de la Royne, le conte de la Marche, Charles de Lebret, connestable de France, et l'evesque de Laon et autres parens et amiz charnelx de monseigneur

le marquiz du Pont, filz du duc de Bar, et de Robert de Bar, filx de feu messire Henry de Bar, ainsné filz dudit duc de Bar, ont fait ceans proposer que pour ce que ou duchié de Bar representation a lieu, et par ce pourroit pretendre ledit Robert qui est filx du feu ainsné filz de Bar, comme dit est, avoir droit oudit

duchié de Bar à l'encontre dudit marquiz qui est filz dudit duc, qui pourroit soustenir au contraire, et pourroit avoir debat entre iceulx amiz, pour lequel eschiver, ledit duc avoit avisié certaine ordonnance ou accort, lequel a monstré aux parties, auxquelles et à leurs amis a esté assés agreable. Si a esté passé ledit accort ou Chastellet de Paris, mais plus grant solennité ont avisié de passer ledit accort ceans, et pour ce que à icellui passer sont necessaires curateurs, si ont nommé lesdiz amiz pour curateurs lesdiz connestable et evesque de Laon, en jurant en leurs consciences que lesdiz connestable et Laon estoient bons et convenables

à estre curateurs pour passer ledit accort. Et pour ce ont esté iceulx connestable et evesque de Laon ordonnez curateurs à passer ledit accort, et ont fait le serment acoustumé. Ce fait, ont requiz à la Court ledit accort estre receu, et estre condempnez par arrest à tenir ledit accort; lequel la Court a receu et à le tenir a condempné icelle Court les parties par arrest.

Vendredi, [XIIe](#) jour d'avril.

Cedit jour, a ordonné la Court, oye la relation des commissaires, que maistre Nycole de Biencourt, ordonné à executer l'arrest obtenu par le doien de Meaulx à l'encontre du chapitre dudit Meaulx, savera

la verité des reparations à faire en l'ostel dudit doien et en certain jardin que tient de l'eglise dessusdicte, se elles sont bien et suffisaument faictes, et si les trueve bien et suffisaument faictes, fera faire satisfaction audit doien de sediz frais par lui gaigniez, fors tant que s'il y avoit aucune chose à parfaire, il feroit retenir jusques à la somme que ce monteroit pour les parfaire, ou que autrement en fust ordonné, et en tant que touche les distributions, ledit commissaire savra aussi quelles il a gaignié et doit gagner, et lui fera bailler ce qu'il appartendra, et se en aucune chose il face doubte, raportera à la Court qui y pourvera. Item, ordonné est que J. Guiart exercera l'office de prevost à Nogent le Roy pendent le procès et jusques à ce que autrement en soit ordonné.

Mercredi, **XXIII**e jour d'avril.

Cedit jour, a esté receu maistre Guillaume Guerin ou lieu de maistre Geffroy de Pompadour, jadiz conseiller ceans en la Chambre des Comptes, de nouvel esleu en evesque de Saint Pons, et a fait le serment acoustumé, et lui a enjoint la Court *in vim juramenti* qu'il face ceans residence, et telle est l'entention de la Court que residera et qu'il ne reçoive don ne pension d'autre que du Roy.

Lundi, **XXIXe** jour d'avril.

La Court a ordonné que la main du Roy mise au chastel et revenue de Baiz soit levée, ou cas que le conte de Valentinoiz donra caution bourgoise de la somme de **XIIc** frans pour laquelle icelle main y estoit mise.

Vendredi, **IIJe** jour de may.

Sur ce que le duc de Berry avoit requiz l'enterinement de certaines lettres de don de **VJc** livres de rente sur les terres de Pons de Cardilhac qui estoient confisquées, la Court a dit que lesdictes lettres ne seront point enterinées.

Item, pareillement a dit et deliberé la Court que à certaines lettres impetrées par Guillaume de Martel, savoisien, du Roy dauphin, que peust tenir le chastel de Saint Laurent du Pont et de Meysiat, qui sont situez es frontieres dudit Dauphiné, et que le Roy le receust à foy et homage d'icelx parmi certaine somme d'argent, nonobstant certain procès à occasion et cause desdiz chasteaulx que l'en disoit commiz aux Roy Dauphin,

et opposition du procureur fiscal dudit Roy Dauphin, ne sera point obtemperé.

Item, pareillement a dit et deliberé la Court qu'il ne

sera point obtemperé à certaines lettres royaulx
obtenues
par messire Pierre de Navarre, qu'il tiegne sa
conté de Mortaing et ses autres terres de Normandie
en parrie.

Juedi, [IXe](#) jour de may.

Sur ce que Thomas Poignant requiert le renvoy de
certeinne cause à l'Eschequier de Rouen à l'encontre
des Chartreux de Rouen, pour cause de ce que les
heritages dont est question sont assiz en Normandie,
et pour autres causes contenues en ses lettres, lesdiz
Chartreux disans au contraire que Thomas Poignant
est grant et puissans au païz, et n'oseroient les advocas
du païz rien dire ne faire contre lui, et pour autres causes
contenues en leur impetration. Appointié au Conseil.
La Court a mis hors de procès maistre Nycolas Le
Sage, promoteur de l'evesque de Paris, J. Queran et
Mahiet de Louvaincourt, notaires apostoliques, qui
estoient ceans en procès contre le procureur du Roy,
pour ce que jà pieça ledit promoteur ala ou Chastellet
pour interroguer Guiselin de Rebrevs qui y estoit
prisonnier sur certains cas qui touchoient le fait de
l'emprisonnement de maistre Jaques de L'Espoise, et
avoit mené avec lui lesdiz notaires pour oïr la confession
dudit Guiselin, et d'icelle leur en requist ledit promoteur
avoir instrument, et pour ce furent miz en
prison.

Vendredi, **Xe** jour de may.

Sur le procès des executeurs de la feu femme de J. Petit de Chastillon, d'une part, et J. Petit de Chastillon et autres, d'autre, maistre Tiebaut Tiessart, interrogué en la Court, a dit que fu à visiter le procès avec maistres Guillaume de Villiers, Junien Le Fevre, Estienne Geffron, Simon Beson, J. de la Marche, et après ce que fu visité et que les dessusdz eurent dit leurs oppinions, fu dit et conclu que on trouveroit expedient de mettre les parties d'accord, dont l'en parla aux dictes parties, lesquelles ne furent pas d'accord, et pour ce depuis, c'est assavoir **XV** jours ou **J** mois lesdiz Geffron et Beson prononcerent leur sentence,

à laquelle ne fu point ledit Tiessart.

Samedi, derrien jour de may, au Conseil.

Les executeurs de feu maistre J. Gilet et ses amis requierent contre les gens du Roy et l'evesque de Paris, que comme ledit Gilet, *afflictione et fervore demencie et furie se ipsum jugulaverit*, dont mors après s'ensuit, et avant ce ait fait son testament et ait crié mercy à Die devotement et religieusement, et en ce estat ait finé ses jours, et neantmoins ses biens et son corps soit empeschié d'estre inhumé, combien que de raison ledit fait *non debeat imputari defuncto, quia satis furore suo puniebatur*, que l'empeschement soit osté et s'opposent que le corps ne soit rendu à l'evesque.

L'evesque defent et dit que par ledit fait Gilet fu excommunié, dont la cognoissance lui appartient, mesme qu'il estoit clerc, prestre et chanoine, que a si grandement delinqué, et combien que le corps soit

arresté par les gens du Roy, toutevoie, *posito* que de l'arrest ne cogneust pas, toute voie de l'excommeniement deveroit cognoistre, car pour la jurisdiction de son eglise *certat*, non pas pour les biens.

Tandem, à

la supplication et requeste des executeurs et amis et aussi du doien de Saint Germain, qui est curé des chanoines

dudit S. Germain et qui estoit curé dudit Gilet, chanoine en sa vie dudit S. Germain, et que aussi ont requiz le benefice d'absolution dudit evesque, *si et in quantum indigebat* ledit Gilet, et par la permission et auctorité dudit evesque et sans le prejudice desdictes parties, a esté dit que ledit Gilet sera enterré en terre sainte.

Samedi, **VIIJe** jour de juin.

Hac die, telo interfectus est dominus Guydo de Roya, archiepiscopus Remensis, cum aliquibus suis familiaribus, in villa de Voutre prope Januam, eundo ad Consilium Pisanum pro unione Ecclesie celebratum, a nonnullis plebeiis ejusdem ville, in commotione

habita inter quemdam habitatorem dicte ville, et
fabrum seu marescallum ejusdem archiepiscopi,
occasione **IIII** vel **VJ** denariorum, ut referebatur./
Juesdi, **XXe** jour de juin.

Ce jour, a esté dit au graphier qu'il enregistrast certaine
provision de **XL** escus à maistre Robert Chambellant,
cordelier d'Angleterre et maistre en theologie,
en certain procès pendent entre lui, d'une part, et
messire J. de Cayeu, chevalier, d'autre part.

Vendredi, **XXJe** jour de juin.

Au jour d'ui, ont esté commiz, du consentement de
maistre Hebert Camus, procureur du duc d'Orleans,
d'une part, et de maistre Race Pannier, procureur du
conte de Nevers, d'autre part, les seigneurs cy dessoubz
nommez à la garde des chasteaulx qui s'ensuivent:
c'est assavoir, le sire d'Auffemont, à la garde
du chastel de Coucy; le sire de Sarny, à la garde du
chastel d'Acy, et messire Yvain de Cramaille, pour le
Chastellier. Et ou cas que le seigneur d'Auffemont ne
s'en voudroit charger, lesdiz de Cramaille est commiz
pour Coucy, Sarny pour Acy et Gile de Camely, dit
Loussere, pour le Chastellier.

A conseiller l'arrest sur certains erreurs receuz par

les maistres des Requestes de l'Ostel du Roy à juger ceans sur certain jugié de la Chambre des Enquestes d'entre Perrette La Gargoule, d'une part, et Jehanne La Fovette, d'autre part, sur quoy en divers temps et par pluseurs et diverses journées avoient esté assamblé le Conseil tant des Chambres de ceans que de pluseurs du Grant Conseil, et jusques à cy l'en n'avoit peu venir à conclusion pour la diversité des oppinions, desquelles les aucunes et jusques au nombre de **XXIII** de pluseurs de grant auctorité estoient que simplement avoit erreur ou dit jugement qui avoit renversé la sentence du prevost de Paris au proufit de ladicte Fovette qui estoit demanderesse, en quoy avoit erreur, comme disoient. Les autres en nombre d'environ **IX** estoient que simplement ou dit jugement n'avoit point d'erreur; **III** autres estoient que il n'y avoit point d'erreur, et, se ce ne passoit, estoient à expedient que chascune des **II** parties eust la moitié des choses contentieuses; **IX** autres avoient esté d'oppinion de pranre ledit expedient, autrement que l'en deist que ou dit jugement n'avoit point d'erreur et qu'il avoit esté ceans bien jugé; **V** autres venoient simplement et absolument audit expediens; un autre et seul estoit que ou dit jugement avoit eu erreur et aussi ou jugement du prevost de Paris, et que en corrigan ledit erreur fust dit que chascune desdictes parties averoit la moitié des choses contentieuses. Et pour ce que l'en ne pavoit venir à conclusion et par especial, car par avant ceste journée, combien que le plus grant nombre des oppinions se revenoit bien et s'accordoit que par jugement fust dit ou par arrest que chascune des parties eust la moitié, toutevoie n'estoient pas d'accort que l'en usast

de ce mot erreur, c'est assavoir que oudit jugement eust eu erreur, mais que la Court ordonnoit que chascune desdictes parties averoit la moitié. Finablement, après pluseurs journées, et que aucuns des seigneurs de ceans et le graphier eussent essayé, chascun en son endroit, d'accorder les parties, ce que n'avoient peu faire, ce que avoient essayé pour eschiver la difficulté dessusdicte et l'empeschement de la Court, pour la continuele poursuite de la partie qui avoit proposé erreur, ont les dessusdiz esté au jour d'ui assemblé, et tout veu et tout considéré, et mesme que c'est honneur de soy corriger en sa faute ou erreur, comme mesme dit raison, a esté conclu, pour ce que la plus grant partie de trop a esté d'opinion que: Il sera dit que ou jugement de la Court a eu erreur, et en corrigan icellui la Court dit que chascune desdictes parties sera maintenue et gardée es possession et saisine de la moitié des heritages contentieus entre icelles parties, et seront restituez à ladicte defenderesse les fruis perceuz par ladicte demanderesse pour la moitié desdiz heritages, et compense icelle Court les despens fais *hinc inde* par devant le prevost de Paris, et s'aucuns en a receus ladicte demenderesse d'icelle defenderesse, elle sera tenue de les lui restituer, et delivre la Court la caution baillée par la defenderesse pour la somme de **VJxx** libvres.

Mardi, [XXVe](#) jour de juin.

Sur certain debat pendent ceans entre l'arcevesque de Reins, d'une part, et l'Université de Paris et maistre Henry de Savoisy, commiz à recevoir certain disieme ou demi disieme miz sus en France pour la prosecution de l'union de Sainte Eglise, duquel ne voloit paier ledit arcevesque, ou au moins pendent le debat avoit consigné au change à Paris la somme de [VJxx](#) livres, appointié est, et du consentement du procureur dudit arcevesque, que la main du Roy mise au temporel dudit arcevesque sera et est levée, sans prejudice de l'obligation faicte sur ce que dit est, et sera la somme de cent livres tournois reaument baillée par provision audit receveur, et demourra en l'estat le residu qui est au change, et au surplus, pour ce que les gens dudit arcevesque se ventoient d'une bulle de reduction du tax des benefices et par especial de son arceveschié, la Court verra icelle bulle, et aussy des despens faiz en la poursuite et execution dudit demi disieme contre l'arcevesque, au Conseil, dont lettre. Venredi, [XXVIIJe](#) jour de juin.

Hier, en jugement fu requisite distribution de conseil pour l'Université de Paris contre maistre J. André, conseiller du Roy ceans, qui respondi que ne voloit ne n'estoit besoin qu'il plaidast ceans contre ladicte Université,

veu que pour la cause dont icelle Université requeroit distribution, lui estoient donnez en l'Université et par icelle deputez, neantmoins puiz qu'il plaisoit à icelle Université pranre distribution contre lui, la pranroit, et ce a requiz estre enregistré, et a esté au jour d'ui escript pour ce que il estoit omis du jour d'ier.

Mercredi, **Xe** jour de juillet.

Maistre Pierre Solas, procureur de l'evesque de Paris, se consent et accorde que tous les biens meubles de feu maistre J. Gilet soient vendus par N. de Baye, graphier de Parlement, et l'argent qui vendra de la vendition d'iceulx biens soit mis et arresté en la main du Roy, jusques à ce que autrement en soit ordonné au proufit de qui il appartendra, et sans prejudice des parties, et ce aussi a consenti le procureur du Roy.

Juesdi, **XJe** jour de juillet.

Cedit jour, maistre J. de Havencourt, advocat ceans et bailli de l'evesque de Paris, maistre Robert Lijote, notaire du Roy, et Guillaume de Biaiz, soy disans executeurs

du testament dudit evesque, et familiers et amis dudit evesque, ont protesté que certain accort pourparlé et avisié entre ledit evesque, d'une part, et chapitre de Paris, d'autre part, doit estre apporté ceans pour estre receu, ne porte prejudice audit evesque ou à ses drois, non obstant le consentement de lui ou de son procureur, car pour crainte et paeur de ce que ceulx de chapitre avoient dit et menassé, ou aucuns d'eulx, de faire mettre le corps dudit evesque, qui

estoit moult griefment malade au lit, en terre profane
comme excommunié, pour ce qu'il avoit trait
hors de l'eglise de Nostre Dame de Paris aucuns
prisonniers
qui estoient eschappés de ses prisons, comme
l'en disoit, sur quoy estoit procès ceans, à occasion
desquelles choses leur faloit, pour obvier à esclande et
inconveniens, passer ledit accort, si requeroient que
ce fust enregistré.
Cedit jour, s'est levée la Court à **VIIJ** heures et sont
alez les seigneurs, les advocas et procureurs à la
procession
general qui a esté faicte à Sainte Genevieve
pour les nouvelles que dimanche au soir avoit receu
le Roy et la Court le lundi ensuivant, entre **VJ** et **VIJ**
au matin, de l'election du pape Alexandre Quint, par

avant nommé maistre Pierre de Candia, maistre en theologie à Paris, de l'ordre des Freres Mineurs, et cardinal nommé de Milan de l'autre obeyssance, dont a esté faicte lundi derrien passé et au jour d'ui moult grant feste en Crestienté et par especial à Paris, et non pas sans cause, pour ce que par **XXX** ou **XXXJ** an avoit duré le scisme entre **IJ** contendens du papat, si a esté des cardinaulx des **IJ** obeyssances esleu icellui Alexandre; les **IJ** contendans, c'est assavoir, Angelus Corrarior, nommé Grigoire, pape de Romme par dela, et Pierre de Lune, nommé Benedict, pape de Romme par dessa, contumax, declarez pertinax scismatiques et heretiques, et degradez de toute honneur et dignité par le Conseil general estant à Pise, où a esté faicte ladicte election, *non sine divine providentie spiraminis ministerio*, et fu faicte ladicte election le **XXVJe** de juin derrain passé, comme portoient les lettres qui en sont venues.

Vendredi, **XIJe** jour de juillet.

Maistre Phelippe des Essars, arcediacre de Suessons, s'est opposé et oppose que maistre N. Le Sage ne soit point receu à l'office de maistre des Requestes de l'Ostel que tenoit maistre Guillaume Boisratier sans le oir.

Mardi, **XVJe** jour de juillet.

Cedit jour, monseigneur Pierre d'Orgemont, filz de messire Pierre d'Orgemont, jadiz chancellier de France, conseiller du Roy et evesque de Paris, après ce qu'il a vescu evesque par **XXVJ** ans ou environ, est au jour d'ui alé de vie à trespas en son aage de **LXVI** ans ou environ.

Et cedit jour, messire Loiz, duc en Baviere, frere de la Royne, le grant maistre d'ostel du Roy et autres ont affermé à la Court que le Roy en plain Conseil a dit et ordonné que nul autre ne soit receu à l'office de maistre des Requestes de l'Ostel du Roy, que tenoit messire Guillaume Boisratier, que maistre Raoul Le Sage, aussi pareillement est ce l'entention de la Royne, comme lesdiz seigneurs ont dit.

Mercredi, **XVIIe** jour de juillet, au Conseil.

Cedit jour, la Court a commiz maistre J. de Havencourt, advocat ceans, à exercer l'office de bailli du Four l'Evesque pendent la regale et de nommer officiers à exercer la justice dudit Four, telx qu'il appartendra.

La Court a donné delay à maistre Phelippe des Essars à demain venir ceans dire les causes de son opposition à l'encontre de maistre Raoul Le Sage, pour cause de l'office de maistre des Requestes de l'Ostel, que tenoit maistre Guillaume Boisratier, et, se ledit des Essars ne vient audit jour, la Court fera l'estat audit Le Sage.

Juedi, **XVIIJe** jour de juillet.

Cedit jour, à **VIII** heures, s'est levée la Court pour aler aux exeques de l'evesque de Paris, nagueres trespasé.

Mercredi, **XXIIIJe** jour de juillet.

Cedit jour, a esté rendu un sac seillé qui estoit devers la Court, où avoit finance appartenent à l'execution de feu maistre J. Trucan, aux executeurs d'icellui evesque, c'est assavoir, à maistre Denis de Baumes, J. Duchesne et Richart Heust.

Vendredi, **XXVJe** jour de juillet.

Cedit jour, a esté appointié en la Tournelle Criminele après disner par messire H. de Marle, premier president, (*presentibus* m. P. Lefevre, J. Garitel, R.

Broisset), que mons. d'Auffemont, lequel a esté commiz et esleu à la garde du chastel de Coucy, mettra oudit chastel pour la garde d'icellui **XXIIII** personnes, dont l'un sera lieutenant dudit d'Auffemont, et y avera desdiz **XXIIII** tant de gentilx hommes que ledit d'Aufemont

ordonnera sans prejudice du duc d'Orleans ne du conte de Nevers, et jusques à ce que les partages soient fais entre lesdiz seigneurs, ou que par la Court en soit autrement ordonné. Et pour marchander auxdictes personnes de leurs gages aura un homme de par ledit monseigneur d'Orleans et un autre de par ledit monseigneur de Nevers, et se pranront lesdiz gages sur les revenues communes de la terre de Coucy. Et messire Yvain de Cramailles aura la garde d'Acy, à **XL** frans de gages pour moiz, et monseigneur de Cerny la garde du Chastellier, à **XX** frans pour moiz, et garderont

lesdiz chasteaux d'Acy et du Chastellier bien et suffisaument, et ainsi l'ont promis et juré, et semblablement

a fait ledit d'Auffemont dudit chastel de Coucy. Et se aucun desdiz seigneurs d'Orleans et de Nevers voloit aler en aucun desdiz lieux, il y pourra entrer, lui **Xe**, après le serment par eulx fait de non y faire aucune violence.

Samedi, **XXVIJe** jour de juillet.

Cedit jour, pour ce que le Roy estans à Chartres

manda, environ quaresme, **XIJ** des seigneurs de ceans et son procureur general et ses **IJ** advocat, qui furent audit Chartres ou à l'environ par aucuns jours, et depuis pour leur salaire ou gages furent assignez sur les amendes de ceans, dont ancores n'estoient pas payé, a esté dit et ordonné que des deniers desdictes amendes ne sera distribué ailleurs nulle part, jusques à ce que de leurs diz gages et salaire il soient parpayez. Mercredi, derrien jour de juillet.

Item (à conseiller l'arrest) d'entre les teinturiers de St Deniz en France, d'une part, et les habitans et drapiers dudit St Deniz, d'autre part, sur le plaidoié du **XXVIJe** de juillet **CCCC IX**, après disner, et tout veu; Il sera dit que l'ordonnance faicte par le bailly de Saint Deniz, en tant qui touche les teintures d'escailles de nois, de racines et d'escorces, tendra et vaudra, et au surplus ce qui a esté fait la Court tient pour non avenu, et useront lesdiz teinturiers, drapiers, foulons, tisserans et habitans dudit S. Deniz, comme ilz faisoient paravant, selon leurs ordonnances anciennes, jusques à ce que par la Court en soit autrement pourveu, et feront les parties articles sur les fraudes pretendues *hinc inde et super commodo et incommodo*, et la verité enquire et raportée, la Court fera ce qu'il appartendra.

Samedi, **IIJe** jour d'aoust.

Cedit jour, le procureur du Roy a dit ceans au Conseil que du debat qui estoit entre lui, d'une part, et messire Pierre d'Orgemont, nagueres evesque de Paris, sur les biens demourés du decès de maistre J. Gilet, notaire du Roy ceans, et lequel *pre dolore furie* s'estoit

navré, dont mort s'estoit ensuye po après, se rapportoit à la Court.

Pareillement ont relaté à la Court messire H. de Marle et Ja. de Ruilly qu'il avoient oy dire audit evesque, en la fin de ses jours, que dudit cas se rapportoit à la discretion d'icelle Court,*idem* a relaté

maistre J. de Havencourt, executeur dudit evesque.

Lundi, **Ve** jour d'aoust.

Cedit jour, Nycolas Romain, huissier ceans, a relaté au registre que maistre Nycolas d'Orgemont, frere et executeur de feu messire Pierre d'Orgemont, jadiz evesque de Paris, lui avoit dit que du debat pendent ceans entre ledit evesque, d'une part, et le procureur du Roy, d'autre part, pour les biens demourez du decès de maistre J. Gilet, notaire du Roy ceans, se rapportoient les executeurs dudit evesque à la discretion de la Court et metoient ladicte besoigne du tout ou giron d'icelle Court.

Mercredi, **VIJe** jour d'aoust.

Ce jour, sur le debat mis par le procureur du Roy et messire Pierre d'Orgemont, nagueres evesque de Paris, aux biens de l'execution de feu maistre J. Gilet, notaire du Roy ceans, pour l'occasion de ce que s'estoit blessié et navré, dont mort estoit ensuye, par la maladie qu'il avoit *de furia*, duquel debat les executeurs

dudit evesque et ledit procureur du Roy s'estoient rapporté et soubmiz à la Court, comme appert du registre des Plaidoiries du **Ve** et **IIJe** de ce mois, la Court a osté et oste l'empeschement miz auxdiz biens.

Juedi, **VIIJe** jour d'aoust.

Cedit jour, s'est levée la Court à **VIII** heures pour aler aux exeques de messire Phelippe de Molins, evesque de Noyon, qui est trespasé puiz huit jours, aagié de **IIIJxx** ans et plus, et reputé sage.

Vendredi, **XVJe** jour d'aoust.

Le conte de Nevers, frere du duc de Bourgoigne, accompagné de messire Pierre de Nevers et de plusieurs

autres barons et chevaliers et autres gentilz homme, a fait proposer que nagueres lui venu à Paris a entendu que rumeur estoit qu'il avoit fait pendre et estrangler un sergent royal, qui l'avoit adjorné en son chastel de Retest à comparoir ceans sur la propriété de la terre de Coucy et sa femme, appellé Forget, qui avoit esté pendu ou trouvé pendu ou chemin en revenant, et avoient esté trouvées les lettres royaulx dessirées soubz les piez dudit pendu. Si dit que tout son temps a volu honorer Dieu, ses sains, justice et le Roy, et quant au cas, averoit plus chier estre mort que avoir fait un tel cas, *nec est verissimile* qu'il eust fait ne fait faire, car il lui fit et fit faire bonne chiere en lui offrant argent, pour quoy requiert la Court, qui est moult sage en telx et autres cas et qui trop bien et sagement scet trouver la verité de telx cas, supplie qu'elle mette et weille mettre peine à attaindre ledit cas, à ce par especial que tel rumeur cesse, et soit sceue la verité, afin que sa bonne renommée ne soit denigrée, laquelle doit avoir plus chier selon raison escripte, et quant à lui il offre or, argent, soy et ses gens à poursuivre et ayder à poursuivre, afin que la verité soit atteinte. Sur quoy la Court a respondu et dit que ledit cas est un des mauvais cas qui pieça avenist ou royaume et de très mauvais exemple, et ne croioit pas la Court, ne ne croit que ledit conte eust volu faire ne perpetrer si mauvais et si dampnable cas, attendu le sanc et linage dont est le conte descendu, et mesme que le feu duc de Bourgoigne, son pere, avoit tousjours reveré le Roy et ses officiers en tous cas, et à fin de justice et d'estaindre ladicte souspecion, s'aucune estoit ou est contre ledit conte, et pour l'onneur du Roy et de

sa Court, lui a requiz la Court et à ceulx de sa compaignie qu'il ayde et mette peine de savoir et trouver et d'atteindre la verité dudit cas, à quoy derechief icellui conte s'est offert.

Mardi, [XXe](#) jour d'aoust.

Cedit jour, fenient les Plaidoiries, qui avoient esté proroguées depuis mercredi derrien passé, lequel jour devoient fenir, pour ce qu'il a esté ordonné que l'en iroit tenir les Grans Jours à Troyes, et vendredi prouchain fenira du tout le Parlement.

Et le mardi ensuivant je parti pour y aler.

Lundi, [XXVIe](#) jour d'aoust.

Ce jour, fut dit et appointé par la Court que les lettres et papiers estans par devers la Court touchant les consuls et habitans de Rabastains et le procureur du Roy seroient restituées et rendues aux diz habitans, excepté le procès ouquel sont les informations, duquel, sans l'information, iceulx habitans auroient la copie, se bon leur sembloit.

Dimanche, premier jour de septembre [CCCC IX](#).

A l'eure quarte après midi ou environ, dominus

Jacobus de Ruilly, miles, et Robertus Maugerii,
presidentes

ordinati pro dictis Diebus, cum aliis nonnullis de
dominis et magistris Parlamenti regii, obviantibus
sibi quamplurimis, episcopo Trecensi et aliis ecclesiasticis
ac burgensibus, civitatem hanc Trecensem
intraverunt, pulsata campana grossa belfredi per
longum temporis intervallum.

Lundi, **IJe** jour, circa horam sextam de mane, congregatis
predictis dominis presidentibus et consiliariis
in capella palatii Trecensis, celebrata fuit missa de
Sancto Spiritu cum cantu et discantu, deinde eisdem
dominis in camera Dierum, hostio clauso, segregatis,
nonnullis ipsis supplicationes porrecte expedite
fuerunt, ac ordinatum extitit, quod, hac et crastina
diebus, reciperentur presentationes partium causas
ad hos dies habentium; insuper receptus fuit abbas
monasterii Celle in consiliarium presentium Dierum,
virtute quarundam regiarum litterarum, ac solitum
prestitit juramentum./

Mercredi, **IIIJe** jour de septembre.

Cedit jour, maistre J. de Lintelles, lieutenant du
bailli de Vitri, et le procureur du Roy audit Vitri ont
exposé à la Court pluseurs cas, crimes et delicts
commiz et perpetrez ou bailliage de Vitri par pluseurs
grans seigneurs et autres, et autres cas touchans le
Roy et sa justice, en baillant pluseurs informations
afin de faire sur ce provision; sur aucuns desquelx ont
esté appellez les bailli de Chaumont et le procureur
du Roy audit lieu, pour aviser la maniere de faire
pranre aucuns des maufauteurs par bonne maniere et

caute, car par lesdiz maufauteurs avenoient et povoient avenir pluseurs grans perilx ou paiz de Champaigne, non plus,*quoad specialiora, ut secretius teneatur, et quia registrum criminalium tangit.*

La Court a ordonné que les clers des bailliages de Provins, de Chasteltiéri et de Meaux feront apporter certains procès à leurs propres despens dont les noms seront baillez à Cessières qui en fera les lettres.

Vendredi, **VJe** jour de septembre.

Cedit jour, ont esté au Conseil les bailly et procureur du Roy à Chaumont sur plusieurs entreprises faictes par les ducs de Bourgoigne et de Bar et autres ou bailliage de Chaumont, et sur plusieurs autres excès et delits dont il ont présenté à la Court les informations au graiphe criminel.

Vendredi, **IIIJe** jour d'octobre, au Conseil.

Cedit jour et par aucuns precedens, se sont continuées nouvelles que Jannes qui apartenoit au Roy et où avoit mis pour gouverneur messire J. Le Meingre, dit Bouciquaut, mareschal de France, et qui avoit gouverné pour le Roy les Jannenois en grant justice, comme l'en dit, a esté prise puis un peu par le marquiz de Montferrat et un capitaine de Lombardie appelé Faicinquant, qui ont decopé et de jour en jour occient les François que truevent, comme l'en dit.

Mardi, **VIII^e** jour d'octobre.

Cedit jour, avant le jour est alé de vie à trespas à Troyes, en l'ostel où estoit logiez devant le cimetièrre de Nostre Dame aux Nonnains, messire Jaques de Ruilly, president en Parlement, fait chevalier puis **IIII** ans à l'execution de viconte de Murat contre messire Pons de Cardilhac pour la ville et chastel et viconté de Murat obtenuz en Parlement par ledit viconte contre ledit de Cardilhac par arrest. Diex ait son ame.

Juedi, **XVI^e** jour d'octobre.

Furent au Conseil après disner les dessus diz, hors maistre R. Mauger, president, qui a tenu les Plaidoiries des Requestes, pour ce que l'en ne plaidera pas demain.

Vendredi, **XVII^e** jour d'octobre. *Festum beati Evangeliste Luce Curia*, quant à Conseil ordinaire, *vacat*.

Cedit jour, furent au Conseil en la Chambre tous les seigneurs, et avecques eulx l'evesque de Troyes, l'abbé de Monstier la Celle, le procureur du Roy general, me J. Jouvenel, advocat du Roy, le bailli de Troyes, l'arcediacre de Sedenne, l'arcediacre de Brene, le doyen de Saint Estienne, le tresorier d'icelle eglise, le chancelier et garde des foires, me J. Heraut, me Oudart Hannequin, me François Le Pevrier, me Pierre Le Tartrier, me J. de Villerès, advocas, le procureur du

Roy à Troyes, le receveur de Troyes, le procureur de la ville de Troyes, J. Saugette, Michau de Plaisance, Giles Le Pevrier, bourgeois, me Simon Fourny, lieutenant du bailli de Troyes, me Pierre Heraut, avocat.

Sur la requeste faicte par le procureur du Roy du ... jour de septembre derrain passé sur la reformation du pain fait à Troyes, sur quoy la Court avoit par avant mandé certains boulangiers de Provins qui avoient fait **IJ** essaiz de pain audit Troyes, finalement après pluseurs paroles a esté appointié que le procureur du Roy à Troyes baillera aux boulangiers dudit Troyes par cedula les **IJ** essaiz faiz par ceulx de Provins, et le gaing ou prouffit sur chascun pour chascun sextier, toutes charges deduites, et lesdiz boulangiers la verront et en revendront après disner.

Ce jour, après disner, furent au Conseil les dessusdiz, fors l'abbé de Monstier la Celle et Michau de Plaisance.

Et sur certainne requeste et copie d'appointemens de la Court de Parlement baillée par lesdiz boulangiers, a esté ordonné que yceulx boulangiers et le procureur du Roy seront oïz lundi prouchain pour tous delaiz en ce qu'ilz voudront dire.

Item, sur le procès des tanneurs d'une part, et le

procureur du Roy, d'autre part, sur le plaidoié du ... de septembre et certaines ordonnances touchant ledit mestier, a esté ordonné que maistre Bertran Quentin, conseiller du Roy, et maistre J. du Boiz, registrateur et graphier criminel de Parlement, lesdiz bailly de Troyes, son lieutenant, la garde des foires, ledit procureur du Roy à Troyes, Me J. Heraut, me J. de Villerez et J. Monstier, procureur de ladicte ville de Troyes, s'assembleront demain après disner, et dimanche, se mestier est, et verront les articles des ordonnances estans oudit procès, et orront sur ce tanneurs,

bouchiers et seurres, et modereront ou adjousteront sur lesdictes ordonnances, et rapporteront à la Court pour ordonner ce qu'il appartendra.

Item, sur certaine requeste faicte pour les religieuses de Nostre Dame aux Nonnains de Troyes, afin d'avoir une foire chascun an le jour de la Nostre Dame en mi aoust en une place non sainte devant leur eglise, ainsi comme d'ancienneté l'avoient, si comme estoit relaté par les anciens, et comme l'en trouvoit par les anciens registres et les comptes de ladicte eglise, après ce que la Court en a demandé aux dessusdiz evesque, arcediacres, bailli et autres presens, qui tous en ont esté d'accort, ycelle Court a octroyé, concedé et octroye que ladicte foire siée et tiegne, et l'ayent les religieuses, comme d'ancienneté l'avoient et selon leur requeste. Samedi, **XIXe** jour d'octobre.

Ce jour, au vespre, ont esté apportées nouvelles à

Troyes que messire J. de Montagu, chevalier et grant maistre d'ostel du Roy nostre Sire, par avant notaire et secretaire d'icellui Seigneur, homme de basse corpulence, maigre à peu de barbe, legier et apert, hatif en langage, ynel, subtil et diligent, aagé de **L** ans et plus, filz de messire Gerart de Montagu, au temps de son trespas et po avant chevalier et par avant notaire du Roy, et filz comme l'en disoit, lequel messire J., par affection ou souffrance et simplece du Roy et des seigneurs de son sanc royal, avoit esté élevé en telle auctorité et eminence qu'il avoit en son temps gouverné toute la maison du Roy et de la Royne et de monseigneur le Dauphin, esté souverain sur les finances du Roy, lequel non pas seulement en l'ostel desdiz seigneur et dame, mais des seigneurs oncles et cousins du Roy, avoit moult grande auctorité, et par especial en l'ostel du duc de Berri estoit devent tous autres, et tant qu'il estoit le premier et principal ou Conseil du Roy et qui avoit fait ses **IJ** freres, l'un arcevesque de Sens et president de la Chambre des Comptes et estoit esperence qu'il seroit chancelier de France, et l'autre evesque de Paris et chancelier du duc de Berry, et qui avoit marié ses enfans si hautement, comme son filz de l'aage de **X** ou **XJ** ans à la fille de messire Charles de Lebret, cousin germain du Roy et connestable de France, l'une de ses filles au conte de Roucy et de Brenne, et l'autre fille au filz dudit conestable, lesquels filz et filles dudit Montagu estoient de la fille feu messire Estienne de la Grange, jadis president en Parlement, sa femme, et qui avoit acquiz moult de terres en divers lieux de ce royaume, et avoit fait faire un chastel nommé Malcoussis, près de Paris, à **VIII** ou

IX lieues, de moult merueilleux edifice, avoit aussi en moins de **IJ** ans edifié et fondé un couvent de Celestins près dudit chastel, si bien ordonné en toutes manieres que c'estoit merveille, comme l'en disoit, et avoient cousté lesdiz chastel et couvent plus de **IJc** mil frans; et lequel Montagu estoit si élevé que quasi nulles fois, lui venant à la Court de Parlement, n'ostast son chaperon de sa teste, non pas devant le Roy, icellui Montagu fu prins, lundi ot **VIII** jours, entre St Victor et Paris, et avec lui l'evesque de Chartres, general sur les finances, et furent mis ou Petit Chastellet de Petit Pont, et jeudi derrien passé fu ledit Montagu environ **X** heures mené du Petit Chastellet du Petit Pont à Paris en une charrette es haies de Paris, où fu devant infinité de peuple decapité, et sa teste fichée en une lance en l'eschafaut, et le corps mené et pendu au gibet de Paris.

Juedi, **XXIVe** jour d'octobre.

Cedit jour, a esté Guillaume Draperie, procureur du Roy à Troyes, suspendu de son office de procureur, prononcé en plaidant, et a esté publié par le president et dit publiquement que s'il y a aucun qui se veille plaindre dudit procureur qu'il viegne devers la Court.

Juedi, **XXIIIe** jour d'octobre, après disner, furent au Conseil, maistre R. Mauger, president, l'evesque de Troyes, l'abbé de Monstier la Celle et mes autres

seigneurs de la Court cy dessus nommés, et furent appellez les procureur du Roy general, maistre J. Juvenel, advocat du Roy, le bailli de Troyes, maistre J. Heraut, Oudart Hannequin, Mahiet Paillon, François Pevrier, J. Fagot, receveur, Pierre Le Tartrier, J. de Villerès, Pierre Heraut, et fu procedé à election d'un substitut ou lieu de Guillaume Draperie, nagueres procureur du Roy à Troyes, qui avoit esté suspendu dudit office.

Vendredi, **XXVe** jour d'octobre.

Cedit jour, Guillaume Draperie a miz et déposé devers la Court **X** escus que l'en disoit lui avoir receu du challevaly de maistre J. Fagot, receveur de Troyes, et s'est opposé ledit Draperie que ne soient employé ne baillez quelque part jusques à ce que lui soient rendus **IJ** escus qu'il a paiez aux compaignons de Troyes à boire, aussi s'opposent lesdiz compaignons pareillement, car à occasion dudit challevaly ont frayé et despendu de leur argent.

Mardi, **XXIXe** jour d'octobre.

Cedit jour, après disner, par devant maistres G. de Villiers et P. de Oger, conseillers du Roy en la Chambre des Requestes audit Troyes, furent les chanoines de l'eglise de Troyes les uns contre les autres, et pour ce que l'une partie n'a pas esté preste.

Nichil.

Juedi, derrain jour d'octobre.

Cedit jour, furent après les arrests pronunciez leues les ordonnances touchans les renvoiz et autrement, et fu dit que se aucunes causes y a qui soient à retenir en la Court par l'adviz des graphier et registreurs de la Court, oultre celles qui sont retenues, les pourront iceulx graphiers les retenir de par la Court. Et aussi a esté dit que ce qui sera fait huy, demain et samedi prouchain vaudra et tendra, comme se fait estoit es Grans Jours, car mesme a esté retenu à pourveoir samedi prouchain sur aucunes ordonnances touchans tant les bouchiers, tanneurs que autres à samedi prouchain, et iceulx diz jours averont les seigneurs leurs gages. Mardi, [Ve](#) jour de novembre.

Aucuns de messeigneurs de la Court ont esté visiter un prisonnier à Saint Eloy, nommé Colin Verjus, arrêté à la requeste de l'Université de Paris et de l'abbé de Saint Remy de Reims, et eulx, par le rapport de maistre Jaques Saquespée, medecin, maistres Jehan de Troyes et Gilet Desoubzlefour, chirurgiens jurez, ont trouvé que ledit prisonnier estoit très foible et entachié d'une espiece de melencolie, et par ce estoient d'oppinion qu'il fust mis en une bonne chambre et bien gardé, et que l'en lui feist bon feu, et baillast bonnes viandes, et que se ainsi n'estoit fait, il estoit en peril de mort, et pour ce ce sera rapporté à messire

Pierre Boschet, president, et ce signifié au procureur dudit abbé, et oy sa response, en sera appointié comme il appartendra.

Samedi, **IXe** jour de novembre.

Maistre Jehan Houguart, procureur de l'Université de Paris, maistre Rasse Panier, procureur de l'evesque de Soissons, et maistre Jehan du Berc, procureur de l'abbé de Saint Remy de Reims, se sont consentiz et consentent que Colin Verjus, prisonnier de par la Court es prisons de Saint Eloy à Paris, soit eslargiz à la caution de Oudinet Verjus, son frere, qu'il a baillée jusques à la somme de **Vc** frans, ou de rendre ledit prisonnier es prisons dudit evesque de Soissons dedans le landemain de la Chandeleur prouchain venant, sur peine d'estre atteint et convaincu des cas et autres peignes acoustumées, les defences autresfoiz faictes à l'evesque de Soissons demourans en estat, et aussi consentent

que par provision des biens dudit prisonnier soit prise la somme de **XX** frans, et baillée et delivrée audit Oudinet pour les necessitez dudit prisonnier et non autrement, et pour ce, attendu ce que dit est, et l'estat dudit prisonnier, il a esté eslargiz et faicte ladicte provision, dont lettre.

Mardi, **XIJe** jour de novembre mil **CCCC IX**.

Messire Arnault de Corbye, chevallier, chancellier de France, tint le Parlement et Conseil en la Chambre de Parlement, presens et assistens les ... Pierre Boschet

et maistre Robert Mauger, presidens, absens messire Henry de Marle, chevalier, premier president, pour ce qu'il avec aucuns des seigneurs de ceans tenoient l'Eschequier à Rouen, et messire Ymbert de Boisy, docteur, qui est alé de vie à trespas environ juin ou juillet derrien passé en Picardie, et Jaques de Ruilly, chevalier, presidens, qui ou mois de septembre derrien passé trespassa à Troyes, seans les Grans Jours, et aussy presens les arcevesques de Reins, l'arcevesque de Bourges, l'evesque de Lisieux, de Beauvaiz, de Tournay, de Chaalons, de Noyon, d'Esvreux, de Luçon, l'esleu de Poitiers, l'abbé de Saint Deniz, maistre Pierre l'Orfevre, nagueres chancelier d'Orleans, messire Jehan de Foleville, chevalier, maistre de la Chambre des Comptes, maistre Eustace de l'Aitre, Pierre de l'Esclat, Guillaume Chanteprime, Phelippe de Corbie, maistres des Requestes de l'Ostel du Roy nostre Sire, maistre Robert Wagnet, president des Enquestes, maistre J. du Drac, president des Requestes du Palaiz, et les autres seigneurs, tant de la Grant Chambre que des Enquestes et des Requestes du Palaiz. Et furent leues les ordonnances regardans les seigneurs, et puiz les huissiers, eulx appelez, puiz furent appelez les advocas et procureur du Roy, puiz generaument les advocas et procureurs, les huiz ouvers, puiz furent leues les requestes de ceulx qui voloient faire serment de nouvel en office d'avocat et de procureur. Ce fait, furent leues les ordonnances regardans advocas et procureurs, qui après ce firent le serment acoustumé, chascun en son ordre, ou giron dudit Chancelier, touchés les Sains Evangiles, puiz se partirent tous, hors ceulx du Conseil. Et fu ordonné par monseigneur le Chancelier

que après disner, à **IIJ** heures, iroient les seigneurs du Conseil en l'ostel dudit Chancellier pour eslire un president ou lieu de feu messire Ja. de Ruilly, nagueres president, et un maistre des Requestes de l'Ostel ou lieu de maistre Pierre Troussel, esleu evesque de Poitiers, selon aucunes ordonnances faictes en vacations en l'Ostel du Roy et en son Conseil, comme l'en dit.

Cedit jour, après disner, furent les seigneurs du Conseil assemblez en l'ostel du Chancellier pour eslire president et maistre des Requestes du Palaiz, et en la presence dudit Chancellier et de messire Pierre Boschet

et R. Mauger, president, et le graphier, dirent aucuns en scrutine leurs veus et deliberation, et ne fu pas parfaite ladicte election pour le brief temps, mais remise à demain après disner.

Ycellui jour, oudit lieu, et en la presence des dessusdiz Chancellier, president et graphier, maistre Nycole d'Orgemont, doyen de Tours et conseiller du Roy ceans, requist audit Chancellier, que comme l'esleu de Poitiers, par avant maistre des Requestes de l'Ostel du Roy, eust par avant lesdictes ordonnances resigné à son proufit ledit office de maistre des Requestes, et par ce y avoit droit par le don du Roy à lui fait, et dont avoit lettre, combien que non seellée,

et l'en feist election sur ledit office, que justice lui fust faicte et gardée.

Juedi, **XIIIJe** jour de novembre.

Pour ce que les advocas n'estoient pas prests de leurs causes, la Court a fait partir advocas et procureurs et parties et s'est mise au Conseil.

Samedi, **XVJe** jour de novembre.

Cedit jour, a esté esleu maistre Hugues Grimaut, doyen de Noyon et conseiller du Roy nostre Sire ceans, pour porter le roole devers nostre Saint Pere le Pape à Pise, et a esté ordonné que chascun des seigneurs baillera **III** frans, pour ce qu'il faut pranre le chemin par les Alemaignes, obstant les perlix des chemins de Jannes pour la rebellion que les Janenoix ont fait au Roy en la personne du mareschal Bouciquaut, gouverneur de Jannes pour le Roy.

Mercredi, **XXe** jour de novembre.

Cedit jour, maistre Simon de Nanterre, conseiller du Roy nostre Sire en la Chambre des Enquestes, qui avoit exercé l'office de visiter les lettres à la Chancellerie par dix ans et plus, et qui avoit nagueres esté

esleu president ou lieu de messire Jaques de Ruilly, chevalier, nagueres trespasé, a esté receu et a fait le serment de president acoustumé. Et pour ce que maistre J. de la Marche, advocat en Parlement, avoit esté esleu ou lieu dudit de Nanterre en la Chambre des Enquestes et il avoit obtenu l'office de visiter les lettres à la Chancellerie, combien que ancor ne fust il pas ancor receu ceans, la Court lui a dit que la fin pourquoy avoit esté esleu estoit à ce qu'il travaillast, laborast et besoignast en ladicte Chambre, comme il estoit besoin, et ceste estoit l'entention de ceulx qui l'avoient esleu, non pas de lesser la Chambre et aler à la Chancellerie, pour quoy s'avisast, car la Court n'avoit point entention de le recevoir, si ne juroit de faire residense continuelle en ladicte Chambre et y besoigner et travailler, comme il apartenoit, et il a respondu en merciant la Court que, combien que le Chancelier lui eust donné ledit office de visiter les lettres, toutevoie puiz qu'il ne plaisoit pas à la Court, ne l'exerceroit pas, mais l'office de conseiller en ladicte Chambre des Enquestes, et en ce cas lui a esté dit qu'il feist faire sa lettre et seeller.

Messire Phelippes de Poitiers, chevalier, a au jour d'ui consenti et consent que l'interdiction, qui avoit esté faite par la Court à maistre Deniz de Paillart, ja pieça à la requeste de madame Jehanne de Paillart, dame de Dormans, sa mere, et de ses autres amis, soit revoquée et mise au neant, en tant que lui touche et sa femme,

suer dudit maistre Deniz, et ce a requiz estre enregistré.

Vendredi, **XXIJe** jour de novembre.

Cedit jour, sur ce que procès estoit esperé d'estre meu ou à mouvoir entre messire Phelippe de Poitiers, chevalier, et madame sa femme, d'une part, et madame d'Orgemont, d'autre part, et pour ce eust esté pourparlé entre icelles parties d'accort, et n'ait point esté accordé, a requiz ledit chevalier qu'il fust enregistré ce que dit est et que entre icelles parties n'a aucun accort.

Mardi, **XXVIJe** jour de novembre.

Sur ce que maistre Pierre des Champs, docteur en decret et prieur de Saint Anthoinne ou diocese de Rodès, estoit ceans adjorné à comparoir en personne, et estoit mis son temporel en la main du Roy à la requeste du procureur du Roy et de l'arcevesque de Tholouse, appoinctié que ledit docteur joyra de son temporel soubz la main du Roy, et est receu par procureur, *quousque*, et si lui seront rendus ses biens à sa caution.

Samedi, **VIIJe** jour de decembre, au Conseil.

Cedit jour, la Court a donné maistre Pierre le Mainsné pour curateur à Robert de Bar pour passer certain

accort d'entre lui, d'une part, et le duc d'Orleans, d'autre part, et a fait le serment acoustumé.
La Court a defendu à maistre J. Rabateau, procureur de messire J. Harpedenne, chevalier, comme audit chevalier, qu'il ne mefface n'en corps ne en biens aux habitans de Montagu, ne à aucuns d'eulx à peine de X mil livres à appliquer moitié au Roy et moitié auxdiz habitans, ou contempt de certain procès pendent ceans entre lesdictes parties, et met la Court lesdiz habitans en sa garde, et sera mandé au bailli du grant fief d'Aunix qu'il envoie toutes les informations et besoignes qu'il a touchant ledit procès.

Mercredi, **XJe** jour de decembre, au Conseil.

Au jour d'ui est trespasé maistre J. Boyer, conseiller du Roy ceans, *ut fertur*.

Cedit jour, pluseurs seigneurs, prelas et autres de l'ostel le duc de Berri sont venu ceans, et ont requiz que maistre J. de Marle, filz du premier president de ceans, fust receu maistre des Requestes de l'Ostel ou lieu de maistre Pierre Troussel, nagueres arcediacre de Paris et maistre des Requestes de l'Ostel du Roy, et à present evesque de Poitiers, selon la forme d'une lettre qu'il a presentée à la Court. A quoy maistre Phelippe de Boisgillou a dit que, combien que le Roy lui eust donné le lieu dessusdit, ne le voloit point empescher ne soy opposer. Pareillement maistre Nycole d'Orgemont, conseiller du Roy, a dit que, combien que à son proufit ledit Troussel eust resigné ledit office, et à ceste cause le Roy devant tous lui eust donné, neantmoins

ne se voloit point opposer que ledit de Marle ne fust receu, si a esté receu et a fait le serment acoustumé.

Maistre Phelippe des Essars a esté receu maistre des Requestes ou lieu de maistre Eustace de l'Aitre, qui est de nouvel president de la Chambre des Comptes, et a fait le serment acoustumé.

Et cedit jour, a esté faicte election ou lieu de maistre H. de Savoisi en la Chambre des Enquestes, qui est

monté ou lieu de maistre Nycole d'Orgemont, qui est de nouvel maistre en la Chambre des Comptes, et a esté esleu maistre J. Vivien, advocat ceans.

Juedi, **XIJe** jour de decembre.

La Court a donné congié à maistre J. de Ramais, N. de Savigny, advocas ceans, et Junian Le Besson, procureur ceans, de cy à mercredi prouchain, pour aler à la feste de l'arcevesque de Reins quant à Savigny, et quant aux autres pour convoier le corps de maistre J. Boyer, conseiller du Roy ceans, qui puis un po est trespasé.

Maistre J. Jouvenel, advocat du Roy ceans, comme procureur de maistre Nycolas Eschalart, son gendre, advocat ceans, s'est opposé et oppose que aucun ne soit receu ou lieu de feu maistre J. Boyer ceans, sans ce qu'il soit oy.

Cedit jour, la Court a taxé à maistre Gile Petit la somme de **LX** solz tournois pour son salaire d'avoir apporté de Sens à Paris un procès pour Guillaume, sr d'Irou, et les habitans dudit lieu, contre messrs Erart et Troullart de Lisines, freres.

Samedi, **XIIIJe** jour de decembre.

La Court a ordonné que la somme de cent livres tournoiz qu'a ordonné feu monsr Pierre d'Orgemont, nagueres evesque de Paris et trespasé, en son testament estre baillée à l'execution de feu messire Gile de

Lorriz, evesque de Noyon, soit baillée et delivrée à messire Guerin de Lorriz, chevalier, frere dudit de Noyon, pour emploier au mariage de la fille dudit Guerin, et soit ce employé es comptes des executeurs dudit evesque de Paris.

Lundi, [XVIe](#) jour de decembre.

Avant les Plaidoiries, au Conseil, maistre J. Chanteprime, doien de l'eglise de Paris, dist pour maistre Gile de Clamecy, son nepveu, conseiller du Roy ceans en la Chambre des Enquestes, comme cleric, combien qu'il fust marié et qu'il voulsist estre lay, que par ordonnance royal et usage de ceans que quant aucun des seigneurs cleric ou ayant gages de cleric voloit estre lay et avoir gages de lay ceans, et il vacoit un lieu de lay, tel qui avoit par avant gages de cleric devoit estre preferé devant tous autres volans venir audit lieu de nouvel, or vacoit le lieu ceans de feu maistre J. Boyer, conseiller du Roy ceans en lieu lay, ouquel fu esleu samedi derrain passé ceans, et pour ce que ne savoit qu'il en avendroit, s'opposoit que nul ne fust oudit lieu receu, sans le oïr en audience, attendu mesme qu'il plaisoit et sembloit bon à la Chambre des Enquestes qu'il fust preferé oudit lieu.

Mardi, [XVIIe](#) jour de decembre.

Ce jour, a ordonné la Court audience à la quinzaine de janvier prouchain venant à pluseurs sergens du Poitou et au procureur du Roy general contre le duc de Berry, et sera mandé, se mestier est, au bailli de

Touraine qu'il envoie instruction et ce qu'il appartendra à la cause devers ledit procureur du Roy. Lettre à Disy.

Vendredi, **XXe** jour de decembre.

Cedit jour, la Court a ordonné que, pour juger plus seurement le procès d'entre le sire de Torcy, d'une part, et les religieux de Beaucamp, sera faicte une figure de la situation et lieux contencieux aux despens des parties.

Dimanche, **XXIXe** jour de decembre. *Curia vacat.*

Messire Guillaume de Dominicat, chevalier, a renoncé et renunce à une appellation faicte par lui ou son procureur puiz **VIII** jours en ça, comme il dit, d'une sentence du seneschal de Pontieu donnée contre lui au prouffit de messire Eustace de Neuville, chevalier, capitaine de L'Escluse.

Presens cedula debuit supra die XXVJa hujus mensis registrari, que hodie, per defectum clericorum meorum qui tardè eamdem registrandam tradiderunt, registrata est.

Mardi, derrien jour de decembre.

Cedit jour, n'a point esté plaidié pour ce que l'en ne povoit entrer ou Palaiz, obstant un grant conseil

que faisoit le Roy en la sale Saint Loiz, de messeigneurs de son sanc et des nobles du royaume, sur le fait de la guerre d'entre le Roy, d'une part, et le roy d'Angleterre, d'autre part; ouquel conseil ay esté sur la fin veoir la maniere.

Et y a esté dit et conclu de par le Roy, par la bouche du conte de Tancarville, que pour pluseurs causes par lui paravant recitées, et par especial, pour ce que les Anglois faisoient grant appareil de guerre et avoient delayé par III mois de venir au tractié où devoient venir ou envoyer, comme avoient promis, le Roy avoit conclu sur le fait de la guerre. Sur quoy estoient avisié aucuns poins qui seroient dis auxdis nobles, et se miex avoient, le diroient au Roy.

Aussi a esté dit que, pour ce que il y avoit eu grans defaus ou fait de la justice de ce royaume, et aussi ou gouvernement et recepte du demainne et des aydes, le Roy avoit ordonné pluseurs vaillans hommes reformateurs

generaulx, desquelx les aucuns estoient du sanc du Roy, c'est assavoir, les comptes de la Marche, de Vendosme et de St Pol, lesquelx reformateurs puniroient celx qui avoient failli, et priveroient ceulx qui avoient desservi.

Aussi fu dit que, pour ce que le Roy, pour pluseurs empeschemens qui lui survenoient souvant, avoit jà pieçà ordonné que la Royne par le conseil de messeigneurs

du sanc royal entendroit es grosses besoignes et cas qui en ce royaume avendroient, auxquels le Roy ne pouvoit entendre, ycelle Royne aussi estoit

empeschée pour pluseurs cas qui lui surviennent et empeschemens, par quoy n'y pouvoit entendre, si avoit ordonné le Roy, à la requeste de la Royne, que monseigneur le Dauphin entendroit de cy en avant auxdictes besoignes par le conseil de mesdis seigneurs du sanc royal.

1410.

Mercredi, [VIIIe](#) jour de janvier, au Conseil.

Cedit jour, maistre J. des Landes, dit Boucandri, et J. Moreau, procureurs en Parlement, ou nom et comme procureurs de messire J. Le Meingre, dit Bouciquaut, mareschal de France, ont mis par devers la Court les lettres d'obligation de cinq mil ducats prestés à messire Symon Cramaut, lors patriarche d'Alexandrie, aux evesques de Beauvaiz et de Meaux par Perceval de Vivaldes, citoyen de Jannes; item, le transport de ladicte debte fait par ledit Perceval audit mareschal, item, autres lettres d'adjournement et relation par l'ordonnance de monsr le Chancelier, comme ilz disoient, et se sont opposez lesdiz procureurs et s'opposent, ou nom desdiz mareschal et Perceval, se mestier est, à ce que lesdictes lettres ne soient baillées ne

restituées à quelcunques personne, jusques à ce qu'il soient premierement oïz.

Vendredi, **Xe** jour de janvier.

Ce jour, la Court a ordonné que d'ores en avant maistre Giles de Clamecy lay, qui par avant prenoit gages de cleric, pranra gages de lay, et maistre Quantin Massue gages de cleric, jusques à ce que autrement en soit ordonné.

Lundi, **XIIIe** jour de janvier.

Cedit jour, le seigneur de Fonteinnes a esté donné curateur par la Court au duc d'Orleans et à ses freres et suer pour passer certain accort entre lesdiz duc, freres et suer, d'une part, et le conte de Nevers, d'autre part, pour cause de la terre et baronnie de Coucy et autres terres aussy, et a fait ledit Fonteinnes le serment acoustumé, et ce fait, a esté passé ledit accort.

Cedit jour, la Court a deschargé et descharge et donne congîé aux capitains qui estoient ordonnez à la garde des chasteaulx de Coucy, d'Assy et du Chastellier, auxquels garder estoient commiz les seigneurs d'Auffemont, de Cerny et Evein de Cramailles.

Mardi, **XIII^e** jour de janvier.

Cedit jour, messire H. de Marle, chevalier et premier president de la Court, et Robinet Le Tirant, escuier, executeurs du testament du feu viconte d'Acy, ont consenti et consentent que la somme de **IJc** frans qu'avoit laissé en son testament ledit viconte à Jacotin de Bellebronne,

et laquelle somme estoit par devers le sr d'Auffemont et le viconte d'Acy, filx dudit viconte, soit baillée et delivrée audit Jacotin. Si a ordonné la Court icelle somme estre baillée audit Jacotin.

Mercredi, **XV^e** jour de janvier, au Conseil.

Le bailli de Meaulx s'est opposé et oppose à ce que la Court ne reçoive aucun à bailli de Meaux.

Vendredi, **XVI^e** jour de janvier.

Cedit jour, a esté ordonné que, pour ce que doubtte

estoit survenue en un arrest fait et jugié en la Chambre des Enquestes sur un procès d'entre Thomas de Nully, changeur, d'une part, et J. Fale, d'autre part, laquelle doubte, depuis que ledit arrest avoit esté baillié au premier president pour prononcer, avoit esté avisée par icellui president, le procès sera revisité et veu en la Grant Chambre, sans qu'il soit ja mestier que les seigneurs des Enquestes y soient.

Cedit jour, la Court a ordonné que messire Guillaume de Han avera commissaires au paiz à l'encontre de certains espaignos marchans au paiz, pourveu qu'il ne seront pas de la ville de la Rochelle.

Cedit jour, messire J. de Merle, chevalier, bailli de St Pierre le Moustier, s'est opposé et oppose à ce que nul ne soit receu à bailly audit lieu sans le oïr, et sur ce a presenté lettres royaulx qui seront monstrées au procureur du Roy.

Juedi, **XXIIIe** jour de janvier.

Sur la requeste faicte par Charles de Cresecques à ce que la Court reçoive certain accort sur une cause nagueres ceans plaidoiée, par lequel appert, comme dit le procureur du Roy, que ledit Charles confesse le delict à lui imposé, appointié que la Court appellera demain le procureur du Roy et en ordonnera.

La Court a au jour d'ui delivré de prison J. Droyn, prisonnier en la Conciergerie, parmi ce qu'il obeyra à l'ordonnance de la Court qui estoit que, en recevant obligation de Perrin de Coulandes, prisonnier au Chastellet,

de ce que lui devoit pour ses despens fais ou Chastellet, dont estoit geolier Droyn, le laisseroit issir, veu que autrement de present n'avoit ledit Coulandes de quoy paier.

Vendredi, derrain jour de janvier, au Conseil.

Cedit jour, Jaques de Buymont, huissier de Parlement, a revoqué et revoque son seau qu'il a perdu puiz **IIJ** ou **IIII** jours.

Mardi, **IIII**e jour de fevrier.

Cedit jour, maistre Giles Labbat, procureur de J. d'Aunoy, escuier, bailli de Chaumont, s'est opposé par vertu de certaines lettres royaulx, dont a apparu à la Court, à ce que nulz ne soient receuz en bailli de

Chaumont, sans ce qu'il soit par avant oy en ses causes d'opposition, et ce a requiz ledit Labbat estre enregistré.

Juedi, **XIIIe** jour de fevrier.

Cedit jour, J. Le Beguinat, procureur ceans, s'est opposé et oppose à ce que la Court ne confere, ou les commissaires à ce ordonnez, les bourses du college de Dormans à autre que à un sien nepveu, qu'il a presenté à l'abbé de St Jehan des Vignes, s'il n'est plus près de Dormans que n'est sondit nepveu, ou du linage de Dormans, selon les status dudit college.

Lundi, **XVIe** jour de fevrier.

Maistre J. de Lespine s'est opposé et oppose que nul ne soit receu à l'office d'uissier de Parlement de Thomas Rart que l'en dit trespasé, sans le oïr ou appeller.

Vendredi, derrain jour de fevrier.

Ce jour, a esté visité le procès d'entre Pierre Amiot, d'une part, et J. Prevost, dit Merveillier, d'autre part, sur quoy ont esté parti en la Chambre des Enquestes, et ancores ont esté parti en la Grant Chambre.

Samedi, premier jour de mars.

Cedit jour, a esté maistre J. de Longueil commiz à faire l'information de pluseurs villes que le procureur du Roy de Senliz dit estre du bailliage de Senliz, et le

procureur de l'evesque de Beauvaiz dit estre du bailliage de Beauvaiz, à savoir de quel bailliage elles sont.

Mercredi, **XIJe** jour de mars.

Ymbert du Grolay est venu prier de par le duc de Berry la Court de l'avancement du procès de messire Ode de Villars contre messire Remon de Turenne, et pour ce que autres grant seigneur welt que l'on attende, a esté enregistré.

Juedi, **XIIJe** jour de mars.

Bethin d'Acy, marchant de Lucques, requiert contre les arcevesque et les evesques de Beauvaiz et de Noyon et dit que ou mois de may derrain passé ou environ, Guillaume du Porche, demourant à Luques, presta auxdiz arcevesque et evesques **IIIc** florins, lesquelx

promidrent de rendre et paier à Paris en leurs personnes et privez noms dedans le mois de septembre derrain passé, et de ce baillèrent leur lettre et cedula signée de leurs propres mains et signets, si requiert que confessent ou nyent, et s'il confessent, soient condempnez

à paier ladicte somme et despens, et s'il le nyent, le prouvera, et lesdiz defendeurs revendront à juedi après Pasques prouchaines dire ce qu'il appartendra et seront monstrés les adjornemens et la cedula.

Vendredi, **XIIIJe** jour de mars.

La Court au jour d'ui, sur le plaidoié du **IIJe** jour de ce present mois et tout veu, a mis les **IIJ** appellations faictes par l'evesque d'Amiens à l'encontre du procureur du Roy, le bailli d'Amiens et autres (au neant)

sans amende, et s'en iront les parties sans jour et sans terme, et seront les cas dont a esté plaidoié reputez et les repute la Court pour non avenus, et ordonne la Court et du consentement desdictes parties que l'evesque pour deffraier ledit bailli et son lieutenant paiera **VJxx** escus.

La Court a defendu à messire J. de Langac, chevalier, qu'il ne mefface ne ne face meffaire à Pierre Mercier, bourgeois de Langac, à peine de **IJm** mars d'or, et le tient ladict Court en son sauf conduit, et lui baillera asseurement devant l'official.

Samedi, **XVe** jour de mars.

Cedit jour, maistre Pierre Boier, docteur en loiz, a protesté, que comme maistre J. Catalan, procureur ceans pour Bernart Boyer, son frere, viguier de Carcassonne,

certeinnes lettres dudit office de viguier appartenent audit Bernart eust prises et receues d'icelle Court pour bailler à Guinot de Pesteil, partie adverse de sondit frere, que ce a esté et est pour crainte et doute qu'il ne fust mené hors de Paris en prison et par violence et villené en sa personne, souz umbre et auctorité du duc de Berry, et que rien qu'il ait fait ou face ne lui prejudicie, ne aussy à son dit frere.

Mercredi, **XIXe** jour de mars.

Cedit jour, a esté signé par le graphier une commission d'entre le sr de Pousauges et le duc de Berri contre le sr de la Suze par la hativeté du procureur dudit de Pousauges, que requiert Pingué, procureur dudit de la Suze, estre corrigée, pour ce que en icelle a *pro omni* prefixion qui n'y doit point estre.

Cedit jour, J. Tarenne, changeur sur le Pont et bourgoiz de Paris, a au jour d'ui receu en depost de par la Court, par la main de J. Le Roux, tresorier du roy de Navarre, la somme de deux mil livres tournois au proufit du duc de Bretagne.

Simonnet Allars, changeur sur le pont de Paris, a au jour d'uy receu en depost de par la Court, par la main de J. Le Roux, tresorier du roy de Navarre, la somme de deux mil livres tournois au proufit du duc de Bretagne.

Juedi, **XXVIe** jour de mars.

Cedit jour, pour ce que l'en ne gardoit point l'ordinaire des jours ne des bailliages, mais chascun jour plaidoiable l'en plaidoit *indistincte* de tous païz et bailliages sans ordre, a esté ordonné et publié que de cy en avant l'en plaidera les lundi et mardi des ordinaires, et le juedi et aussi le venredi, lorsque l'en plaidera, l'en plaidera de causes extraordinaires, et defent la Court que aucun contre ceste ordonnance ne demande audience.

Lundi, derrain jour de mars.

Cedit jour, J. Maignier, huissier, a dit que la veille

de Pasques flories perdi son seel, si proteste que chose qui depuiz avoit esté seellée d'icellui ne lui prejudicie. Mercredi, **IXe** jour d'avril.

Guillaume de Fontenay, escuier, prisonnier en la Conciergerie du Palaiz pour cause de la somme de **IIIc** frans, dont l'en faisoit execution sur lui par vertu d'une commission des commissaires ordonnez à punir les fauteurs de Pierre de Lune, et dont ledit escuier se disoit avoir appellé en Parlement, est eslargi par tout jusques à un mois prouchain venant, parmi ce que Regnault de Fontenay, frere dudit prisonnier, l'a cautionné

de ladicte somme, et de le ramener au jour corps pour corps et avoir pour avoir.

Cedit jour, ont esté baillez et delivrez quatre mil livres tournois au duc de Breteigne, qui avoient esté mises en depost au change de par la Court par le roy de Navarre pour certaines causes contenues en la quittance sur ce faicte estant devers icelle Court, et par ce ont esté restituées les cedulaes qui estoient devers la Court sur ledit depost aux changeurs qui avoient ledit depost.

Juedi, **Xe** jour d'avril.

J. de Chailly, escuier, demourant à Molins, en la parroice de Mesy, à **IJ** lieux de Dormans, s'est opposé et oppose que nul ne soit receu à avoir bourses ou college de Dormans, s'il n'est plus prouchain de Dormans que Simonnet, son filx, qui est né à **IJ** lieues de Dormans, s'il n'est plus prouchain dudit Dormans ou linagier, ou que autrement lui soient deues, car

il s'est présenté à l'abbé par plusieurs fois, qui ancor ne lui a pourveu.

Lundi, **XIIIJe** jour d'avril.

Messire J. d'Aunoy, chevalier, a requis l'enterinement de certaines lettres par lesquelles le Roy lui donne le bailliage de Troyes en deschargant messire J. de Bormont, chevalier, qui estoit et est bailli, et a requiz qu'il soit receu à faire le serment, à quoy ledit Bormont, par vertu de certaines lettres, s'est opposé et oppose, si a ordonné la Court que les parties seront oyes à juedi prouchain.

Sur ce que maistres R. Broisset, B. Quentin et T. Tiessart, conseillers du Roy ceans, estoient commiz à taxer les despens faiz en l'ostel de maistre J. du Boiz, graphier criminel, par damoiselle Jehanne, fille de madame Marie de Coucy et niepce de J. de Rainneval, par **XIX** sepmaines ou environ, et que par **V** sepmaines dudit temps elle avoit esté endablé de maladie, si lui avoit falu garde et autres necessitez, a esté dit par lesdiz conseillers que ledit du Boiz avera **XX** livres parisis, qui seront prins et executez sur ledit Rayneval qui les recouvrera sur ladicte dame Marie, se elle succumbe en la cause pendent entre elle, d'une part, et ledit de Rayneval, d'autre part.

Vendredi, **XVIIJe** jour d'avril.

Cedit jour, la Court a ordonné que Lorin de Bournieres, prisonnier ou Chastellet, sera rendu à l'evesque de Paris, et ly sera enjoint qu'il en face bonne justice.

Lundi, **XXJe** jour d'avril.

Du consentement du procureur du Roy et de maistre J. du Boiz, procureur des bourgeois et habitans de la ville de Rouen, et de Cardin Mites, bourgeois de ladicté ville, la batelée du foin appartenant à Alain Simon, marchant, demourant à Paris, qui par la main du Roy a esté prinse aux caiz de Rouen et amené à Paris par le commandement de Anguerran de la Porte et depuis de Adam des Vignes, huissiers de Parlement, commissaires

en ceste partie, sera appréciée, c'est assavoir, le foin, d'une part, et le batel, d'autre part, et par caution suffisant du priz du foin et du batel, seront les foin et batel baillez et delivrez, c'est assavoir, le foin audit Alain et le batel à Perrot Jouhan, voiturier par eaue, à qui appartient ledit batel, auquel prisagement faire est commiz le premier huissier de ladicté Court sur ce requiz, qui de ce fera son rapport et relation, sans prejudice desdictes parties.

Dimanche, **IIIJe** jour de may.

Le quart jour de ce mois, ala de vie à trespas monseigneur Alexandre quint, pape, notable theologien, mais *parum peritus in tanto regimine*, et n'a duré ou papat que **XJ** mois.

Mardi, **VJe** jour de may.

Le procureur du Roy, pour cause et occasion de moult grans excès, crimes de lese magesté et autres

delits commiz et perpetrez par le duc de Lorraine et plusieurs autres ses complices contre le Roy et ou contemps

des arrests et executions d'icelx obtenus ceans, et contre les bourgoiz de Nuefchastel n'a gueres et plusieurs autres, contenus en plusieurs et grosses informations

sur ce faictes, et à occasion de quoy ledit duc a ceans esté adjorné avec ses complices à certain jour, auquel n'ont point comparu ne ne comperent, combien qu'il ayent esté appellez à la barre et à la table de marbre, requiert default, et pour monstrer qu'il lui doit estre octroyé, propose plusieurs choses que enregistre le graiphe criminel.

Juedi, **XVe** jour de may.

Cedit jour, a esté et est advoquée ceans à de lundi prouchain venant en **VIII** jours la cause pendant par devant les maistres des Requestes de l'Ostel du Roy nostre Sire, entre madame Marie du Bois, dame de la Granche, d'une part, et les **XXX** eulx disans sergens de la ville et banliue de Rouen, d'autre part, à la requeste du procureur general et du consentement de maistre J. d'Anisy, procureur de ladicte dame, et Mahiu Mouton, procureur desdiz **XXX** sergens, et se

sont tenus et tiennent lesdiz procureurs desdictes parties pour bien presentez et fondez audit jour par vertu des procurations mises en la court desdictes Requestes de l'Ostel.

Vendredi, [XVJe](#) jour de may.

La Court a donné congié à maistre J. Bonnet, soubmaistre ou college de Dormans jusques à la fin d'aoust prouchain venant, parmi ce qu'il a laissé substitut en sondit office, lequel en prenra les gages pendant le temps dessusdit.

Samedi, [XVIJe](#) jour de may.

Furent au Conseil monseigneur Arnault de Corbye, chancelier, maistre R. Mauger, president; l'evesque de Tournay; l'evesque d'Aucerre; le conte de Tancarville; le chancelier du Daupiné et de Guienne; le seigneur de Blarru; le seigneur de S. George; le seigneur d'Auffemont; le seigneur de Boissay; le prevost de Paris; maistre Pierre de L'Esclat, m. Raoul Le Saige...

A conseiller le défaut obtenu ceans pour le procureur du Roy contre le duc de Lorreinne, qui ceans avoit esté adjorné à comparoir en personne, sur plusieurs rebellions, inobeysances, contemps de justice et des arrests de ceans, pilleries, murtres, larrecins et plusieurs autres crimes et malefices fais contre le Roy

nostre Sire et sa souverainneté, dont est ledit duc vassal et homme lige, et contre les habitans de la ville de Nuefchastel qui sont subgiez du Roy et de sa conté de Champaigne en ressort et souverainneté, comme apparoit par très grosses informations sur ce faictes et fais notoires et autrement deument, tout veu et consideré: A esté advisé et conseillé que, quant au defaut, sera adjorné ledit duc et seroit procedé contre lui à autres defaus, selon le stile de ceans en cas criminelx, et quant à la provision des prisonniers seroit procedé de fait contre le duc en metant et tenant ses terres tenues soubz le Roy en la main du Roy ou autrement, se bon sembloit au Roy et aux seigneurs de son sang, aux quelx en seroit parlé, jusques à ce que les bourgeois de Neufchastel, que tenoit ledit duc prisonniers, averoit delivré.

Cedit jour, après disner, comparurent et furent ceans au Conseil les dessusdiz, hors Tancarville, le chancelier du Daufiné, le seigneur de St George et le prevost de Paris. Et fu conseillé sur un cas d'appel et d'atemptas qu'avoit fait et faisoit le duc de Breteigne, contre et ou prejudice du Roy et de sa seigneurie, et contre les doien et chapitre de S. Malo en Breteigne, dont estoit seigneur le Roy, ou contempt de certain appel entrejetté par lesdiz doien et chapitre en la Court de ceans. Et pour ce que ledit duc avoit esté adjorné en cas d'appel et non pas d'atemptas, fu advisié qu'il seroit adjorné audit cas d'atemptas ceans, et lors l'en requerroit et feroit l'en tel provision auxdiz de chapitre, comme apartendroit, et ce seroit signifié et dit au Roy et aux seigneurs de son sanc pour y conclurre.

Mardi, **XXe** jour de may.

Nycolas Le Clerc, bourgeois de Paris, demourant en la parroice de Saint Jaques de la Boucherie, demourant en la rue de Troucevache, à l'image Saint Nycolas, a promis de faire ester à droit messire Estienne Marie, prestre, subgiet de monsr l'evesque de Suessons, en sa court, à peine de **Ijc** libvres tournois, et moiennant ceste caution ledit Marie est eslargi des prisons où estoit de par la Court. Fait du consentement de maistre Michiel de Couhan, promoteur de la court dudit evesque, et de maistre Hebert Camus, procureur du viconte d'Acy. Et a defendu la Court et defent audit evesque que, jusques à ce qu'elle ait cogneu du cas privilégié, il ne procede contre ledit Marie à sa sentence diffinitive.

Samedi, **XXIIIJe** jour de may. Au Conseil.

Cedit jour, les procureur du Roy et Rabateau du duc de Berry, interrogé se contre certaines lettres impetrées de la part de l'evesque du Puy pour lever la main du Roy mise à son temporel vouloient quelque chose dire, ont respondu, c'est assavoir, le procureur du Roy qu'il se rapportoit à ce que *aliàs* avoit proposé

contre ledit evesque, et Rabateau qu'il n'estoit pas assez instruit et qu'il falloit qu'il parlast audit duc pour avoir instruction contre ladicte lettre, que requeroit avoir, ou la copie d'icelle.

Juedi, **XXIXe** jour de may.

La Court a defendu à Bernardon Vernon et à Roolin Vernon, escuiers, à peine de **Ijc** mars d'argent, à

appliquer la moitié au Roy et la moitié à maistre
J. de Wary, procureur ceans, que audit Wary ne
meffacent

ne ne mesdient, et à peine de **C** mars d'argent
aussi a esté faicte defence audit Wary que auxdiz Vernon
et Roolin ne meffacent.

Samedi, **VIJe** jour de juin.

Cedit jour, Jaques de Bellebronne, escuier, a confessé
avoir receu de messire Guy de Nelle, chevalier,
sr d'Auffemont, la somme de deux cent livres tournois,
laquelle avoit esté laissée audit escuier par feu
messire J. La Personne, en son vivant viconte d'Acy,
en son testament, et laquelle somme avoit esté baillée
en garde par la Court audit sr d'Offemont.

Lundi, **XVJe** jour de juin.

Ce jour, a esté octroyé lettre de sommation en cas
de marque à l'arcevesque de Besançon à l'encontre du
roy d'Arragon et ses subgiez.

Juedi, **XIXe** jour de juin.

Ce jour, sur ce que maistre Hugues Grimaut, doien
de Noyon et conseiller du Roy ceans, estoit dès janvier
derrain passé alé en court de Romme qui seoit à
Boloigne la grace, porter le roole de la Court pour
estre signé et receu par le pape Alexandre Quint qui
lors regnoit, pour le salaire duquel chascun des inrotulez
eust baillié **IIJ** frans, et pour ce que pendent le
temps que ledit Grimaut estoit en court de Romme,
trespassa ledit Alexandre environ le **XXIIIJe** d'avril
derrain

passé, *negotio Curie ibidem imperfecto*,

et assez

tost après eust esté esleu le cardinal de Bouloigne d'en

Pape, qui a esté et est nommé *JohannesXXIII*,

et ait

esté mandé audit Grimault de par la Court qu'il attendist pour parfaire ladicte besoigne, et pour soustenir ses frais et despens la Court lui enverroient cent escus, pour ce que ce qu'avoit receu pour son salaire ne suffisoit pas: a esté ordonné que un chascun de celx qui ont esté mis audit roole paieroit un escu, et se aucuns des seigneurs ou autres qui prennent gages ou presens, qu'il ne paient pas ou que ne veillent ou puissent de present paier, sera dit par le graphier de par la Court à cellui ou celx qui paient les gages des dessusdiz que pour un chascun retiegne **J** escu qui sera delivré à maistre Guillaume de Gaudiac, doien de St Germain et conseiller du Roy ceans, qui s'est chargé pour la Court de faire finance audit Grimault de ladicte somme de cent escus, et ce qui sur ce est desjà païé lui sera delivré par le graphier.

Lundi, **XXIII**e jour de juin.

La Court a dit et ordonné audience au premier jour de juillet prouchain venant en la cause de ceulx de Perdrich contre le conte d'Armignac, lequel, se lors n'est prest, la Court donra exploit tel qu'il appartendra, et pour ce qu'il semble à maistre Guillaume Cousinot que lors ne pourroit estre prest, attendu que ancor n'a il point d'instruction pour plaider la cause qui est et grande et grosse, et que requiert à parler audit conte, il s'est deschargié de la cause.

Jeudi, **XXVJe** jour de juing.

Ce jour, par appoinctement de la Court fait en la presence de maistre Regnault Rabay, conseiller du Roy nostre Sire et executeur du testament de feu messire Guillaume de Dormans, jadiz arcevesque de Sens, de maistre Herbert Camus, procureur de messire Guy Gourle, chevalier, et de madame d'Orgemont, de maistre Jehan de Warry, procureur de maistre Denis de Paillart et de maistre Jehan du Bois, procureur de messire Phelippe de Poitiers et de sa femme, et par commandement fait à moy Jehan Milet, notaire du Roy nostre Sire, cinq seaulx et un signet qui furent jadiz au feu evesque de Beauvais, nommé de Dormans, pesans un marc sept onces et demie, estans en une bourse et **IIJ** seaulx qui furent audit feu arcevesque, pesans un marc **IIJ** onces **V** esterlins, estans en un coffret de cuir fermant seellé du signet de feu messire Pierre d'Orgemont, jadis evesque de Paris, ont esté cassez par Jehan Mignot, orfevre sur le Pont à Paris, prisié le marc six frans **IIII** solz parisis, tout baillié par moy Milet audit Rabay.

Samedi, **XXVIIJe** jour de juin.

Cedit jour, la Court a obtemperé à certainnes lettres presentées par J. de Caillac sur le plaidoié d'après disner de hier, en adnullant l'appel par lui fait, par ce qu'il obtempere à la sentence, et renvoie les parties par devant le seneschal de Limosin ou son lieu tenent au secont jour de septembre prouchain venant, tous despenz reservez en diffinitive.

Mardi, premier jour de juillet.

Sur certain debat d'entre les procureur, conseillers et gouverneurs de la ville de Rouen, d'une part, et Vincent Buffet, à occasion d'une nef qui n'avoit pas esté mise en compaignie françoise, comme l'en proposoit, oye la relation des commissaires, il sera dit que ceulx de Rouen n'averont congié ne despens, et demourra la cause ceans.

Jeudi, **IIJe** jour de juillet.

Le procureur du Roy après débat certain renvoy, requiz par le duc d'Orleans devant son bailli d'Orleans, d'un appel entrejecté ceans par une femme vefve, duquel le mari avoit esté tué audit Orleans à occasion de ce que parloit contre aucuns qui transportoient

le blef de la ville hors pour vendre ou peril et famine du pueple. Au graiphe criminel.

Le siege levé, s'est venu opposer au graiphe le procureur du Roy que je ne reçoive rien sans le oïr en certain procès pendant ceans entre lui pour le Roy et prevosts et jurez de Tournay, à cause de certains imposts, attendu que pieça lesdictes parties avoient mis devers la Court ce qu'avoient volu mettre.

Mardi, **XVe** jour de juillet.

Le seigneur de Saint Severe et maistre Hebert

Camus ont esté donnez curateurs *ad causas*

par la

Court aux enfans de monsr Charles de Lebret,
connestable

de France, et de feu madame de Sully, sa

femme, et ont fait le serment accoustumé, et quant

aux enfans de ladicte dame de l'autre mariage precedent,

revendront les parties juedi prouchain.

Mercredi, **XVJe** jour de juillet.

Cedit jour, *Jacobus Bedocii* a esté

receu en office de

procureur et a fait le serment acoustumé.

Juedi, **XVIJe** jour de juillet.

Avant les plaidoiries au Conseil, maistres Ph. de

Boisgillou et G. Le Clerc, conseillers du Roy ceans, se

sont opposez que nul ne soit receuz en leurs lieux sanz

eulx oïr, pour ce que aucuns dient que le Roy leur a

donné lieux de conseillers et maistres en la Chambre

des Comptes.

Cedit jour, maistre J. Vrien, examinateur de Chastellet,

a mis par devers la Court de son ordonnance

l'inventoire des biens demourez du decès de feu messire

J. Le Mercier, sr de Nouviant.

Samedi, **XXVI**e jour de juillet.

Ce jour, arrests Boschet. Depuiz, pour ce que après lesdiz arrests pronunciez n'estoient que **IX** heures, se sont mis au Conseil lesdiz presidents, maistres G. de Gaudiac (et douze autres conseillers).

Juedi, derrain jour de juillet.

Cedit jour, maistres Guillaume de Villiers et R.

Rabay, ordonnez à soy informer de l'antiquité de maistre J. Le Besgue en office de notaire, au regart des autres notaires, ont relaté qu'il truevent et ont trouvé que maistre Pierre Le Mercier est plus ancien oudit office de notaire que n'est ledit Besgue.

Samedi, **I**e jour d'aoust.

Ce jour, maistres Phelippe de Boisgillou et G. Le Clerc, conseillers du Roy ceans, se sont opposez et opposent que nul ne soit receu ceans en leur lieux sans les oïr.

Mardi, **V**e jour d'aoust.

Maistre J. de Conflans, cleric notaire du Roy nostre Sire, s'oppose que aucune provision ne soit faicte à autre que à lui des bourses de maistre Pierre de Saulx pour certaines causes à declarer.

Mercredi, **XIII**e jour d'aoust.

Cedit jour, a esté monseigneur le Chancellier de France et pluseurs du Grant Conseil ceans pour eslire

ou lieu de maistre Guillaume Le Clerc, conseiller du Roy en la Chambre des Comptes, qui paravant estoit de la Chambre des Enquestes, ou lieu duquel par la plus grant partie desdiz conseillers et Chambres de ceans a esté esleu par scrutine maistre Robert Piedefer, advocat ou Chastellet. Et ou lieu de maistre Phelippe de Boisgillou, conseiller du Roy en ladicte Chambre des Comptes, qui par avant estoit conseiller du Roy clerc en la Grant Chambre, ouquel lieu vient maistre M. du Bos de la Chambre des Enquestes, et en son lieu est ordonné par le Roy, eue la deliberation de son Conseil estant au jour d'ui ceans, maistre Phelippe de Ruilly, licencié en loiz, filz de feu messire Jaques de Ruilly, chevalier et president ceans, en faveur dudit president qui bien avoit servi le Roy.

Mercredi, **IIJe** jour de septembre.

Sur ce que la Court tenoit la main du Roy au temporel de l'abbaye de Maubuisson, qui avoit esté mise puiz une complainte en cas de saisine et de nouvelleté prise et executée à la requeste de dame Luce de Montmorancy,
par avant abbessse dudit lieu, à l'encontre de
dame Katerine d'Estouteville, abbessse à present d'icellui

lieu, et laquelle main icelle Court n'avoit voulu lever jusques à ce qu'elle fust informée d'aucunes choses; sur quoy elle eust envoieé maistre Robert Mauger, president, et maistre Regnaut de Sens, conseiller du Roy nostre Sire ceans, pour faire aux dames dudit lieu certains interrogatoires, au jour d'ui, oye la relation d'iceulx commissaires et tout veu, la Court a levé à plain et lieve la main du Roy mise audit temporel. Cedit jour, par mandement du Roy nostre Sire sont alez maistre R. Mauger, president, le procureur general du Roy et moy à Saint Pol devers icellui Seigneur, qui, en la presence du roy de Navarre, du duc de Bourgoigne, du conte de Nevers et des chancelliers de Guienne et de Bourgoigne, a commendé à nous dessusdiz de recevoir certain accord qui sera présenté et passé en Parlement entre le duc de Breteigne, d'une part, et le duc de Bourgoigne, comme curateur du conte de Pantevre, d'autre part, et a defendu le Roy audit procureur que ne l'empesche aucunement, car c'est pour le proufit mesme du royaume et à eschiver plusieurs inconveniens qui pourroient avenir audit royaume, se ledit accord n'estoit.

Jeudi, **III^e** jour de septembre.

Cedit jour, la Court a receu certain accort d'entre le duc de Breteigne, d'une part, et le conte de Paintevre, d'autre part, par le commendement du Roy fait en sa personne à St Pol à maistre R. Mauger, president, et à son procureur general et à moy, ce qui a esté rapporté à la Court par ledit president, et l'a presenté l'evesque de St Briou, chancelier de Breteigne, procureur du duc, qui l'a consenti pour icellui duc, et maistre Gile Labbat, procureur du duc de Bourgoigne, curateur donné audit conte, d'autre part, l'a consenti, present le procureur du Roy et non contredisant.

Mardi, **IX^e** jour de septembre.

Cedit jour, les ducs de Berry, d'Orleans, de Bourbon

et les conte d'Alençon et d'Armignac ont envoyé
et fait presenter ceans lettres patentes seellées de leurs
seaulx, contenens *sommarie*, que pour
ce que l'onneur
du Roy, sa justice, et l'estat du royaume et de la chose
publique estoient foulez et blechiez, estoient assemblez
et aliez ensemble pour ce venir monstrier au Roy, et
n'est point leur entention d'eulx departir jusques à ce
que ce ayent monstrier au Roy, comme contenu est plus à
plain es dictes lettres que vous trouverrés ou livre des
Ordonnances. Et est assavoir que onques mais l'en ne
vit tel peril, car lesdiz seigneurs estoient ensemble
selon la riviere de Loire en moult merueilleux nombre
et arroy de gens moult notables en armes. Par deçà
se tenoit le duc de Bourgoigne avec le Roy et le Dauphin,
qui, ou nom du Roy, a fait et fait venir gens
d'armes de tous païs sans nombre pour la defense et
honneur dudit seigneur. Et pour ce que le demainne
du Roy, ne les aydes, **XII** deniers pour livre et le
quatriesme
du vin ne suffisoit pas au Roy pour la despense,
car il n'avoit point d'argent, ne n'a accoustumé
d'avoir depuiz longtemps par petit gouvernement, a
fait et fait emprunter de toutes gens et par tout son
royaume, sans distinction, soient moignes, chanoignes
ou clers, bourgeois ou autres, finance importable. Et pour
ce que le Roy avoit fait crier son arrier ban à occasion
des gens d'armes qui venoient par deçà, comme
l'en disoit, du cousté desdiz seigneurs de Berry, d'Orleans,
etc., pour resister à eulx, se besoin estoit,
toutes manieres de gens, fussent povres, fussent riches,

nobles ou non nobles anobliz, ou à occasion de povres et petis fiefs ou arriere fiefs que tenoient en pluseurs païs, s'efforçoient de venir pour servir le Roy à cause dudit cry, pour la doubte de mesprandre. Et quelx meschiez, quelx perilx, quel honneur, quelx inconveniens, quelx crimes et quelx pechiez sont venus de ce, viennent et venront, *considera* par ce: la cause principal de tout ce que dit est, est defaut de justice *quoad Deum* par les blasphemes horribles qui ont cours en ce royaume, de renier et maugrayer Dieu au premier mot, voire par les plus grans, tant juges que autres garsons et enfans et gens d'eglise, et autres pechiez non dicibles, et aussi par defaut de justice *quoad se et quoad proximum seu subjectos*. Car nos justices, ancor teles quelles, je me doubte, sont *de numero justiciarum*, dont parle le Prophete: *Universe/justitie nostre quasi pannus menstruate ...*. Dieu par sa pitié weille avoir pitié et mercy de nous et nous donner cognoissance de nos fautes et orgueil, et mauvaistié. Au fort, *fiat sua benigna voluntas, et non nostra*. *Amen*.

Et fu envoie au Chancelier pour avoir son adviz se l'en plaideroit la cause des dames Jehanne et Mathe d'Armignach à l'encontre du conte d'Armignac, lequel Chancelier dist que c'estoit l'entention du Roy que ladicte cause fust plaidée, et que aussi la Court avoit sur ce mandement patent, et pour ce fu plaidoïée icelle cause, comme s'ensuit:

Samedi, **XIIJe** jour de septembre.

Cedit jour, ont esté faictes les distributions des commissions de ce Parlement passé à Saint Eloy par messeigneurs messire P. Boschet, me R. Mauger, S. de Nanterre, presidens de Parlement, et me J. de S. Verain et R. Waguet, president en la Chambre des Enquestes, absent messire H. de Marle, premier president, qui estoit en ambaxade en Arragon.

Mardi, **XVIJe** jour de septembre.

Au jour d'ui, pour ce que messire P. Boschet, president, se plaignoit de ce que l'en lui avoit donné une commission d'entre le sr de Partenay, d'une part, et plusieurs singuliers dudit Partenay, qui n'estoit pas de ceste année passée appointée, mais de l'autre, et avoit esté par erreur du clerc qui avoit extrait les faiz contraires, messrs les presidens lui ont accordé la commission

qui sera entre le sr de Rochechouart, d'une part, et le sieur de Partenay, d'autre part, dont les memoires sont par devers maistre J. de Vitri, sur lesquelles les parties ne pourront estre delivrées sans fais quant vendra au jugement, comme l'en espere et croit.

Cedit jour, pour ce que le Roy nostre Sire, accompaignié de moult de princes, barons et chevaliers et grant nombre de gens d'armes, estoit venu loger au Palaiz, et pour les gens d'armes estoient prins les hostelx tant de la Cité que du cloistre de Paris, et par tout oultre les pons par devers la place Maubert sans distinction, hors les seigneurs de ceans pour lesquels a esté ordonné, comme a dit en la Chambre le prevost de Paris, que en leurs hostelx l'en ne se logera pas, et que en telx cas aventure seroit que les chambellans du Roy nostre dit Seigneur ne preissent les tournelles de ceans, esquelles a procès sans nombre, qui seroient en aventure d'estre embroillez, fouillez et adirez et perdus, qui seroit dammage inestimable à tous de quelque estat que ce soit de ce royaume, j'ay fait murer l'uiz de ma Tournelle, afin que l'en ne y entre, car
in

armis vix potest vigere ratio.

Samedi, **XXe** jour de septembre.

A esté ordené par les presidens et autres conseillers

du Roy estans en la Chambre de Parlement que, par main souveraine et sans prejudice de certain procès pendant en la Court dudit Parlement entre le procureur du Roy nostre Sire, d'une part, et le Grant Pannetier de France, d'autre part, pour cause de la visitation du pain, maistres Jehan de Fontenay et Aubert de la Porte, examineurs ou Chastelet de Paris, facent la visitation du pain en la ville de Paris, tant de celui qui est et sera amené par marchans forains, comme de celui qui est et sera labouré par les boulangiers de Paris, et ycelui pain visité, comme il appartient, le facent delivrer à ceulx qui en auront le soing pour pris convenable, en regard à la valeur du blé et de la farine, et aux coustemens necessaires faiz par lesdiz marchans forains et boulangiers pour amener et faire ledit pain, non obstans appellations et oppositions faictes et à faire quelzconques.

Vendredi, [XXVJe](#) jour de septembre.

Trespasa me Robert Waguét, president en la Chambre des Enquestes, et environ cedit jour trespasèrent trois autres des seigneurs de ceans.

Ledit [XXVJe](#) jour, J. de Villette, escuier, commiz à gouverner de par le Roy le chastel de Conflans, contentieus

entre le connestable, d'une part, et les enfans de la Tremoille, d'autre part, et a fait le serment que à nulle desdictes parties n'avera plus de faveur que à

l'autre, et à nul ne le rendra, sinon par le commendement ou mandement de la Court de ceans, qui lui taxera ses gages telx que de raison.

Dimanche, **XXVIIIe** jour.

Cedit jour, fu commiz à faire l'inventoire des biens de feu maistre Robert Waguet, president es Enquestes.

Juedi, **IJe** jour d'octobre.

Henry Crossu, familier de l'admiral de la mer, m'a affermé en sa loyauté que de certeines cautions et inventoire de biens que lui avoient fait demander Guillaume Moens et J. Daukereszonne, maistres de **IJe** vaisseaulx de mer nommez estutes, Donch de Polich et Albin de Welle, marchans de Coloigne et de la hanse d'Alemaigne, et lesquelz biens et cautions disoient à eulx avoir esté ostez sur mer, rien n'en

avoit, comme plus à plain est contenu en certaine relation de Geffroy de Molins, sergent.

Mercredi, **XIJe** jour de novembre mil **CCCCX**.

Messire Arnault de Corbye, chevalier et chancelier de France, tint le Parlement, presens maistres R. Mauger et S. de Nanterre, presidents, absens messire H. de Marle, premier president, ambaxateur en Arragon, et messire P. Boschet empeschié, et aussy les archevesques de Pise et messire Nycolas de Robertis, chevalier, ambaxiateurs du Pape en France, de Reins, de Bourges, les evesques de Xainctes et de Tournay, l'abbé de Saint-Deniz, maistre Eustace de l'Aitre, president

en la Chambre des Comptes, J. de Nourry, J.

de Corbye, J. de Marle, H. de Savoisy, R. Le Sage, maistres des Requestes de l'Ostel du Roy nostre Sire,

N. d'Orgemont, Ph. de Boisgillou, maistres en la Chambre des Comptes, et les maistres des deuz

Chambres de ceans et des Requestes du Palaiz, jusques aux nombre de **LVI**, et les registreux et notaires de la Court...

La Court, pour les grans perilz qui sont de present et ont ja esté par toutes les marches et païz de ce roiaume dont l'en n'ose venir à Paris, tant pour gens d'armes proprement appelez larrons et pillars, que pour brigans et compaignes qui se sont miz sus pour rencontrer et piller lesdiz larrons, et autres larrons, espieurs de chemins qui de present regnent et ont cours, a continué les presentations de cy à lundi, qui vient exclusivement, quant à Vermendoiz, combien que non est *verissimile* que nul ne pourra ne

n'osera venir dedans ledit jour ne longtemps après,
 car l'en ne lit pas es ystoires que, hors les feuz boutez
 ou temps passé publiquement par les ennemis de ce
 royaume, l'en veist onques mais faire à ce royaume
 tel dammage, comme ont fait Brabançons, Lorreins,
 Bregoignons, Armignagues, Brabans et autres de toutes
 pars de ce royaume.

Messire Arnault de Corbye, chevalier, presens
 l'arcevesque

de Reins, de Pise, legat du pape, de Bourges,
 messire Nycolas de Robertis, legat du Pape, plusieurs
 evesques et les seigneurs du Conseil du Roy, tant des
 Requestes de l'Ostel du Roy nostre Sire que des
 Comptes, que des Chambres de ceans, tint le Parlement,
 et furent leues les ordonnances, et firent les sermens
 ceulx qui l'ont acoustumé de faire et par la
 coustume autrefois gardée, comme plus à plain est
 contenu ou livre du Conseil. Et fu ordonné, ce fait,
 que l'en recevroit les presentations du bailliage de
 Vermendoiz decy à dimenche *inclusive*,
 et si pourverroit

l'en en oultre selon les exigences du cas, pour ce
 que *verissimile est* que les parties ne
 pourront venir
 à temps pour eulx presenter et poursuivre leurs causes
 pour l'incursion des gens d'armes de Lorreinne,
 d'Alemaigne,
 de Bourgoigne, de Flandres, de Picardie, de
 Champaigne, de Braban, qui ont esté, passé a **X**
 sepmainnes,
 tant à Paris que dehors du costé de delà la
 riviere de Seine, oultre le Grant Pont, et desquelx
 plusieurs et quasi sans nombre estoient logés par tout
 en ceste cité, tant entre les **IJ** pons pour estre entour

le Roy, le duc de Guienne, dauphin de Vienne, le roy

de Navarre et le duc de Bourgoigne, qui estoient logez en ce palaiz, et de là le Pont Nuef jusques aux portes qui longuement furent tenues closes, hors une ou **IJ**, que aussy pour les Bretons, Armignagues, Berruiers, Aulnoiz, Borbonnoiz, Alençonnoiz, Valoisiens et plusieurs sans nombre, qui se tenoient de là la riviere de Seine oultre Paris pour accompagner les ducs de Berry, oncle du Roy, le duc d'Orleans, nepveu et gendre du Roy, de sa premiere femme, le duc de Bourbon, cousin germain d'icellui Seigneur, le conte d'Alençon, le conte d'Armignac, et le seigneur d'Alebret, conestable de France, qui estoient logez tant à Vincestre, Vanves, Icy, Vitry, que ailleurs entour; lesquelx, tant deçà que delà, ont fait tous les mauix que l'en puet faire, hors bouter feulx publiquement, et à venir icy et à retourner ont destruis les païz de France, et par especial entour Paris jusques aux portes, et par especial Armignagues, Bretons, Brebançons, Lorreins et Bourgoignons ont tout pillé et emmené ce que ont peu emmener, et rançonné en grant deshonneur du Roy et du royaume. C'est tout siecle.

Juedi, **XIIJe** jour de novembre.

Cedit jour, vint monseigneur le Chancellier en la Court pour faire election de **V** lieuz qui vacoient en la Chambre des Enquestes, et aussy pour eslire president

en ladicte Chambre des Enquestes ou lieu de maistre Robert Wagnet, et n'a pas esté parfaite l'election.

Vendredi, **XIII**e jour de novembre.

Cedit jour, a esté besoigné en l'election dessus touchée, jusques à **IX** heures, que messeigneurs les presidens a convenu aler au Conseil devers monseigneur le Dauphin.

Samedi, **XV**e jour de novembre.

A conseiller l'arrest d'entre messire Gauchier de Chastillon appellant, d'une part, et le seigneur de Moy, *nomine quo procedit*, et la dame de l'Isle Adam,

d'autre part, *non est conclusum*; car, à **VIII** heures,

a esté la Court occupée jusques à près de **XI** heures de parfaire l'election des **V** lieuz vacans, en l'absence de monseigneur le Chancelier, laquelle election par scrutine a esté faicte devant messeigneurs mes R. Mauger et S. de Nanterre, presidens, moy enregistrant *vota singulorum*.

Samedi, **XXI**e jour de novembre.

Cedit jour, a envoyé ceans le recteur de l'Université de Paris, nommé *Rolandus Ramerii*, une cedula seellée

du seel dudit recteur, contenant ce qui s'ensuit:

Nos Rolandus Ramerii, rector Universitatis magistrorum et
 scolarium Parisius studentium, requirimus per
 juramentum et

sub omni pena omnes magistros dicte Universitatis, ac omnes et singulos in jure canonico vel civili licenciatos dicte Universitatis juratos, cujuscumque status fuerint, quatinus cras de mane, hora octava, compareant in congregatione generali dicte Universitatis in Sancto Bernardo annuente Domino celebranda.

In cujus testimonium sigillum rectorie hinc cedula apposuimus, etc. ./

Par vertu de laquelle un escolier ou bedel a signifié que les jurez de ladicte Université estans ceans fussent à ladicte assemblée. A quoy la Court a respondu que ce n'estoit point la maniere de venir ceans signifier les assemblées, attendu l'estat de la Court qui n'estoit subgete ne jurée que du Roy; mais, s'il avoit aucun ou aucuns singuliers qui eussent serment de l'Université, devoient estre à part requiz d'aler à ladicte assemblée, et non pas en la Court par ladicte maniere, et fu enjoint audit messenger que ce deist audit recteur, et que plus ne feist ainsy, à quoy a dit que l'intention et entendement, quant à la maniere de la Court, estoit l'intention dudit recteur, mais pour brifté avoit esté fait de par ledit recteur par ceste maniere.

Dimanche, [XXIIIe](#) jour de novembre.

Cedit jour, messire Pierre Boschet, president, a surrogé en son lieu en la commission d'entre la contesse de Tonnerre et le sr de Partenay maistre André Marchant, conseiller du Roy, et a volu et consenti maistre J. Moreau, procureur dudit sr de Partenay, que ledit Marchant procede oudit lieu avec maistre J. de Vitry et s'opposa que maistre Thibaut de Vitry ne

autre n'y procede sans le oir.

Lundi, **XXIII^e** jour de novembre.

L'Université de Paris, par la bouche d'un maistre en theologie, a requiz que, comme ja pieça, un arrest eust esté ceans donné à la requeste du Roy et d'icelle Université sur l'exaction de plusieurs pecunes qu'estoit en Court de Romme ou prejudice du Roy, du royaume et de la chose publique, et en l'empeschement de l'union qui estoit à pourchacer pour lors, et icellui arrest eust esté confirmé par le Roy et en eust fait ordonnance comme loy, et tout ce fu approuvé par l'Eglise, et neantmoins les gens du pape Jehan **XXIII^e**, qui à present est, a envoyé certains legas de Court de Romme en ce royaume pour requerir lesdictes pecunes, non obstant lesdiz arrest et ordonnance, car ilz dient, de par le Pape, que icelles pecunes sont dehues de droit divin, naturel et positif, et se ainsy estoit, la Court et le Roy averoient erré contre la foy, pour quoy sur ce a esté faite assemblée general et moult solennel entreulx, en laquelle avoit esté conclut, *nemine contradicente*, que l'Université tenist et gardast et defendist de son pouvoir que lesdiz arrest et loy ne fussent enfrainctes, et que à la Court fust faite la requeste qui s'ensuit: c'est assavoir, qu'il pleust à la Court de garder et defendre leurdict arrest et loy, et soy opposer avec eulx, et aussy estre avec eulx par aucuns de la Court, deputez de toute la Court, où et quant l'en demenera et parlera de ceste matiere, et ont requiz le procureur du Roy

general qu'il se opposast à ce avec eulx, lequel a dit qu'il fera tousjours ce qu'il lui apartendra à cause de son office à ce que lui sera ordonné et commendé de par la Court. Et oultre ont dit ceulx de l'Université que, samedi derrien passé, s'il n'eussent esté au Conseil du Roy pour soy opposer à la requeste desdiz legas du Pape, leur eust esté octroyé au Grant Conseil ce que requeroient. Si a respondu la Court que en ce et autrement ilz feront, pour l'onneur du Roy et du royaume garder et pour le bien aussy du royaume et pour justice, ce qu'il apartendra, et du mieux qu'elle pourra. Et pour ce que lesdiz legas requeroient à faire une requeste à la Court à aucun jour que pourront venir; la Court fera savoir auxdiz de l'Université le jour ou l'eure, afin que se à ladicte requeste faire wellent estre, qu'il y soient, dont ilz ont mercié la Court, et sur ce se sont parti.

Puiz a esté plaidoiée une cause criminelle du ravissement d'une fille d'Anjou.

Mercredi, [XXVJe](#) jour de novembre.

Cedit jour, l'arcevesque de Pise, messire Nycolas de Robertis, chevalier, et messire Geffroy de Peyrusse, docteur et conseiller du Roy nostre Sire,

ambaxiateurs du Pape, sont venus ceans en la Chambre entre **VII** et **VIII** heures au matin, estans les seigneurs de la Chambre des Enquestes en la Grant Chambre, et ont presenté à la Court unes bulles closes contenens en effect salut et benediction apostolique, narration comment ledit Saint Pere avoit esté esleu ou Papat, son entention et ferveur qu'il avoit à poursuivre la paix et union de l'universal Eglise, en quoy avoit besoin d'aydes, et sa requeste que la Court voulsist tousjours ayder à l'Eglise. Et icelle bulle par moy leue au Conseil, maistre Geffroy de Peyrusse dessusdit, une petite prefation en latin premise, print pour theme:*Talis enim decebat ut nobis esset pontifex. Hebre. VIIe originaliter, in quibus duo tangi dicebat, altum ipsius preeminentie fastigium, cum dicitur, talis pontifex, secundo, sue legationis injunctum negocium, cum dicitur, nobis decebat, ut obediremus, supple. In primo membro ostendit Summi Pontificis ingressum, progressum et congressum; ingressum, per suam sinceram et sanctam, nemine contradicente, electionem, cujus seriem enarravit; progressum ostendit per suas virtutes mirabiles et ipsius strenua facta, tam cum Rege Ludovico Sicilie, consanguineum Regis, quem multipliciter juit ac magnifice recepit; progressum vero ostendit per intentionem quam habet ad pacem et unionem, tam inter Grecos et Latinos quàm aliàs faciendam et procurandam, quàm etiam inter Francos et Anglos inter se, pacem et pacis condiciones multipliciter commendando et extollendo, de consilio generali etiam celebrando in*

termino in Consilio Pisano assignato, de statu Ecclesie etiam tam in capite quam in membris reformando, in premissis diu insistendo punctis. Demum quoad secundum principale scilicet negotii eis injuncti, Curiam exhortando ut eidem Summo Pontifici Ecclesieque assistat, ut promptius que Summus Pontifex intendit ad effectum perducantur prosperum, ut tandem a Deo domini Curie, regii consilarii, honorem et gloriam mereantur; postmodum causam, quam in Curia habebat cardinalis de Flisco pro quodam prioratu, recommendavit.

Aux quelles choses le president pour la Court remercia le Pape et iceulx legas, et offri la Court aux dictes requestes en ce qu'elle puet, puiz se partirent icelx legas.

Mercredi, **IIJe** jour de décembre.

Sur la requeste faicte par le procureur du Roy que aucun fu commiz à visiter le procès du Chastellet ou lieu de me Robert Piedefer, par avant conseiller du Roy ou dit Chastellet, et maintenant conseiller d'icellui Seigneur ceans, duquel office estoit procès et contens entre plusieurs, appointé est que, pendent le procès et *quousque* sera decidé dudit procès, maistre Pierre

de Monstiers, par provision, visitera lesdiz procès de Chastellet et conseillera en percevant *pro rata temporis* les gages audit office appartenens.

Juedi, **XJe** jour de decembre.

Cedit jour, les executeurs du testament et derrienne volenté de feu messire J. Tabary, jadis evesque de Therouenne, ont volu, wellent et consentent que de la somme de **VIic** escus, qui estoient en depos par devers la Court pour estre emploiez et convertiz en rentes et revenues au proufit de l'evesque qui à present est et de ses successeurs, pour cause d'un admortissement fait par ledit evesque, **Vc XXVII** escus et **XIIII** solz parisis en

soient baillez audit monsr l'evesque ou son procureur, pour estre converti en l'achat d'un fief, ainsy qu'il se comporte, tant en cens, rentes, boiz, dismes, terrages, revenues, drois, possessions et autres choses achetez de Sohier de L'Isle, escuier, et de sa femme.

Vendredi, **XIJe** jour de decembre.

Cedit jour, ont esté receuz ceans maistre Guillaume de Villiers, president en la Chambre des Enquestes ou lieu de maistre R. Waguet, nagueres trespasé, et maistre Jaques Branlart, *dyocesis Cathalaunensis*, Gerart Perriere, *Matisconensis*, Clement de Fauquenbergue, *Picardus*, Pierre Johan, *Parisiensis*, es lieuz

de **IIII** des seigneurs vacans en ladicte Chambre, et maistre Pierre Le Jay, brioiz, né de Resbaiz en Brie, ou lieu de maistre Simon Gudin, vacant aux Requestes du Palaiz, precedent election solennelment faicte ceans par monseigneur le Chancellier des ores à **IIJ** sepmaines

et les seigneurs du Conseil du Roy ceans et du Grant Conseil, et ont fait le serment acoustumé.

Samedi, **XIIJe** jour de decembre.

Hier furent ceans receu par election solennelment faicte ores à **IIJ** sepmaines par le Chancellier et les seigneurs de ceans et du Grant Conseil maistre Guillaume de Villiers en president des Enquestes ou lieu de feu maistre Robert Waguet, maistre Jaques Branlart, champenoiz, Gerart Perriere, masconnois ou lionnoiz, Clemens de Fauquanbergue, picart, Pierre Johan, françoiz, né de Paris, es lieu de **IIII** des seigneurs vacans en la Chambre des Enquestes, et maistre Pierre Le Jay, brioiz, né de Resbaiz en Brie, ou lieu de maistre Simon Gudin, au Requestes du Palaiz, et ont esté prins en ladicte Chambre des Enquestes *in ordine/prius aut posterius*, selon le nombre des voiz qu'il

avoient eu en ladicte election. Et a esté retardée la reception depuiz l'election faicte, par ce que monseigneur le Chancellier ne venoit pas ceans publier le scrutine, et aussy pour ce que aucuns nobles se doloient de ce que l'en n'avoit esleu aucun noble homme entre lesdiz esleuz, disans que selon les ordonnances royaulx l'en doit pranre des nobles devant tous autres,*supple qui sufficientiores aut saltem sufficientes inveniantur, aut saltem quod tales a dominis eligentibus secundum eorum conscientiam cognoscantur*. Et pour ce m'a esté commendé que je alasse au Roy de par la Court, et que je lui deisse le fait de l'election et que aux esleux commendat

à moy faire leurs lettres, ce que j'ay fait; si m'a commendé le Roy des hier en son lit, entre **X** et

XJ heures devient disner, les lettres à signer. Et a juré maistre Clement de Fauquanbergue dessusdit, qui par avant visitoit les lettres à la Chancellerie, qu'il servira et desservira ceans son office continuellement, car autrement

n'eust esté esleu, et soubz ceste condition l'ont esleu les seigneurs de ceans.

Mardi, **XVIe** jour de decembre.

Cedit jour, certainne obligation en laquelle estoient obligiez maistres Tiebaut Tiessart et J. de la Marche, conseillers ceans, et aussi maistre J. de Veilly, en la somme de **Vc** escus envers les executeurs du feu evesque de Therouanne et à la Court, pour certain depost qui avoit esté prins ceans par l'auctorité de la Court et envoyé à messire Jaques de Ruilly, qui tenoit siege à Murat pieça pour l'execution d'un arrest de ceans, a esté rendue du consentement desdiz executeurs auxdiz obligiez, pour ce que de ladicte somme ont fait satisfaction.

Samedi, **XXe** jour de decembre.

Cedit jour, maistre Pierre Buffiere s'est opposé et oppose, pour et ou nom de maistre J. Coppot, à ce que nul autre que lui ne soit receu en l'office de juge es terres reservées par le Roy nostre Sire en la senechaucie de Limosin.

Mardi, **XXXe** jour de decembre.

La Court, oye la relation des commissaires à ce deputez, a ordonné que la somme de **XXXIJ** livres tournois soit baillée au capitaine du chastel de Confflans sur son salaire sur les fruis et revenues dudit chastel et chastellenie qui estoient en la main du Roy, et se fera la lettre de la date du **XXIIJe** de ce moiz.